

1
T R A I T T E
D E S C O N C I L E S
E T D E L A V R A Y E
E G L I S E.

Nouvellement traduit de Latin en François.



qui arrouse : mais Dieu qui

Celuy qui planten'est rien, ne celuy




donne accroissement. 1. Corinth. 3.

Chez Nicolas Barbier, & Thomas Courteau.

M. D. L V I I.

THE COLLEGE



3

A TRESPVISSANT

& tresuertueux Prince & Seigneur, Christian, Roy de Danemarch, de Noruege, de Sclauie & Gottie, Duc de Schlesuicch, Holfatie, Stormar & Ditmarschen, Conte d'Oldenbourg & Dalmenhorst, &c.

ROY trespuissant, mon Seigneur & protecteur tresdebõnaire, il y a desia tāt d'annees depuis le temps que M. Martin Luther docteur commença a se mettre en train, q̃ la cour & Eglise Romaine rēplie de toutes sortes de meschātez, quasi l'accuse & blasme soy-mesme, & dit qu'il n'est pas possible de souffrir so' le ciel vne si estrange auarice, tāt de forfaits amassez les vns sur les autres, & vne turpitude si vaine. Es cours des Roys & Princes il y a eu tousiours des propos semez, & grādes complaints espāchees: qu'es Synodes particuliers on y procedoit trop laschement, qu'on ne pourroit pouruoir aux affaires publiques sans vn Cōcile general, qu'il n'y auoit point

d'autres remedes pour guerir ces maladies. Il se falloit dōc haster, & faire qu'il y eut vn Concile libre & Chrestien assemble, auquel aussi il y eut gens scauans appelez. Et vne telle cogitatio plaisante, ou plustost ce songe d'or trauaille aujourd'huy les esprits de beaucoup de gēs: ascauoir, que si on public & celebre vn Concile general, tout se portera mieux, nous iouirons d'vne grāde paix & felicitē, toutes ordures pourront estre facilement repurgees & ostees du milieu de l'Eglise. Mais touchant ces choses & la publication du Concile, M. Martin Luther docteur, ha bien eu vne autre opiniō. Car en cest endroit il s'accorde pour la pluspart avec Gregoire Nazianzenien, qui estoit vn personnage fort scauant & grād amateur de la verite: lequel dit, que les discords n'ont poit este ostez entre les Euesques, ains plustost augmētez apres les synodes ou Conciles: que depuis les enuies & les dissensions ont este plus pernicieufemēt allumees: d'autant que laissant derriere la pureté de la parole de Dieu, ils cerchoyēt leur gloire propre par vne rage d'ambition. Dequoy plusieurs bons & scauans personnages se sont pleints mesme iusques a nostre temps: ascauoir, de plusieurs Conciles & synodes, où il y auoit grans nōbres d'Euesques assemblez.

D'auantage

D'auantage M. Martin Luther docteur en ce traitté qu'il a fait des Conciles, s'esbahit fort que l'Empereur, les Rois, les Principautez & puiffance apres tât de fortes de tergiuerfatiôs & delais du Pape, ont encore les yeux bandez pour ne voir point, combien ces cogitations font friuoles & du tout vaines & inutiles : ascauoir, qu'on puisse obtenir du Pape & de ses Cardinaux vn Concile Chrestien & libre. Car si le Pape & les charnels Cardinaux se fussent môstrez iusques a present gouuerneurs fideles en l'Eglise : c'est a dire, s'ils se fussêt efforcez a cōseruer, maintenir & defendre la pure doctrine sclo l'institution de Iesus Christ & les ordonnances des Apostres, parauecture ne refuseroyēt-ils pas ainsi obstineement a l'Empereur & aux Rois vn Concile Chrestien & libre, veu que tant de combats fascheux & tant de dissensions aigres sont tous les iours suscitees en tant d'Eglises de tant de royaumes, & ce a cause de la religion. Et encore moins y mesleroyent-ils des fraudes & trôperies, & autre seblable leuain Pharisaique. Mais d'autant que peu de gouuerneurs fideles se sont trouuez, & qu'ils tremblent de peur, sentans bien (comme dit Isaie) qu'ils sont compagnons des larrôs & brigans, & qu'eux-mesmes (comme dit Iesus Christ) sont brigans

& larrons, & selon la complainte de saint Estienne sont homicides, qui ont trahi la verite, & tousiours resisté d'une façon furieuse a la verite cogneuë & au S. Esprit: ils souffriront plustost d'estre mis en pieces en la plus grande place de Rome, & tirez a quatre chevaux, que de consentir que iamais il y ait vn Concile Chrestien & libre, auquel gens de bien & scauans soyét appelez. On trouue par escrits des tesmoignages authentiques de Iesus Christ & de ses Apostres touchant la reuelation de la Parolle & de la verite eternelle de Dieu: comme il y a cestuy-ci entre les autres, La lumiere est venue au monde, & les hommes ont plus aimé les tenebres que la lumiere. Item, Celuy qui fait mal, hait la lumiere, & ne veut amener ses œuures en lumiere. Il y a desia long temps que ceste sentence de Christ est accôplie en la personne du Pape & des faux euesques, & en ceste ville orgueilleuse & auenglee de Rome. Pourra-on d'oc iamais croire ou esperer, que ceste Rome tant corrompue (laquelle confesse ouuertement, qu'en ceste ville-la on n'estime nullement qu'il y ait autre peché q' n'auoir point d'argēt) permette avec to' ses beaux faits & entreprises, q' par le moyen de quelque Cōcile il y ait reformatiō & amēde mēt de vie, ou correctiō des erreurs? ou que
elle

elle souffre d'estre tiree de ses tenebres pour
estre amenee a lumiere? Ils serõt biē sēblant
(cōme ils sont impudēs hypocrites) de pu-
blier vn Concile, afin qu'ils esblouissent les
yeux de l'Empereur & des Rois: cōme par ci
deuant ils ont fait par ceste sottē bulle, vou-
lās dōner quelq̃ belle entree a leur Concile
de Rome, cōmençās par ceste belle & ioyeu-
se preface, Esioy toy Ierusalem: combien
que cependant ils n'eussent rien moins en
leurs cœurs q̃ de se conioindre avec la vraye
Eglise ou avec Ierusalem s'esioissant. Il y a
vn liure de M. Philippes Melancthon, plein
de grande doctrine, auquel il se plaint, que
dēs la premiere origine de la Papaute, qui
est vne domination tyrannique & barbare,
il n'y a eu en icelle nulle cognoissance de la
doctrine celeste & salutaire. Le tiltre de ce
liure est tel, Les causes pour lesquelles les
hōmes scauans & craignans Dieu ne peuent
consentir au Concile de Trente, ou aux de-
terminatiōs qui y serõt arrestees. En toutes
les gloses puates des Canonistes on ne trou-
uera point vne telle dispute que ceste-ci, en
laquelle il est biē facile de voir cōbien cela
est veritable & certain, que le Pape ne souf-
frira iamais qu'on publie vn Cōcile libre &
sainct, sinon que premieremēt il ait cōsultē
avec ses Cardinaux, & scache biē que toutes

les menées seront desia diligēment faites & par bōs aduis, & qu'il ait tellemēt basti par deffous terre & par finesse couuertes, & tellement dressé cest affaire en toute l'Eglise, qu'il n'y ait ne grās ne petits qu'il ne tienne estroittemēt obligez de ne chāger riē de ceste tāt belle & tāt iolie forme d'Eglise, qui est maintenāt en la resplādissāte ville de Rome, & par toute la cōtree profane & Epicuriēne de la Chrestieſte seduite: & aussi q̄ premieremēt il n'ait gēs apostez par toutes les terres & royaumes, qui luy serōt obligez par fermēt, qu'ils ne chāgerōt poīt les idolatries horribles & les ceremonies superstitieuses de l'Eglise Romaine, ains plustost les augmēteront, & combattront de toute leur force a ce que telles impietez soyēt gardees iusqu'a plusieurs anneés apres: voire qu'ils ne changerōt rien de toutes leurs obseruatiōs & seruices Diuins, pleins d'impiete & d'idolatrie. Quel besoing est-il d'vser yci de grādes persuasions de rhetorique, ou de longues parolles? Ce presēt liure de M. Martin Luther docteur, que nous auons en main, rend assez suffisant tesmoignage, quels sont les purs & saincts Cōciles, qui ont este sainctemēt celebrez en l'Eglise par le S. Esprit selon la verite des saintes Escritures, qui n'ont point tasché a forger de nouveaux articles de foy,

ains

ains a conseruer & maintenir les anciens. Tous les autres Conciles qui ont este tenus depuis le premier Concile des Apostres, ont eu des erreurs intolerables: & il y en a eu plusieurs qui ont approuué ce villain article, que la Messe estoit vn sacrifice pour les vifs & les morts, itē l'inuocatiō des saincts, item le celibat des prestres & des moynes. Et il y a bien peu de Conciles, qui n'ayent loué & exalté la virginite iusques au ciel, & qui n'ayent mesprisé & villenié le mariage iusqu'au bout. De nostre temps on a imprimé deux gros tomes en la ville de Cologne, ou les moynes ont bien trauaillé. En ces tomes il y a plusieurs decretz fots & tyranniques: voire tels que si selō ces bobulaires de Cōciles il falloit dōner la decisiō es articles de grāde importāce, il n'y auroit riē plus miserable que l'Eglise. Ainsi donc M. Luther docteur, iuge & prononce fort bien en cest endroit: qu'es principaux articles de la doctrine du Fils de Dieu, il n'est poit besoing d'auoir des Conciles ne synodes de grād appareil: il n'est point besoing que les hōmes dōnent leur iugemēt ou sentence. Car la doctrine de Christ seule est pure vraye & entiere, biē fondee es escrits des Prophetes & Apostres, touchāt la iustice de la foy, la remisīō gratuite des pechez: & est biē authorizee

de fermes tesmoignages des sainctes Escriptures. Le Fils de Dieu luy-mesme nostre Seigneur Iesus appelle la doctrine ou cōfessiō de l'Eglise inuincible, & vne pierre forte & ferme, contre laquelle les portes d'enfer ne peuēt riē. Il y a dauātage, qu'il n'y a epistre de S. Paul tāt petite ou brieue soit-elle, cōme l'epist. a Tite, ou autre semblable, en laquelle tout le corps de la doctrine ne soit cōpris entierement. Outreplus les principaux mots, cōme Loy, Peché, Grace, Remissiō des pechez, Iustification, esquels cōsiste toute la force & vertu de la doctrine Chrestienne, pourroyent estre a peu pres cōpris: tellemēt que tout homme craignant Dieu, qui se voudra a bon escient enquerir de la verite selon la vraye intelligence, pourra facilement entendre ce que S. Paul veut dire. Vn chacun fidele donc confessera facilement, qu'il y a des tesmoignages de la verite infallible de Dieu, tāt bien scelez & cōfermez es escrits, actes & sermons tant des Prophetes que des Apostres, pour monstrier ce qui est vray ou faux, qu'il n'est point requis de recourir aux decrets & ordonnāces des Conciles anciens. Nous n'attendons doncques ou cerchons vn Concile: mais nous prions que les oraisons de l'Eglise soyent plus ardentes, a ce qu'vn chacū lise beaucoup plus diligēment

les escrits des Prophetes & Apostres. Car les Conciles ne doyuent seruir a autre fin, sinon qu'ils conseruent & maintiennent les articles de foy, & les tressages decrets du S. Esprit, qui ont este faits & ordonnez deuant tous les Conciles. On trouue par escrit es histoires, que depuis Chilian premier Euesque de Herbipoli il y a eu soixâte quatre Euesques de ceste ville-laiusqu'a Melchior, qui est maintenant Euesque, qui est vn vieillard honorable entre beaucoup d'autres, & lequel a este chancelier de trois Empereurs. Et quant aux Papes, depuis Phocas qui a introduit les corruptions, comme les historiens en rendent tesmoignage, il y a eu vn peu plus ou moins de cēt septante Papes. Si donc il y eut eu trois ou quatre Apollo puissans en doctrine, & semblables au docteur Luther en vn si grand nombre de Papes, cela eut beaucoup mieux vallu pour l'Eglise, que si sous vn chacun il y eut eu aucuns Conciles celebres. C'est vne coustume bien ancienne & receuë, que les Papes, les Cardinaux, Euesques & autres Prelats chantent vne messe du saint Esprit auant que de commencer le Concile. Pour bien cōmencer, ils mettēt en auant vne execrable idolatrie cōtre le saint Esprit. Pour ceste raisō les enfans mesmes s'en sont mo-

qu'ez souuentefois. Car en ce cruel & meurtrier Concile de Constance, auquel Iehan Hus fut bruslé, vn ieune garçon attacha vn billet aux portes du grand temple, & disoit on que c'estoit vn escollier. Voyci ce qui y estoit contenu, C'est folie de crier ainsi, & de chanter ce bel hymne, Vien, ô saint Esprit, & repeter cela par plusieurs fois. Car le saint Esprit n'a pas loisir maintenant de venir ou de descendre : d'autant que iamais il n'a este plus occupé a ouir les prieres des pources affligez, cependant que Iehan Hus ploure a chaudes larmes en la prison. Celuy qui lira vn peu diligemment, & considerera de pres les decrets des Conciles, il trouuera de quel orgueil ils ont arresté leurs deliberations sur des articles de petite importance, tout ainsi que les Pharisiens faisoient leurs deliberations touchant le lauemēt des mains deuant le repas. Au Concile de Gangres & quelques autres il y eut vne question proposee : ascauoir, si on pouuoit vser de calices d'estain ou de laiton. Et touteffois tels Conciles estoient de grande authorite. Mais touchant le celibat abominable des prestres, la Messe, les superstitions infinies des moynes, les pelerinages les idolatries diuerses presētees a la vierge Marie, on n'en fait aucune mention aux Conciles pour censurer diligem-

diligem^mēt ces choses. On porte par ci par là de fors liures de moynes pl^r friuoles que les contes de vieilles. L'vn est de l'enfance de Iesus Christ, l'autre de la conformite de la vie de Christ & de saint François, l'autre de la reuelatiō Cherubique & Seraphique, l'autre des stigmates de saint François: des quels ils ont forgé des mensonges infinis, l'autre des signes & miracles par lesquels ils ont voulu confermer ce qu'ils appellent le Rosier de la vierge Marie. Pour arracher tels & si execrables erreurs du milieu de l'Eglise, possible est que quelques moyens synodes y seruiroyēt de quelque chose. Mais les Euesques faisans tauerne de la parole de Dieu, n'ont point tasché de rien reformer en ceste assemblee, estimās que c'estoit vne fort vilaine impiete. Et maintenant mesme le Pape ne peut estre amené iusques a ce poinct, qu'il cōfesse que la marchādise qu'il fait de ses indulgences, est vne chose detestable. Il y a plusieurs erreurs manifestes, qui sont villaines tasches & ordures en l'Eglise, lesquels l'Eglise Romaine deffend plus obstineemēt que ne feroient les peuples barbares. Car pourroit-on excogiter chose plus villaine que ceste-ci : a scauoir, que le Pape s'est vsurpé vn tiltre prodigieux d'Euesque general de toute l'Eglise? Saict

Paul dit que c'est vne chose haute & fort difficile, d'auoir la charge & de bien gouverner vne seule Eglise. On demande, s'il y a quelqu'un trouué fidele, dit-il. Cōtre telles & autres meschantes ordonnances des Conciles on deuoit ouir ces horribles foudres. Quiconque s'osera nommer Euesque general de beaucoup d'Eglises, qu'il soit en execration. Vous avez donc bien fait & sagement, Sire, qu'es terres de vostre noble royaume de Dannemarch au lieu de quelques Euesques pompeux & braues, ne pourchassans que des richesses caduques & vaine gloire, vous avez substitué des personnages scauans & craignans Dieu, puissans es saintes Escritures. Car comme les ordōnances & Decrets des Conciles en rendent tesmoignage, le Pape iusques a maintenant s'est attribué d'une façon orgueilleuse la puissance souueraine sur les Conciles. Par cela il y a eu ses moynes loagers & autres tels supposts, & les a obligez par serment, a ce que tous les Decrets salutaires fussent exposez a moquerie, ou renuersez par ces hurlemens furieux: ascauoir, que le Pape est par dessus le Concile. Ces bestes profanes de Cardinaux ont aussi toutes choses dressees a ce but, que l'autorite du Pape fut establie, & du tout confermee, &

que

que par le nombre des voix la verite fut finemēt cachee ou du tout enseuelie, & la pure doctrine fut totalement opprimee. Mais l'autorite des Conciles ne consiste point au grand nōbre des Euesques cerchans leur proufit, ni es ordonnances enfilees de parolles : mais plustost ils seront bien autorizez quand ils consentiront aux escrits des Prophetes & Apostres. Voyci donc qui sont les Conciles dignes de louange, & qui ont meritē d'estre reputez Chrestiens: ascauoir, ceux qui se seruent de gens qui ont vrayement la crainte de Dieu, & sont scauans en la langue Hebraique, Grecque & Latine, & qui sont tout deuoir de s'enquerir ou de chercher la verite, & qui la scauent bien discerner des fallaces trōperies & erreurs : & non point les Conciles qui par gestes & contenancez fardees couurent & enseuelissent de leur propre gre & sceu la verite de Dieu. Comme le docteur Luther décrit viuemēt les principaux & les plus saincts Conciles en cest œuure present qu'il a fait des Conciles, non point Conciles qui n'ayēt eu que la parolle, mais qui ont este vrayement assemblez au S. Esprit. I'ay donc bien voulu traduire ce liure de la langue Allemande en Latin, afin que les autres natiōs qui n'entendent point nostre langue, commencent

187
a cognoistre la raison profane pour laquelle le Pape denonce les Conciles. Or cōbien que la lecture de ce liure puisse autrement apporter fruit aux lecteurs, & estre vtile a toutes les Eglises bien ordonnees : neantmoins ie l'ay biē voulu dedier a vostre maieſte, ô Sire, afin que sous vostre adueu il ait plus heureux cours, & que beaucoup plus facilement on cognoisse par iceluy, que le Pape n'a que le bec & les parolles, quād il parle & promet de faire tenir vn Concile general. Car a la verite il fuit la lumiere, comme la chauuesoris, & craint merueilleusement qu'il y ait quelque reformation pour remettre la verite en sa purete. Or nostre Seigneur Iesus vueille conseruer vostre maieſte en longue prosperite au proufit de l'Eglise & de la republique.

Vostre tres humble & obeissant serui-
teur Iustus Jonas laisné.

LE LIVRE

DES CONCILES ET DE

LA VRAIE EGLISE.



CECI A ESTE VN SPECTACLE gracieux tât aux autres qui estoient presens qu'a moy-mesme, touteffois & quâtes que i'ay veu aucûs se iouër avec des chiens, & leur presenter vn morceau de pain au bout d'un cousteau, & tout soudain tourner le mâche pour les frapper sur le nez, ainsi qu'ils baailloyent de grand desir apres la viande: en sorte que les pources chiens non seulement estoient frustrez de la viande, mais aussi ne rapportoyent autre chose q̃ blessure & douleur.

Et certes vn tel spectacle n'est point du tout sot ne maussade. Tât y-a touteffois q̃ pour lors il ne me vint point en l'esprit, que ce gentil passe-temps peut signifier quelque chose d'importance, ou bien que Satan ennemi mortel de Dieu & de tous ses fideles qui ont esperance en luy se iouë ainsi de nous qui sommes pources hommes, & nous estime comme pources chiens, nous donnant des nazardes: & n'en ay rien appereu, iusques a ce que i'ay veu l'exemple de ce fait en nostre tressainct Pere le Pape, & en ses liures, rescrits, bulles, publications de Concile, delais, prorogations, practiques ordinaires pleines de fraudes & tromperies, par lesquelles il se mocque ouuertement des fideles & de la pource Eglise, comme d'un chien ord & contemptible.

Mais, ô bon Dieu, combien de dommage horrible apporte-il en cest endroit? combien de milliers d'ames destruit-il? de quel outrage & blaspheme se mocque-il de Dieu & de la maïeste eternelle q̃ est la haut es cieux? Comme il a desia fait, & fait encore en la denonciatio

ou publication de son Concile, lequel tant de peuples & nations ont desia de si long temps tant desiré & de si grande affection, & toutesfois ont perdu leur temps en l'attendant. Et mesme l'Empereur Charles cinquiesme, to^r les Electeurs, princes & estats de l'empire Romain ont desiré grandemēt, & il a desia vingt ans qu'ils ont fait tout ce qu'ils ont peu a ce qu'un Cōcile Chrestien fut tenu.

Mais iusques a present il a donné a l'Empereur des delais tels que bon luy a semblé, & a entretenu tous les Princes d'une vaine & folle esperāce, & ne fait encore autre chose q̄ monstrer ce petit morceau de pain de ses promesses fardees. Quand ce trompeur voit son occasion, il donne des nazardes, & frappe du manche du couteau le bout du nez des attendans, & prend là son passe temps, & donne a rire a ses Cardinaux, & a se mocquer d'un tel Monarche, dominateur sur tant de royaumes.

Car c'est-ci desia pour la troisieme fois que ce tres-sainct Pere a fait publier le Cōcile general. Mais avant que passer plus-outre, il enuoye ses apostres par toutes les terres, pays & royaumes, & mande que les Rois, Princes & seigneurs soyent obligez par serment a ce qu'ils continuent a honorer & rendre obeissance a l'Eglise Romaine. Et les Euesques avec leurs beaux doyens & chanoyes se ioignent fort volontiers & de grand desir avec luy. Et dés maintenant ils se sont opiniastrez, ils ont conspiré ensemble de n'endurer en sorte que ce fut qu'il y eut aucune reformation. Par ce moyen ce Concile prodigieux & horrible met hors son enfantement, qui sont ses decrets & ordonnances, avant qu'il soit nay. Et desia en une cause, de si grande importance la sentence est prononcee avant qu'il y ait bouche ouuerte au Concile pour cōmencer. O la grande & horrible meschancete!

Or le decret est tel, que toutes choses demeurent en cest estat selon l'usage ou plustost l'abus horrible de l'Eglise

l'Eglise Romaine introduit & receu iusques a present. Est-ce ceci ce saint & beau Concile tant bien promis & tant attendu ? Le Concile n'est pas encore commencé, & desia il a paracheué ce qu'il deuoit faire, s'il eut esté commencé. C'est bien voirement se moquer de l'Empereur, & se rire a gueule bee de luy, & luy donner des nazardes, & preuenir de longue main par finesse & cautelles merueilleuses les conseils du saint Esprit qui deuoit venir & presider au Concile.

Or de ma part, ie ne trouue point ceci nouueau au Pape. J'ay bien souuent pensé en ceci: i'en ay écrit souuentefois: ie les ay bien souuent predites: ascauoir, que le Pape, les Cardinaux & les autres estafiers & sup pots ne pourroyent nullement souffrir qu'il y ait aucun Concile, & qu'ils n'en publieroient point, que premierement ils ne tinsent l'Empereur, les Rois & les Princes obligez par serment & en leur puissance, afin qu'ils puissent ordonner, faire & decreter en liberté & a leur appetit tout ce que bon leur semblera, pour establir & confermer leur tyrannie, & pour opprimer la poure Eglise de Iesus Christ d'un ioug plus dur qu'elle ne fut iamais.

Mais ceste vostre volonte soit faite: si vous qui auez le gouvernement de la terre, Empereur, Rois, Princes & autres seigneurs, endurez volontiers, que telle maniere de gens meschans, orgueilleux & desesperes qui sont a Rome, manifestement Atheistes & Epicuriens vous facent la mouë, se moquent de vous & oppriment la vraie religion, & l'Eglise de Christ, se rient a gueule ouuerte de vous, non point seulement d'un ou de deux ou de bien peu, ains de tous en general, voire se moquent a vostre barbe: alors nous aussi sommes contraincts de l'endurer.

Si vous voyez vos ennemis, ennemis trescruels & mortels de la Republique & de l'Eglise, voire sans en estre aduertis, nous deuons bien penser qu'il ne font rien de nouueau maintenant: mais le Pape & les siens


sont tels qu'ils estoient auparauant. Car ils ont desia fait des choses beaucoup plus enormes contre vous. C'est-ci vne œuvre de Pape & de Romanisques & de long temps, dreller des fineses & embusches aux Rois, ietter les Empereurs hors de leur gloire & dignite imperiale, excommunier des Rois & Empereurs forts & puissans, les enuoyer en exil par la trahison de leur propres familiers & domestiques, faire ennuy aux grans seigneurs, susciter des horribles guerres, assaillir par toutes voyes meschantes & frauduleuses, tous les Princes qui se sont opposez au siege Romain, & les faire mourir, & deceuoir tout le genre humain par fraudes vrayement diaboliques. Les histoires tesmoignent ouuertement de ceci : & eux-mesmes aussi s'y employent fort vaillamment iusques a present, c'est qu'ils continuent fort bien a Romanizer, afin qu'il ne semble que les historiens soyent peu veritables.

Toutefois Iesus Christ conseruera & maintiendra son Eglise, voire contre toute la puissance de Satan & les portes d'enfer, encore que l'Empereur ou les Rois n'eussent nul pouuoir ne volonte de la garder: ce qui n'aduienne. Iceluy se peut passer beaucoup plus facilement de leur aide, qu'eux de l'aide de Dieu & de Christ. Qui a gardé l'Eglise de Dieu auant que l'Empereur & les Rois fussent nais au monde? Et que seroit-ce, si encore aujourd'huy il y auoit vne Eglise suscitee entre les Payés, & qu'il n'y eut Empereur ou Roy Chrestien au monde, & mesme si tout le monde estant farci & rempli de diables, escumoit sa rage contre le Fils de Dieu? Iesus Christ estant au monde auoit bien accoustumé de boire le calice de la croix, & du breuage amer de fiel, & il scait bien mesme donner a boire aux autres des choses beaucoup plus aigres ou ameres. Mais malheur a ceux a qui il en donnera a boire en sa fureur.

Neantmoins, nous autres pures Chrestiens tât infirmes & foibles, & qui sommes appelez heretiques
entre

entre ces venerables beaux-peres, auons bien matiere de nous resiouir, & de rendre graces en toute liesse de nostre cœur au Pere de toutes misericordes & bôtez, de ce qu'il a frappé nos Cains & meurtriers cruels de telle rage & auéglement d'Egypte, & de tel endurcissement & obstination Iudaïque, qu'ils ont mis en leur esprit de ne se laisser vaincre en quelque article que ce soit: & souffriroyét plustost qu'il y eut dissipation en toute l'Eglise de Christ, que consentir qu'il y eut quelque reformation au moindre article de leurs abus, ou de leur idolatrie, de laquelle toutesfois ils sôt pleins. Ils se glorifient de ceste leur constance, & a la verite aussi ils ne font autre chose. Esiouissons-nous d'ôc, voire esiouissons-nô avec gayete de cœur: car par vne telle obstination ils rendêt nostre cause beaucoup meilleure que nô ne l'auôs desiré: & leur cause beaucoup pire qu'ils ne sauroyent penser. Eux-mesmes scauent bié & le confessent aussi, que Dieu & les saintes Escritures leur sont du tout contraires: & toutesfois ils veulent entrer par force, & resister a Dieu de leur propre sceu, & defendre ce qui est inique comme s'il estoit equitable. Qui est-ce qui ne s'exposeroit icy au danger de sa vie, voire mille & mille fois s'il en estoit besoing, veu que nous voyons si claiement, & mesme nous touchons a la main, que Dieu est de nostre parti, & que ceux-ci sont ouuertement agitez du diable & d'une façon horrible.

Nous auons donc le decret & la sentence diffinitive de ce beau Concile, qui est assigné a Vincence, & qui doit estre tenu finalement a Mantouë, & puis a Trente, comme par ceci on peut facilement coniecturer: a scauoir, que tout espoir est osté qu'il y ait iamais reformation en l'Eglise, & que la cause de la religion ou bien nostre cause ne sera iamais ouye. Car comme ils se glorifient aussi, le Pape endureroit plustost que tout le nom Chrestié fut effacé, que toute l'Eglise de Christ fut renuersée & du tout ruinee: c'est a



dire, qu'ils adoreront plustost Satan au lieu de Dieu & du Seigneur, qu'ils veulent reteuoir Iesus Christ, ou laisser ou quitter le moindre article de leurs abus & de leur idolatrie. Il y a bien pis, que ne se cõtentans point de cela, ils persequutent a feu & a sang les vrais fideles; & nous veulent contraindre par force nous autres poures Chrestiens d'adorer Satan aussi bien qu'eux, & de reietter Iesus Christ avec outrages & blasphemes.

On ne trouuera en histoire quelcõque vn seul exẽple d'vne obstination si endurcie, d'vne peruersite si enragee, & d'vne forsenerie ou meschancete si diabolique. Il y a eu d'autres tyrans, qui ont este cruels & meschãs d'vne facon du tout diabolique: tãt y-a toutesfois q̃ leur peché a este moins inexcusable, d'autãt qu'ils ont crucifié le Seigneur de gloire par ignorance, cõme les Iuifs, les Gentils & les Turcs. Mais c'est ci ceste lie empoisonnee, & le retrait du venin diabolique de ce dernier temps de gens meschãs & orgueilleux, qui se couurans du nom de Christ se vãtent avec grand orgueil d'estre les plus grans Chrestiens, & degorgent a gueule ouuerte, & font resonner par leurs bulles cõme par son de grosses trõpettes des blasphemmes horribles cõtre Christ. Cõme fils disoyẽt ainsi, Nous scauons bien que les parolles & les faits de Iesus Christ sont contre nous, & toutesfois encore ne voulõs nous pas souffrir sa Parolle: nous ne quitterõs pas encore la place, nõ pas mesme a Christ: mais plustost nous requerõs que luy nous la quitte, & qu'il endure maugre soy nõstre idolatrie abominable: cependant neantmoins nous voulons estre reputez les plus grans Chrestiens.

Or ça donc, puis qu'ainsi est que le Pape & ses supposts nous refusent tout a plat le Concile, & ne veulent souffrir qu'il y ait aucune reformation ni amendement en l'Eglise, & nous denient ouuertement tout secours en cest endroit, & ne tendent a autre but sinõ
a maintenir

a maintenir leur tyrannie plus que barbare en toutes fa ons, & souffrir que l'Eglise de Christ soit du tout mise bas. Mes amis, ô lecteurs Chrestiens, que pouuôs-nous plus faire? Pour le grand amour que nous portôs au treſſain Pere le Pape nous ſommes yci contreints de le chasser hors. Il nous est force, di-ie, d'abâdonner ce Dieu de la terre, & ce chef d'Eglise fait par ses pottiers, & recourir au Seigneur Iesus le Dieu viuant, & le vray chef de l'Eglise, & aller chercher vers luy vne bonne & ſaincte reformatiō, & le vray secours de peur que la republique de Christ & l'Eglise ne souffre aucun dommage. Car combien qu'a cause de la cruaute meschante & incroyable de ces bestes furicuses & tyrans plus que barbares tout espoir nous soit osté d'auoir vn ſainct Cōcile, ni aucune ſaincte reformation: tant y-a neantmoins que nous ne deſeſperôs point de l'aide de nostre bon Seigneur & grand Sacrificateur & vray Eueſque, qui est le Fils de Dieu, nostre Sauueur Iesus Christ: & n'abâdonnerons pour cela la vraye Eglise ſans conſeil & aide. De nous, nous ferons yci a la gloire de Dieu ce que nous pourrons. Et quant a eux, qu'ils ſ'en aillent au lieu de leur damnation & au diable, comme ils ont touſiours deſiré, & cōme ils le meritent bien. Et crians yei a haute voix, nous-nous cōſtituons partie contr'eux, & les accusons criminellement: aſcauoir, qu'ils ſont vrayement Antechriſts, & n'en faut point d'autres pour les condamner qu'eux-mesmes. Reſiſtans orgueilleuſement au ſainct Eſprit, ils veulent de leur propre gre eſtre damnez, ils ſe chaſſent eux-mesmes hors de l'Eglise, ils ſe banniſſent & ſe vâtent apertemēt d'eſtre ennemis mortels des fideles & de la vraye Eglise, & qu'ils la perſequuterōt a feu & a ſang. Car celuy qui dit, que pluſtoſt il ſouffriroit que toute l'Eglise periſt, que d'endurer d'eſtre reformé ou veincu en quelque petit poinct: ceſtuy-la conſeſſe haut & clair, que non ſeulement il ne voudroit point eſtre trouué au rang des Chreſtiens ou au milieu

b.iiij.

de l'Eglise (laquelle il aimeroit mieux voir du tout ruinee, que de perir avec icelle) mais aussi fait profession ouuerte, qu'il ne cessera iamais iusques a ce qu'il soit venu a bout que l'Eglise soit du tout destruite. Comme aussi ceste belle troupe accomplit de fait ces parolles. Comme aussi ces bestes cornues d'Euesques remplis de haine furieuse contre la sainte doctrine (laquelle ils appellent heretique & Lutherienne) endurent bien que tant d'Eglises & temples soyent sans pasteurs, faisans leurs offices, sans ministres, sans Sacramens, & que tant de nobles vniuersitez soyent conuerties en desert.

Anciennement les vrais Euesques & Pasteurs, & mesme vn chacun fidele s'exposoyent hardiment & avec ioye au danger de leur vie pour endurer martyre, & pour maintenir la verite de Dieu & la bonne cause de l'Eglise: comme les vrais Chrestiens & fideles font encore aujourd'huy le semblable: & Iesus Christ luy-mesme s'est offert a la mort pour son Eglise, a celle fin que l'Eglise fut conseruee. Mais le Pape & les siens en ce temps-ci se glorifiēt en cela, que l'Eglise sera plus-tost toute destruite & ruinee, qu'ils puissent relascher quelque chose de satyrannie barbare & de son idolatrie horrible, & de toutes ses meschancetez quelles qu'elles soyent.

O lecteur Chrestien! En quelle sorte te peut plaire ce beau vicaire de Christ? & ce gentil chapitre d'Eglise? Ils veulent estre gardez & preseruez, ils veulent demeurer sains & sauues, & que l'Eglise soit du tout destruite. Et en quel lieu demeurerons-nous fermes maintenant? Ou me tourneray-ie maintenant avec mes amis fideles & Chrestiens? Si l'Eglise perit ou doit perir, il faut bien que premierement Iesus Christ perisse, sur lequel elle est bastie cōme sur vn rocher ferme, en sorte que les portes d'enfer ne pourront rien a l'encontre. Et si Iesus Christ perit, aussi faudra-il necessairement que Dieu luy-mesme soit ruiné & mis
bas,

bas, lequel a mis ceste pierre & ce fondement.

Or qui eut iamais pensé, que la puissance de ces misérables Papistes eut esté si grande, qu'a leur seule volonté & menasse toute l'Eglise doyue aller en decadence & ruine entiere si facilement, ensemble avec Christ & le Pere qui est es cieux? Il faut bien dire que les chapeaux & mitres de Rome ont beaucoup plus de force que les portes d'enfer & q̃ tous les diables: cōtre les forces desquels l'Eglise de Dieu demeure encore assez puissāte pour resister, & demourera a tout iamais.

Cōme i'ay dit, ils s'accusent & condānent yci eux-mesmes, & confessent qu'ils ne veulēt point estre l'Eglise, ni estre de l'Eglise, ou en l'Eglise: mais veulent estre ennemis mortels de la vraye Eglise, & a cela employent toute leur puissance, que l'Eglise soit ruinee totalement. Mais iusques a present ils nous ont bien exercez & tormentez avec ce mot, Eglise, Eglise, & en ont bruit & crié sans mesure ne sans cesse: ils ont voulu estre reputez pour l'Eglise, & pour ceste seule cause ils ont foudroyé orgueilleusement contre nous par leurs cruels edits & par leurs bulles arrogantes, comme contre heretiques & schismatiques: ils ont exercé cruaute par feu & sang, d'autant que ne les auons voulu ouir comme l'Eglise. Maintenant ie pense que par leur propre parolle nous sommes suffisamment excusez, & absous de toutes offenses, en sorte qu'ils ne no^u peuuent plus accuser d'heresie ou schisme, veu qu'ils ne veulent plus estre l'Eglise: mais ils ont ce desir que l'Eglise perisse, & comme ennemis ils ont du tout leur but a cela, que l'Eglise soit opprimee. Car ces deux choses ne peuuent subsister ensemble: ascauoir, qu'ils soyent l'Eglise, & quant & quant qu'ils souffrent plus tost que l'Eglise perisse, qu'eux s'exposent au plus petit danger qu'on scauroit dire. Ce mot est sorti de leur bouche sans y penser, De nous, nous pouuons maintenant dire hardiment, Meschāt seruiteur, ie te condamne par ta propre bouche.

Or si sans cela le dernier iour n'estoit deuât la porte, il ne se faudroit esbahir de voir tout le monde renuerfer a vn si horrible blaspheme, & mesler le ciel & la terre ensemble. Mais pource que nostre bon Dieu peut bien endurer ces choses, c'est signe que le iour de nostre redemption & de leur damaation approche. Toutefois ils se mocquent orgueilleusement de toutes ces choses, & ne pésent point en quelle forsenerie, aucuglement & fureur horrible Dieu les a iettez : & nonobstant en ceste profanation Epicurienne & en ce contemnement orgueilleux de Dieu ils pensent estre bien sages, & se font acroire qu'ils sont forts & constants. Et de moy, ie pourroye bie m'asseurer avec moins de danger qu'eux ne pourroyent faire, si seulement il falloit auoir esgard a leur fureur. Tât y a que ce courroux horrible & espouantable de Dieu qui se monstre ouuertemét en eux, m'estonne grandement. Et le téps mesme & la grande necessite requerroyent nos larmes & nos prieres & oraisons : comme Iesus Christ aussi a pleuré sur la ville de Ierusalem & sur ses ennemis, & a dit au téps de sa passiō aux femmes, Ne pleurez point sur moy, mais sur vous & sur vos fils & filles. Car ils ne croyent point que le temps de leur visitation si horrible soit si prochain. & n'en veulent rien croire, encore que leurs yeux voyent, & leurs oreilles oyent, & touchent a la main, que les feuilles des arbres, les herbes & toutes creatures soyent courroucees contre eux par la malediction de Dieu, qui va & iuge contre eux.

Qu'est-il donc de faire maintenant, veu que le Pape ne veut souffrir aucun Concile saint & vraiment Chrestien, ne qu'il y ait aucune reformatiō : mais plus tost que toute l'Eglise aille bas en ruine ? Et ainsi luy-mesme s'est desrobé, il s'est mis hors soy-mesme, sortant par vn autre costé : il nous est eschappé hors de l'Eglise : afin que luy & les siens puissent demeurer en ferme estat cependant que l'Eglise sera demolie & mise

mise bas. Le Pape a este yci, & a dit vn long a Dieu a l'Eglise pour beaucoup d'annees : qu'est-il donc de faire maintenant? ou bien, ou nous pourrions-nous arrester? que pouuons-nous attenter ou entreprendre, veu que nous sommes contraincts d'estre sans Pape? Car nous sommes ceste Eglise & en ceste Eglise, laquelle les Papistes voudroyent estre du tout ruinee, & laquelle ils ne voudroyent racheter ne sauuer pour vne creuse de noix, pourueu qu'eux soyent bien maintenus. Et nous aussi voudrions volontiers estre bien maintenus & preseruez : nous consulterions volontiers avec le Fils de Dieu nostre Seigneur Iesus Christ & son Pere celeste, Pere de gloire & Dieu de maïeste: ascauoir, si par quelque moyen nous pourrions estre preseruez contre l'orgueil intollerable & la cruauté barbare des Papistes.

Or nous voyons que l'Eglise a besoing d'vn Concile general, franc & Chrestien, veu que nous auons manifestement deuant nos yeux des abus si lourds & estranges : & encore que nous fussions des bœufs ou des asnes, ie ne di point hommes ou Chrestiens, & si nos yeux ne les pouuoient apperceuoir, ne nos oreilles les ouïr : tant y-a toutefois que pour le moins nous serions contraincts de les taster ou rencôtrer en marchât. Que sera-ce, si nous qui sommes ceste pource Eglise cõttemptible & affligée, commençons a tenir le Concile ou faire la reformation contre ceste Eglise bien arrestee & bien ferme, comme ils pensent, maugre le Pape & messieurs les Papistes qui sont si biē assurez? Voire que nous feissions vne reformation qui semblaist estre bien infirme a ces hardis hypocrites & a ceste Eglise tant assuree, selon qu'ils en ont opinion, laquelle toutefois ils fussent contraincts d'endurer, voulussent ou non, comme ils ont fait iusques a present? Mais venons maintenant au principal de la matiere, veu que pour ceste heure nous auons perdu le chef de l'Eglise, le tref saint Pere le Pape, qui s'est retiré vers les corbeaux: &

que sommes cōtraints de regarder & pouruoir a nous-mesmes selon la grace que Dieu nous fera.

Il est bien certain, que durant ces derniers vingt ans ou plus, il y en a eu plusieurs entre les Papistes qui ont pris grand peine a fouiller par les liures, & rechercher les Conciles & les escrits des Peres ou Docteurs anciens, en sorte qu'ils ont desia recueilli & redigé en vn volume tous les Conciles qui furent iamais tenus. Ce labeur me semble estre proufitable : car auparauant ie n'auoye encore veu tous les Conciles ramassez en vn liure. Et selon mon iugement il y a mesme entre les Papistes plusieurs gens de bien, & qui ont la crainte de Dieu, qui voudroyent bien voir quelque bōne & saincte reformation en l'Eglise selon les determinations & ordonnances des saincts Conciles, selon les sentences, escrits & opiniōs des saincts Peres. Ceux-ci (autāt que ie puis cognoistre) ont este grandement esmeus & fachez de voir l'estat present de l'Eglise si corrópu & profané sous le gouuernemēt du Pape, & si villeinemēt aliené de Iesus Christ, & cōme on peut voir facilement, du tout eslongné des Conciles anciens, & des saintes ordonnances & institutions des Peres. Mais yci tous les cōseils ou aduis de tous ces gens de bien ne seruent de rien, & toutes bonnes & saintes cogitations y sont du tout inutiles. Car il ne faut point douter que l'intention & aduis de ceux-ci ne soit, que le Pape & tous les siens ne s'assubiettissent a la reformation qui sera faite a vn sainct Concile, & que d'un bon accord ils rendent obeissance a ce qui y sera determiné : mais c'est temps perdu, & tous ceux qui tascheront a ce faire, n'y proufiteront de rien. Et de fait le Pape demeure là fiché avec ses Cardinaux, enflé d'un orgueil & arrogance diabolique : & s'esleuant d'une façon furieuse tant contre ces gens de bien que contre nous, il fait retentir son rugissement, & tonne, qu'il endurera plustost que toute l'Eglise soit ruinee, & que le nom de Christ soit entierement assoupi, que se laisser vaincre en vn seul article.

ticle. C'est a dire, qu'il permettra plustost que tous les Conciles anciens & nouueaux soyét foulez aux pieds, & que les saincts decretz d'iceux soyét iettez en quelque ord & puât retrait, que de se submettre aux saincts Conciles & bonnes ordonnances des Peres anciens. Car s'il faut rendre obeissance aux Cōciles & aux constitutiōs des Peres anciē, ô bon Dieu, en quelle part de tout le môde le Pape & ses beaux Cardinaux pourrōt-ils estre chassiez & bānis? Il est bien certain, q̄ ceste Egli se tant bien assieuree, laquelle se fait accroire qu'elle est tāt stable & ferme, s'enuoleroit aux quatre vents, cōme plus legere qu'une plume & qu'une fucille bien seiche.

Je ne parleray point yci de ces Conciles anciē, qui ont este celebrez deuant mille ou quatorze cens ans. Car il n'y a pas encore cent ans, que la tressaincte Egli se de Rome selon sa bōne & saincte coustume a commencé a conferer deux benefices a vn prestre, & plusieurs prebendes, & plus d'une cure. Alors les Theologiens de Paris, qui auoyent la louange, & principalement enuers la cour Romaine, censurerent ces choses a grande rigueur, & crioyent contre le Pape, & escriui-
rent beaucoup de choses horribles cōtre ceste cour Romaine. Je n'ay point encore soixante ans, & toutesfoies ie scay que ceci a este introduit de mon temps & de ma memoire par les Romanisques, qu'il ne seroit permis aux Euesques d'auoir plus d'un Euesché. Cepédant toutesfoies le Pape (cōme la cour Romaine est vn goufre insatiable) a deuoré toutes choses, les Annates, les reuenus des Abbayes & Eueschez : il a auallé & englouti les royaumes & prouinces, & a grand peine a-il laissé les ruines ou vieilles masures. Cependant ceci est souuent aduenu, qu'il a baillé trois Eueschez a vn bien-aimé son Cardinal & a beaucoup d'autres ses bien-amez, ou cinq Abbayes, ou six prebēdes, ou dix, ou vîgt benefices. Je vous supplie, comment se pourra-il faire, que le Pape ainsi engraisfé & saoulé regorge? ou bien comment pourra-il souffrir que la Châcellerie de Ro-

me soit dissipée a cause des Conciles & des Peres?

On pourra dire que ce sont-ci abus manifestes & lesquels on ne doit plus endurer en façon quelconque: & mesme toute Rome doit estre plustost du tout demolie & rasée iusques aux fondemens, toutefois que ce soit petit a petit. Cest Vlisses est-il si peu cognu, qu'on pense qu'il puisse endurer quelque chose de ceci? Que les Apostres mesme viennēt, que saint Pierre & saint Paul se mettent en auant accompagnez de tous les Peres qui ont este iamais en quelque siecle que ce soit, garnis de toutes les ordonnances & decretz de tous les Conciles: toy quiconque tu sois, ô Chrestien, vien de quelque part que ce soit, produi la sainte Esriture, mets en auant les Conciles. Il est yci question des biens & richesses & de la gloire. C'est-ci ceste Helaine, que le Pape ne souffrira point luy estre rauie. Premièrement dōc oste les abus qui sont de n'agueres introduits. Car certes il y a seulement cent ans, voire soixante, que les choses n'estoyēt en tel estat, & c'est auāt q̄ ie fusse nay.

En quel chemin donc nous arresterons-nous maintenant avec nostre reformation tiree des Peres & des Conciles? Tu peux biē ouir ceci, si tu n'es du tout sourd, que le Pape, les Cardinaux & Euesques n'endureront rien moins qu'une telle reformation. Si donc le Pape l'homme de peché a amené toutes choses a vne corruption ou profanation si extreme, qu'il ne puisse porter l'estat de l'Eglise tel qu'il estoit deuant cinquante ans, lors que toy & moy estions bien petits: ie te supplie, comment souffriront-ils ceci, quand finalement nous reformerons leurs Eglises, & les reduirons a tel estat ou condition qu'estoit l'Eglise ancienne, telle qu'elle estoit il y a fix cens ans, ou mille ans, ou mille quatre cens ans? Il est bien certain, que ce que les bons pensent, ne sera nullement fait: veu que le Pape est en possession, & ne veut nullement estre reformé. Ainsi donc quant a ceci, que le Pape & les siens soyent reformez, tous les Conciles n'y seruiroyent de rien: tous les Pe-

res ou nais ou a naistre, & tout ce qu'ils pourroyent, ou péser ou dire sur ceste matiere seroyét du tout inutiles. Car le Pape (côme il a accoustumé de crier & tōner selon son arrogāce & orgueil intolerable, & sa tyrannie cruelle) est par dessus les Conciles, par dessus les Peres, par dessus to' les Princes & Rois, par dessus Dieu & les Anges. Aduisez dōc cōmēt on le pourroit abbatre d'un throne si haut eleué, & comment on le pourroit mettre au dessous des Peres & des Conciles. Si on peut faire cela, j'en seray aussi ioyeux, & feray feste, & maintiendray le parti de ceux qui le pourront faire. Mais tandis que cela ne se fait pas, que proufitera ce qu'on dit & escrit beaucoup de choses des Peres & des Conciles, veu qu'il n'y a personne qui se soucie de tout ceci tant peu que ce soit? Car si le Pape ne veut estre assubiecti avec nous aux Peres & Conciles en ceci, & si messieurs les Cardinaux & Euesques qui doyuent demeurer si fermes a iamais, ne se veulent renger, quelle vtilite pourra-on attendre du Concile? quelle reformation ou amendement pourra-on esperer, qui soit de quelque importāce? Car le Pape en ce faisant renuersera & mettra bas toutes choses ainsi que bon luy semblera, & nous imposera silēce. Que si ceux-la ont quelque affection, que nous avec eux souffrions que la reformation, soit faite selon les escrits des Peres, & selon les ordonnances des Conciles, & qu'on pouruoye a l'vtilite & bien public de l'Eglise, & que le Pape & les siens ne vueillent qu'il y ait aucun amendement, alors il faudra faire distinction. Car il y aura l'une de ces deux choses: ou ceux qui desirent ceci, ont le cœur aigri & enuieimé, & disent ceci d'une affection maligne: ou ils sont gens de bien, & autant qu'en eux est ils ne disent ou ne souhaitent point ceci d'un courage peruers.

Or ie respon aux premiers, qu'auant toutes choses ils doyuent cracher en leur sein, & premierement arracher la poutre de leurs yeux ensemble avec le Pape & ses Cardinaux & Euesques, ou mesme sans le Pape &

les siens. Qu'ils commencent a honorer & aimer les Conciles & les Peres : & quant cela sera fait, alors tout incontinent suyuant ce saint exemple, & couras bien loing deuant-eux, nous serons meilleurs qu'eux. Car (graces a Dieu) nous ne sommes point si meschans, que nous aimios mieux que toute l'Eglise perisse, que souffrir que nos opinions nous soyent arrachees. Et mesmes es choses grandes nous voulons bien estre vaincus moyennant que rien ne soit fait ne dit contre Dieu: & qui pl^e est, nous sommes prests de perir du tout, & d'estre redigez en cendre & poudre, plustost que de vouloir que l'Eglise soit endommagée, ou interressée, ou offensée en si peu que ce soit, autant que nous-nous en pourrions garder.

Mais si eux vouloyent a toute extremite mespriser les Peres, les Cōciles & toute ceste authorite, & neantmoins que nous fussions contrains a ces choses, cela seroit vne tyrannie : & pourrions bien dire & a bon droit, Medecin, gueri toy toy-mesme : & leur obiecter ceste parolle de Iesus Christ, Ils amassent & liēt des fardeaux pesans & importables, & les mettent sur les espaules des hommes : mais eux ne voudroyent remuer le petit doigt pour y toucher. Certes cela ne vaut rien, & nous auons des causes fort iustes de le refuser, veu qu'eux-mesmes crient haut & clair que la sainteté des Peres & des Conciles est grande, & se plaignent que nous-nous en destournons : & si on vient a regarder de bien pres ce qu'ils font, ils auront bien celle authorité peinte en des papiers, & la porteront par tout bien écrite, & cependant ce ne sont que parolles, ce ne sont que fumees qu'ils vendent aux auditeurs : au demeurant ils n'en gardent rien quand ce vient au fait. Car nous confessons, & sommes contrains de cōfesser, que nous sommes pures & foibles, voyre en plusieurs sortes. En premier lieu, que nous sommes occupez iour & nuict en la doctrine de la foy & de la cognoissance de Iesus Christ, en lisant, meditant, escriuant, enseignant, exhortant,

exhortant, consolant tant les autres que nous-mêmes, en sorte que nous n'auons nul loisir, ne tēps ni opportunité de pēser si iamais il y eut des Peres, ou si iamais il y a eu des Cōciles: tant s'en faut q̄ nous puissiōs vaquer a ces hauts articles Papistiques: ascauoir, des tōsures de moines ou de prestres, des estolles, des aubes, des capuchons & des frocs, & autres choses semblables.

Or s'ils sont paruenus a vne telle perfection Evangelique ou s'ils ont vne fois receu la doctrine de la foy & cognoissance du Fils de Dieu si parfaitement, qu'ils soyent entieremēt deliurez ou exēpts des tentatiōs de Satan, des esgaremens & frayeurs des cœurs tentez: nous-autres pures Chrestiens & foibles cōfessons franchement, que nous ne sommes encore point venus iusques a ce point, & craignons de n'y paruenir tant que nous viurons. Et pourtant il falloit qu'ils eussent pitié de nous, a ce qu'ils ne nous eussent point si tost cōdamnez, de ce que nous ne pouuons atteindre a vne si haute & excellente sainctete, cōme ils ont fait. Car si nous quittiōs ainsi nos exercices, qui nous sont grans seulement en la doctrine de la foy, & si nous taschions a imiter leur force en ces menus fatras de ceremonies, de frocs, de viandes & accoustremēs: lors nous abandonnerions nostre foible sainctete, & toutefois nous ne pourrions attaindre a leur grande ceremonieuse sainctete, & par ce moyen nous aurions (comme on dit) le cul en terre entre deux selles. Que s'ils n'ont point cōpassion de nous, alors laissons-les ainsi en leur asseurance avec les Anges en Paradis, au milieu des grans tas de fleurs & des dāses, comme quelques grans saints, auxquels la cognoissance de la foy de Iesus Christ est familiere: lesquels en leur sainctete celeste ne sentēt poit qu'ils soyēt tētez du diable, ne de la chair, ne du mode.

Mais quant a nous, nous sommes en anxiete, & trauiillons assiduellemēt, cheminās au trauers de la bouë, & parmi les bourbiers, comme ceux qui sont fort foibles au combat & luiēte de la foy, & cōme petits abe-

en pis, & de iour en iour approchent de leur ruine.

Or pensons maintenant, puis que nous ne pouuons sinon a grande difficulté attirer ou inuiter nos auditeurs a telles œuures tant necessaires & ordonnees de Dieu: quelle raison y auroit-il de les laisser, & de nous adonner totalement a ces œuures si hautes & excellentes pleines de pompes & de ceremonies resplandissantes, qui toutefois ne sont point necessaires, pour lesquelles ils font de si grâdes declamations? Mais encore si nous pouuions si bien proufiter, que tous eussent en grande estimation ces œuures Diuines, ou plustost viles & contemptibles, ou bien œuures ciuiles, comme ceux-ci les appellent les amoindrissans, alors nous pourrions bien par ci apres heureusement commencer leurs œuures spirituelles & Ecclesiastiques moyenant l'aide de Dieu: ascauoir, touchant la manducation de la chair de la façon des habillemens, de la difference des viandes & des iours, & autres œuures semblables.

Mais le trauail ne leur couste gueres, veu qu'ils accomplissent la Loy de Dieu en tout & par tout, ils aiment Dieu sur toutes choses, il n'y a nulle auarice ni usure entr'eux, il n'y a point de paillards ni adulteres, il n'y a point de gourmans ni yurongnes, il n'y a point de prodigues ne dissipateurs de biés, brief, il n'y a nulle mauuaise soupçon d'aucun crime ou meschancete: mais toutes ces menues œuures Diuines leurs sont si faciles a faire, qu'ils sont oisifs toute leur vie. Parquoy ils sont bien en cela, qu'ils controuuent & forgēt par dessus nos œuures ciuiles d'autres œuures plus hautes & de plus grande importance, selon l'obeissance deuë a l'Eglise & aux beaux-peres, & entreprennent a les mettre en exécution: cōme s'il y auoit tant de force en eux, que ce ne leur est point assez de trauailler avec nous es œuures si menues, mais se veulent bien employer a choses plus hautes.

Toutefois ces bonnes gens selon leur misericorde tant haute & excellente, & selon la doctrine de saint

Paul, deuoyét bien auoir pitie de nous-autres pources Chrestiens debiles & foibles, & ne nous maudire tout incontinent, comme ils font, ou se mocquer si fierement de nous, de ce que nous-nous tenans aux bancs & scabelles, nous apprenons petit a petit a cheminer comme petits enfans : & qui plus est, estans veautrezi dedans le boubrier, nous rampons tellement quellement, & ne pouuons aligrement passer par dessus & hors les commandemens & ordonnances de Dieu, comme si nous auions des pieds de serf, comme ils font, eux qui sont des demidieux & geans puissans, lesquels osent bien attenter des choses beaucoup plus grandes & plus hautes que celles-ci : ascauoir, aimer Dieu sur toutes choses, & aimer son prochain comme soy-mesme : ce que saint Paul appelle accomplissement de la Loy au treziesme chapitre des Romains, & le Fils de Dieu luy-mesme, Matthieu. 5.

Que s'ils ne veulent nullement estre esmeus de nostre foiblesse & infirmité, pour le moins qu'ils souffrent que nous obtenions ceci d'eux, qu'ils attendent iusques a ce que nous ayons accompli les commandemens de Dieu, & ces petites & menues œuvres de pedagogie : & cela fait, nous promettons en bonne foy que nous reccurons avec eux ces belles & tant excellentes œuvres, tant heroïques, tant vertueuses & spirituelles, & nous-nous y essayerons. Car quelle folie est-ce, de prouoquer vn enfant de deux ans a courir au stade contre vn Milo Crotoniates si fort & robuste, duquel on dit qu'il a porté sur ses espaules vn bœuf par la longueur de quelques stades, & puis apres le tua d'vn coup de poing, & le mangea luy seul tout entier en vn iour. Il est bien certain qu'vn tel obtiendra la louange de victoire par dessus vn garçonneau, qui n'auroit point tant de force que celuy qui seroit en la fleur de son aage. Ainsi nous-autres pources Chrestiens & foibles, cheminons petit a petit es commandemens & ordonnances de Dieu, & es bonnes œuvres d'iceluy, qui
semblent

semblent bien estre menues, comme petits enfans se tenans aux scabelles & aux bancs, & a grand peine mesme pouuons ramper nous tenans des bras & des mains, & quand mesme nous sommes couchez par terre, a grand peine nous pouuons-nous pousser en auant, & Iesus Christ luy-mesme est contraint de nous prendre par la main, & nous mener d'un costé & d'autre, comme la mere ou la chambriere fait vn petit enfant, iusques a ce qu'il puisse marcher & cheminer fermement. Mais pource que nous ne pouuons pas simplement imiter leur vistesse ou leurs faits magnanimes & œuures heroïques (& nostre bon Dieu nous garde de les imiter) nous voulons donc attendre a suyre ceste sainte Ecclesiastique & Concilieuse (comme ils l'appellent) iusques a tant qu'il ne nous restera plus rien a faire des commandemens & des saintes œuures de Dieu. Et nous ne pouuons & ne voulons souffrir vne telle reformation.

Voila la response que nous auons faite aux premiers, qui requierét de nous vne telle reformatiō malicieusement & frauduleusement.

Quant aux autres qui en simplicité de conseil & aussi d'une bonne affection pensent, qu'une telle reformation salutaire pourroit bien estre faite selon les escrits des Peres, & les decrets & ordonnances des Conciles, encore que le Pape n'en voulut rien faire, ou mesme taschast a empescher qu'elle ne fut faite: ie leur respond aussi d'une bonne affection & simple, qu'il me semble bien que ce labour est du tout impossible, & ie ne voy comment on pourroit attenter vne telle reformation. Car i'ay leu & releu diligemment les escrits des Peres anciens, mesme auant que ie m'opposasse au Pape si courageusement comme i'ay depuis fait, & les ay leus vn peu plus attentiuement & avec vn peu plus grande diligence, que ceux-ci qui en s'esleuant d'une façon orgueilleuse, me viennent opposer maintenant les escrits des Peres. Car ie scay pour certain qu'il y en

a bien peu d'entr'eux qui ayēt experimēté ou fait l'essay en lisant publiquemēt aux escholles les liures de la saincte Escriture, autant qu'un lecteur diligēt des Prophetes & des Pseaumes pourroit estre aidé des cōmentaires & enarrations des anciē, si bien que ie l'ay experimēté. Qu'ils prennēt encore maintenāt vn liure de la saincte Escriture, & qu'ils s'essayēt de recueillir des cōmentaires ou gloses des saincts Peres le vray sens tant des Apostres q̄ des Prophetes, lors en lieu de thresor ils trouueront des charbōs: & leur aduiēdra cōme il m'est aduenū en l'epistre aux Hebr. avec les froides & longues gloses de Chrysostome, en l'epistre a Tite & aux Galates, avec les commentaires de saint Hierosme: & comme aussi il m'est aduenū au liure de Genese, avec les annotatiōs de saint Ambroise & de S. Augustin & au liure des Pseaumes avec tous les cōmentaires generalmente qu'on pourroit aujourdhuy recouurer. I'ay employé beaucoup plus de tēps a lire les escrits de tous les Peres ou Docteurs anciē que ceux-ci ne pourroyēt pēser: & ay fueilleté & discouru les cōmētaires des anciē, lesquels ils ont faits sur to^r les liures de la saincte Escriture. Ils sont dōc orgueilleux & par trop arrogās, & enflēz d'une fierete Pharisaïque, quād ils pēsent que ie n'ay point leu les anciens, & me proposent seulement maintenant les liures & escrits des anciens, comme vne pierre de touche, desquels i'ay este contraint n'en faire pas grand conte, il y-a plus de vingt ans, quād il falloit lire la saincte Escriture aux escholles, & quand avec grand trauail ie cerchoye le vray & naturel sens.

Saint Bernard dit en quelque passage, que toute la science ou cognoissance qu'il auoit des saintes Escritures, il l'auoit apprise des chēnes, des sapins & autres arbres, que les arbres auoyent este ses pedagogues & maistres d'escholle. C'est a dire, qu'en meditant les saintes Escritures sous les arbres dedās les bois & forests, il estoit paruenū a vne telle cognoissāce. Luy-mesme dit aussi qu'il estime beaucoup les escrits des saints & les

& des Peres: toutes fois qu'il ne repute point to' leurs dits pour oracles ou pour parolles celestes: & afferme qu'il a iuste & bõne cause de parler ainsi. Car il aime mieus puiser & boire de la source & des fontaines mesmes, que de suyure ou chercher les petis ruisseaux. Comme quand les chaleurs sont grandes, tous ceux qui voudront estancher leur soif, mespriseront facilement les ruisseaux, s'ils peuuent trouuer la fontaine, & y atteindre: sinon (comme il aduient souuēt) qu'on se serue des ruisseaux cõme de guides, par lesquels on puisse trouuer la fontaine. Semblablement nous deuons suyure la sainte Bible comme le maistre souuerain, & comme la principale fontaine. Car si nous voulons suyure les riuies des petits ruisseaux, elles nous eslongneroyēt par trop de la source ou fontaine, & perdront toute vertu & sauueur, iusques a ce qu'ils entrent dedans la mer salee: c'est ascauoir, dedans ce grand Océan des doctrines & erreurs des hommes, & soyent cachez, comme on a veu aduenir sous la Papauté.

Mais c'est assez parlé de ceci. Maintenant i'adiousteray les raisons ou les causes, pourquoy ie pense que iamais il n'y aura reformation faite par le moyen des escrits des Peres & ordonnances & decrets des Conciles. Premièrement c'est vne chose bien certaine, qu'en Conciles on trouue des decrets & ordonnances nõ seulement diuerses, mais aussi repugnantes l'une a l'autre, & du tout contraires: aussi es escrits des Peres on trouue assez souuent vne repugnance manifeste. Si maintenant il falloit reduire depuis tant de siecles a concorde vne si grande diuersite, alors se leueroient de plus aigres combats, & verroit-on aduenir des disputes plus vehementes, que celles que nous voyons auioird'huy, desquelles nous ne viendriõs iamais a bout. Car il y a plusieurs articles, esquels ils sont grandement diuers, & bien souuent repugnans l'un a l'autre. Voyci la peine qu'il faudroit prendre auant toutes choses. En premier lieu il faudroit faire vn recueil des meilleures senten-
c.iiij.

ces, & puis laisser le reste:& alors se leueroit vne terrible guerre. L'vn diroit sur cela, Si nous gardós les dits & sentences des Peres, il nous les faut garder en tout & par tout, ou les reietter entierement. L'autre crieroit, Vous-autres Lutheriens prenez des Peres ce que bon vous semble,& laissez ce qui vous desplaist. A quels iuges donc ou arbitres s'adressera-on en vne noise si eschaufée & debat si furieux? Car tous ont le grand Decret en la main, qui est vn gros bobulaire assez pour assommer vn bœuf. En iceluy Gratien ha eu ceste intention, & a tasché d'accorder les sentences repugnantes tant des Cóciles que des Peres: & pour ceste raison le liure est intitulé, La Concordance des discordances. Gratien a voulu mettre d'accord les Peres discordans, & faire qu'il y eut appointement entre les Conciles,& de tous en faire vn recueil des plus pures & meilleures choses. Et touteffois ce labour n'a pas este des plus utiles. Car il a souuent laissé ce qui estoit le meilleur & pl^r pur,& a retenu ce qui ne valloit gueres. Or si ainsi est que Gratien n'ait point accordé les Peres ne les Conciles, comme les plus scauans Legistes confessent que le grand Decret sent son auarice & ambition, & vn pur Canoniste (ce disent-ils) c'est vn pur asne: combien plustost heurterions-nous contre les rochers, si la chose venoit iusques a ce poinct, que pour reformer l'Eglise nous accordions premierement les opinions des Peres & les determinations des Conciles? Il est bien certain que nous ne ferions que perdre nostre peine, & d'vn mal en faire deux, & d'vne noise en susciter plusieurs.

Ainsi donc ie ne me melleray point de ces disputes tant friuoles & vaines & contétieuses, puis que maintenant il y a vne si grâde lumiere de la pure parolle de Dieu. Car ie scay bien qu'en ce faisant les contétions, les debats, les noises & riottes aigres n'auroyét iamais fin: & nous ne pourrions rien obtenir finalement pour toutes nos peines qu'vne doctrine douteuse & incertaine.

taine. Vn tas de ieunes theologastres, voire purs hypocrites, qui composent tant de liures badaux & pleins de folie, ne faisans qu'esgratigner le papier, sont ignorans & bestes, & nouueaux apprentis : & comme songeans des songes fols & vains, ils imaginent que c'est peu de cas de conseruer la bonne & pure doctrine, & de gouverner l'Eglise de Dieu. Ils ont opiniõ, que tout ce qu'ils lisent de beau en ceste leur monachale oisiette, est suffisant pour faire que les Eglises & toute la republique Chrestienne soyent reformees par tous pays & royaumes selon leurs belles petites annotations, que ils ont faites. Et toutefois en choses de si grande importance & en tels affaires vraiment Apostoliques a grand peine meritent-ils d'estre reputez abecedaires : & n'ont point encore bié gousté l'Escripture, ou les Peres, ou Conciles, n'ont pas mesme ietté les yeux dessus : & cependant ils esmeuent de grandes crieries : & ne scauent qu'ils disent, ou dequoy ils afferment.

Or cependât ie ne diray plus mot de Gratien. Mais saint Augustin escriuant a Ianuarius, deplore l'estat de l'Eglise. Car il se plaint avec larmes, que dès lors l'Eglise Chrestienne estoit trop chargee, & que de fois a autre on auoit augmenté les ordonnâces & traditiõs, & que les Euesques auoyent beaucoup adiousté du leur, en sorte que la religion des Iuifs estoit beaucoup plus tolerable. Cela estoit trois cens ans apres la natiuite de Iesus Christ : car depuis la mort de saint Augustin il y a mille cent deux ans passez iusques a ceste presente annee 1539. Et il vse expressement de ces mots, Ils chargent l'Eglise de fardeaux infinis & seruiles : au lieu que les Iuifs n'ont este chargez que de commandemens de Dieu, & non de traditions & ordonnances des hommes. Et sur cela saint Augustin dit ouuertement, que le Seigneur Iesus a voulu que son Eglise fut instituee, chargee & honnoree de peu de ceremonies & faciles : a scauoir, de ces deux-ci, du Baptisme & de la sainte Cene. Et luy-mesme saint Augustin ne mōstre point

là d'autres ceremonies, que ces deux, cōme vn chacun le peut voir. Car on le trouuē par tout ses liures, afin que nul ne pense que ie forge cela de ma teste. Or il rompt & met en pieces tous ces liens & tout ce ioug Pharisaïque, sous lequel l'Eglise estant opprimee pour lors gémissoit, quād en ce mesme-lieu il dit plus briueuement voirement, mais aussi avec poids, Ceste sorte a des obseruations libres: yci nul n'est obligé a obseruer les ordonnances & traditions: mais vn chacun de nous les peut omettre sans offenser. Et certes Pere saint Augustin, tu es yci heretique pl^r que tous les heretiques, & de moy, ie ne suis point heretique au pris de toy, qui ayant amassé comme en vn faïsseau tant d'obseruations, ceremonies, traditions & ordonnances de tant d'Euesques & Eglises, les iettes toutes au feu, & appelles & conuies les hommes seulement au Baptisme & au Sacrement de la Cene du Seigneur, & prononces ouuertement, que Iesus Christ n'a voulu imposer d'autres fardeaux a l'Eglise, voire si ces ceremonies externes doyuent estre appelez fardeaux. Lesquelles sont instituees a ceste fin qu'elles nous admonnestent & proposent deuant les yeux les consolations & promesses diuines, & plusieurs grandes choses & excellentes: comme le Fils de Dieu luy-mesme vse de ces parolles tant douces, Mon ioug gracieux, & mon fardeau ligier. C'est a dire, ma charge est paix, & mon ioug est consolation.

Et touteffois ce saint personnage & si prudēt porte vn tel honneur a ces Conciles tant renommez & generaux, qu'il les separe des decrets & traditions de tous les autres Conciles & Euesques, & afferme qu'on doit grandement honorer ces quatre Conciles. Et en ce mesme passage il dit, que les decrets & ordonnances des Conciles vniuersels ou generaux meritēt bien d'estre obseruees. Il vaut mieux que i'allegue ses propres mots, L'autorite est salutaire, dit-il: c'est a dire, c'est vne chose fort vtile d'obeir en toute reuerence a

ces,

ces Conciles, & les estimer grandement.

Or saint Augustin a dit cela d'une bonne affectiō: tant y-a neantmoins qu'il n'a veu aucun de ces Conciles anciens, & n'y a este present: sans cela il eut bien autremēt iugé de ceux-ci. Il y a seulement quatre Conciles principaux, desquels assez de fois est fait mention es liures & histoires: & sont si renommez, que les Euesques Romains les ont comparez aux quatre Euangiles, comme ils gazouillent en leurs Decrets. Le premier est le Concile de Nicee, lequel fut celebré en ceste ville-la, le quinziēme an de l'empire de Constantin le grand, 35. ans auāt que saint Augustin naquit. Ceste ville est en Asie. Le second fut celebré a Constantinoble le 3. an de l'Empereur Gratien & de Theodose premier: qui lors gouuernoient ensemble l'empire. Lors S. Augustin n'estoit pas encore conuerti: & il est bien possible qu'il ne pouuoit lors auoir qu'environ vingt six ans, d'autant qu'il ne pouuoit estre esmeu de tels affaires de si grande importance. Le troisiēme est le Concile d'Ephese, lequel fut celebré apres la mort de saint Augustin: & quelque peu apres il y eut vn autre Concile tenu a Chalcedoine. Si on lit les histoires, on pourra voir que toutes ces choses sont certaines & veritables, comme la supputation des ans a este diligemment calculee.

I'auoye a dire cela, a cause de ceste parolle de saint Augustin, qui a este recitee ci dessus: ascauoir, que ces Conciles vniuersels ou generaux doyuent estre grandement estimez: a celle fin que son opinion soit droitement entendue. C'est qu'il parle seulement de ces deux Conciles de Nicee & de Constantinoble, esquels il n'auoit este present, mais depuis les a cognus par les escrits de ceux qui auoyent este auparauant. Or est-il ainsi qu'en ce temps-la, il n'y auoit nul debat entre les Euesques touchant la preeminēce. Car il ny auoit nul Euesque, non pas mesme celuy de Rome, ou quelque autre quel qu'il fut, qui eut peu assembler tels Conciles:

comme les Conciles moindres & particuliers demōstrent bien cela, qui ont este celebrez par tout es prouinces entre les Euesques sās edits des Empereurs. Et selon mon iugemēt il semble biē que les Cōciles vniuersels sōt ainsi nōmez d'autāt qu'ils estoyēt assēblez par l'autorite du chef souuerain, & monarque ou seigneur vniuersel, ascauoir l'Empereur, & que to' Euesques y estoyēt appelez de toutes prouīces par iceluy. Car les hystoires rendēt suffisant tesmōignage de cela, encore que to' les Papistes soyēt enragez & embrasez de cupidite de nuire, que Syluestre Euesque de Rome n'eut iamais fait assēbler le Cōcile de Nicee, si l'Empereur Cōstātin n'y eut mis la main. Et qu'est-ce que ce pource Euesque de Rome eut peu faire pour lors, veu q̄ les Euesques d'Asie & de Grece ne luy estoyent point subiets? Car s'il eut peu assembler le Cōcile sās le mandemēt ou autoritē de l'Empereur Cōstātin, il eut choisi & limité quelque lieu en Italie, ou a Rome, ou en quelque autre ville voisine, & non point en Nicee qui est en Asie, vn lieu si loingtain, qui est outre la mer, ou il estoit bien certain que son autorite n'eust este grandement estimee, comme il le scauoit bien luy-mesme, & l'auoit assez experimentē: & eut contraint l'Empereur Constantin d'y venir.

En di autāt des autres trois Cōciles plus renōmez. Si les Empereurs, Gratiē, Theodose premier, & Theodose secōd, & Marciē n'eussent fait assembler ces trois grās Cōciles, iamais ils n'eussēt este tenus par l'autorite de l'Euesque de Rome ne des autres Euesques. Car les Euesques des autres regions ne craignoient pour lors l'Euesque de Rome non plus q̄ l'Euesque de Mayence craint aujourd'huy celuy de Treues, ou l'Euesque de Treues celuy de Coloigne, & l'Euesque de Coloigne tous les deux autres. Car ils ont ceste reigle entr'eux. Il n'y a poīnt de dominiō de pareil a pareil.

Touttefois le lecteur prudent apperceura ceci facilement en toutes hystoires, que desia dēs longs temps les
Euesques

Euesques de Rome ont este frappez de ceste maladie d'ambition enragee, & ceste fievre chaude les a bruslez, de chercher domination & monarchie sur les autres Euesques. Mais la puissance des Monarches & Empereurs les a empeschez de paruenir iusques-là. Car les Euesques de Rome espancherent alors par tous pays des epistres orgueilleuses & pleines d'autorite magistrale, tant en Afrique qu'en Asie, & mesme deuant le Concile de Nicee: esquelles il y auoit ceci contenu, qu'il ne falloit rien publiquement determiner ou en l'Eglise ou en l'Empire sans l'autorite du siege Romain. Mais pour lors il n'y auoit encore persone q. craignit beaucoup ce siege-la: & les Euesques d'Asie, d'Afrique & d'Egypte laissoient couler toutes choses sans dire mot: & combien qu'ils respondirent assez humainement a l'Euesque de Rome, se submettans a luy en toute honneste reuerence, toutesfois ils ne luy ottroyerent aucune puissance. Si on lit toutes les histoires, on y trouuera ceci. Pour le moins qu'on aduise a ceci, qu'on ne se soucie des clameurs de ces flattereaux & escornifleurs qui mangent les bons & frians morceaux en la cour du Pape: plustost qu'on lise les histoires, & qu'on les ait incessamment deuant les yeux.

Or comme ainsi soit que ce beau mot de Concile commençast a obtenir grande autorite & estimation entre les Chrestiens, mesme a cause de ces parolles de saint Augustin, desquelles nous auons fait mention ci dessus, & que ces excellēs Empereurs ou Monarches fussēt desia morts: les Euesques de Rome ont tousiours tendu a ce but, comment ils pourroyent attirer a eux ceste puissance d'assembler le Concile, & faire que cela fut du tout sous leur autorite: en sorte que tous peuples & generalement toute l'Eglise fussent contrains d'adiouster foy a tout ce qu'ils diroyent: & qu'en ceste sorte, sous ce tant beau nom & saint tiltre de Concile vniuersel ils fussent faits seigneurs vniuersels & Monarques de tout le monde. Or il n'y a point de doute

que ie n'aye yci touché iustement au but de la verité, & que ie n'aye frappé droit a leur conscience, voire s'il y a quelque conscience en eux. Et certes la verité est telle: comme il y en a aucuns qui crachent ou touffent quelque fois, a celle fin qu'on n'entende le son de embas, ou qu'ils font croire qu'ils ont quelque maladie, & le font par finesse, quand ils sentent bien qu'une mauuaise conscience les reynord: aussi les Euesques Romains ont pretédu ie ne scay quelle maladie pour couvrir leur cupidite cruelle, par laquelle ils aspiroyent secrettement a la domination souueraine, & n'ont cessé que finalement ils n'ayent esté faits Constantin, Gratien, Theodose, Marcien: & maintenant ils ont plus de puissance que ces quatre Monarches avec leurs quatre Conciles. Car c'est-ci la resolution de tous les Conciles du Pape, Je le veux ainsi, ie le commande ainsi, il n'y aura autre raison que ma volôte. Ce n'a point esté toutefois par tout qu'ils ont obtenu ceste puissance, & toute l'Eglise ne leur a point rendu obeissance, ains seulement en cest endroit de l'empire Romain, où Charlemaigne auoit domination. Car les Papes ont fait & obtenu plusieurs choses & grâdes par le moyen d'iceluy: & ont tant fait, qu'estans inspirez & possédez de tous les diables & furies infernales, ils ont foulé cruellement aux pieds aucuns Empereurs, & les ont trahis par diuerses fineses & horribles meschâcetez: ce qu'ils font encore aujourd'huy fort songneusemēt & de propos delibéré, & autant que leur faculté & puissance se peut estēdre. Mernirinus en faisant son testamēt a predit ces choses des Papes, & en a admonesté l'Empereur Charles cinquiesme.

Or i'ay déclaré iusqu'yci ce que S. Augustin a escrit des Conciles. Maintenant i'adiousteray quelle est son opinion touchant les Peres. Il escrit des Peres a saint Hierosme en ceste sorte: ce que Gratien aussi recite en la 9. distinction, Quand ie considere diligēment toutes les opinions de tous ceux qui iamaïs ont escrit en l'Eglise,

glise, & quand ie les confere songneusement les vnes avec les autres, ie trouue qu'il n'y a que la sainte Escriture, qui n'est point errante, ou qui ne se foruoye point. Je li bien les autres : mais quelque chose qu'ils soyent plus excellens en saintete ou scauoir que les autres, si est-ce que ie ne leur voudroye point bailler si grande authorite, que ie pense qu'ils ayent enseigné ou escrit choses veritables, sinon que ie soye du tout conueincu ou par tesmoignages euidens des saintes Escritures, ou bien par argumens manifestes, qu'il faut que les choses soyent telles. Item en ce mesme lieu du Decret, le passage de saint Augustin est allegué, qui est au prologue du liure de la Trinite, où il dit, Ne suy point mes escrits, comme si c'estoit vne Escriture sainte : mais croy fermement & sans aucune doute tout ce que tu trouueras en la sainte Bible, a quoy tu ne consentois point auparauant. Mais en mes escrits tu n'y dois rien appeller certain, estant esmeu de l'authorite de mon nom, de ce que tu estimois incertain auparavant, sinon que ie móstre par fermes & viues raisons, qu'il est certain & veritable.

Il met plusieurs telles sentences ailleurs, comme quād il dit, Je veux qu'on lise mes liures tout ainsi que ie li les liures des autres. Je laisse les autres passages pour maintenant. Or les Papistes scauent tresbien que par tout en saint Augustin il y a de telles & semblables sentences, qui sont mesmes redigees en leurs Canons & au grand Decret. Et touteffois il y a vne obstination Pharisaique en eux, qui leur fait abbayer orgueilleusement contre la verite. Quand ils cachent & ferment les yeux a tels passages, ils le font contre leur conscience : ils veulent que les Peres, les dits des Anciens, les Euesques Romains, qui ont este pour la plupart gens fort ignorans soyent preferez de beaucoup a toutes ces choses. Nous voyons donc que ce bon docteur saint Augustin a trouué beaucoup de choses a redire aux Peres qui ont este deuant luy, veu

qu'il ne veut estre asubietti a leur autorite, & qu'eux tous, voire luy-mesme, soyent subiets a la seule Escriture sainte. Si vn si excellent personnage ne nous eut voulu admonnester de bonne heure de choses grandes & fort necessaires, quel besoing estoit-il qu'il vst de parolles si vehementes, quand il dit, quelque saintete ou scauoir qu'il y ait en eux? Il luy eut este beaucoup plus facile de dire, l'estime bien autāt tout ce que les Anciens ont escrit, que la sainte Escritures mesme, a cause de leur saintete. Mais voyla, il nie fort & ferme, que l'autorite des anciens doye estre si grandemēt estimee. Cōme en vne autre epistre qu'il escrit a saint Hierosme, qui se courrouçoit fort aigremēt de ce que saint Augustin auoit repris quelque passage du commentaire qu'il auoit fait sur l'epistre de saint Paul aux Galatiens, il dit ainsi, Mon frere (comme certes S. Augustin estoit homme de grande humanite) ie ne cuide pas que tu demādes cela, qu'on repoute tes liures pareils aux liures des Prophetes & Apostres.

A la verite ie ne voudroye point qu'un tel honneur me fut fait par vn tel personnage si saint & si scauant, qu'il m'admonnestast par vne semblable epistre, comme S. Hierosme a este admonneste par S. Augustin: ascauoir, de ne requerir ou desirer que mes liures fussēt egalez ou accomparez a la sainte Escriture. Car il n'y a homme qui ne deuit rougir de honte en soy-mesme, seulement de penser, que nostre autorite soit faite egale a l'autorite du S. Esprit. Mais c'est-ci que ie traite maintenant: ascauoir, que S. Augustin a veu & bien cogneu que les Peres, & ceux qui ont escrit en l'Eglise, ont este hommes comme les autres, & qu'ils n'ont point du tout surmōte l'infirmite de laquelle il est parlē au 7. des Romains. Et pourtāt il ne veut point qu'on se fie ni aux ordonnances des Conciles, ni aux escrits des Peres: luy-mesme ne s'y fie point, quelque autorite, quelque saintete & scauoir qu'il y ait: voire il ne veut

veut pas qu'on luy adiouste foy, & encore beaucoup moins a ceux qui deuoyent venir apres luy, & estre pires: mais il veut que la sainte Escriture soit la seule & perpetuelle reigle, par laquelle la verite soit estimee. Côme aussi i'ay recité ci dessus de saint Bernard, lequel dit que les arbres luy ont este pour precepteurs & docteurs, & qu'il aimoit mieux boire de la fontaine que des ruisseaux. Il n'eut iamais mis hors de sa bouche ces parolles: fil eut pensé que les liures des anciens deussent estre egalez aux saintes Escritures, & si n'y eut eu rien a redire. Mais plustost il eut parlé ainsi, C'est tout-vn que ie boyue ou de la fontaine de la sainte Escriture, ou des ruisseaux des Peres. Mais laissant-là les ruisseaux, il baille apres les fontaines, & apres la source viue sortant & iettant ses bouillons de la roche.

Qu'est-il doncques de faire maintenant? Renuoyons-nous l'Eglise a la doctrine & aux obseruations & ceremonies ordonnees par les Peres? Saint Augustin iette par terre & met bas tout ce conseil, & ne veut point que nous constituions quelque but sur le fondement de nos opinions: veu qu'il afferme ouuertement & hardiment qu'il ne faut point adiouster foy, ou s'appuyer ne sur les Peres, ne sur les Conciles, ne sur les Euesques, quelque saintete, quelque dignite & scauoir qu'il y ait en eux: & mesme il ne s'exempte point du nombre. Mais il veut que nous suyions les fontaines mesmes, qui est la sainte Bible: & dit que sans les saintes Escritures toutes choses sont friuoles & incertaines. Or si nous excluons yci saint Augustin, nous faisons tout le contraire de nostre intention: ascauoir, d'autant que nous voudrions auoir vne Eglise selon la doctrine des Peres. Car si saint Augustin est mis hors du rang des Peres, les autres ne deuront point estre grandement estimez: & n'est point conuenable, & ce n'est point chose qu'on doyue endurer en l'Eglise, qu'aucun prononce vn tel iugemēt si orgueil-

leux & chagrin de saint Augustin, cōme s'il n'estoit pas bien digne d'estre nombré entre les plus excellens de tous ceux q'ont iamais escrit en l'Eglise: cōme ainsi soit qu'il ait este beaucoup plus authorize en l'Eglise que tous les autres tant es escholles qu'es temples: & qu'il ait grandement aidé, & proufité beaucoup luy seul entre les autres tāt pour la façon d'enseigner que pour l'administration de la Parolle. Et touttefois vous qui nous estes aduersaires, taschez de nous amener iusques a ce but, & nous voulez contraindre a ce trauail infini & friuole, qu'auant toutes choses nous cōfessions les escrits & opinions des Peres anciens, & les decrets des Conciles avec la sainte Escriture, & que nous en iugions puis apres selon la reigle qu'ils auront donnee. Auant que cela se face pleinement, ou qu'il se puisse faire, il aduiendra que nous tous qui sommes encore en vie, serons preuenus de la mort long temps auparauant, ou par le dernier iour.

Mais mettons vn peu a part les admonitions pures & bonnes de saint Augustin, de saint Bernard, & des autres semblables: & cela fait, considerons aussi les decrets & ordonnances des Conciles, & les escrits des Peres: ascauoir, si nous pourrions former & dresser nostre vie selon ce qu'ils auront ordonné & déterminé. Mais aussi considerons, & dressons nos yeux sur les plus excellens Conciles: ascauoir, sur les deux que saint Augustin prise, le Concile de Nicee, & le Concile de Constantinoble, combien qu'il n'ait veu ne l'un ne l'autre, comme on a veu ci dessus: & mesme afin que nous soyons appuyez plus fermement & sur plus grande certitude, & aussi que sans y penser nous ne nous aheurions point cōtre quelque mauuaise rencontre, regardons au premier & plus excellent Cōcile, qui fut tenu en Ierusalem par les Apostres, duquel il est fait mention au 15. chapitre des Actes. Là les Apostres, ces grans & si excellens personnages & vrais seruiteurs de Dieu disent ouuertement, que c'est le saint

Esprig

Esprit qui a constitué & ordonné ces choses par eux, parlans ainsi, Il a semblé bõ au saint Esprit & a nous, de ne vous imposer plus grosse charge que ces choses necessaires : que vous-vous absteniez des choses dediees aux idoles, de sang, & chose estoufee, & de fornication : & quand vous-vous en deporterez, vous ferez bien.

Or nous oyons yci, que le saint Esprit (duquel ces hautes trompettes de Conciles ont accoustumé de se glorifier) ordonne & commande que nous-nous abstentions des viandes offertes aux idoles, de sang & de de chose estoufee. Si nous voulons auoir auourd'huy vne Eglise corrigee & reformee selon ce Concile (lequel comme il est le premier & celebre par les Apostres, aussi en doit-on faire grande estime) alors il nous faudra enseigner publiquement, & insister principalement, qu'il n'y ait ne princes, ne gentils-hommes, ne bourgeois, qui osent mager des cheurculx, ou de quelque venaison, soit de cerf ou de sanglier, ne de gibbier sauuage. Car le iust ou le brouët auquel ces viandes auront este cuites, non seulement est assaisonné de poyure ou autre espice, mais aussi est teinct de sang. Il faudra donc que doreseuuant nous-nous abstentions de ces choses : car elles sont toutes apprestees en sang : & principalement les rustiques & payfans, & mesmes les autres peres de famille n'oseront plus manger des saucisses, ou pastez, ou endouilles ou autres choses farcies. Car on a accoustumé d'assaisonner ou farcir telles viandes non seulement de sang liquide, mais aussi figé & caillé. D'auantage, encore se deura-on abstenir beaucoup plus de manger des lieures, counils, oyes sauages & autres oiseaux : car on estoufe coustumierement toutes ces viandes. Ce que les veneurs & chas-seurs scauent bien, & les fauconniers aussi, encore que la venaison ne soit point mise au pot pour estre buoillie, mais qu'on la rostisse seulement.

Maintenant si selon le decret & ordonnance de ce
d.ij.

Cócile, il faut que l'Eglise de Christ & les Chrestiens se deportent de manger du sang & de quelque chose estoufee: alors les Iuifs & Rabins ces racailles du dernier temps gouverneront nostre Eglise par leurs resfue-ries & escrits friuoles. Car ceux-ci ont vn liure qu'ils nomment Thalmud, qui est d'une grosseur incroya-ble, lequel traite de la manducation du sang. Ils font si grand scrupule de manger du sang, que s'ils sont avec vn Payen ou Chrestien, qu'ils ne mengeront point de chair de veau ou de bœuf, encore qu'elle n'ait point este estoufee, ains tuee d'un cousteau, & songneusement lauee. Et qui plus est, ces superstitieux hy-pocrites aymeroyent mieux d'estre mille & mille fois meurtris & occis, que de toucher a vn petit morceau de chair, laquelle ils n'auront occise eux-mesmes. O bon Dieu, commet nous serions mal-heureux & mise-rables! & de quel laqs serions-nous entortillez! seule-met de ces deux articles, du sang & de chose estoufee.

Or s'en voient maintenant ces laudateurs de Con-ciles, & qu'ils astreignent l'Eglise a l'obeissance de ce Concile: & lors ie suyuray volontiers leur exemple: mais si ceste entreprise ne vient a bone fin, aussi ne me soucieray-ie pas beaucoup de ces crieries importu-nes, Conciles, Cóciles. Oubien ie reietteray ces voix hautaines dedas leur gosier mesme, Mais c'estes-vous qui ne voulez ouyr les Conciles ne les Peres, veu que vous ne suyuez point ce grad & excellēt preuier Con-cile, ne les Apostres, q sōt les grās & souuerains Peres. Me pourras-tu contraindre a garder & obseruer si sain-ctement & estroittemēt les escrits des Peres & les or-donnances des Conciles: & cependant tu ne voudras toucher leurs ordōnances nō pas du petit doigt seule-mēt, nō pas ietter les yeux? Le diroye certes a telles gēs ce que i'ay dit contre les obseruateurs du Sabbat: asca-uoir, qu'eux cōmencēt les premiers a obseruer la Loy de Moyse, & puis apres nous la garderōs. Au reste veu que les Iuifs ne gardēt point la Loy, ce seroit vne cho-se fort

se fort ridicule de requerir cela de nous.

On pourra repliquer, Il ne se peut faire que maintenant on obserue les decrets de ce Concile des Apostres. Car le cōtraire: a scauoir, la liberte Chrestienne de manger du sang est maintenant trop auant paruenue a toute l'Eglise. Mais ceci ne fait rien a propos, veu que nous auons vne fois deliberé pour la reformation de l'Eglise de suyure l'authorite des Conciles, veu que là aussi il est dit ouuertemēt, Il a semblé bon au saint Esprit. Il n'y a ne coustume, ne longue espace de temps, ne subterfuges de quelque sorte qu'ils soyent forgez, qui puissent auoir vigueur contre le saint Esprit: & on ne pourroit apporter tranquillite aux consciences troublees par ces belles excuses fardees. Si estans deuenus gens de Conciles nous commençons a suyure les Conciles: il faudra bien alors que nous oyons par dessus tous les autres ce saint & souuerain premier Concile des Apostres, & que nous le suyuiions reuerement sans en rien omettre. Sinon, nous sommes en liberte de laisser tous les autres Conciles. Car ceux qui presidoient en ce premier & souuerain Cōcile, ce n'estoyent point des Euesques ou Peres vulgaires, cōme ceux qui ont assisté es autres: mais c'estoyent les Apostres du Fils de Dieu & de nostre Seigneur Iesus Christ, remplis du S. Esprit, les souuerains monarches de toutel'Eglise, & Peres tresreuerens & tressaincts.

Outreplus, ce n'est pas vne chose fort difficile de se garder de mager du sang & d'une beste estoufee. Que s'il nous falloit viure de fromēt, d'herbes, de pōmes, de raues, & autres choses qui croissent en la terre, cōme auant le deluge les premiers Peres ont vsé de ces choses, veu qu'il n'estoit encore permis de manger de la chair: que seroit-ce? Il est certain que nous ne mourrions de faim tout incōtinent, encore qu'il no^e fallut du tout abstenir de chair & du poisson. Car encore auourd'huy verra-on plusieurs hōmes assez sains & dispos, qui ne magerōt chair ne poisson que biē peu souuēt. Ainsi en
d. iij.

cest endroit l'impossibilite ne sert point d'excuse pour cōfermer nos consciēces cōtre le S. Esprit, veu que sans faire grād tort a nos ames n'y a nos corps, on peut facilement amener les choses iusqu'a ce poinct, que non seulement on pourroit viure sans sang & sans manger de quelque beste estoufee, cōme Moyse l'a cōmādē: mais aussi que nous-nous garderions totalement de māger de la chair & du poisson, & de n'en auoir point du tout cōme deuāt le deluge. Et ie m'esbahi grādement, cōment Satan qui aujourd'huy de nostre temps a suscitē tant de sectes prodigieuses, n'a point aussi mis en auant ces belles cogitiōs, lesquelles peuuent estre deffēdues par grans & notables exemples de la saincte Esriture.

Or si nous voulōs dire, q̄ nō seulement toutes ces choses sont maintenāt impossibles, mais aussi qu'elles sont desia tombees bas d'elles-mesmes, & sont cōuerties en mauuais vsage, & abolies par vsage cōtraire, cōme i'ay accoustumē d'appeller les Canons surannez abolis & morts: encore ne sera-ce point vne ferme solutiō de l'argument. Ie scay biē, q̄ le Pape & ses beaux Cardinaux se seruēt de ces passages & autres sēblables, ou en tirēt argument pour se deffēdre, cōme s'ils auoyēt puissance de chāger ces trefanciens statuts du Cōcile des Apostres: mais ils mētēt impudēment en ceci, cōme ils font aussi en toutes autres choses. Car ils ne peuuent pduire ou exēple ou tesmoignage d'aucune Eglise, laquelle ait fait vn tel chāgemēt, ou q̄ ait ordōné de le faire. Car l'Eglise se n'a nulle autorite de changer les decrets & sainctes ordonnances du S. Esprit: & aussi elle ne s'est iamais voulu attribuer ceste puissance, & ne le voudra iamais.

Mais ces aueugles & conducteurs d'aueugles n'ont nuls yeux pour voir clair yci, d'autāt qu'ils battent les verges quand ils en ont este frappez. Car quand cela aura este permis, que les hommes ayent puissance de changer les decrets, les statuts & ordonnāces du sainct Esprit: alors en toute liberte dēs ceste heure mesme nous foulerōs aux pieds dedans les bouēs & boubiers & le

& le Pape & les Cardinaux avec toutes leurs bulles, breuets, papiers, parchemins, decrets & decretales: & dirons hardiment, Si les decrets du premier & excellent Concile: ascauoir, le Concile des Apostres, peuuent estre changez par les hommes, desquels on peut dire pour certain qu'ils ont le saint Esprit, cōme aussi eux-mesmes disent, Il a semblé au saint Esprit & a nous: alors nous ferons beaucoup moins de conte de toutes les ordonnances, statuts, edicts & decrets du Pape: d'autant que nous ne sommes pas si certains que toutes ces choses soyēt du saint Esprit, que ces grans & excellēs seruiteurs de Dieu ont iadis decreté & ordōné. Car cōme ie pense, les Apostres meritent bien qu'on leur attribue plus d'authorite qu'au Pape: & si nous ne les mettōs au dessus des Euesques Romains (cōme cest heretique Luther enseigne) toutefois nous souffrirōs que les Apostres ayent place au siege Apostolique a costé des Papes. Car on voit que les Papes sont souuēt les plus mechans, monstres horribles, meurtriers de parēs, garnemens desesperez: entre lesquels il y a des guerres execrables, pour la gloire, pour les biens & richesses, pour la domination: en sorte que l'un confermera les ordonnances de l'autre, les changera, les rēuertera, ou les rompra du tout selō qu'il luy viēdra en fantasie: & n'y a ne fin ne mesure en leurs chāgemens. Mais le S. Esprit qui est l'Esprit de la verite ferme & eternelle, ne peut pas ainsi batailler contre soy-mesme: & les Apostres n'ont point este de tels garnemens, ne faux prophetes, ne tyrans. Et pourtant il faut yci respondre quelque chose qui soit plus ferme: il n'y aura nulle bonne ne sainte conscience qui acquiesce a ces resueries & parolles friuoles. Sinon que nous vueillions dire, que l'Eglise de Dieu est bastie entre les roseaux, ployant a tous vents, & preste a s'encliner de quelque costé & en quelque lieu que le Pape & ses beaux Cardinaux & autres supposts la voudrōt pousser par la rage de leurs cupiditez abominables. Mais il est ainsi, qu'il ne faut point que

d.iiij.

l'Eglise soit appuyee sur vn roseau, ains fondee & bastie sur la roche ferme. Matthieu 7. & 16.

Et ne faut point qu'on dise, Ces choses sont abolies & tombees bas d'elles-mesmes, & par faute d'en vser elles sont venues en desaccoustumace: & l'Eglise ne les a point chagees, il ne les faut donc plus obseruer. Mon bel ami, Ces choses, dis-tu, ont-elles este abolies en ne les gardant point? Et le Legiste dit, Cela se porte mal, qu'elles n'ont este gardees. Mais estimera-on que les droits & les loix soyent abolies & aneanties pour ceste raison que les loix sont mesprisees, & que des vices puis apres on en a fait des coustumes? S'il est ainsi, crachons hardiment contre toutes loix, & en toute liberte laschons la bride a toutes nos cupiditez. Que la putain publique crie & se glorifie hardiment: car a l'en droit de l'homme adultere & de la femme adultere le septiesme commandement de la Loy est aboli. Il y a bien pis, Nous qui sommes enfans d'Adam, & a cause de nos offenses damnez avec les diables, celebrerons vn Concile contre la haute maieste de Dieu, & nous eleuans contre luy, nous dirons, O Dieu, tu oys ceci: toutes mandemens & edits sont tóbez bas entre nous malheureux hommes & diables, & ne sont point obseruez pour ceste raison nous ne sommes point obligez a les obseruer: nous voulós donc ceci necessairement, que tu trouues bon tout ce qui nous plaist, & que tu ne nous condamnes point: veu qu'il n'y a point de peché, quand la Loy est abolie par faute d'en vser. Ainsi les larrons, les ruisseurs, les brigans, les boutefeux se peuuent iustifier eux-mesmes, & dire hardiment en barbe aux plus grás Princes & Empereurs, Nous ne vous deuons obeissance quelecoque, ô Princes & Rois: mais nous faisons bien en amassant pechez sur pechez. Car toutes vos loix & ordonnances sont tóbees bas entre-nous.

Or qu'on nous donne yci conseil que c'est que nous auons a faire. Si on respond, Ce Concile des Apostres est aboli ce qui est vray: où il a este changé par l'Eglise

se Chrestienne, ce qui est faux : ce ne sera point vne res-
 ponse assez ferme. Quel incouuenient y auroit-il, si ces
 mots estoyét raclez, Il a ainsi semblé bon au saint Es-
 prit? Possible est qu'õ pouruoiroit au fait par ce moyẽ.
 Estimes-tu que ce soit-ci vne chose si ridicule & friuo-
 le? Songe quelque chose de meilleur, si tu peux. Car si
 tu ne racles le nom du saint Esprit, il faudra necessai-
 rement qu'il y ait de deux chose l'vne, & peut-on tirer
 cela de ce qui a este fait & ordonné en ce Concile : ou
 que nous & les Papistes rendiõs obeissance a ce Con-
 cile en toute reuerence & simplicité : ou bien si cela est
 en nostre liberte pleine d'y obeir ou de n'y obeir poit,
 que nos ennemis cessent finalement de nous faire fas-
 cherie, a nous-autres pources heretiques, & qu'ils ne
 crient plus ainsi a l'estourdi, Conciles, Conciles, Con-
 ciles. Car si on ne doit point suyure ce Concile, aussi
 ne deura-on point obeir aux autres Conciles : & au-
 contraire il faudra que nos ennemis oyent ces cla-
 meurs, Medecin, gueri-toy toy-mesme, Compagnon,
 pren-toy par le nez. Que ces grans criers & vanteurs
 obeissent premierement a ce grand Concile : & alors
 nous les suyurons volontiers. Et s'ils ne le font, alors
 on cognoistra ouuertement, qu'ils n'insistent point
 sur ces crieries d'aucun zele qu'ils ayent : mais c'est
 seulement pour se mocquer & faire fascherie aux hom-
 mes, & pour estonner les pources consciences par vne
 obstination malicieuse & desloyaue, peruerse : & ten-
 dent a perdre & ruiner tant de millions d'ames.

Or ie parle yci de ce Concile des Apostres pour ce-
 ste raison seulement, que ce Concile est le premier, &
 plus excellent beaucoup que tous les autres : & toutef-
 fois c'est afin que par ce moyen nous premeditions &
 considerions vn peu plus attentiuement ces choses si
 hautes & grandes, auant que nous requerions que l'E-
 glise soit remise en bonne forme & estat, & que toute
 la vie des Chrestiens soit bien corrigee & reformee se-
 lon les Conciles. Car puis que ce seul Concile nous en

gendre tant de disputes & perplexitez, que sera-ce si on vient a peser les decrets des autres Conciles, & si on les defend comme fermes & immuables? De ma part, certes ie confesse bien qu'il n'y a rien si facile, que de faire sortir ce mot de Concile hors de la bouche: & y a-il rié plus facile que de crier a gueulle ouuerte, On doit garder les Conciles, On doit rendre obeissance aux Cóciles. Mais ie vous prie, en ceci semblablement y aura-il si grâde facilite, q̄ les decrets & statuts des plus grans & excellés Conciles soyét reuocquez des entens?

Bonnes gens, que direz-vous a cela? Le Pape & ses Cardinaux ont yci leurs eschappatoires, & se glorifiét en toute audace & orgueil, q̄ le Pape est par dessus tous les Conciles, & que luy seul peut sauuer iusques a tant qu'il voudra, & dominer cōme bon luy semblera. Mais si par vn tel moyen on peut pouruoir a ces choses, lors laissons-là le mot & ces crieries estourdies, On doit obseruer les Conciles: & crions, Le Pape, le Pape, la doctrine du Pape doit estre gardee: & alors nous eschapperōs d'une ioyeue façon, & deuiendrōs gentils Chrestiens, tels qu'ils sont. Car dequoy nous proufitera vn Cócile, si noⁿ ne pouuōs, ni ne voulōs obseruer les decrets d'iceluy, mais si seulemēt nostre plaisir est de noⁿ glorifier du mot & de ces trois syllabes? Et afin qu'e ce tēps-ci ie dise quelque chose pour rire: ceci me sembleroit vne chose fort belle & digne des Papistes, s'il estoit questiō seulemēt de quelques petits traits de plume, & de trois syllabes: alors nous pourrōs bié faire des Papes & Cardinaux de ces copistes & dataires de Rome, & autres esgratigneurs de parchemin. Ceux-ci pourroyét bié pourtraire ces lettres, grâdes, petites, dorees, enluminees, rouges, noires, verdes, azurees, & telles qu'on vouldra. Alors noⁿ vouldrōs de ioye frapper des mains sur quelq̄ eschaufaut, ou il n'y auroit persōne, de ce q̄ l'Eglise Chrestienne seroit bié reformee selō les Cóciles. Car s'il n'est nullemēt besoīg de garder les choses qui aurōt este determinees & ordōnees aux Cóciles, lors il

ne faudroit q̄ ces trois syllabes, Cōcile, pour biē pour-
 uoir a l'Eglise. Mais si les lettres peītes desplaisēt, ayōs
 lors nostre recours aux peintres, graueurs, fondeurs &
 imprimeurs, afin qu'ils nous peignent, grauent, forgēt
 & impriment des Conciles. En ceste sorte voirement
 les affaires de l'Eglise se porteroient fort bien. Mais
 aussi faudroit-il faire ceci, que tous ces ouuriers fus-
 sent faits Papes, Cardinaux ou Euesques. Car c'est tout
 vn si on garde les decretz du Cōcile, ou si on ne les gar-
 de pas: il est question seulement de ce mot Concile.

Outre toutes ces choses, que seroit-ce si tous les hō-
 mes auoyent les yeux creuez, & s'ils ne pouuoient voir
 les Cōciles peints, escripts, grauez, & imprimez? Le vous
 supplie, quel moyen pourroit-on alors tenir pour re-
 former l'Eglise par les Conciles? Je baille mon conseil
 sur cela: que les Papistes recourent a leurs Choraux de
 Magdeburg, ou de Halberstad, & au lieu qu'ils ont ac-
 coustumé de chanter & crailler leur *Quicumque a Pri-
 me*, il leur soit commandé de crier a gueulle bee, Con-
 cile, Cōcile. Car on pourroit biē ouyr bramer ces gros
 taureaux de delà la riuiere d'Albe, encore que no^r fus-
 sions tous aueugles: & lors il y auroit vn bon gouver-
 nement en l'Eglise. Et d'auātage on deuroit eleuer ces
 Choristes a la dignité Papale, ou leur bailler des cha-
 peaux de Cardinaux, cōme a ceux qui pourroyent fa-
 cilement reformer toute l'Eglise. Mais ie parleray ci
 apres vn peu plus amplemement de ce Concile des A-
 postres. Car la prolixité me croist yci entre les mains,
 cependāt que ie m'arreste trop longuemēt sur ce pro-
 pos. Encore avec ce Concile il y a des choses necessai-
 res a dire du Concile de Nicee, qui est le plus excellēt
 & le premier general Cōcile apres celuy des Apostres.

Or il a este determiné en ce Concile de Nicee, que
 les Chrestiens qui estoient trebuschez en quelque fau-
 te, deuoient estre derechef receus a repentance durant
 l'espace de sept ans. Que s'ils fussent venus a l'heure de
 la mort durant ce temps-là, lors on les deuoit absoudre

& deliurer: & le Sacrement ne leur deuoit estre refusé. Et toutesfois ces gentils proclamateurs de Conciles ne gardent point maintenant ceste determination: mais plustost ils font tout le contraire, renuoyans au Purgatoire les Chrestiens qui meurent cependât, avec le residu de leur repentance. Car s'il falloit que le Pape obeïst a ce statut du Concile de Nicee, ô bon Dieu, a quelle miserable & infame pourete seroit-il réduit avec to^s ses monasteres? s'il perdoit tout en vn coup tout le prouffit & le gain de ceste sienne miniere d'argent, & le reuenu qu'il tire de son gélil Purgatoire, des Meses pour les trespassez, pelerinages, fondations, confrairies, indulgences & bulles. Le dieu que le Pape adore, le vueille garder. Satan, di-ie, maintiène ce beau Cōfistoire de Cardinaux, les Euesques, Abbez, Moynes, Nonnains, a ce que l'Eglise ne soit point reformee selon ce Concile. Où est-ce que ces pources gens seroyēt amenez, si cela se faisoit? Tant y-a, pource que ceci regarde seulement ma personne, comme ayant de si grande vehemēce & impetuosite debatue de ce fait cōtre le Pape: & que ie coniecture facilement comment les parrôles de ce Concile pourroyēt estre reiettees sur moy: ie lairray-là pour ceste heure ce Concile, & ie traitteray ce qui appartient a toutes les deux parties d'un costé & d'autre, & qui sert a refuter ces grans proclamateurs de Conciles.

Entre autres choses ce Concile aussi a determiné, que ceux qui abandonnent la guerre a cause de la religion, & puis apres retournent a la guerre, doyuent faire penitence, & conuerser avec les nouueaux conuertis par l'espace de cinq ans: & deux ans apres ils doyuent estre receus au Sacrement. En cest endroit i'enten que le mot de religion signifie la doctrine catholique de la foy Chrestienne: dequoy il sera parlé ci apres plus amplement. Et ie ne veux point maintenāt esmouuoir aucune dispute, de peur que ie ne soye destourné de mon propos par questions suruenantes: ascauoir, si le
Concile

Concile de Nicee defend les guerres, ou bien & iusques a quel poinct il dōne autorite aux autres de defendre les guerres & de les cōdamner: veu mesme que ceux qui suyuent la guerre ne renient point la foy autrement. Dequoy nous auons desia parlé ci dessus.

Mais voyci dequoy il est yci questiō: ascauoir, si cest article obserué iusques a maintenant, & si ce decret du Cōcile de Nicee doit estre gardé a l'aduenir: que nul homme de guerre ne puisse estre sauué, ou estre Chrestien. Car le Pape & tous ses complices rendront témoignage que cest article est aboli, & qu'avec beaucoup plus grande difficulté le pourroit-on remettre au dessus, que le decret & ordonnance des Apostres touchant de manger du sang & d'une beste estouffee comme i'ay dit ci dessus. Ainsi donc le Concile de Nicee ne parle pas des raiisseurs, des ennemis, des volleurs & brigās: mais de la guerre legitime, quād quelque Prince, ou Roy, ou Empereur fait la guerre ouuerte a son ennemi: & la où Dieu ordonne & veut que les gens de guerre obeissent a leurs Princes ou Capitaines. Rom. 13, encore que les chefs soyent Ethniques ou Payens, pourueu qu'ils ne contraignent leurs subiets de leur obeir contre leur cōscience, & de faire la guerre a Dieu, comme sainct Maurice & plusieurs autres ont fait.

Or sus donc, dressons vne reformation d'Eglise selon ce Concile. Premièrement desliions les baudriers a l'Empereur & aux Roys: commādons a l'Empereur de desceindre son espee. Cela fait, annonçons la paix par tout le monde: a celle fin que nulles occasions ne soyent donnees a faire guerre par quelque hōme que ce soit. Car le Cōcile de Nicee a defendu toutes guerres sous peine de repentance de sept ans. Que demandons-nous d'auantage? L'Eglise est desia reformee: il n'est plus besoing qu'il y ait des guerroyeurs. Le diable est mort: & toutes les annes qui sont passees depuis le temps du Concile de Nicee, ont este ceste aage d'oree, telle que les Poetes l'ont forgee durāt le regne

de Saturne. Et qui plus est, ç'a este ceste vie vrayement biē-heureuse, & ce repos perpetuel, au moins si ce saict edict du Concile est vray, & si on le doit obseruer.

Or il faudroit que nous eussions yci des merueilleux & excellēs ouuriers, qui nous peussent peindre & presenter deuāt les yeux vne telle idee d'Eglise, & si claire, que nous la puissions voir. Ou s'il nous falloit auoir les yeux creuez: il nous faudroit auoir aussi des proclamateurs qui eussent la voix plus esclatante que les bassecontres de Halberstad & Magdeburg, lesquels nous puissions ouyr. Possible est que les escriuains des libraires ou védeurs de bonnes senteurs, nous pourroyēt bien peindre ces lettres, C O N C I L I V M. Car ils ont plusieurs & diuerses couleurs ou lettres, & pourroyent peindre plus parfaitement que nous-autres peureux Chrestiens. Mais pource que le fait n'est plus present, nous ne pouuons estre sauuez seulement par lettres, ou images, ou crieries.

De nous, il est bien conuenable que nous parlions autrement d'une chose de si grande importāce, & que nous ottroyoīs seulement aux Papistes les lettres, les peintures & ces tristes sons ou chants de mortuaires. Il est conuenable que nous viuions selon les ordonnāces & decrets des Conciles, & ne nous vanter follemēt des lettres seules de ce mot Concile, qui sont vaines & friuoles: puis que nous voulons estre Chrestiens. Mais il y en aura aucuns qui diront, Ce decret du Concile doit estre entendu de tels Chrestiens qui suyuent la guerre ou le cāp de leur bō gré pour faire leur proufit. Tels guerroyeurs meritent bien d'estre estroitement condamnez. Autremēt il n'y auroit en cela qu'une cauillation & sophisterie ridicule, si le Concile cōdamnoit si estroitement les guerres legitimes, ou ceste obeissance qui est deuē aux Magistrats.

Au nom de Dieu, ie veux volontiers estre estimē ignorant, beste, sot & asne, qui aussi a la verite ay les Conciles en grande estime. Ploye & raiui ces choses,
& les

& les emporte ou bon te semblera : ie te donne conge de le faire. Seulement ie fay ceste demande: ascauoir, si tu estois present au Concile de Nicee alors que cest article fut fait, veu que tu oses affermer si hardiment d'une telle interpretation? Que s'il n'est ainsi, où as-tu leu ces choses? Car l'article parle expressement de la guerre, ou du fait de la guerre: il ne parle pas des guerres iniques ou illicites: & cela seroit sans propos que telles guerres fussent cōdamnees par les sentences des Conciles, veu que tous les Payens les condamnent, combien qu'ils soyent seulement enseignez ou admonestez par la clairte de nature, & non point par la parole de Dieu: cōme ceux qui ne sont point Chrestiens, & si ne condamnent point les Conciles horriblement.

Quād quelque Prince ou Roy est esmeu pour quelques grandes causes & necessaires a se defendre, ou a repoussier quelque outrage qui luy aura este fait, il faut qu'il amasse gens de tous les costez qu'il pourra. Or si tous ceux qui iroyent lors a la guerre, estoient condamnez, comment se porteroient les affaires des Roys, Princes & Empereurs: veu qu'il n'y a presque d'autres gens de guerre q̄ ceux-la mesmes que le bruit de guerre amene en regions estranges? Di moy: ascauoir, si les Princes ou Roys ou Empereurs se combattent seul a seul, & s'amuseront a se blesser ou tuer l'un l'autre en leur propre personne, a qui sera le plus fort? Ou bien, ascauoir s'ils cōuurirōt de genests, ou de nattes ou de ioncs quelque petits bouts d'hommes pour les faire entrer en bataille cōtre leurs ennemis? Et puis apres demande quelque bon conseil au Concile, si cela se doit faire ainsi? Et certes cela est bien facile a dire, Le Concile a determiné cela: au lieu qu'au moins on regarde les lettres en passant, ainsi qu'une vache ou un bœuf regarde un tableau peint. Cependant il n'y a nul qui pense au fait, qui considere ce qui appartient principalement a cela, ou quelle est l'intention du Concile, qui sont les decrets & ordōnances d'iceluy qu'on

doit garder. Et pourquoy est-ce que les Prelats ou Euesques eux-mesmes ne les ont depuis gardez? Lesquels ont este cause de guerres infinies, de discords terribles, & de grande effusion du sang humain: & encore ne cessent-ils de faire auiourd'huy le semblable: cependant toutefois ils ont tousiours les gueulles ouuertes pour crier, Conciles, Conciles, Conciles, les Peres, les Peres: en sorte neantmoins qu'ils ont liberte de faire tout au contraire sans en estre seulement repris, & extraire pour le moins les choses qu'ils requierent estre faites de nous sans condition. Or ça Luther, tu pourrois bien par ce moyen charger le Concile de Nicee de haine, ou de suspesçō de sedition, ou le redre coupable de crime de lese maieste. Car si nous enseignions maintenant de ceste façon, que l'Empereur & les gens de guerre, lesquels ont des raisons vrgentes & necessaires de faire la guerre, sont damnez: a bon droit on iugeroit de nous que nous sommes seditieux, & ne faudroit autre chose pour nous condamner que nos propres escrits. De moy, ie suis maintenant du parti du Concile, & suis contraint d'en estre. Ci apres ie parleray de ceci plus amplemēt, & me declareray moy-mesme.

Or ie diray maintenant ce que i'ay dit ci dessus, Le Concile ne peut autrement parler que du fait ordinaire de la guerre, telle qu'elle estoit lors en vsage par tout l'Empire Romain, tāt sous iceluy-mesme Empereur Constantin, que sous les Empereurs Payens ou infideles qui auoyent este deuant luy. Or en ce temps-la il y auoit des gens de pied, qu'on appelloit gendarmes enrroulez, faits bourgeois es villes, qui auoyent gages annuels tout le temps de leur vie: en sorte que quand le pere estoit deuenü vieux ou cassé, ou quād il venoit a mourir, le fils succedoit incontīnēt au pere au fait de la guerre, & mesme y estoit contraint: comme auiourd'huy le grand Turc garde ceste coustume. Au cūs disent que le Roy de France tient quasi vne semblable façon entre les Suisses, & baille gages mesme aux petits

tits enfãs de ceux qui le seruēt en guerre. Mais ie laisse a parler de ces choses.

Aussi y auoit-il des gens de cheual & d'ordonnances, a qui on bailloit gages toute leur vie, & ces gages leur estoient comme hereditaires : & les appelloit-on cheualiers. Nos gentils-hommes ont presque vne telle façon que ces cheualiers. Ils doyuent tousiours estre fournis de cheuaux & d'armes : & pour cela mesme ils ont leurs fiefs. En telle sorte que l'Empire Romain a tousiours entretenu vn certain nôbre de gens tant de pied q̃ de cheual : & les vns & autres ont eu gages pour toute leur vie. Ie recite ces choses historiques, afin que le decret du Concile soit entendu cōme il appartient : ascauoir, qu'on ne la pourroit autrement exposer que du fait ordinaire de la guerre, veu qu'il parle expressement de l'armee Romaine, en laquelle selon la doctrine de saint Paul il y auoit plusieurs Chrestiens souldoyez : comme saint Maurice avec ses compagnons, Iouinien, Gratien, Valentinien, Theodose & autres. Mais sil estoit licite estre aux gages auant le Baptisme sous des Emperours infideles, pourquoy est-ce qu'apres le Baptisme aussi il n'eut este licite mesme aux Chrestiens & fideles de seruir en guerre sous les Emperours?

Sinon d'aventure que la religion ne soit yci appelée la foy Chrestienne, ains plustost la moynerie. Or ie seroye yci comme tenu serré de liens bien estroits, & selon le decret & ordonnâce de ce Concile, il me faudroit derechef prendre le froc & le capuchon (voire si ie le vouloye faire) & ie ne scauroye ou il faudroit trouuer saint Pierre au ciel, voire s'il a este pescheur lors qu'il viuoit au monde, & sil a fait derechef office de pescheur apres son Apostolat : lequel routessois il auoit quitté auparauant pour faire seruice au Seigneur Iesus.

Or prenons le cas que la religion soit appelée la moynerie, combien qu'en ces temps-la il n'y eut nuls

ordres, ou moynes, ou monasteres: toute fois vn peu apres ceste contagion commença a se fourrer par tout, & a se dilater au long & au large. Car enuiron ces tēps-là, saint Antoine viuoit avec sa troupe: lequel eux nomment Pere & instituteur de tous les ordres. Mais Moyne n'estoit autre chose alors que ce que nous appellōs au iourd'huy Hermite: comme aussi le mot de Moyne qui est tiré du Grec, signifie solitaire: c'est a dire, qui estant separé de toute frequentation & conuersation de tous hommes, vit tout seul en vn bois ou quelque lieu desert, ou autrement vit en quelque lieu bien loing de toutes compagnies. De moy, ie ne scauroye maintenant proposer aucuns exemples, & ne pense point que iamais il y eut de tels moynes, il y a mille ans passez ou plus. Sinon qu'on vueille nommer Moynes les pources chetifs qui sont detenus prisonniers en quelques tours ou en quelques autres sortes de prisons ignominieuses: lesquels sont moynes a la verite: car estans separez du regard & conuersation de tous les autres hommes, ils viuent solitairement. Ceux qui sont ainsi nommez en la Papauté, conuersent beaucoup plus avec les hommes en compagnie, & sont moins solitaires que les autres hommes. Et quelle sorte de gens, quel degre d'hommes y a-il au monde, qui viuent plus entre les autres & avec eux, que sont tels moynes? Sinon que quelqu'un voulut y ci vser de cauillation: que les monasteres qui sont bastis es villes ou bourgades, ou sur les grans chemins, ne sont point entre les hommes.

Mais laissons-là la grammaire, & disputons du fait mesme. A scauoir, si la religion en cest endroit est appelée la moynerie qui estoit de ce temps-là? Pourquoy est-ce que ce Concile condamne le fait de la guerre: c'est a dire, l'obeissance qui est deuë aux Magistrats politiques? Le condamne-il, pour ceste raison que les moynes subiets aux Magistrats par telle obeissance, ne sont point sauuez?

Cela

Cela seroit aucunement tolerable, que la moynerie fut louee & prisee : mais de dire, que le fait ordinaire de la guerre doyue estre mis a l'opposite pour estre si estroitement condamné, cela est trop rigoureux : comme si saint Antoine n'eut peu en bonne conscience servir a l'Empereur. Car d'où est-ce qu'un Roy ou Empereur pourroit prendre des hommes propres & duits a la guerre, si tous se vouloyent rendre moynes sous vne telle couuerture, comme, si il n'estoit nullement licite de servir en guerre? Le te prie di moy, combien s'en faut-il que ceste doctrine ne soit pour esmouuoir sedition, & principalemēt si elle estoit enseignee par nous? Et touteſſois nous ſcauons que la vie monachale choisie volontairement n'est point commandee ni ordonnee de Dieu, ains par obeissance. Et encores que les moynes eussent grande affection de s'enfuir du monde, tant y-a neantmoins que leur fuite deuroit estre honneste & ouuerte : ils ne deuroyent point laisser de puanteur ni aucunes ordures apres eux : c'est a dire, ils ne deuroyēt point par leur fuite faire a la desrobbee, rendre les autres façons de viure ou estats suspects ou contemptibles, comme si c'estoyent choses reprouuees & pollues, & qu'il n'y eut que leurs capuchons & frocs qui sentissent le baume. Car quād quelqu'un s'enfuit ou se cache dedans vn monastere, c'est autant comme si il disoit, Fi, si, que les hommes sont ords & sales, comment ils s'appliquent a offices vils! que leurs labeurs sont abominables & detestables! Or de de moy, ie veux estre seul sauué: les autres se iettent de leur bon gré dedans les enfers. Si Iesus Christ aussi s'en fut ainsi fuy, & qu'il se fut rendu vn tel saint hypocrite ou moyne : qui est-ce qui se fut exposé a la mort pour les hommes? ou qui eut satisfait pour nous autres pources pecheurs? Ce fussent parauanture ces moynes desdaignans les hommes avec leur vie aspre & fugitiue. Iehan Baptiste a este au desert voirement: tant y-a touteſſois qu'il n'estoit point hors de toute

conuerſation & frequentation des hommes. Car depuis il eſt venu monſtrer en aſſemblees publiques, apres qu'il fut venu en aage virile : & a preſché. Ieſus Chriſt (comme auſſi Moÿſe au mont de Sina) fut par l'eſpace de quarante iours au deſert ſans compagnie humaine, entre les beſtes, & durant ce temps il ne māgea ne beut : mais depuis il retourna auſſi avec les autres hommes. Or ſus donc accordōs cela que tous deux ayent eſte hermites ou moynes, ſi eſt-ce touteſſois que nul deux ne condamne le fait ou eſtat de la guerre, ne la condition de ceux qui la ſuyuent, ou qui ſont ſouldoyez, combien qu'eux ne fuſſent gens de guerre. Iehan Baptiſte parle a eux doucement & amiablement comme a gens honneſtes, diſant, Soyez contents de vos gages, & ne faites oppreſſion, & ne calomniez perſonne. Ieſus Chriſt eſt venu en la maiſon du Centenier en Capernaum pour guerir le ſeruiteur d'ice-luy, qui ſans doute auoit auſſi gages pour ſuyre la guerre : nonobſtant il ne luy commande pas de laiſſer ceſte façon de viure : mais il louē ſa foy a haute voix, en ſorte qu'il dit qu'il n'a trouuē vne foy ſemblable en tout Iſrael. Et ſainct Pierre permet a Cornille qui eſtoit en Ceſaree, de demeurer voire apres le Baptême en ſon eſtat de gendarme, avec ſes ſoldats eſtans aux gages de l'Empereur Romain. Sainct Antoine ne deuoit-il pas beaucoup pluſtoſt enfreindre ceſte ordonnance diuine avec ſes moynes par ſa nouuelle & propre perſuaſion & ſainctete contrefaite, veu qu'il n'a eſte qu'un idiot, n'ayant nulle cognoiſſance des lettres, n'ayant iamais eſte exercé au miniſtere? Le penſe bien qu'il eſtoit homme d'un grand courage & ardent, comme auſſi ont eſte ſes diſciples. Mais c'eſtoit vne choſe pleine de ſcandale & de grans dangers : & touteſſois il a eſte preſerué en ceſt erreur ou peché, comme les autres eleus ſont preſeruez, combien qu'il y ait des pechez & des ſcandales en eux. Si eſt-ce que l'exemple de ſa vie ne doit eſtre nullement approuuē :

mais

mais l'exemple & la doctrine de nostre Seigneur Iesus Christ & de saint Iehan Baptiste est digne de louange: & faut necessairement que ceux qui enseignent en l'Eglise l'ensuyuent.

Or soit que la religio soit yci appelee la foy Chrestienne, ou la moynerie, on peut pour certain recueillir du decret & ordonnance de ce Concile: que l'estat de la guerre, qui estoit vne obeissance deuë a l'ordonnance politique pour lors, & non point vne desobeissance enuers Dieu, ou vne obeissance taquine ou seruile, doit estre approuuee contre l'estat de moynerie forgé par l'autorite des hommes. Mais la legende de saint Martin tend a ce poinct, que la foy Chrestienne estoit nommee religion en ce temps-la. Car se voulant faire Chrestien, il quitta l'estat de la guerre, lequel il auoit eu de ces ancestres comme par heritage: auquel estat son pere auoit vescu auparavant, qui estant desia tout cassé de vieillesse, auoit fait enrouler Martin son fils au catalogue ou les noms des gendarmes estoient escrits: comme c'estoit lors la coustume du peuple Romain. Plusieurs interpretoient cela de trauers, & le tiroient a la plus mauuaise part, comme si estant effemine & failli de courage, il eut voulu fuyure la religion Chrestienne, pour abandonner l'estat de la guerre, & eut craint les ennemis: comme ceci est recité au long en son histoire. Par ce moyen on cognoit manifestement, que ceste opinion commençoit alors a pulluler & se semer entre le commun populaire, comme ainsi soit qu'aucuns Euesques preschassent ceste opinion aux temples: que le fait & estat de la guerre estoit vne façon de viure fort dangereuse & damnable: & celuy qui vouloit bien seruir a Dieu, la deuoir fuir de loing: car saint Martin n'estoit pas fort long temps apres le Concile de Nicee. Il estoit aux gages & a la soulte de l'Empereur Iulien.

Maintenant si nous voulons garder le decret de ce Concile, ou derechef l'introduire aux Empires & re-

publiques : il nous en faudra fuir aux hermitages & deserts : il faudra enuoyer les Roys & Empereurs aux monasteres, & dire qu'ils ne sont Chrestiens, ou qu'ils ne doyuent estre sauuez, ou affermer ceci, qu'ils viuēt en vne obeissance perilleuse & seruile, & ne seruent point a Dieu. Sinon si nous auons deliberé de ne vouloir point consentir ni obtemperer a ce Concile : alors toutes choses deuront estre du tout reiettees : car l'une est aussi bonne que l'autre, veu qu'il n'y a rien qui ne soit gouuerné par vn mesme Esprit. Mais nous ne requerons point des Conciles escrits en papier ou parchemin, ou peints en tableaux, ou grauez en cuyure : mais tout cest affaire gist en fait & exequution.

Mais ie ne scay quel horreur & tournoyemēt de teste me doit faire virer, quand ie pense que les saincts Peres n'ont point dressé ou basti cest article : comme ceux qui a la verite en cela ont eu esgard a l'Empereur Constantin, qui les auoit auparauant deliuré de la cruauté des tyrans, non point par l'estat monachal de saint Antoine, ains a force d'armes. Ceci a quelque couleur & belle apparencē, comme si les autres Euesques cauteleux & fins eussent meslé ces choses avec les plus sains decrets & meilleurs, ou comme s'ils eussent cōfusu ces fripperies avec la principale dispute.

Outreplus, ce mesme Concile de Nicee a déterminé, que l'Euesque Romain eut les Eglises des faubourgs & a l'environ pour recommandees selon la coustume : comme l'Euesque d'Alexandrie deuoit auoir celles d'Egypte pour recommandees. Au demeurant il y a ce mot, Suburbicaires : de moy, ie ne veux & ne peux interpreter ce mot : ie ne l'ay point forgé, sinon qu'il signifie les Eglises d'Italie, qui estoient voisines de l'Eglise Romaine. Comme aussi il y auoit des Eglises en Egypte voisines de celle d'Alexandrie. Qu'un autre donne telle sentence qu'il voudra : toutefois j'ay yci opinion que ce Concile n'attribue point la domination a l'Euesque de Rome sur les

les Eglises voisines: mais il les luy recommande cōme a vn pasteur, pour auoir l'œil dessus, pour leur aider de faueur & conseils salutaires, les soustenir & instruire.

Et toutesfoiſ il ne les luy recommande point pour dire qu'il y ſoit cōtraint de droit Diuin: mais il fait cela ſelon la couſtume receuë anciennement. Or la couſtume n'eſt point vne Eſcriture ſaincte, ou parolle de Dieu. D'auantage il oſte a l'Eueſque de Rome les Eglifeſ qui eſtoient en Egypte: & cela ſe fait auſſi ſelon la faſon & couſtume ancienne: & les recōmande a l'Eueſque d'Alexandrie. Par ceſte meſme raiſon ceci auſſi ſ'accorde fort bien, que les Eglifeſ de Syrie ont eſte recommandees a l'Eueſque de Ieruſalem, ou d'Antioche, & non point a l'Eueſque de Rome, comme celles qui eſtoient encore plus loing de Rome, que n'eſtoit Alexandrie ou Egypte.

Or ſi maintenāt l'authorite de ce Cōcile doit auoir quelque lieu ou uigueur en nos Eglifeſ, & ſi on en doit faire cas: auant que paſſer outre, il nous faudra condāner l'Eueſque de Rome, & le challer hors de l'Egliſe comme vn tyran, & toutes ſes bulles, & ce gros bobulāire de ſes Decrets & Decretales, & ietter tout cela au feu ſans en rien reſeruer. Car il n'y a letre du Pape, ni aucune bulle, ni page quelconque aux Decretales, en laquelle il ne brame, rugiſſe & foudroye, qu'il eſt le chef ſouuerain de toutes les Eglifeſ qui ſont par tout le mōde, & ſeigneur a qui toutes choſes obeillent, & ſelon la volonte duquel il faut que tous ceux qui veulent obtenir ſalut, viuent & ayent mouuement. Que ſi on veut parler ouuertement, voyci comment il faudroit dire, Le Cōcile de Nicee eſt faux & heretique, & doit eſtre condāné par la voix de tous les hommes du monde, cōme deteſtable. Et cela ſoit dit a la faueur du Pape: d'autant que ce Concile luy oſte l'empire ou domination ſur toutes les Eglifeſ, & attribue vne puiſſance egale a l'Eueſque d'Alexādrie. Toutesfoiſ le Turc & le Souldan ont expoſé (il y a deſia lōg tēps) le decret de ce Cō

cile par degast ou destructiō d'Alexādrīe, & en ont dōné si bōne instructiō, qu'il n'est besoing ni au Pape ni a nous d'auoir pl' aucū souci de cela. Or no' apprenōs par ceci q̄ les decrets des Cōciles ne sōt tous egalemēt perpetuels ne stables, cōme sont les articles de la foy.

Outreplus, il a este ordonné par ce Concile, que ceux qui se chastret̄ eux-mesmes pour euit̄er diuerses flāmes & plusieurs bruslemens de paillardises, ne doyuent point estre receus en l'ordre des clerics ou des diares. D'auātage ce mesme Concile a aucōtraire ordonné, que les Euesques n'eussēt point de fēme en leur cōpagnie, si ce n'estoit leur mere, ou leurs seurs, ou les seurs de leurs peres ou meres, ou autres parētes prochaines. De moy, ie cōfesse frāchemēt, que ie n'entē nullement le S. Esprit en ce Cōcile. Si ceux qui se chastrent̄ eux-mesmes pour euit̄er les flāmes & bruslemēs de paillardises, ne sōt reputez idoines pour seruir au ministration Ecclesiastique : & d'autre part si ceux qui espousent des fēmes pour surmōter les aiguillōs de la chair selō le cōseil ou la doctrine de S. Paul, 1. Cor. 7. ne sōt aussi idoines: ou tōbera la chose finalement? L'Euesque ou le ministre, ou le prescheur deura-il endurer ceste ardeur intolerable, & ce bruslement d'amour illicite, & ne se deliurer poīt & ne se retirer hors de ces dāgiers ne par mariage ne par chastremēt? Car quel besoing est-il de donner vn long mādement a celuy qui est marié de ne brusler point apres les femmes des autres: veu que cela n'est point licite mesme aux laics & caux gēs mariez? Ainsi la pudicite ou chastete de la mere ou de la seur ou d'autre parēte ne seroit poīt en dāgier, si l'Euesque estoit marié: il ne seroit besoing lors de faire vne deffēse si feuer. Le S. Esprit n'a il point d'autres affaires es Conciles, que d'astreindre & charger ses ministres de loix impossibles, dangereuses & non necessaires?

On trouue es histoires, que S. Paphnuce, hōme craignant Dieu, & excellent en sapience celeste, contredit & resista fort & ferme aux Euesques en ce mesme Cōcile,

cile,

cile, lesquels vouloyent deffendre le mariage mesme a ceux qui auoyent espousee femmes auant qu'ils fussent faits prestres: ils vouloyent aussi rompre le lien de mariage entre ceux qui s'estoyent donnez la foy l'un a l'autre auparauant. Mais S. Paphnuce leur conseilla de ne faire point ceste deffense: affermant que ceci aussi estoit vne vraye chastete, quand le mari & la femme viuoyent chastement en mariage. Aucuns disent qu'il obtint ce qu'il demandoit: tant y-a que ces deux decrets semblent signifier que les Euesques passerent outre, & deffendirent simplement le mariage. Et de fait, il y auoit en ce Concile plusieurs Euesques ignorans & du tout bestes, meslez parmi la sainte assemblee en ce Concile. Il y auoit des Arriens avec gens de leur secte (ce qu'on peut cognoistre facilement par les histoires) qui coterent quelque chose de leurs erreurs: dequoy nous parlerons ci apres plus au long. Or maintenant nous nous deporterons vn peu de parler des Conciles, & nous considererons aussi les tesmoignages des Peres ou Docteurs anciens. Combien que saint Augustin ne trouble vn peu, en ce qu'il ne veut point qu'es choses Diuines on adiouste foy a aucun des Peres, comme il a este dit ci dessus. Tant y-a neantmoins qu'il nous faut voir leurs tesmoignages, iasoit que S. Augustin veuille qu'ils soyent tous asubiettis ou captifs aux tesmoignages des saintes Escritures.

S. Cyprien qui est l'un des plus anciens Peres, qui estoit long temps deuant le Concile de Nicee, du temps des Martyrs, comme aussi luy a constamment endure le martyre; a este ferme en ceste opinion, que ceux qui auoyent este baptizez entre les heretiques, on les deuoit baptizer derechef: & n'a peu estre destourné de ceste opinion iusqu'au temps de son martyre, combien qu'il en fut fidelement admonnesté par les autres Euesques. Et S. Cornille Euesque de Rome, qui aussi en ce temps-la fut mis a mort pour la confession du nom du Seigneur Iesus, ne voulut estre de ceste opinion. Et saint Augu

stin qui a este depuis, se tormente bien fort en le voulant excuser, & finalement il a son recours a cela qu'il dit, que cest erreur a este effacé par son sang, lequel il a espandu pour la dilection de Iesus Christ. Voyla comment saint Augustin parle, condamnant la doctrine de saint Cyprien touchant la reiteration du Baptisme: ainsi que depuis elle a este condamnée, comme de fait elle doit estre condamnée. Mais nous pourrions excuser facilement saint Cyprien, comme celuy en qui nous est proposé vn bel exemple de la grace excellēte & consolation tresdouce, que les fideles ont au Fils de Dieu: ascauoir, que les plus saints mesmes sont vne grosse piece de chair & masse de peché: & il leur est biē facile d'errer. Comme S. Cyprien qui estoit vn si grād personnage, & a este martyr si excellent, toutefois s'abuse fort villement en d'autres choses de grāde importance. Mais ce n'est point nostre intention de parler maintenant de cela.

Or que dirons nous des Peres qui estoient aupara-
uant, qui ont laissé ceste doctrine a S. Cyprien & aux autres qui ont succédé apres, cōme hereditaire? Qu'on lise le vij. liure de l'histoire Ecclesiastique au j. & ij. feuillet, & qu'on regarde bien là ce que ce grand personnage Denis Euesque d'Alexandrie escrit touchant ceste matiere a Sixte Euesque de Rome, & quelle opinion il en a: ascauoir, que deuant ce temps. la auāt que les Euesques eussent fait cela en Afrique, il auoit este desia fait par les autres Euesques, & estoit desia arresté & resolu en Iconie au Concile. Il dit doncque, qu'il faut bien peser ceste cause de si grande importance, auant qu'on la condamne. Outreplus cest article est clairement exprimé au Concile de Nicee: que les heretiques Paulinistes ou Photiniens deuoient estre baptizez derechef. Duquel article S. Augustin se trouble grādement, & est fort offensé en son liure qu'il a fait des heresies. Car combien qu'il eut eu d'assez aspres cōbats contre les Donatistes qui rebaptizoyent, toutefois il
vient

vient finalement excuser le decret du Concile de Nicee, & tâche par finesse d'eschapper vsant de ces parolles, On doit péser que les Photiniés n'ont point gardé la vraye & droite forme du Baptésme, cōme les autres heretiques aussi l'ont obseruce. Mais il est difficile de s'accorder aux choses qui n'ont point de probation ou fermes argumens, qui font que nous consentons ou accordons. Car les Photiniens n'auoyét & si ne faisoýét point vn autre Euangile, que celuy que tout le reste de l'Eglise auoit. Parquoy il faut plustost croire qu'ils ont vsé de la forme cōmune. Car tousiours les heretiques ont accoustumé de mettre en auant la saincte Escriture & l'autorite d'icelle. Ainsi demeurera & sera maintenue la reiteration du Baptésme contre saint Augustin & nous tous, veu que le Concile de Nicee & aussi les autres Cōciles & les Peres ont suyui ceste opinion de saint Cyprien.

Outre toutes ces choses, on trouue des Canons des Apostres tant de fois imprimez, & par tout espanchez, & est bien facile a péser que c'est afin que l'Eglise soit mieux gouuernee par ce moyen. Entre les autres Canons cestuy-ci y est compris: ascauoir, que les Sacrements des heretiques & le Baptésme ne doyuent estre estimez pour rien, & ceux qui ont este baptizez desia, doyuent estre rebaptizez par eux. De cela on peut bien facilement recueillir ceci: Si les Apostres mesmes ont ordonné ce qui depuis a este donné comme de main en main par les Peres les plus anciés & les Conciles (comme saint Denis dit) iusques au temps de saint Cyprien, & depuis saint Cyprien iusques au Concile de Nicee (car saint Cyprien estoit deuât le Concile de Nicee) si, di-ie, les Apostres eux-mesmes ont ordonne cela: lors l'opinion de saint Cyprien demeure ferme, & saint Augustin tōbe bas avec tous ceux qui ont escrit aucontraire, & nous aussi qui consentons avec luy. Car qui est-ce qui se voudra opposer de son propre sceu aux Apostres mesmes? Mais si les Apostres

n'ont point ordonné cela, les auteurs de ces faux li-
ures & contrefaits seroyent dignes d'estre enuoyez au
gibet, ou de passer par le trenchant de l'espee, ou par
quelque autre tourmēt bien grief. Car y a-il plus gran-
de meschācete, que de dire qu'on face semer de tels li-
ures parmi l'Eglise, qui est de tant de nations ou peu-
ples, & ce sous le nom des Apostres ? Ils meriteroyent
bien aussi qu'on ne leur adioustast foy en nuls autres li-
ures, ou en quelques autres choses que ce fussent : veu
qu'eux & ceux qui adherent aux Papistes publient de
tels liures sans cesse & sans fin, auxquels eux-mesmes
n'y adioustent nulle foy, & nonobstant ils nous char-
gent fierement de ces lettres & syllabes, Conciles, Pe-
res: lesquelles quelque Choriste ou quelque bassecon-
tre de Halberstad pourroit mieux faire resonner de sa
grosse voix, entonnant quelque Libera pour les tref-
passez, si seulement il estoit question en tout ceci des
morts & des lettres ou syllabes de ce mot Concile. A
quoy touteffois ceux-ci sont occupez seulemēt, & ce-
pendant ils nous trompent villainement & d'une fa-
çon desloyale.

Or maintenant si saint Cyprien a eu pour foy les
Canons & reigles des Apostres, & le Concile de Ni-
cee, & outre cestuy-la beaucoup d'autres: comment ac-
corderons-nous les Peres ? Les Apostres avec saint
Cyprien entēdent, que ceux qui ont este baptizez par
les heretiques, doyuent estre baptizez vne autre fois.
Saint Augustin avec toute l'Eglise conclud que cela
est contre la sainte Escriture. Qui est-ce qui presche-
ra cependant aux fideles & Chrestiens, iusques a ce que
ce different soit finalement appaisé ? Il n'y a rien plus
facile, qu'a la façon des batteleurs & ioueurs de gobbe-
lets se iouer avec ces mots Peres & Conciles, & abuse r
frauduleusemēt de noms sacrez pour suspendre ou em-
pescher vn Concile vray & libre, comme le Pape a fait
tous ces vingt ans entiers. Et en si grand nōbre d'Euef-
ques ou Prelats il n'y en a pas vn seul qui pense du sa-
lut

lut de tant de millions d'ames, lesquelles deuoyent estre repeuës de la pure parolle de Dieu, & d'une certaine & ferme consolation de consciences : comme Iesus Christ luy-mesme dit, Pais mes brebis.

Voyci iusques a quel poinct i'excuse saint Cyprien: ascauoir, qu'il n'a point este vn tel Anabaptiste, comme sont ces monstres horribles de nostre temps. Car saint Cyprien auoit ceste opinion, que le Sacrement estoit nul entre les heretiques : pour ceste raison il est d'aduis qu'on doit rebaptizer ceux qui ont este baptizez entr'eux, comme ceux qui n'auroyent iamais receu le Baptisme. Et il auoit ceste intention en son cœur, que les Payens non baptizez fussent baptizez, & non point de confermer la reiteration du Baptisme. Car il ne scauoit rien du tout de ceste reiteration du Baptisme, beaucoup moins conclud-il qu'elle soit d'efficace : mais il croit seulement qu'il n'y a qu'un seul & vray Baptisme des fideles & Chrestiens. Mais nos Anabaptistes confessent bien qu'entre nous & les Papistes le Baptisme y est vray bon & legitime : mais pource que ceux qui baptizent & ceux qui sont baptizez, en sont indignes, ils nient que cela soit le vray Baptisme. Saint Cyprien n'eut point accordé cela, & encore beaucoup moins eut-il ainsi rebaptizé.

Ie di cela de ma part, de saint Cyprien martyr, duquel i'ay opinio sainte, & n'en vouldroye parler qu'avec reuerence & hōneur, quant a sa personne & sa foy. Car toutes sortes de doctrines sont subiettes a ceste parolle de l'Escriture & du saint Esprit, Esprouuez toutes choses, & retenez & gardez ce qui est bon. Mais ceci n'est pas de nostre propos : c'est-ci nostre principale intention de monstrier comment les Peres pourront estre accordez, afin que nous soyons certains quelle sorte de doctrine doit estre annoncee en l'Eglise, afin que les fideles soyent instruits, & les consciences abbatues soyent redressees, & les cœurs ayent vne ferme & perpetuelle cōsolation. Car yci les Apostres & saint Cy-

prien ne sont point d'accord avec saint Augustin & l'Eglise touchant vn grand article : ascauoir, du Baptisme. Si nous souscriuons a l'opinion de S. Augustin, en ce cas-la il nous faudra condamner les Apostres avec leurs Canons, & reietter le Concile de Nicee avec les Peres & les Conciles anciens, & avec saint Cyprien. Aucontraire si l'opinion du Canon des Apostres & de saint Cyprien demeure ferme, lors saint Augustin erre avec toute l'Eglise. Qui est-ce qui preschera cependant, ou qui baptizera, iusqu'a ce que derechef il y ait vne bonne concorde entre nous? Et pource que les Papistes alleguent contre nous les Canons des Apostres, les Conciles & les Peres, & afin qu'on y adiouste plus de foy, aucuns aussi sont inferez au decret de Gracien: que si ce rampar pouuoit estre rompu par quelque occasion, en sorte qu'on apperseut qu'un ou deux de ces Canons ou Conciles fut erronee & heretique, comme est cest article de baptizer derechef les heretiques? qui est celuy qui pourroit alors empescher que ceste riuie-re ne fut espanchee par tout, & que les flots & les sons des orages n'abbayassent comme par vn prodige contre les Papistes, qu'ils sont mēteurs manifestes en toutes les choses qu'ils escriuent, disent & composent, en tous leurs sermons & crieries, & qu'ils ne meritēt nullement qu'on leur adiouste foy en quelque petit mot que ce soit, cōbien q̄ par leurs finesses & ruses ils se couurent des tiltres de Conciles, Peres, Prophetes & Apostres?

Mais cependant que nous de nostre costé nous extrayons & tirons si songneusement des Peres & Conciles ce qui nous semble bon, & qu'eux aussi de leur costé en recueillēt & tirent ce que bon leur semble, & toutesfois nous ne pouuōs estre d'accord, veu que les Peres mesmes ne s'accordēt pas si bien entr'eux que sont les Conciles: ie vous supplie, qui est celuy qui sur ces entrefaites repaist les ames de vraye & salutaire doctrine, lesquelles ne scauent rien de ces contētions & crieries curieuses? Est ce cela paistre les brebis de Iesus Christ?

Christ? Veu que les bergers mesmes ou Docteurs ne scauent pas si ce sont des pasturages ou poisons, si c'est de l'herbe ou du venin: ascauoir, si cependant on doit laisser en doute & suspens les pources esprits tremblans ou cōbatans, iusques a ce que la chose soit du tout mise a fin, & que le Concile en ait determiné? Helas comment le Fils de Dieu eut mal pourueu a son Eglise, s'il eut voulu qu'on eut ainsi tenu les esprits en suspēs! Certes il n'a nullement voulu faire ainsi. Car la certitude de la doctrine celeste & Diuine est bien autre, & beaucoup plus grande, que celle qui est tiree des Peres ou Conciles. Ou bien il faut dire, que depuis le temps des Apostres iusques a maintenant il n'y a point eu d'Eglise: ce qui n'est nullement veritable, car il est dit clairement au Symbole, Je croy qu'il y-a vne sainte Eglise vniuerselle. Item, Je seray avec vous iusques a la fin du mode. Il faut necessairemēt que ceste promesse demeure ferme & stable, encore q nous fussions deceus par tous les Conciles & Peres qui furent iamais au monde. Car ce tiltre demeure ferme & immuable au Seigneur Iesus le Fils de Dieu, Je suis la verite. Les Peres & les Conciles au regard du Fils de Dieu portent ce tiltre, Tout homme est menteur, principalement quand ils se reculent de la Parolle reuelee, ou des tesmoignages manifestes de la sainte Escriture.

Je di ceci, non point a cause de nos Euangeliques, ausquels ie monstrey bien ci apres que c'est des Conciles, des Peres, & de l'Eglise, si d'aucture ils n'en scauent rien: comme certes par la grace de Dieu ils ne se sont gueres tourmentez iusques a ceste heure a expliquer ces questions: mais a cause de ces criars & babilars, qui pensent que nous n'ayons point leu les Conciles ou les escrits des Peres. Combien que ie n'aye leu tous les Conciles, & ne les liray iamais, & ne feray iamais vne si grande perte de temps, comme i'ay fait: ce m'est assez d'auoir leu les quatre Conciles vniuersels diligemment & attentiuement, & beaucoup plus attentiuemēt que nul de nos aduersaires, & ie le scay bien.

Et pourtant scachant ceci pour certain comme bien aduisé, ie seray si hardi, que (ces quatre Cōciles vniuersels exceptez) ie ne feray plus de cōte de tous les autres, encore que ie les deusse approuuer cōme bons & tolerables, pour le moins aucuns: ce que ie veux estre entendu sainement. Au reste, voyla cōment ie me persuade, que i'ay plus grande cognoissance de tous les anciens qui ont escript, que ces criars, qui tirent d'iceux ce qui leur semble bon, & font leur proufit de ce qui peut seruir a leurs fantasies & opiniōs, & laissent-là tout a propos les autres choses qui leur sont contraires tant peu que ce soit. Et pourtant ces choses de si grande importance doyuent estre autrement traitees & d'une autre fidelite.

Y a-il chose que nous debattions plus asprement? Si nous voulons bien accorder les sentences des Peres, il nous faut prendre le Maistre des sentences, qui a diligemment trauaillé en cest argument, & nous a auancez de bien loing en ce labeur. Car il a eu des cogitations semblables touchant les discords & dissensions des Peres ou Docteurs anciens, comment on les pourroit appaiser, & y mettre quelque bon accord. Et selon mon iugement, il n'a point perdu sa peine en cela: qu'il plus est, il a beaucoup plus fait que nous ne scaurions faire tous. Et quand on espeluchera bien tous les Conciles, & tous les dictz des Peres, a grand peine y en aura-il vn seul, ou on trouue tant de choses qu'on pourra faire en ce seul liure des Sentences. Car les Conciles & les Peres traittent seulement d'aucuns articles ou de quelques parties de la doctrine Chrestienne: & n'y en a pas vn seul qui en traite de tous, & qui compréne toute la somme, comme fait ce personnage-la, ou bien qui traite des principaux. Mais des plus grans articles, comme de la doctrine de la foy & de la iustification, il en parle plus clairement & plus simplement: combien qu'il magnifie grâdemment de la doctrine la foy, & luy dōne des tiltres excellens. Par mesme raison nous cōfessons que

que Gratien n'a point ramassé son gros bobulaire de Decret sans quelque trauail: & a aucunement proufité a la posterite en ce qu'il a accordé les Peres & Conciles. En quoy il a pris fort grand peine & labeur: tant y-a touteffois qu'il n'est point si pur que le Maistre des sentences. Car il attribue plus a l'Euesque de Rome: & estant preoccupé de la folle opinion du temps, il tire & rapporte toutes choses au Pape: sans cela il est possible que son labeur eut esté plus vtile, que le nostre ne scauroit estre maintenant.

Or qui voudra voir plus amplemēt combien estoit grande l'infirmité humaine es Peres & Docteurs anciens, il faut qu'il lise le liure que Pomeran pasteur en nostre Eglise de Vuittemberg a fait sur le 4. chap. de la premiere aux Corinthiens. Il pourra bien apprendre de là, que saint Augustin a tresbié dit, qu'il ne faut adiouster foy a nul des Peres, s'il n'a pour soy des tesmoignages clairs des saintes Escritures. O bon Dieu, si la foy Chrestienne dependoit des hommes, & des parolles ou sentences des hommes, quel besoing seroit-il d'auoir la sainte Escriture: ou a quel propos Dieu eut-il voulu qu'elle eut esté manifestee, & produite de sō sein occulte par sō Fils nostre Seigneur Ies' Christ? Si on doit ouyr la parolle d'un homme, il nous faudra cacher sous les muids & les bancs la parolle de Dieu, & toutes les Escritures de la sainte Bible. Lisons & prononçons en la chaire les Cōciles & les Peres. Ou si les Peres n'ont point esté aussi eux-mesmes hōmes, nous qui sommes hommes, comment serōs-nous en ce cas-la sauuez? S'ils ont esté mortels, il ne faut point douter qu'ils n'ayent quelquefois pensé, dit & fait telles & semblables choses qui nous sont offertes a penser, dire & faire. Et souuentefois il leur a bien fallu dire avec toute l'Eglise, Pardonne-nous nos pechez & offenses, comme nous pardonnons aussi a ceux qui nous offensent: veu principalement qu'ils n'ont point eu de telles promesses de l'Esprit que les Apostres: mais seule-

f.j.

ment ils ont esté disciples des Apostres. Si le saint Esprit eut esté si fol & mal aduisé, de croire que les Conciles ou les Peres eussent rongné iusques au vif toutes choses sans exception, & en general reformé toutes choses selon ceste rongneure mathématique, de telle façon qu'il n'y eut ne tasche ni imperfection cachée: ie vous prie, quel besoing eut-il esté alors, que l'Eglise fut si longneusement admōnestee de bonne heure par la viue voix du saint Esprit: ascauoir, qu'il faut esprouuer toutes choses. D'auātage il faut bien aduiser où on edifie de la paille, du foim & de l'esteule sur le fondement qui est le Fils de Dieu, le Seigneur Iesus, 1. Cor. 4.

Or yci le saint Esprit prophetize non point en cachette ou comme en passant, ains ouuertement & en autorite, qu'il y en aura aucuns en la sainte Eglise vniuerselle, qui edifieront sur ce fondement, du bois, ou de la paille, ou des esteules: c'est a dire, qu'il y aura des Docteurs qui demeureront au fondement qui est Christ, les œuures desquels souffriront dommage: & toutefois eux seront sauuez comme par le feu. Lequel passage ne peut estre entendu des heretiques, car les heretiques mettent vn autre fondement: mais ceux-ci demeurent au fondement: c'est a dire, ils sont sauuez en la foy de Iesus Christ, & sont appelez les Saints de Dieu: & nonobstant ils ont aucuns enseignemens qui ne sont que seltus, bois & esteule, lesquels enseignemens souffrent dommage par le feu des saintes Escriures: eux toutefois sont sauuez, comme saint Augustin dit de foy, Je pourray errer, mais ie ne pourray estre heretique. La raison, Les heretiques non seulement sont en erreur: mais aussi deffendent obstineement leurs erreurs, & qui pis est, bataillent contre la verite manifeste & cognue, & l'oppugnent contre leur propre conscience. Saint Paul au 3. de Tite dit des heretiques, Fuy l'homme heretique apres vne admōnition ou deux, & saches que celuy qui est tel, est subuerti, & qu'il offense estant condamné par foy-mesme: c'est a dire, qui

veut

veut obstineement & sciemment estre damné en son erreur, & périr a tout iamais. Mais S. Augustin veut volontiers recognoistre son erreur, il veut volontiers estre instruit : pour ceste raison il ne peut estre heretique. Autant en font tous les autres vrais fideles, & iettent volontiers leurs esteules & pailles pour estre brulées : seulement qu'ils demeurent sur Iesus Christ qui est le fondement du salut eternel:comme aussi nous auons fait & faisons.

Puis donc que la chose ne peut aller autrement quât aux opinions & escrits des Peres (ie parle maintenant des bons & saincts Docteurs) en quelque lieu qu'ils edifient, sans or, sans argent & pierres precieuses: c'est a dire, sans quelque bon & certain tesmoignage de la sainte Escriture, & s'ils bastissent, esteules, foin, bois, sur autre chose que sur le fondement: alors il faudra suyure la reigle de S. Paul fort vtile & tressainte, & faire difference entre l'or & le bois, entre l'argent & l'esteule, entre les pierres precieuses & le foin. Ne nous laissons donc point tirer par ces criars & bauars, ni amener iusques a ce poinct, que nous croyons ou pensions que l'or & le bois soyent tout vn, & que les festus vallent autant que l'argent, & que le foin soit aussi precieux ou riche qu'une esmeraude ou quelque autre pierre precieuse. Ou bien s'ils ne se deportent, nous les prions qu'eux monstrent les premiers quelque espreuue de ceste nouuelle sapience ou philosophie, qu'ils iettent la l'or comme vn festu, & choisissent du bois pour l'argent, & ayent en admiration la paille, ou esteule, ou charbons comme vn grand thresor, & qu'ils estiment des festus comme escarboucles. Autrement ils nous pardonneront si nous ne voulons point estre deceus es choses spirituelles: veu qu'eux ne veulent estre trompez es temporelles : lesquelles si on compare aux biens eternels, non seulement elles seront beaucoup plus viles, mais aussi elles seront sans comparaison moins que rien.

Et certes veu qu'il est question des plus anciens Peres ou Docteurs, il faut considerer en cest article le conseil admirable & singulier du saint Esprit, en ce qu'il n'a voulu d'ailleurs bailler au monde tous les liures en general de la sainte Escriture tant du vieil que du nouveau Testament, que de la semence d'Abraham, & du peuple Iudaïque, & qu'un seul seulement ne fut escrit par vn homme Payen. Comme aussi il n'a point choisi les Prophetes ne les Apostres d'entre les Gentils, cōme saint Paul dit au 3. des Romains, Les Iuifs ont ce priuilege, que les parolles de Dieu leur ont este commises. Et au Pseume 147. Lequel annonce la Parolle a Iacob, ses iustices & ses iugemens a Israel. Il n'a point fait ainsi a toute nation, & ne leur a point manifesté ses iugemens. Et le Fils de Dieu dit au quatriesme de saint Iehan, Nous scauōs que le salut est des Iuifs. Item, aux Romains 9, Ausquels est la promesse, la Loy, les Peres & Christ selon la chair.

Et pourtant nous qui sommes Gentils & profanes, n'egalons point les escrits de nos Peres a la sainte Escriture, laquelle est procedee de ces grans & excellens personages & lumieres de tout le monde. Portons-nous vn peu plus modestement enuers les escrits de si singuliers personages. Car ils sont enfans & heritiers & nous sommes estrangers & forains : & ce que nous sommes receus a la table des enfans, c'est par pure misericorde & bōte gratuite. Pour mieux dire, nous-nous deuions ietter bas par terre aux pieds des Patriarches, comme ceste poure femme Chananee, & desirer sur toutes choses d'vne profonde affectiō de nostre cœur, que nous puissions manger des miettes qui tombent de la table des seigneurs. Maintenāt nous-autres Gentils mis beaucoup au dessous voulons exalter nos Peres & leurs escrits iusques a l'autorite des Apostres. Nous ne pensons pas, que Dieu qui n'a point espargné les rameaux ou branches naturelles, nous peut aussi bien rompre & du tout briser, Rom. 11. Car il n'a point

point espargné la semence ou la posterite d'Abraham, a cause de leur incredulite & obstination. Et toutesfois le Pape, ce monstre & abomination horrible du dernier temps s'esleue par dessus les Prophetes & Apostres, & s'attribue d'un orgueil diabolique la puissance de changer l'Escripture a son appetit. Parquoy saint Augustin dit fort bien, escriuant a saint Hierosme, comme nous auons ci dessus recité, Ne penles point, mon frere, & ne requiers que tes escrits soyent egalez aux liures des Prophetes & Apostres : ia n'aduienne que tu le demandes.

Et il n'y a nul Concile, ni aucun liure des Peres, auquel on puisse trouuer toute la doctrine Chrestienne. Mettons ceci pour exemple, Le Concile de Nicee traite seulement cest article, que Iesus Christ est Dieu naturellement. Le Concile de Constantinoble, que le saint Esprit est Dieu. Le Concile d'Ephese, que Iesus Christ est seulement vne personne, & non point deux. Le Concile de Chalcedoine, que Iesus Christ n'a point seulement vne nature, mais deux : ascauoir, la nature Diuine, & la nature humaine. Ce sont-ci les principaux & les plus excellens quatre Conciles, & traittent seulement ces quatre articles, comme nous orrons. Mais ce n'est pas-ci encore toute la doctrine Chrestienne. Saint Cyprien enseigne comment il faut constamment mourir en la foy, & comment il faut endurer les martyres & passions : & il baptize derechef les heretiques. Il reprend les mauuaises mœurs, & principalement des femmes. Saint Hilaire dessend & maintient le Concile de Nicee, que Iesus Christ est vray Dieu : & a fait quelques traitez sur aucuns Pseaumes. Saint Hierosme louë excessiuement la virginite, & la façon de viure des hermites. Saint Iehan Chrysostome exhorte en ses sermons a iusner, faire prieres & oraisons, dōner des aumosnes, a estre patiēt, modeste en habillemens, & autres choses semblables. Saint Ambroise a escrit beaucoup de choses necessaires :

f. iij.

mais sur tous saint Augustin traite les principaux articles : & pourtant le Maistre des sentences a puisé de luy vne bonne partie de ses escrits. Pour dire en brief, quand tous les escrits des Peres anciens & toutes les ordonnances des Conciles seroyent amassees ensemble : tant y-a toutefois qu'on n'en pourroit pas extraire vn corps entier de la doctrine Chrestienne : & si la sainte Esriture n'eut fait ce corps, l'Eglise de Christ n'eut peu demeurer ferme, ou durer long téps, par le moyen des Conciles & des Peres. Or pour dire ceci plus clairement : dont est-ce que les Conciles & Peres ont ce qu'ils enseignét & traittent? Pourroit-on bien auoir ceste opinion, qu'ils en ayent este les premiers inuenteurs? ou bien que le saint Esprit leur ait fourni quelque chose derechef? Par quels aides donc est-ce que l'Eglise a este gouuernee ou maintenue auant les Conciles & les Peres? Parquoy il faut necessairement que nous parlions autrement des Conciles, & que nous ne regardions point seulement ces lettres ou syllabes nues, Concile, Concile, mais a l'intention des ordonnances faites par les Conciles. Ceci soit assez pour la premiere partie de ce petit liure, afin aussi que nous puissions reprendre halaine.

LA SECONDE partie.



PREN PREMIER LIEU
parlons des Conciles. Car ces trois
syllabes, Concile, nous donnent
beaucoup d'ennui, a nous qui som-
mes ignorans, voire plus que les Pe-
res & l'Eglise. Au reste, ie ne m'v-
surperay point yci autorite de iu-
ge, ou de quelque ouurier excellent : mais seule-
ment

ment ie proposeray ce que i'ay en fantasie. S'il y en a aucuns qui en ceste matiere si necessaire & de si grande importâce peuuent apporter quelque chose de meilleur ou plus solide, ie leur desire salut & prosperite. Et auant toutes choses i'accommode a ceste presente matiere le passage de saint Hilaire de la Trinite. On doit, dit-il, tirer l'intelligence de ce qui a este dit des causes de ce qui est a dire. C'est comme s'il disoit, Qui veut entēdre les dits ou les escrits des autres, il faut qu'il regarde premierement pourquoy & pour quelles causes on a ainsi dit & escrit. Semblablement par les causes de ce qui est a faire on aura cognoissance de ce qui a este fait. Aussi la raison naturelle enseigne cela: mais ie veux declarer ceci d'une façon grossiere.

Il peut bien aduenir, qu'entre quelques fermiers ou laboureurs il y aura quelque voisin qui accusera son voisin, & pourra ainsi former son procez deuant le iuge, Monsieur le iuge: cestuy-ci a bleissé ma renommee, il m'a appellé pendard, ou garnemēt: là les lettres & les syllabes donnent la sentence d'elles-mêmes, comme si l'accusateur estoit grandement outragé, & nonobstāt tout cela n'est que mēsonge. Mais si celuy qui est ainsi accusé furuiēt, & s'il monstre les causes de ces lettres & syllabes, & reiette ces reproches contre le demandeur, disant, Monsieur le iuge, ce demandeur ou accusateur est vn homme meschant & rempli de malice. Car apres auoir este publiquement fouetté en ceste ville, il en a este banni a cause de ses malefices & forfaits: & s'il n'eut eu pour soy l'intercession des gens de biē, a grād peine fut-il eschappé des mains du bourreau: & toutesfois il a tasché de me prendre a despourueu, & de me saccager en sa propre maison. Alors le iuge entend bien d'une autre façon les lettres & les syllabes qu'il ne faisoit auparauant: comme ceci nous est montré par l'experience ordinaire es iugemens & affaires politiques. Car auant qu'on cherche les causes & les sources, il n'y a rien que des syllabes, & heurlemēs

de Choristes & bruits de moyneſſes. En ceſte façon quand Ieſus Chriſt dit a Pierre, Tout ce que tu auras lié en terre, ſera auſſi lié au ciel : & tout ce que tu auras deſlié en terre, ſera auſſi deſlié au ciel: le Pape empoigne ces lettres ou ſyllabes nues, & ſe fait voile pour nager aux iſles bien-heurees : & corrompt ceſte commiſſion en ceſte ſorte, Ie qui ſuis l'ape, ay uiſſance de lier au ciel & en terre. I'ay les clefs pour lier & deſlier toutes choſes en tout & par tout. C'eſt bien a propos.

Or quand on conſidere les cauſes de ceſte ſentence, alors le Fils de Dieu eſt là en ceſt argument, qui eſt de ſi grande importance, où il eſt traitté de la uiſſance de lier & deſlier. Car il parle de la uiſſance de pardonner les pechez en l'Egliſe. Car il n'y a homme qui uiſſe paruenir au Royaume des cieux & a la reconciliation eternelle, ſinon par la remiſſion de ſes pechez & offenſes: & nul n'eſt excluſ & mis hors de ce royaume bien-heureux de Dieu ſinon celui a qui les pechez ſont retenus pour ſon obſtination & impenitence. En ſorte que nous deuons rapporter ces parolles de Ieſus Chriſt a la neceſſite des conſciences opprimees, & non point a la uiſſance de ſainct Pierre. Tant y-a q̃ le Pape qui eſt le vray Antechriſt, a fait de ces clefs, des clefs fauſſes & contrefaites, ſous leſquelles il enferme toutes les richesses, les threſors & coffres de tous les Roys: & les a forgees pour fouiller, & piller par larrecin, & diſſiper par rapine impudente toutes les facultez tant des riches que pources, brief pour attraper tous les biens de tous les hommes. Car ce fol de Pape ne regarde que les lettres & ſyllabes des parolles ou de la ſentence du Seigneur Ieſus, & non point les cauſes ou les ſources. En ceſte ſorte on trouuera en la ſaincte Eſcriture beaucoup de paſſages, qui ſont contraires l'un a l'autre ſelon la lettre. Or quand les cauſes & raiſons ſont donnees, alors on les peut facilement accorder. Et ie ne doute point, que les Legiſtes & Medecins

decins ne trouuent vn nombre infini de tels exemples en leurs liures, comme i'ay recité ci dessus du iuge de village. Et que sont toutes les choses & affaires des hommes sinon contradictions opposites, iusques a ce que les causes & raisons des choses dites & faites soyent bien considerees? Parquoy ces serpentins hypocrites, qui cherchent si songneusement des contradictoires & oppositions en mes liures, & laissent tout a propos les causes & raisons des choses qui sont là dites, ce sont des porceaux & asnes, & bestes stupides, & courent finement mes parolles par belles canillations & sophisteries. Comme si ie ne pouuoie pas bien aussi recueillir de leurs escrits des contradictions infinies, mesme en tels lieux ou il y a des vrayes contradictions & oppositions, qui ne pourroyent estre accordees pour quelques raisons qu'on peust alleguer. Mais c'est allez parlé de ceci: car nos aduersaires mesmes ne meritent pas qu'on leur tienne si long propos.

Or voyons maintenant du Concile de Nicee. Voyci les raisons pourquoy ce Concile fut tenu. Le bon Empereur Constantin s'estant fait Chrestien, donna la paix a la vraye Eglise contre les oppresseurs & persecuteurs: & eut vne si grande force de foy & vne si grande cōstance, qu'il fit la guerre a son propre beau-frere nommé Licinius, a qui il auoit donné sa sœur en mariage, & lequel il auoit associé a l'Empire: & luy osta son royaume, d'autant que combien qu'il l'eut par plusieurs fois admonesté, toutefois ne s'estoit voulu deporter de faire des persecutions terribles contre les pures Chrestiens. Ce bon Empereur donc ayant remis la pure Eglise en vn repos bien-heureux, & l'ayant restituée en paix & tranquillite, & fort bien pourueu aux commoditez d'icelle en toutes les sortes qui luy auoyēt esté possibles, iusques-la qu'il se preparoit a faire la guerre aux Perses, ne peust finalement euitier vn malheur horrible. Car durāt ceste paix

tant desirable, & au milieu de ceste heureuse tranquillite, le diable ancien ennemi de l'Eglise suscita Arrius prestre d'Alexandrie contre son Euesque: lequel s'efforçant de cōtrouuer & forger quelque chose de nouveau contre la foy ancienne & catholique, faisoit des monstres orgueilleuses de son esprit, & commençoit fierement a s'opposer contre la doctrine de son Euesque, & nioit ouuertement que Iesus Christ fut Dieu egal a son Pere. Il y auoit plusieurs autres prestres qui fauorisoient a ceste doctrine d'Arrius, & plusieurs Euesques aussi de grand renom. Or ceste peste commença a l'espandre bien loing, de telle façon qu'Arrius se vantoit qu'il estoit Martyr, comme endurât persecution de son Euesque a cause de la verite. Car iceluy le reprenoit, & sema par tous les pays des epistres enuenimees outre mesure contre luy.

Or quand ce bruit fut venu iusques a l'Empereur (comme il y auoit vne grande sagesse en luy) il tascha d'esteindre vistement ce feu qui commençoit a brul-
ler, auant qu'il vint a monter en plus grande flamme. Il escriuit donc tant a l'Euesque d'Alexandrie qu'a Arrius, les exhortant tous deux avec authorite & d'affection bonne & paternelle a viure en paix, & ne pouuoit-on escrire de plus grande grauite ni humanite. Il leur remonstroit, qu'il auoit pris grand peine a mettre la paix en sa iurisdiction pour le repos des fideles & Chrestiens: & eux maintenant suscitoyēt des discords & riottes: que cela seroit vn grand scādale aux infideles: & cela seroit destourner plusieurs peuples de la foy: ce qui fut fait, & ce bon Empereur s'en pleignoit aussi. Item, que cela l'empescheroit de faire la guerre aux Perses. En somme, ce Monarque tant grand & tāt puissant escriuit ainsi des lettres fort modestes & fort Chrestiennes a ces deux personages. Et certes selō mō opinion, l'Empereur Constantin s'abbaissa en ces lettres plus bas qu'il n'estoit cōuenable a vn tel Prince. Voy-
la comment j'en fay iugemēt par ma plume beaucoup plus

plus aspre & plus bruyâte, laquelle certes ie n'eusse peu moderer a vne telle douceur ou debonnairete, principalement si i'eusse este au lieu d'un si grand ou puissant Empereur.

Mais ceste letre de Cōstantin ne seruit de rien. Car cest heretique Arrius auoit desia applaudissement enuers plusieurs: & en telle furie il vouloit entrer par force contre son Euesque. Mais ce bon Empereur ne desista point encore pour cela, ains enuoya vn ambassadeur notable, vn Euesque renommé par tout le monde, nommé Osius Euesque de Cordube en Hespaigne, pour appaiser ce different semé en Alexandrie & par tout l'Egypte. Mais encore ne fut point la cause assoupie pour cela, mais le feu s'allumoit tant plus & gaignoit pays, ne plus ne moins que si quelque flâme auoit saisi toute vne forest. Alors Constantin le bon Empereur recourut a l'extremite, & appella au Concile tous les plus excellens & plus saincts Euesques qui pour lors fussent en tout le monde, & ordōna qu'aux despens de l'empire il y eut des asnes, mulets & cheuaux apprestez pour les porter, a celle fin qu'ils peussent venir a Nicee: desirant de tout son cœur que ce different fut appaisé par eux. Là donc se trouuerent beaucoup d'Euesques excellens & de grand renom. Entre autres il y eut l'Euesque de Nisibis, nommé Iaques, & Paphnuce aussi Euesq de Ptolemaide s'y trouua: lesquels auoyēt este furieusement persequitez par Licinius, & lesquels aussi auoyent fait des miracles, & estoient renommez pour cela. Aussi il y auoit entr'eux des Euesques Ariens, comme si on eut meslé de la fiente de rats parmi du poyure. L'Empereur donc estoit fort ioyeux, & esperoit que ceste cause auroit finalement bonne issue, & traittoit tous les Euesques honnorablement. Or les Euesques commencerent a s'agacer l'un l'autre a cause de leurs offenses particulieres: & on portoit a l'Empereur des libelles diffamatoires, esquels les especes des iniures, des blasmes & outrages estoient nommement

escrites, & en cela declairoit-on expressement comment l'un auoit iniurié l'autre: & chacun requeroit que l'Empereur donnast sa sentence la dessus. Mais il les reietta: car il ne vouloit point qu'on traittast-là des riottes & offenses particulieres: mais il vouloit que cest article de Christ fut là expliqué: & il n'auoit assemblé ce Concile pour les offenses particulieres. Mais voyant qu'ils ne cessoyent, il ordōna que tous les breuets de toutes leurs cōpleintes luy fussent apportez. Ce qu'on fit: toutefois il n'en voulut point ouurir vn seul pour le lire: ains il les ietta tous dedans le feu. Cependant neantmoins, faisant toutes ces choses d'une grāde benignité & clemence, il disoit qu'il n'estoit point leur iuge, veu qu'ils luy estoient donnez de Dieu pour Euesques & iuges. En ceste façon il les admonnestoit de traiter de la principale cause. Ce bon Empereur ne merite-il pas d'estre loué cōme homme de grande benignité & sagesse? Vn autre qui eut este d'une nature plus vehemente, se fut offensé de ce fait des Euesques. Mais ce bon Prince se porta modestement; & toutefois il monstra bien quelles estoient ses pensees, & aussi quelle estoit son opinion, en ce qu'il ietta dedans le feu ces libelles & breuets d'accusations particulieres, ne faisant difficulté de ce faire pour leur nom & autorité Episcopale. Car il les voulut biē admonester de leurs combats fots & puerilles, au lieu qu'ils auoyent este là appelez des lieux & pays loingtaïs pour d'autres causes beaucoup plus necessaires & de plus grāde importāce.

Comme ainsi soit donc que le Cōcile fut desia cōmencé, ce bon Empereur voulut assister luy-mesme au milieu des Euesques, & estre assis en vn siege qui estoit vn peu plus bas que les autres sieges des Euesques. Syluestre Euesque de Rome n'y estoit point: mais cōme aucuns disent, il y auoit enuoyé deux prestres. Et apres que Eustache Euesque d'Antioche qui presidoit au Cōcile, eut rendu graces a l'Empereur Constantin pour ce grād biē qu'il auoit fait, d'assembler le Cōcile, la doctrine d'Arri-

fut

fut leuë haut & clair deuât to^{us}. Car par l'histoire mesme on peut facilement cognoistre qu'Arrius n'y estoit pas present, d'autât qu'il n'estoit ni Euesque ni ambassadeur d'Euesque. Ce meschât article estoit principalement cõtenu en la doctrine d'Arrius: ascauoir, que Iesus Christ n'est pas Dieu naturellement, mais creë & fait de Dieu, comme ceci est plus amplement contenu en son histoire. Sur cela se leuerent tous les Euesques, & de courroux qu'ils auoyent, deschirerent par pieces le papier ou ceste doctrine estoit escrite, & crierent a haute voix que ceste doctrine estoit faulse & peruerse. Ainsi Arrius fut condamné sans autre procedure, que par la contenance que les Euesques monstroyent en leurs faces, declarans assez tous d'un mesme consentement & avec vn refrongnement, qu'ils ne pouuoient porter la meschancete & audace outrecuidee de ce dogmatiseur, & qu'ils auoyent en horreur ce blaspheme si execrable d'Arrius. Tous les Euesques donc sousscriuoient a ceste condamnation d'Arrius d'un commun accord, & mesme les Euesques Arriens, combien que ce fut par dissimulation & feintise, comme l'euenemēt l'a bien monsté depuis: exceptez seulement deux Euesques d'Egypte, qui ne soussignerent point. En ceste sorte l'Empereur donna conge aux Euesques: & luy & le Concile escriuirent des lettres a toutes les Eglises de toute la terre touchant ceste matiere. Lors l'Empereur print plaisir a ce que ce different fut appaisé, & se monstra fort humain enuers les Euesques, & principalement ceux qui auoyent endure persecution.

On peut maintenant facilement cognoistre par ceci pour quelles raisons ce Concile fut assemblé, & pour quelle fin: ascauoir, pour maintenir cest ancien & principal article de la foy: que Iesus Christ est vrayement & naturellement Dieu, contre la nouuelle heresie d'Arrius, lequel estant deceu par argumens de la raison humaine, voulut fleschir, changer, corrompre & condamner cest article: & en ceste sorte, luy-mesme a esté con-

damné. Car cest article ne fut point inuenté par le Concile de Nicee: & là il ne fut point ordonné comme s'il n'eut point esté auparauant en l'Eglise: mais il y fut maintenu contre la nouuelle heresie d'Arrius: comme les fideles Euesques & saints Peres le declarerent mesme de fait, lesquels de grand courroux deschirerent par pieces le papier où cest article estoit escrit. En quoy faisant, ils ont monsté ouuertement, que deuant ce temps-là, depuis le temps des Apostres on auoit autrement enseigné en l'Eglise. Car sans cela comment est-ce que tant de Chrestiens eussent esté sauuez, qui deuant le Cōcile de Nicee depuis le temps des Apostres, voire par l'espace de trois cens ans auoyent creu en iceluy Iesus Christ nostre Seigneur & Redempteur, qui auoyent mis leur foy en cela qu'iceluy est vrayement Dieu, qui l'auoyent confessé, inuocé & adoré, & espandu leur propre sang en tesmoignage de ceste confession d'un cœur constant & alaigre?

Je suis contraint de reciter ces choses en passant: car ces faux calomniateurs & escornifleurs du Pape, sont tellement hors du sens, qu'ils deffendent du bec & des ongles ceste tant haute sentence: que les Conciles ont puissance & autorite de forger de nouueaux articles de foy, & de chāger les anciens ou les reformer. C'est-ci vn mensonge execrable & fort estrange. Et nous qui sommes Chrestiens, sommes aussi obligez de rompre par pieces a belles dents tels papiers où il y aura de tels blasphemés escrits: & sur cela il y a vne Diuine ordonnance perpetuelle & immuable. Car il n'y eut iamais Conciles qui ayent forgé ou changé des articles de la foy: & qui plus est, il n'y a esprit humain, ni autorite qui doye controuuer des articles de foy, comme plusieurs font, & ont fait par ci deuant, lesquels forgent des illuminations nouuelles & secretes, & de leur propre audace osent bien establir des articles de foy. Mais les articles de la foy ont esté produits & reuelez du ciel par

par tesmoignages manifestes & ouuerts du S. Esprit: autrement ce ne sont point articles de foy, comme nous dirons ci apres.

Soit-ci par forme d'exemple, Le Concile de Nicee (comme on a veu ci dessus) n'a point inuenté cest article, ou de nouveau ordonné & establi, que Iesus Christ est naturellemēt Dieu: mais il fut apporté par le sainct Esprit, quand au iour de la Pentecoste il fut enuoyé du ciel sur les Apostres en espee visible, & declara ouuertement par les sainctes Escritures, que Iesus Christ le Fils eternel de Dieu, estoit vray Dieu: comme auparavant le Fils de Dieu luy-mesme voulant monter a la gloire celeste, auoit fait promesse a ses Apostres, qu'il leur donneroit pour certain le S. Esprit. Et de puis les Apostres ont transmis cest article iusques au Cōcile, & du Concile il a este transmis iusques a nous. Et par ainsi il demeurera iusques a la fin du monde: comme luy-mesme dit, Je seray avec vous iusques a la consommation du monde. Or si pour maintenir cest article nous n'auions plusieurs autres & plus fermes tesmoignages que ce Concile, nostre defense seroit fort froide. Et de ma part, ie ne voudroye certainement adiouster foy a ce Concile: plustost ie diroye, Les Peres de ce Concile ont este hommes. Mais l'Euangeliste S. Iehan, les Apostres, S. Pierre & S. Paul & les autres Apostres sont tesmoins fermes & graues: ceux-ci sont vn fondemēt assure, & vn mur de fer. Car il leur a este reuelé du ciel par le S. Esprit, qui leur a este enuoyé du ciel. Les Eglises ont receu cest article d'eux auant ce Concile: & le Concile mesme a receu ceste verite immuable. Car les Eglises tant deuant le Concile, lors que l'heresie d'Arrius cōmençoit a pulluler, que durant le Concile mesme & apres, opposerent constamment a cest erreur pernicieux, les parolles de la saincte Escriture prises de l'Euangile selō S. Iehan, comme on peut voir es liures d'Athanasie & de S. Hilaire. Et l'histoire Tripartite au xxix. chap. du v. liure tesmoigne que le Symbole a este

fondé & confirmé par les escrits des Apostres au Concile de Nicee. Autrement les parolles nues des Conciles ne proufiteroyent de rien, elles n'auroyent ne force ni efficace sans les tesmoignages ouuerts de la saincte Escriture, qui est comprise es liures des Prophetes & Apostres. En ceste sorte cest article de la Diuinite de Iesus Christ est l'esprit & l'ame de ce Concile de Nicee: ou pour mieux dire, ce Concile n'est autre chose que cest article, pour lequel il a esté tenu, & renuoyé en ce iour-la, comme on a veu ci dessus.

Or ils s'assemblerent derechef en vn autre iour, auquel n'est faite aucune mention de l'Empereur Constantin le grand, qu'il y fut present: & traiterent quelques autres affaires: & il est bien certain qu'ils ne meirrent point en oubli ces libelles ou breuets que Constantin auoit iettez au feu, & n'auoit voulu ouyr les parties. Parquoy il fallut qu'ils s'assemblassent derechef pour appaiser ces differés & discords. Car la plus grád partie de ces querelles n'estoit autre chose que débats & riottes entre les prestres: ascauoir, qu'en vne cite ou ville ou bourgade il n'y deuoit point auoir deux Euesques. Ité, qu'un Euesque ne deuoit point laisser vne Eglise q. n'eut esté de gráde estime, pour en chercher vne plus riche, ou plus ample, ou plus magnifique. Ité, que les clerics ou diacres ne se deuoyent fourrer par cautele dedans d'autres Eglises, pour laisser ou abandonner l'Eglise, par laquelle ils auroyent esté premierement appelez. Ité, qu'un Euesque ne deuoit receuoir ceux qui auoyent esté reiettez par d'autres, ou excommuniez. Item, que l'Euesque de Ierusalem deuoit retenir l'ancienne prerogatiue de sa dignite par dessus les autres: & autres tels menus fatras. Et qui est l'homme qui pourroit estimer ces propositions tant legieres & friuoles comme articles de foy. Et quel proufit pourroyent apporter ces choses, quand elles seroyent preschees deuát le peuple? Dequoy appartient cela au peuple ou a l'Eglise? Sinon que parauanture on voulut recueillir

cueillir ceci comme vne histoire, & cognoistre par cela qu'en ce temps-la, par tout il y auoit des gens ambitieux, effrontez & malins en l'Eglise, fussent Euesques, prestres ou clers, qui ont este plus sōgneux ou curieux de l'honneur, de la puissance, de la splendeur & des œuvres, que de la gloire de Dieu & de sō Royaume, auxquels il falloit ainsi resister.

Car le lecteur fidele & prudent peut facilement iuger, que ce bon Empereur & Prince tressage Constantin, n'auoit pas fait assembler tāt de gēs de bien & personages si excellens pour tels fatras & petites querelles qui ne valloyent pas le parler. Autrement il ne faut point douter qu'il ne l'eut fait, auant que ceste heresie pernicieuse de ce prestre ambitieux eut cōmencé a naistre ou pulluler. Car toutes ces choses estoient si viles, qu'elles ne meritoyēt pas qu'un si puissant Monarque s'en fut soucié: lesquelles les Euesques mesmes auoyēt constituees & depeschées en leurs dioceses & gouuernement domestique: comme les articles mesmes en rendent tesmoignage. Et cela eut este vne chose non seulement mal seante, mais aussi deshoneste, d'assembler vn si grand Concile, pour affaires si menus & legers: veu que Dieu a baillé la raison a l'homme pour ordōner de ces affaires externes ou politiques: & là il n'est poit besoing que le S. Esprit y preside: lequel doit traiter de Christ, & nō point estre occupé aux affaires submis a la raison. Sinon qu'on veuille appeller œuvre du S. Esprit, toutes celles que les Chrestiens & fideles font: voire mesme ce qu'ils font en mengeant & beuuant. Autremēt quant a la doctrine, le S. Esprit a des occupations beaucoup plus hautes & de plus grande importance, que ces œuvres externes & cuiles, lesquelles tous ceux qui ont quelque sens ou iugemēt cōmun, peuuent facilement iuger. Auec ce les Euesques qui ont este presens en ce Cōcile de Nicee, n'estoyent pas tous fideles: tous n'estoyēt pas Paphnuces, ou Eustaches, ou Iaques. Car il y en auoit 17. Arriens, qui estoient fort estimez

qui touteſſois ſouscouerture de quelque humilite fai-
ſoyent ſemblât de porter reuerce aux autres. L'hiſtoi-
re de Theodorat dit, qu'il y auoit vingt articles. Ruſin
dit, qu'il y en auoit 23. Je ne peux dire, ſi les Arriens ou
autres y adiouſterent ou effacerēt quelques articles: car
l'article des fēmes & du mariage des preſtres, pour le-
quel il eſt dit que Paphnuce a combatu, n'eſt pas là cō-
tenu. Mais ie ſcay bien, que tous ces articles ſont entie-
remēt morts, il y a deſia long temps, & enſeuelis es li-
ures, & reduits en cendres, & ne reſusciteront iamais.
Cōme Constantin a ſignifié cela de fait, quand il deſ-
chira par pieces, & ietta au feu to^s les breuets & papiers
de ces articles. Car ils ne ſont point aujourd'huy obſer-
uez, & ſi ne les pourroit-on obſeruer. Tous ces articles
ont eſte du bois, du foin, des eſteules, comme S. Paul
dit, qui ont eſte edifiees ſur le fondemēt. Et pour ceſte
raison le feu a conſumē peu a peu ces choſes: cōme tou-
tes autres choſes fragiles & caduques ſ'en vont a neant
par ſucceſſion de temps. Or ſi ces choſes euſſent eſte
articles de foy, ou commandemens & ordonnances de
Dieu, elles euſſent duré comme ceſt article de la Diui-
nite de Ieſus Chriſt.

Touteſſois de ces articles de feſtus, aucuns ſont de-
meurez de reſte, comme quelques tiſons qui eſchappēt
de l'ardeur du feu: aſcauoir, l'article de la feſte de Paſ-
ques. Comme les Mathematiciens & Aſtronomes di-
ſent, nous ne gardons pas bien & iuſtemēt ceſt article:
veu qu'aujourd'huy de noſtre temps l'equinoce ſe por-
te d'vne autre façō bien diuerſe qu'il ne faiſoit pas du
temps du Concile de Nicee: & noſtre Paſque eſt bien
ſouuent celebré plus tard, qu'il ne deuroit eſtre ſelon la
vraye ſupputatiō. Ceſte cōtētion de la feſte de Paſque
cōmēça biē-toſt apres le tēps des Apoſtres: & les Eueſ-
ques ſe ſont excommuniez les vns les autres a cauſe de
ceſt article, & ont foudroyé l'vn cōtre l'autre de ter-
rible façō. Entr'eux il y en auoit aucūs, qui vouloyent
que le iour de Paſque ſur celebré au meſme iour que
les

les Iuifs le celebroyent selon la Loy & ordonnance de Moÿse. Les autres (afin qu'il ne semblast qu'ils voulussent Iudaïzer) debattoyēt qu'il falloit celebrer Pasque le Dimanche apres la Pasque des Iuifs. Car Victor Euesque de Rome qui estoit 180. ans deuant ce Concile, qui aussi fut martyrisé, excomunia tous les Euesques & les Eglises d'Asie, d'autāt qu'ils ne celebroyēt point Pasque en vn mesme temps qu'il faisoit. Ainsī voyōs-nous que dès lors les Euesques de Rome pensoyent de se faire grās & puissans. Mais Irenee Euesque de Lion, lequel a veu Polycarpe disciple de S. Iehan Euangeliste, le reprint, & appaisa ce discord, & fit tant que Victor desista de troubler les Eglises. Et pourtant le bon Empereur Constantin fut contraint, de se mesler de cest affaire, & d'aider aux Euesques a appaiser ce different: & fit vn edit, par lequel il fit publier a tous les hommes du monde, que tous celebraissent Pasque en vn mesme iour. Ceci est fort biē descrit au xxxix. cha. du ix. liure de l'histoire Tripartite.

Mais cest affaire auroit encore maintenant besoing de reformation, a ce que le Kalendrier fut corrigé, & que nous eussions le iour de Pasque droittement assigné. Mais nul ne peut ou ne doit faire cela, que les Monarques, l'Empereur, les grans Rois, & Princes. Il faudroit qu'ils assemblaissent leurs conseils, & fussent vnīs en bonne volonte, & sceussent publier ceste ordonnance a tous peuples & nations, en quel temps de l'annee on deuroit celebrer la feste de Pasque. Car si seulement on commençoit vn si grand affaire en vne iurisdicciō ou deux ou trois, & si les affaires politiques & publiques, comme les foires & marchez & autres semblables estoient accommodez au temps present de Pasque, de cela s'ensuyuroit vne grande cōfusion ou desordre en-toutes choses & affaires. Cela seroit certes biē vtile, & se pourroit facilement faire, si les Princes ou Monarques vouloyent prendre ceste charge sur eux: veu mesme que les Astronomes ont pris grand peine

g. ij.

apres cela, & ne reste seulement finó qu'on face publier des edits. Cependant nous retenons le lin fumant & le tison ayant encore quelque estincelle de feu: que la feste de Pasque soit celebree le Dimanche, quelque grád changement & esbranlement qui puisse aduenir durát ce téps-la. On appelle ceste feste Mobile, d'autant que par chascun an le iour de Pasque est remué ou changé avec ses festes dependátes, & ne demeure point arrestit en vn certain iour comme les autres festes.

Or ceste mobilité de festes est venu de là, que les Peres anciens (comme il a esté dit) desia dés le commencement du Concile ordónerent que le iour de Pasque fut mis en ce temps-la qui auoit esté ordonné & constitué par Moyse auparauant: c'est á dire, en la pleine lune du mois de Mars prochaine de l'equinocc. Et n'obstant ils ne vouloyét pas du tout avec les Iuifs celebrer la feste de Pasque en la pleine lune: mais c'óme h'ómes Chrestiens ils laissoient la Loy de Moyse en ce cas, & prenoient le iour du Dimanche le plus prochain apres la pleine lune de Mars. Ainsi aduint-il l'an passé qui estoit 1538. que les Iuifs feirent leur feste de Pasque pres de cinq sepmaines deuant nous. Ils se ríent de cela maintenant á gorge desployee, & s'eleuent orgueilleusement contre les Chrestiens, c'óme s'ils ne vouloyent point obseruer le temps legitime de Pasque, & c'óme s'ils ne cognoissoient la vraye supputation de l'annee: & ainsi ils s'endurcissent en leur infidelité d'une rage Pharisaïque, & d'une fureur du tout obstinee. Ceci fait grand mal á nos gés qui suyuent nostre parti, qui voudroyent volótiérs que l'Empercur employast quelque chose de sa puissance pour la correction du Kalédrier. Car en cela on n'y pourroit rien faire sans la liberalité des Princes & des Rois.

Or afin que nous laissions-là toutes ces riottes, lesquelles ont esté esmeuës sans gráde cause, ie di que ceci doit estre mis en nostre liberté, de celebrer la feste de Pasque en quelque téps que ce soit, encore qu'il fallut
changer

changer le iour du vendredi au Dimenche, ou au contraire. Il n'y auroit nulle impiete en cela, moyennant que cela se fait par l'autorite des superieurs, & par le consentement des saincts & bons personages. Car Moyse est mort & enseveli par Iesus Christ: & les iours ou les temps ou les saisons ne doyuent point dominer sur les consciences des fideles & Chrestiens: mais les Chrestiens sont seigneurs sur les iours & saisons. Ils ont pleine liberte de determiner de ces choses comme bon leur semble. Car Iesus Christ a mis toutes ces choses en liberte, quand il a osté toutes les charges de la Loy de Moyse. Excepté que nous retenons la coustume receuë publicquement en l'Eglise ancienne, a cause des autres qui vsent de mesmes temps comme nous. Car nous qui sommes en l'Eglise, sommes certains que nostre salut ne depend point, ne de Pasque, ne de Pentecoste, ou de l'observation du Dimanche, ou du vendredi, comme saint Paul enseigne clairement.

Et pour retourner a parler encore des Conciles, ie di ceci a bon escient, que nous obseruons trop superstitieusement ceste partie du Concile de Nicee. Ie di que le Pape avec ses Cardinaux & Euesques non seulement a tiré de là, de l'or, de l'argent, ou des pierres precieuses: mais aussi que de là il en a fait vn bastiment: c'est ascauoir, qu'il en a forgé vn article de foy, sans lequel on ne peut estre sauué: & tous nomment cela vn mandement & obeissance deuë a l'Eglise catholique de Rome. En quoy ils sont beaucoup pires que les Iuifs, pourautât que les Iuifs ont le texte de Moyse en la Bible touchant la celebration & observation de Pasque, laquelle leur a este diuinement ordonnee: mais ceux ci n'ont rien du tout qu'ils puissent ou doyuent suyure, qu'une vaine persuasion, par laquelle estâs poussez, ils veulent des vieilles rapetasseries de Moyse faire vne robbe neufue. Ils crient a haute voix & de grand zele, que la Loy de Moyse doit estre gardee: & ces crieries si hautes tant pleines soyent-elles de zele, toutesfois ce
g.iiij.

sont purs menfonges, & refueries catharreufes, & fonges friuoles faits de Moyse, lequel est pourri dés long temps, & comme l'Eſcriture parle, il a eſte enſeuelli par le Seigneur meſme : c'eſt aſcauoir Chriſt, en ſorte q nul n'a peu trouuer ſon ſepulchre en lieu que ce fut: & ces forciers cauteleux veulēt par leurs enchātemens faire venir l'eſprit de Moyſe de quelque lymbe ou profond abyſme, & nous l'amener viſ deuant les yeux, & ne voyent point ce que ſainct Paul en l'epiſtre aux Galatiens admonneſte, diſant, S'ils veulent garder vne partie de Moyſe, il faut auſſi qu'ils gardent Moyſe tout entier.

Veu donc qu'ils ont ceci pour tout perſuadé, que la pleine lune du mois de Mars doit eſtre eſtimee pour le vray temps de Paſque, & puis qu'ils gardent ſi eſtroitement ceſte partie de Moyſe, il faut auſſi neceſſairement, qu'ils gardent toute la Loy, l'agneau Paſchal, & que par vn ſoudain changement ils ſoyent transformez en Iuiſs, & qu'ils mangent de l'agneau charnel enſemble avec les Iuiſs. Sinon, il faut qu'ils reiettent le tout, & ceſte partie de la Loy touchant ceſte obſeruation de la pleine lune, & auſſi tout le reſte de la Loy. Ou il faut qu'ils nient, que ces choſes appartenantes a la Loy ſoyent neceſſaires a ſalut, comme les articles de la foy y ſont neceſſaires.

On voit donc clairement, qu'en ce Concile de Nicee on a principalement debattu le different touchant ceſt article, que Ieſus Chriſt eſt vrayement Dieu. Car le Concile fut aſſemblé expreſſement pour ceſt article: & pour ceſte raiſon il eſt appellé Concile, comme il eſt vray Concile de fait. Quant & quant auſſi il fut là debattu de quelques choſes accidentales, corporelles, externes ou temporelles, ou de quelque nom qu'on les voudra nommer, leſquelles a bon droit on peut eſtimer pour affaires politiques, ou choſes ciuiles: & ne doyuent nullement eſtre cōparces a articles de foy, ni eſtre miſes en conte ou eſtime, cōme ſ'il y auoit quelque

que autorite perpetuelle & inuiolable en icelles. Il y a long tēps que telles choses sont passees, & ne sont plus en vſage. Mais il a eſte beſoing qu'en ce Concile on ait fait des ordonnances de quelques choses temporelles, qui pouuoient eſtre commodēs & conuenables ſeulement pour ce temps-la, n'appartenantes de rien a noſtre temps. Car il n'eſt poſſible de les obſeruer, & auſſi il n'eſt pas expedient.

On y condamna auſſi vn autre erreur meſchant, q̄ les heretiques doyuēt eſtre rebaptizez : ſi touteſſois cela a eſte fait par les bons Eueſques, & non point inferé par les Arriens ou par quelques-autres faux Eueſques qui ayent fait cela par fineſſe. Semblablement, au Concile qui fut tenu en Ieruſalem par les Apoſtres, apres qu'on eut reſolu du fait principal, on meit auſſi en auant quelques diſputes ou differens de quelques articles externes: aſcauoir, de la beſte eſtoufee, du ſang, & des viandes offertes aux idoles. Tant y-a que ces choses ne furent point ordonnees avec telle opinion, comme ſi c'eueſt eſte vn Decret qu'on d'eut perpetuellement obſeruer en l'Egliſe, ou comme ſi c'eueſſent eſte articles de foy. Car incontinent apres, toutes ces choses tomberent bas. Et pourquoy ſeroit-ce que ne vouluſſions auſſi auoir les yeux ouuers pour regarder de pres ce Concile, comment on le doit entendre par ces cauſes meſmes, qui ont donné occaſion premierement au Concile. C'eſtoit-ci la vraye cauſe, Les Gentils qui auoyent eſte n'agueres conuertis par Paul & Barnabas, auoyent receu le ſainct Eſprit par la parolle de l'Euangile auſſi bien que les Iuiſ: & touteſſois ils n'eſtoient point ſous la Loy ou ſous la ſeruitude de la Loy, cōme eſtoient les Iuiſ. Là les Iuiſ debattoient aigremēt qu'il falloit que les Gentils fuſſent circōcis, & qu'ils deuoyent garder la Loy de Moÿſe: ou bien que les hommes ne pourroyent eſtre ſauuez. Ces choses eſtoient terribles, & comme foudres eſpouantables: aſcauoir, que nul ne pouuoit obtenir ſ'heritage

du salut eternal sinon en obseruant la Loy de Moyse, & s'il n'estoit circonci. Et les Pharisiens insistoient sur cela sur tous les autres: ascauoir, ceux qui estoient conuertis a Iesus Christ, Actes quinzieme. Pour ceste mesme raison les Apostres s'assemblerent avec les anciens du peuple: & apres longues altercations Pierre se mit en auant, & fit ceste belle harengue contenue en ce quinzieme chapitre des Actes,

Hommes freres, vous scauez que des les iours anciens Dieu a ordonné entre nous, que les Gentils ouysent par ma bouche la parolle de l'Euangile, & creussent. Et Dieu qui cognoist les cœurs, leur en a donné tesmoignage, leur baillant le saint Esprit comme a nous: & n'a rien fait de difference entre nous & eux, purifiant leurs cœurs par foy. Maintenant donc, pourquoy tentez-vous Dieu, pour mettre sur le col des disciples le ioug, lequel nos Peres ne nous n'auons peu porter? Mais nous croyons que serons sauuez, par la grace du Seigneur Iesus Christ comme eux.

Or ceste predication signifie autāt comme si saint Pierre auoit este grandement esmeu du propos si aspre des Pharisiens, qui auoyent dit, que les Gentils ne pouoyent estre sauuez, qu'ils ne fussent circoncis & qu'ils ne gardassent la Loy de Moyse, comme on a veu ci dessus. Parquoy il reiette sur eux ces foudres, Vous scauez, dit-il, que les Gentils ont ouy la Parolle par ma bouche, & ont este conuertis a la foy, comme Cornille avec sa famille: & en auez murmuré, & vous-vous estes courroucez fort aigrement contre moy: ascauoir, que i'estoye allé aux Gentils, & qu'apres leur conuersion a la foy, ie les auoye baptizez au nom du Seigneur Iesus, Actes dixieme & vnzieme. Auez-vous oublié si tost ces choses? Et maintenant vous voulez imposer aux Gentils vne telle charge, que, ni nous, ni nos Peres n'auons peu porter. Qu'est-ceci autre chose sinon tenter Dieu, quand on met sur
les

les autres des fardeaux importables, lesquels on ne voudroit pas mesme porter? Veu mesme que vous scauez bien que Dieu leur a donné le saint Esprit sans aucuns merites, ou dignitez de telles charges: & les a faits esgaulx a nous: comme ainsi-soit que nous aussi ayons receu ce mesme Esprit, non point par le merite d'aucune charge, ains seulement par la bonte gratuite & infinie de Dieu, comme aussi nos Peres ont fait. Car puis que nostre infirmité n'estoit point assez forte pour porter vne telle charge, nous auons merité plus d'ire ou courroux que de grace, veu que nostre deuoir nous obligoit a porter telles charges. Car nous-nous estions ainsi obligez nous-mesmes auparauant.

Or voyla la vraye proposition de ce Concile: ascauoir, que contre la Parolle de grace, les Pharisiens vouloyent ainsi exalter ou magnifier les œuvres ou merites de la Loy, comme s'ils eussent este necessaires pour obtenir le salut eternel. Ainsi la Parolle de grace eut este effacee avec Iesus Christ & le saint Esprit. Et pourtant saint Pierre repousse & reiette si fort ces resueries obstinees des Pharisiens: & affirme constamment, que sans œuvres quelconques, & seulement par la grace de Christ il faut que nous soyons sauuez. Et ne se contentant d'une telle affirmation, il ose bien passer plus outre, & dit, que tous leurs ancestres tant les saints Patriarches que les Prophetes & tous les fideles Israelites, n'ont point este autrement sauuez que par la seule grace du Seigneur Iesus: & condamne tous ceux-ci comme tentateurs de Dieu, qui ont voulu & veulent estre sauuez par vn autre moyen.

On peut bien cognoistre, que ceste harengue de saint Pierre a este assez aigre & vehemente, laquelle a rompu ces barreaux de fer, & ces verroux d'airain, dedans lesquels la police Iudaïque estoit encluse. Cest heretique ne meriteroit-il pas bien d'e-

stre brulé par la sentence de tous, veu qu'il reiette toutes bonnes œuvres, & debat fort & ferme que ce peu fuffit pour obtenir salut: ascauoir, la grace & la foy. Et afferme que ceste doctrine a esté preschée a tous les saints Peres depuis le commencement iusques alors. Plusieurs nous appellent aujourdhuy heretiques, qui toutefois n'enseignons autre chose que ceste harenque & predication de saint Pierre, & le decret & ordonnance de ce Concile: ce que tous les hommes scauent bien maintenant, & mieux que ces Pharisiens mesmes, lesquels saint Pierre ne laissez pas pourtant de reprendre aigrement.

Mais saint Pierre est beaucoup plus rude, & par trop rigoureux, en ce que non seulement il enseigne que la grace du Fils de Dieu fuffit pour obtenir salut, qui est propos de grande douceur; mais aussi quand il dit, que ni eux ne leurs Peres n'ont peu porter ceste charge. C'est autant comme s'il disoit, Nous qui sommes Apostres, & tous autres quelques que nous soyons, ensemble avec nos ancestres, premiers Peres, Patriarches & Prophetes, & auec toute ceste multitude qui est appelée le peuple de Dieu, n'auons iamais satisfait a la Loy de Dieu: mais nous sommes pecheurs miserables, souillez de toutes ordures, polluez & damnez. Car il ne parle pas d'une saucisse, ou du brouet, ou de quelque sauce noire espendue sur de la chair ou du poisson: mais il parle d'une chose de grande importance: ascauoir, de la Loy de Moïse, disant, qu'il n'y a homme qui l'ait obseruee, ou qui la puisse iamais garder, ou qui l'ait peu iamais obseruer: comme Iesus Christ dit, Iehan troisieme, Nul de vous ne garde la Loy. Certainement (si ie ne suis deceu de mon opinion) c'est-ci prescher la Loy en malediction, & se nombrer soy-mesme entre les plus grans pecheurs damnez & coupables de mort eternelle. Dont nous peut donc venir ce gentil heritier du siege Apostolique, faulx-

faussement estime tel, qui d'un tiltre si orgueilleux s'appelle soy-mesme Tressainct, & cleue iusques aux hauts cieux ceux qu'il veut canonizer, & lesquels il veut faire saincts, & ce a cause de leurs beaux merites & bonnes œuures, & non point pour le merite de Christ? Et où est-ce que se fourre & se iette maintenant ceste troupe forsenée de moynes, qui sont si robustes, qu'ils peuuent bien plus porter que ne pese ce fardeau importable de la Loy? & qui ont vn tel residu de leur sainctete & iustice, qu'ils en peuuent bien vèdre aux autres? Nous ne sommes point ainsi obstinez ou opiniastrés. Il ne nous est licite d'estimer & reputer pour pecheurs les Patriarches, Prophetes, Apostres & tous les fideles de l'Eglise: mais avec cela nous sommes contraincts d'appeller le Pape Tressainct, c'est a dire, le Sainct des saincts, qui est Iesus Christ.

Mais saint Pierre a la verite merite bien vne absolution benigne, douce & honorable: & ne faut plus iuger de luy avec vn tel chagrin & morosite. Car en cest article si excellent il nous remonstre premieremēt que c'est de la Loy, que par icelle nous sommes tous constituez pecheurs. Secondement que nous sommes rendus iustes seulement par l'imputation gratuite du Fils de Dieu: & que les premiers Peres, les Prophetes & Apostres, & mesme tous les saincts & fideles de l'Eglise qui ont este depuis le commencement, ont este sauuez par ceste foy: desquels tous comme de soy-mesme, il prononce qu'ils ont este vne masse souillee & miserable, pleine de pechez & ordures. Tiercement, il enseigne, voire long temps deuāt qu'il y eut Concile assemble en Nicee, que Iesus Christ est Dieu vrayemēt & naturellemēt: car il dit, qu'il faut que tous les saincts en quelque temps qu'ils ayent este, soyēt damnez, s'ils ne sont faits heritiers du salut & de la vie eternelle, par la grace de nostre Seigneur Iesus Christ.

Or dispenser a vn autre la grace & le salut eternel

ble, & sans aucune doute. Et c'est merueilles, que comme bien que S. Pierre ait mandement & autorite comme Apostre avec toute la cōgregation des Apostres, de faire nouvelle ordonnance de cest article (car pour ceste cause sont-ils appelez, le fondement de l'Eglise, & le sōt de fait) toutefois il recule en arriere, & amene des exemples de la premiere & exquisite Eglise de Dieu, de tous les Patriarches & Prophetes, qui ont este depuis le commencement: & voyci ce qu'il veut dire, Ceste doctrine n'est pas inuentee de nouveau: car tous nos ancestres & tous les saints personages qui iamais ont este, ont fait professiō de ceste doctrine, & l'ont receuë en vraye foy. Qu'est-ceci dōc que nous-nous promettons follement, ou que nous talchons de faire, comme si nous pouuions inueter ou forger des doctrines nouvelles, sinō que par ceste vaine & folle persuasiō nous tentons Dieu, & troublons les consciences de nos freres, & les rendons languissantes?

Or ceci, di-ie, est la principale substance en ce Cōcile, pour laquelle ce Concile tant renommé a este assemblé, & qui a este comme vne conclusion adioustee a toutes les deliberations appartenantes a la doctrine de l'Eglise Chrestienne. Mais ceste beste de Pape ne regarde point a ce qui est le principal: il iette ses yeux seulement comme en passant sur ces quatre membres qui y sont adioustez par saint Iaques, touchāt le sang, la beste estoufee, la fornication, & les viādes sacrifiees & offertes aux idoles. Car de là ils tirēt leur force pour se fortifier en leur tyrannie & cruaute inique, & se couurent de ce zele audacieusement: que puis que l'Eglise a changé ces articles, il leur est licite aussi de chāger & innouer des articles de foy & faire des Conciles a leur appetit. Cōme ils disent orgueilleusemēt, Nous sommes l'Eglise: nous pouons faire & ordonner ce que bon nous semblera. Entens-tu bien Asne-pape? Tu es vn sot, tu es vn lourdaut, tu es vn baudet & vne grosse beste, avec tous tes chapeaux rouges: & pour mieux di-

re, tu es vn porc ord & sale, & pl^r villain qu'une truie qui croupit en ses ordures. Cest article de ce Concile n'est ne tombé bas, ne changé: mais il est demeuré immuable en tous temps, depuis le commencement de l'Eglise, comme saint Pierre dit yci, & demeurera ferme ci apres iusques a la fin du monde. Et a la verite il y a eu tousiours & en tous temps & siecles, des saints & bons personnages, qui ont este sauuez par la seule imputatio du Fils de Dieu, qui est gratuite, & nō point par la Loy: comme les mots du texte sont tellement quellemēt demeurez au milieu des rages du royaume du Pape, vne telle quelle intelligence de la promesse y est demeuree, & de la foy acceptant la promesse: on y a eu quelque cognoissance du Baptisme, de la Cene du Seigneur, des clefs, & le nom tressaint du Seigneur Iesus y est demeuré, combien que le Pape ait cōtredit a la verité, d'une façon furieuse par ses mensonges horribles & diaboliques, & a horriblement seduit, hélas! la plus grand partie du genre humain.

Et quant au Cōcile de Nicee, nous auons dit ci dessus, que la forme du decret composee au Concile auoit este auparauant, & estoit demeuree. Car les decrets des vrais Conciles s'accordās avec la reigle immuable de la doctrine celeste, demeurent fermes a tout-iamais, cōme aussi ils ont tousiours demeuré en ceste fermeté, & principalemēt les principaux articles de la foy, desquels les Conciles prennēt leur denomination & leur origine. Mais qu'auons-nous a dire de ce Concile des Apostres, duquel saint Iaques a recueilli ces quatre poincts, du sang, de la beste estoufee, de la paillardise, & des viandes sacrifiees & offertes aux idoles? Dironsnous que ce Concile est discordant a foy-mesme & au saint Esprit? Car ce sont-ci deux choses opposites & directement contraires: mettre sur les consciences le fardeau importable de la Loy de Moyse, & ne le mettre point. Et si quelqu'un vouloit yci se gaudir par sophisterie, comme s'il y eut ordonnance en ce Concile

non

non point de toute la Loy, ains seulement de quelques parties d'icelle, & qu'on peut imposer le fardeau d'aucunes d'icelles, & d'autres non: cestui-la ne nous satisferoit point: car saint Paul met ces parolles expressees, Galat. 6. Il faut necessairement que celuy qui garde & obserue vne partie de la Loy, qu'il garde aussi la Loy entierement. Or ceci est autant come s'il cōfessoit qu'il doit obeissance a toute la Loy, come celuy qui au demeurant ne feroit pas grand conte d'une partie de la Loy, & tout incontinent se voudroit mettre en auant comme voulant rapetasser vne vieille robbe de pieces neufues, dont la cousture deuit puis apres estre beaucoup plus difforme.

On scait assez aussi que ces membres sont recitez en la Loy de Moysse, & nō poit ailleurs es loix des Payés. Car quel besoing eut-il este autrement d'imposer telles charges aux Gentils, sinon qu'ils eussent vsé d'icelles-mesmes, comme des loix & obseruations du pays, & sinon qu'ils eussent este accoustumez ou nourris? Comment donc accorderons-nous ces repugnances, Nulle loy, & toutes loix?

Mais prenons qu'ainsi soit: si nous ne pouuons accorder ces choses, il nous faut plustost laisser-la Iaques avec son article, que de reietter ce grand & principal article de saint Pierre, a cause duquel ce Synode fut assemblé & celebré. Car cest article yci est de telle importance & de si grand pois, que sans iceluy nul homme mortel ne doit esperer salut. Or Corneille & les autres Gentils que saint Pierre baptiza chez luy & avec luy, ont este sanctifiez & sauuez, deuant que saint Iaques forgeast cest article, comme saint Pierre le remonstre tresbien en ce Concile-la. I'ay aussi touché ci dessus: ascauoir, si ces mēbres yci peuuent estre obmis en bonne conscience, veu que le saint Esprit a este le modérateur de ce Concile, & y a presidé. Mais ceste question yci est vn peu plus subtile: ascauoir, si ce Concile yci se contredit en sorte qu'il soit, contraire a soy-

mesme. Et ainsi tout incontinent qu'ils nous veulent descharger d'un fardeau grand & pesant, ils nous en imposent un beaucoup plus dur & plus difficile : ascauoir, que tout en un coup nous facions tout, & si ne facions rien. Et certes maintenant que telles choses sont enuieillies avec le temps, il nous est facile de nous accorder avec l'une des deux parties : ascauoir, avec l'article de S. Pierre, lequel nous enseigne une doctrine pure & catholique. Seulement l'inceste ou fornication, laquelle est la quarte partie en l'article de saint Iaques n'est pas encore du tout hors d'usage, combien qu'il y a desia plus de vingt ans que les courtisans & ces meschans tant detestables, commençoient a les mespriser, comme si par une longue accoustumance, le peché & paillardise leur eut este une chose de petite estime : de sorte qu'il n'estoit plus estimé mortel, mais pour un peché leger, & dont on ne deuoit pas faire grand cas, & auoyent tousiours en la bouche ce dit commun, Nature demande l'issue, & qu'encore auourd'huy ces saints hypocrites vsurpent souuent a Rome, comme si c'estoit quelque sentence belle & plaisante. O monstres & bestes trescruelles ! Et de fait, il est vray-semblable que ces pources aueugles, ainsi comme ils sont profanes, ont abusé de ce texte yci pour couvrir les impietez de leurs paillardises. Car pource que saint Iaques nombre la fornication entre les autres trois, qui ne nous obligent plus en rien, ils ont tiré de là une telle conséquence, Si la defense de manger du sang & de la chose estoufee, & des choses sacrifiees aux idoles, n'a plus de lieu, il s'ensuit donc que la defense de l'inceste ou de la paillardise n'a plus de lieu, veu que S. Iaques le met au rang des trois autres, & qu'aussi c'est un oeuvre naturel & humain. Or que ces vilains & salles & ords aillent en enfer. Car a la fin ils receuront tel loyer de leurs impietez comme ils le meritent.

Je declareray quel est mon iugement touchant ceci, que les autres en iugent mieux s'ils peuuent. Nous

auons

auons desia souuent dit qu'il faut tousiours iuger des Conciles selon le principal article, qui a premiereinēt este cause que le Concile ait este assemblé. Car en cela gist principalement toute la substance du Concile, & le pouuons appeller, le corps ou l'ame du Concile, a quoy toutes les autres choses se doyuēt rapporter & accommoder: tout ainsi qu'un accoustrement doit estre accommodé & conuenir a la proportiō du corps qui en est vestu, & quand elle n'y conuient point, on le reiette & n'est plus estimé cōme vn accoustremēt. Or il n'est possible qu'il y ait aucun Concile (non pas mesme quelques assemblees, soyent que lon tienne quelques iournees ou chapitres) esquels apres qu'on aura mis fin aux negoces principales, il ne suruienne quelque point a traitter des matieres de moindre importāce. Il les faudra donc depescher & expedier par vn mesme moyen, comme il en fut fait au Concile de Nicee. Car apres qu'on eut traitté du principal article: ascauoir, que Christ est naturellemēt Dieu, incōtinent se presenterent d'autres negoces ciuiles & externes touchāt le iour de Pasque, & d'autres aussi touchant les ceremonies de l'Eglise. En ceste sorte apres qu'il a este yci disputé du principal article de S. Pietre, il fut traitté cōme en passant, de l'article de S. Iaques.

L'opiniō donc ou decret vray & immuable de tous les Apostres & de ce Concile yci est, que l'hōme doit estre sauué, par la seule grace de Iesus Christ, sans la Loy, ne sans aucune charge ou exaction d'icelle. Et quand S. Pierre & S. Paul & leurs compagnons eurēt impetré la cōfirmation d'un tel decret, ils se resiouirent & se tinrent pour bien contens. Car pour l'obtenir, il leur fallut beaucoup trauailler & auoir maints combats contre les Pharisiēs & les Iuifs: lesquels cōbien qu'ils fussent conuertis a Christ, iugeoyent toutesfoiς qu'il falloit garder la Loy. Quand a ce que S. Iaques y adioust son article, iceux ne l'en engardent pas, pource que l'observatiō d'iceluy n'est pas exigée

comme loy ou charge de la Loy : ce que l'epistre enuoyee par ce Concile tesmoigne, quand elle dit, Ne leur imposant nulle charge, &c. Comme s'ils disoyēt, Nous ne vous voulons imposer aucune charge, mais que seulement vous-vous gardiez de mâger du sang, &c. Et qui plus est, ils n'eussent pas defēdu ces choses yci-mesmes encore que S. Iaques y eut adioustē plusieurs autres traditiōs, cōme de la lepre, & autres choses semblables. Car les dix Cōmandemens demurēt tousiours en leur entier, tout ainsi cōme si ces choses-la n'y eussent point este adioustees.

Mais ils disent que cōbien que ces choses ne soyēt point la Loy, ou vn fardeau de la Loy, que toutesfois elles sont necessaires. Or quand vn fardeau n'est plus fardeau, il ne charge pas trop celuy q le porte. En ceste sorte, depuis que la Loy n'est plus loy, il n'est pas malaisē de garder la Loy. Combien d'auātage cela se fera-il, quand il sera question des ceremonies? principalement quād elles sont ou du tout abolies, ou quād on ne retient sinon vn bien peu d'icelles. Si le Pape nous vouloit descharger du fardeau des traditiōs humaines, & qu'il ne voulut point qu'on les receut cōme vne loy, nous luy voudriōs facilement obeir: principalement s'il ne retenoit d'icelles, sinō quelque peu, & qu'il renuerfist ce grand amas confus qui y est. Il faut donc entendre l'article de S. Iaques, en telle sorte que l'article de sainct Pierre touchāt la grace, sans les œures de la Loy, demeure tousiours en son entier.

Il nous faut aussi considerer les causes pourquoy ces choses ont este disputees par sainct Iaques, comme par maniere d'incident, afin que nous cōsiderions biē profondement qu'elle est l'intention de ce Concile. La Loy de Moyse estoit (s'il faut ainsi parler) nayē, nourrie, incorporee & plantee avec les Iuifs, dēs leur ieune aage, & quasi conuertie & tournee en la nature d'iceux, comme S. Paul en parle Gal. 2. Nous sommes Iuifs de nature. C'est a dire, nous sommes nais en la

Loy

Loy de Moyse. Car il parle là de la Loy, & nō pas seulement de la natiuite ou generation charnelle. Pour ceste cause ils ne pouuoÿēt souffrir les meurs & cōditions des Gentils, & ne pouuoÿēt endurer d'estre cōparez a iceux, en quelque lieu qu'ils fussent espars entre les Gentils, quand ils voyoyent commēt les Gentils mēgeoyent du sang, & des choses estoufees, & des choses sacrifiees aux idoles, & toutesfois ils se glorifioÿēt d'estre le peuple de Dieu, ou Chrestiens. Saint Iaques a bien poisé ces choses yci, afin qu'il remediast a tels scādales, de peur que les Gētils n'abusassent trop debordeemēt de leur liberte, au deshonneur des Iuifs, mais qu'ils vlassēt de quelque moderatiō: afin que les Iuifs qui auoyent la Loy de Moyse si profondement enracinee en leurs cœurs, ne fussēt offēsez, & qu'avec vne fierte, ils se mōquaissent de l'Euāgile: car il nous faut auoir cōpassion de ceux qui sont encore foibles & rudes: cōme nous-autres Alemās, nous scauōs biē dire quād nous sōmes yures, qu'il faut qu'une charrettee de foin face place a vn homme yure. Car celuy qui appellera au combat vn homme gouteux ou quelque autre qui soit malade, ne sera pas pourtant reputē vn Hercules ou vn Hector: ne celuy qui osera assaillir vn homme indocte, ne sera pas incontinent iugē docte & scauant.

Or en cest endroit, S. Iaques procede fort doucemēt & avec vne grande moderation. Il laisse-là toute la Loy de Moyse, qui parle des sacrifices & toutes autres ceremonies, lesquelles ils estoÿēt cōtraints d'observer en Ierusalem, voire mesme par toute la Palestine, & parle seulement de ces quatre poincts, par lesquels les Iuifs cōuersans entre les Gentils estoÿēt offēsez. Car les Iuifs estans dispersez çà & là entre les Gentils, estoÿent contraints de voir leur vie & leurs meurs, d'habiter avec eux, & quelquefois auoir la table cōmune avec eux. Alors c'estoit vne chose fort faucheuse que de seruir sur table deuant vn Iuif, des saul-

ciffes, de la chair de lieure avec la saulce noire, des choses sacrifiées aux idoles : veu qu'on scauoit bien qu'il ne pouuoit endurer cela, sans qu'il pensast que cela se fit en se mocquant de luy. Car cela seroit autāt cōme si ie disoye, Oy-tu biē Iuif, cōbien que ie te pourroye biē amener a Christ par mon exemple, d'autāt q̄ ie ne m'age pas des saulciffes, ou que ie n'en fay point seruir deuāt toy, touteffois ie n'é veux pas faire en ceste sorte, mais en m'ageāt de ceste saulcisse ie te veux destourner de Christ, & te precipiter iusques aux enfers. Cela seroit-il humain, afin que ie ne die point Chrestien? Ne faut-il pas qu'un chacū en ceste vie presente dissimule beaucoup de fautes, & qu'il en pardonne beaucoup, quād il voit & scait bien que ses faits ou ses dits naurēt la cōsciēce d'autrui, & sur tout en telles choses qui ne sont point directemēt a l'encōtre de Dieu? Dés lors les Gētils estoγēt fort cōtraires aux Iuifs, & s'esleuoγent a l'encōtre d'eux, cōme ceux qui auoyent seigneurie & dominatiō sur eux. Aucōtraire les Iuifs estoγēt irritez, cōme ceux q̄ estoγēt le peuple de Dieu, ainsi cōme la saincte histoire de la Bible le tesmoigne trescuidōment en beaucoup de lieux. Il s'ensuit dōc q̄ ce conseil de S. Iaques estoit fort salutaire & propre, pour remedier a telles offenses, & pour deliurer les cōsciēces de plusieurs: afin que pourautāt que les Payēs & Gētils auoyēt obtenu la grace de Christ sās la Loy, & sans aucuns merites, de leur costé ne se mōstrassent point rigoureux enuers les Iuifs, en peu de chose, cōme ceux qui estoγent debiles & infirmes, afin qu'eux aussi par ce moyē fussent quelqueffois amenez a la grace de nostre Seigneur Iesus Christ. Car cōme ainsi soit que en cela il n'y eut aucune impiete, si quant a l'vsage externe ils s'abstenoyent de sang, de la chose estouffee & de ce qui estoit sacrifié aux idoles : touteffois pource que chacū d'eux en sa cōscience estoit deliuré de toutes ces choses par la grace de Christ, il falloit touteffois que pour l'vtilité & salut des Iuifs ils se portassent

vn peu plus humainement. Car autrement en l'absence des Iuifs, ils pouuoient manger librement & sans offenser persõne de tout ce qu'il leur plaisoit sans aucun scrupule de conscience: afin aussi que les Iuifs ne fussent point en danger d'estre offensez en leurs consciences, pource qu'ils ne pouuoient pas si tost delaisser ne changer leur vieille coustume. Car ce qu'on dit de toute chose a quoy on est accoustumé, que la coustume est vne autre nature, est veritable: & encore est-il beaucoup plus veritable, quãd on parle de ceste coustume qui est de la Loy de Dieu, & à laquelle on est accoustumé dès son enfance, & s'est tousiours augmentee, tant qu'elle est venue iusques a vn aage parfaite. D'auantage l'equite mesme enseigne qu'il ne faut donner aucun empeschemēt a personne, ne l'irriter en telles choses: mais que de tout nostre pouuoir, nous seruions les vns aux autres, iouxte ce Commandemēt, Tu aimeras ton prochain comme toy-mesme. Parquoy il semble que de prime face ces deux articles yci de S. Pierre & de S. Iaques, soyent contraires l'vn a l'autre, combien qu'a la verite il n'y ait aucune contrariete ne repugnance. Sainct Pierre parle yci de la foy, & S. Iaques dispute de l'office de charite. L'article de S. Pierre ne peut souffrir aucune bride, & ne se soucie point des liens de la Loy: mais il mange du sang quand bon luy semble, & de la chose estoufee & de ce qui est sacrifié aux idoles, sans aucū peril de la cõscience: pource que la foy regarde directement a Dieu, & non pas aux hommes, & ne se soucie d'autre chose que d'appréhender Dieu propice & fauorable. Mais l'article de S. Iaques, frequente avec ceste grande multitude d'hommes, a vne table commune avec eux, & adresse toutes choses a ce but-la, que les autres soyent instruits en ce qui est contenu en l'article de S. Pierre: & exhorte diligemment que la conscience d'vn chacun, cependant qu'elle fait sa course pour paruenir a salut, ne soit retenee ou empeschee. Or l'office de la charite qu'on ex-

h. iij.

erce enuers les autres en ceste vie presente, c'est que ce qu'elle aime & desire, soit muable & caduque, & qu'elle n'en puisse iouir perpetuellement: mais qu'il l'esuauouisse cōme vne chose transitoire, & qu'au lieu d'elle il y ait quelque chose qu'elle aime iusques a la fin du monde. Apres que les Iuifs ont este dissipéz, & qu'ils sont demeurez en leur pertinacite, & que les Gentils n'ont peu estre attiréz par quelque cause que ce fut a les aimer, toutes ces choses-la sont tōbees d'elles-mesmes, & n'ont pas este changees par la puissance de l'Eglise, comme les Papistes l'affirment en mentant avec vne tresgrande hardiesse: mais d'autant que la cause estoit ostee il y auoit desia long temps, les Chrestiens ont vsé librement de sang & des choses sacrifiées aux idoles: ce qu'ils auoyent entrelaissé pour vn temps en faueur des Iuifs, afin que par ce moyen ils fussent peu a peu attiréz, combien qu'ils ne fussent contrains a ce faire par quelque loy deuant Dieu, lequel ils apprehendoient par la seule foy. Car si S. Iaques eut voulu que cela eut este obserué comme vne loy, il eut falu necessairement qu'il eut derechef publié toute la Loy, comme S. Paul en dispute Gal. 6, Qui garde vn poinct de la Loy, est tenu de garder toute la Loy. Ceci seroit vne proposition contradictoire, repugnante a l'article de S. Pierre, lequel S. Iaques conferme yci.

Or quāt a ce qu'il fait yci mentiō de la paillardise, laquelle est defendue au Decalogue par vn cōmandement eternal & immuable, ie pēse q̄ cela se fait a cause que les Gētils amoindrissoyēt le peché de paillardise, ou plustost estimoyēt q̄ ce ne fut pas peché: ce qui apparoit par leurs comedies & poësies. Et cōme i'ay dit ci dessus, il y a plus de vingt ans que les courtisans & chanoines, ces vêtres & ces fardeaux inutiles de la terre, ont cōmancé de prescher & affermer publiquemēt telles choses. Les Gentils donc iugeoyent que paillarder estoit vne faute aussi legere comme de manger des saulcisies, ou de la chair de lieure avec la saulce noire,
ou

où il y ait du sang mélé parmi, ou manger des choses sacrifiées aux idoles. Si quelqu'un lit les histoires Romaines, il pourra voir cômēt les Romains s'accordoyēt malaiscemēt a se marier: de sorte que l'Empereur Auguste par loix & peines tresséueres les contraignoit a se marier, pourautāt qu'ils se persuadoyēt que la paillardise estoit licite, & qu'on leur faisoit tort, si par loix & peines ils estoient contraints a se marier. S. Iaques donc veut enseigner les Gētils a ce garder de paillarder de leur bon gre, & non point pour crainte du Magistrat: & qu'ils apprennent a priser & estimer la vie coniugale, pudique & chaste: ce que faisoient les Iuifs, lesquels estoient fort offensez de ceste licēce desbordée de paillarder: & ne se pouuoient persuader qu'ils peussent estre participans de la grace de Dieu, & qu'ils peussēt estre le peuple de Dieu, a cause de ceste desſence des viandes & de la façon de viure.

En ceste sorte les Apostres ont imposé loy aux Gētils, & pour quelque tēps en ont exempté les Iuifs, & cepēdāt ont presché de la grace, sans aucune crainte, & avec vn grād & tressardēt courage, cōme nō voyōs en S. Paul, lequel viuoit avec les Iuifs, a la façon des Iuifs, & avec les Gētils, a la façon des Gētils, afin que par ce moyen il les gaignast tous a Christ, 1. Cor. 12. Et pour ceste cause aussi il a circōci son disciple Timothee, cōbien qu'il fut desia fidele, Act. 16. nō qu'il fut necessaire d'ainsi le faire: mais cōme S. Luc escrit, il le fait en la faueur des Iuifs qui habitoient en ces lieux-là: afin qu'il ne leur donnast occasion de scandale. Apres cela aussi il souffrit d'estre purifié au Tēple avec les autres Iuifs, & sacrifioit selon la coustume de la Loy, Act. 21. lesquelles choses il faisoit pour ce que comme dit S. Augustin, il falloit que la Synagogue, c'est a dire, Moysē avec toute sa police & loy ceremoniale fust honorablement enſeueli.

Or sous quelle cōdition ce Cōcile yci & ces deux articles de S. Pierre & de S. Iaques ont este receus, on

le voit amplement aux epistres de S. Paul: lequel en plusieurs endroits se complaint des faux apostres, & les accuse de ce qu'ils pressoyent ainsi l'observation de la Loy, contre la doctrine de la grace, & que sous le nom de Christ, separant les hommes de Christ; ils les reduysoient a l'observation des traditions legales: comme aussi apres le Concile de Nicee, les choses sont tombées en vn tresmauvais estat. Car pource qu'Arrius homme du tout meschant, se portoit humblement, & apres auoir promis la foy, cōferma par sermēt publicque qu'il seroit obeissant, ce qui luy auoit este enioint par l'Empereur Constantin, il fut derechef receu au Synode. Mais estat-là, quel grād & horrible dōmage a il apporté? quels troubles a-il suscitez? Aussi auoit-il pour cōpagnons en toutes les pratiques, certains meschāns Euesques qui suyuoient son parti. Lesquels depuis, apres la mort de Constantin ont suscitē encores de plus grāds troubles, ayans Constantius le fils de l'Empereur Constantin, qui les poussoit a cela: lequel ils auoyent attiré de leur costé, & l'auoyent tellemēt aigri, qu'il enuoya en exil tous les Euesques, excepté deux: ascauoir, Gregoire & Basile. Yci aucuns racontent que Constantin le pere, deuāt sa mort, se tourna aussi du costé d'Arrius & que quelque prestre Arrien luy fut fort diligemment recommandé par sa seur Cōstance, estant ia prochaine de sa mort, lequel puis apres il recōmāda par son testament a son fils Constantius, par lequel les Arriens ont depuis este eleuez a grands honneurs & dignitez.

Ces exēples yci nous admōnestent que nous priōns diligemment & ardēment pour les princes, pource que ce sont ceux q̄ le diable assaut entre tous les autres: afin qu'il se puisse seruir d'eux comme d'instrumens, pour opprimer l'Eglise. Et faut aussi que nous soyons prudenſ, & que nous ne nous souffrions pas abuser par ces esprits fantastiques, encore qu'ils s'abaissent & humilient iusqu'au bout, comme faisoit Arrius, & comme aussi Saul a deceu Dauid, sous vne couerture d'humilité.

lite. C'est vn dit commun, que les meschâs sentent aucunesfois quelques componctions. Mais ceux qui sont tels cachent souuent leurs fraudes & tromperies, iusques a ce qu'ayans trouué l'occasion, ils espâdent leur venin sur les autres. Alors ils se promettent entiez d'orgueil, & semble qu'ils touchent de la teste au ciel, & déclarent ce qu'auparauant cauteusement ils celoyent. Et partant ce n'est pas merueilles si les Peres ont imposé aux apostats de si longues & dures satisfactions. Car il n'y a point de doute qu'ils n'ayent cognu par experience, combien vne telle apparence est pleine de fraude & de mensonge, & cōbien il est malaisé aux hypocrites, d'auoir desplaisir de leurs meschâcetez, & s'humilier a bon escient: comme aussi Syrach en parle, quand il dit, Donne toy garde de l'ennemi reconcilié.

En sōme, celuy qui ne scait pas encore q̄ c'est qu'on appelle le baizer de Iudas, qu'il lise avec moy l'histoire d'Arrius sous l'Empereur Constantin, & il confessera qu'Arrius par ses fraudes & trōperies surmonte en beaucoup de sortes Iudas. Car avec vne merueilleuse astuce, il a deceu ce tresbō prince Cōstantin par vne apparence de parolles la plus belle du mōde, Nous croyōs en Dieu le Pere tout-puissant, & en Iesus Christ sō Fils vnique, &c. qui est nay de la substâce d'iceluy deuant la creation du mōde & de toutes les creatures, vn seul Dieu, vne seule Parolle, par lequel toutes choses sont faites. Je vous prie, qui est le Chrestien qui iugeroit qu'il y eut quelque venin meslé parmi ces parolles? Qui est-ce qui penseroit qu'Arrius voulust affermer impudēment que Christ est vne creature? Ce que toutefois a este manifesté, quand Arrius a este ouy.

Auxētius Euesque de Milan, predecesseur de saint Ambroise, a tourmenté les hommes par vne semblable astuce. Et mesme il colore ses erreurs monstrueux en telle sorte, que quand au commencement de la confession d'Auxentius ie voyois escrit les blasphemies d'Auxentius, ie me cuiday courroucer contre saint

Hilaire. Et qui plus est, a cause de ces parolles d'Auxentius, ieusse osé exposer le salut de mon corps & de mon ame en danger, & affermer avec iurement, estant deceu d'un tel fard de parolles, qu'Auxentius maintenoit que Christ estoit naturellement Dieu.

Ie croy aussi que entre telles tromperies de parolles, il y a eu des bons & simples esprits, qui ont bien suyui la vraye & droite opinion, & conforme a la forme ancienne des symboles, & qui n'ont peu entendre ces parolles-la autrement qu'elles sont prononcees es symboles qui ont este depuis le temps de l'Eglise Apostolique. Et ne peuuent estre autrement entendues par homme viuant, qui n'aura rien sceu que c'est que des tromperies & corruptions d'Arrius.

Et d'autant qu'il est besoing pour beaucoup de raisons de grande importance que la memoire de telles exemples soit conseruee en l'Eglise entre les gens de bien, & aussi que le lecteur mal instruit ne grand pas garde de si pres a l'histoire, qu'il vienne a penser, combien elle est vtile pour nous aduertir de nous garder de ces esprits fantastiques, les erreurs desquels le diable qui est leur dieu rend si gliscens qu'on ne scait par où on les peut seurement, ne prendre, ne tenir. Ie declareray en peu de parolles toute ceste controuersie, apres l'auoir distribuee en certaines parties.

Premierement, Arrius a enseigné que Christ n'estoit pas naturellement Dieu, mais que c'estoit vne substance creee. Or estant conuaincu des saincts Eueques par argumens tresclairs & euidens, il fut contraint de confesser que Christ est Dieu. Ce qu'il concedoit bien: mais c'estoit en destournant mal la signification du mot: c'est ascauoir, que Christ est Dieu, mais tel qu'est, ou Pierre, ou Paul, ou les Anges, que l'Escripture appelle dieux, ou enfans de Dieu.

Secondement, cōme ainsi fut que les Peres eussent Arrius pour suspect, cōme s'il eust fait quelque recōciliation fardee, ils le presserēt de telle sorte, que luy &

ceux

ceux q le suyuoÿét cōcedoyent que Christ est vrayemēt & naturellemēt Dieu. Ils font dōc quelque semblāt de n'haborner point du commū iugement & consentement des Eglises, lesquelles depuis le temps des Apostres ont fait profession d'vne telle doctrine & de parolle & de courage. Mais en leurs assemblees particulieres, les Arriens & entre les autres Eusebe Euesque de Nicomedie, principal fauteur & grād ami d'Arrius, depraüoyēt ainsi ces parolles, Tout ce que Dieu a fait est vray : car tout ce qui n'est pas vray, n'est pas Diuinement fait. Nous voulons en public confesser que Christ est vrayement & naturellement Dieu: mais en particulier, qu'un chacun de nous aye cela pour tout resolu, que Christ est vn Dieu creé & forgé, tel qu'est Moyse & tous les Saints.

Tiercement, apres que la fallace d'Arrius fut descouuerte, & qu'on cognust que sous le pretexte de ces parolles il appelloit Christ creature, il s'esmeut vne dispute encore plus vehemente, de sorte qu'ils furēt contrains derechef de confesser que Christ a este deuant la creation du monde. Qui est-ce qui n'eüst yci pensé qu'Arrius & les siens estoient hommes tres-saincts, & qu'ils auoyent este iniustement condamnez par le Concile de Nicee? Mais iceux vn peu apres le Concile de Nicee, lequel auoit desnueloppé tous les laberinthos d'Arrius, semblables au neud de Gordius, & composé le symbole que nous auons encore, ils comencerent a inuenter nouuelles façons de tout corrompre. Car ils s'efforçoÿent de renuerser l'autorite du Concile de Nicee, & de destruire toute la doctrine, vne partie apres l'autre.

Quartement, apres que ceste calomnie des Arriens fut derechef descouuerte, par laquelle ils maintenoÿent que Christ estoit neantmoins, & deuoit estre appellé creature, en y adioustāt vne telle deprauation: ascauoir, que Christ a bien este deuant le monde visible : c'est a dire, qu'il a este creé & fait deuant que ce

monde visible, ou quelque autre substance, en tout cest ordre des creatures fussent créées: ils ont este contrains de confesser que la machine de ce monde, & tout ce qui est contenu en icelle auoit este creee par luy, comme il en est parlé, Iehan 1. Toutefois quand ils estoient avec ceux de leur sorte, ils interpretoient ceci en ceste sorte: ascauoir, que Christ auoit este créé premierement, & que puis apres toutes choses auoyent este creees par luy.

Pour le cinquiesme, ils confessoient facilement ceste particule, Engendré, non fait: c'est a dire, engendré ainsi comme tous les Saincts sont engendrez de Dieu, & sont faits enfans de Dieu, Iehan 1. Non point fait: ascauoir, avec les autres creatures, mais deuant toutes les autres creatures.

Pour le sixiesme, apres qu'on fut venu au principal point de la disputation: ascauoir, que Christ estoit Homousios, c'est d'une mesme essence avec le Pere, c'est a dire, d'une mesme Deite, & d'une mesme puissance, alors ils ne trouuoient aucune sophisterie n'eschappatoire pour euader. Ce mot Homousios, signifie autant comme egal ou pareil quant a la substance & nature, ou celuy qui est d'une mesme substance, & non d'une substance double. Les Peres ont vsé de ce mot en ce sens-la au Concile, & en Latin on le traduit Consubstantial. Aucuns, afin qu'ils expriment mieux la signification d'iceluy, le traduisent Coexistantial ou Coessential. Les Arriens le receurēt au Concile de Nicee, & en vsoient quand il falloit qu'ils disent leur opinion en la presence de l'Empereur ou des Peres. Mais en leurs disputes priuees, s'il aduenoit que quelquefois ils disputassent, ils combattoient d'une rage merueilleuse cōtre ces mots-la, & maintenoient qu'on ne les trouuoit point en la sainte Escriture. Et assembloient souuent des Synodes, mesmes du tēps de Constantin, pour renuerser l'opinion & autorite du Concile de Nicee, & estoient souuent cause d'un grand desordre

desordre & confusion. Outre cela, ils pressoyent tellement les nostres par les laberinthés & esblouiffemens de leurs disputatiōs, que saint Hierosme estant grandement troublé, a escrit des lettres a Damasus Euesque de Rome, par lesquelles il se lamente & desire que ce mot Homousios soit du tout aboli. Je ne scay, dit-il, quel venin, ne quels empoisonnemés sont meslez parmi ces lettres-la, pour lesquelles les Arriens enragent a l'encontre de nous d'une telle fureur, comme s'ils estoient picquez de quelque mousche guespe. Nous auons encore vn dialogue, auquel Athanase & Arrius escriuent ensemble de ce mot Homousios, vn certain Probus gouuerneur, president en leurs disputations. Et cōme Arrius debattoit fort aigremēt que ce mot-la ne se trouuoit point es saintes Escritures, Athanase luy opposoit qu'aussi ces mots, Dieu.innascible, ingénitus, non engendré, ne se trouuoient point es saints liures. Car les Arriens auoyent vsé d'iceux pour prouuer que Christ ne pouuoit estre Dieu, d'autant qu'il estoit engendré, & que Dieu n'est point engendré, & qu'il est innascible. Or le gouuerneur Probus donna sentence contre Arrius. Car c'est vne chose trescertaine qu'il ne faut rien enseigner ou affermer es choses Diuines contre les tesmoignages de l'Escriture, comme saint Hilaire le tesmoigne au premier liure de la Trinite. Laquelle sentence veut dire ceci, Qu'il ne faut rien enseigner, sinon ce qui est contenu aux saintes Escritures. Or qu'il ne faille vser d'autres mots, sinon ceux qui sont contenus es saintes Escritures, cela ne se peut faire principalemēt es disputations, alors que les heretiques s'efforcent de corrompre & renuerfer les parolles de l'Escriture, par leurs argumens. Car en cest endroit il estoit besoing que la sentence de l'Escriture, recitee avec vn grand nombre de parolles fust comprise sous vn certain mot, lequel comprint sous soy briefuement & proprement la somme entiere de toute la chose, & qu'ils fussent interrogez : ascauoir,

s'ils croyoyent que Christ fut Homousios, c'est d'une mesme substance ou essence avec son Pere. Car telle a tousiours este la sentence de toutes les parolles de l'Escripture, lesquelles ils renuersoyent par fausses interpretations quand ils estoient avec ceux qui estoient de leur opinion, combien qu'ils en eussent fait profession publicquement deuant l'Empereur & le Concile. Tout ainsi comme si les Pelagiens vouloyent cauiller qu'il fallust raser de nos liures ces mots yci, Peché originel, ou, La corruption d'Adam, pource qu'ils ne sont point en la sainte Escripture: combien que plusieurs passages de l'Escripture enseignent tresexpressément ce que veulent dire ces parolles-la: ascauoir, que nous sommes conceus en peché, Pseau. 51. Que de nature nous sommes enfans d'ire, Ephess. 2. Et que tous pour le peché d'un sommes subiets a peché, Rom. 5.

Si tu me disois, Si maintenant Arrius venoit vers toy, & qu'il confessast entierement ce qui est contenu au symbole du Concile de Nicee, lequel est auourd'huy chanté en nos temples, le pourrois-tu accuser comme heretique? Je diroye qu'Arrius a bonne opinion, encore qu'en pretendent malicieusement quelque conuerture, il forgeast des interpretations estranges a ces mots-ci: mais ne seroy-ie pas bien deceu? Je ne suis pas d'oc d'accord avec ceux qui disent que Constantin s'est tourné du costé des Arriens: mais plustost ie croy qu'il a adheré au Concile de Nicee. Et n'y a point de doute que ceci ne luy soit adueni, a cause que estant circouenu par ie ne scay quelle cautelle, il a adiousté foy a Arrius, lequel feignoit de sauoiriser au Concile de Nicee: & comme nous auons dit ci dessus, l'affermoit avec iurement. Parquoy Constantin commandoit qu'il fust restitué en son premier estat en Alexandrie. Mais comme Athanase qui cognoissoit mieux ce vieil regnard Arrius, que ne faisoit pas Constantin ne le vouloit permettre, il fut enuoyé en exil.

Car Constantin, comme homme qu'il estoit, pou-
uoit

uoit imaginer qu'Arrius, combien qu'il fust homme de bien, par l'enuie que quelques-vns luy portoyent, ou par fausles suspicions, auoit este iniustement condamné a Nicee. Veu mesme que les Arriens, & principalement Eusebe de Nicomedie, s'estoyent insinuez en la bonne grace de l'Empereur, & luy remplissoyent les oreilles de beaucoup de propos ambigus, en deffendant & excusant Arrius. Car les grands Rois & Princes; encore qu'il y ait en eux vne excellēte bonte naturelle, n'ont pas tousiours pour conseilliers des Anges, ou saint Iehan Baptiste: mais quelquefois ils ont des diables mesme, ou Iudas & Doeg, comme l'histoire des Rois le demonstre. Et ce que Constantin eut soing deuāt que mourir qu'Athanasie fut rappellé d'exil, est vn tesmoignage notable de beneuolēce enuers iceluy, quelque peine que les Arriens meissent de l'en empescher, Hist. Tripartite liu. iij. cha. xj. Car par cela il voulut dōner tesmoignage qu'il ne reiettoit point le Concile de Nicee, ne la doctrine d'Athanasie: mais qu'il a regardé seulement a ce but qu'en toutes les Eglises & tēples il y eut vn mesme accord de doctrine.

Il y a de nostre temps certains barbouilleurs de papier entre les Papistes, qui en font tout autant. Lesquels demonstrent quelque zele, cōme s'ils vouloyēt annoncer la doctrine de la foy & des bonnes œuures, afin qu'ils se facent valoir, & qu'ils nous chargēt d'enuie en beaucoup de sortes: comme si de tous temps ils auoyent ainſi enseigné, & que ce fust a tort qu'ils sont accusez par nous d'auoir suyui vn'autre genre de doctrine, afin qu'estans couuerts par dessus de robbes de brebis, comme s'ils estoyēt du tout semblables a nous, ils peussent par quelque moyē faire retourner le loup affamé en la bergerie. Car a la verite ce n'est pas ce qu'ils cherchent, que d'enseigner la doctrine des bonnes œuures: mais d'autant qu'a la façon des Arriens, ils ne peuuent autrement cōfermer & establir leur venin, ne leur rage de loup, que par tels fards & accou-

stremens de brebis : ascauoir, en preschant de la foy & des bonnes œuures; ils cachent par ce moyen la peau de loup, iusques a ce qu'ils puissent derechef occuper la bergerie. Mais ce qui nous est fait, leur deuroit estre fait : c'est a dire, il leur faudroit commander qu'ils abolissent toutes profanatiōs d'idolatrie, & qu'ils monstrassent cela par effet, apres qu'ils auoyent abolì tous abus cōtraires a la doctrine de la foy, lesquels se voyēt auiourd'huy en leurs temples, par lesquels le poure peuple est abusé. Autrement on ne peut adiouster foy aux parolles & gestes nues: c'est a dire, aux accoustremens de brebis. En ceste sorte falloit-il qu'Arrius se desdìst de son erreur, & que par sa vie & ses faits il monstrast quelque amendement, renōçant a sa premiere vie, tout ainsi qu'Augustin, de vie & de fait a renoncé a la secte des Manicheens. Et aussi auiourd'huy beaucoup renoncent a la vie Papistique & monastique, au nombre desquels, par la grace de Dieu, ie me puis mettre. Mais ceux-là ne veulent pas confesser leur faute, & ne peuuent faire cest honneur-là a Dieu qu'ils la confessent: tout ainsi que les Arriens vouloyent que leurs mensonges fussent maintenus, & ne pouuoýēt endurer d'estre excōmuniez par le Concile.

Il faut auoir souuenance de ces exēples qu'on trouue es histoires, & principalement nous qui sommes appelez au ministere de l'Eglise, & nous est singulierement commandé que nous defendions fidelement le troupeau de Christ, & que les bons Euesques ayent grand soing de bien faire leur office, comme saint Pierre l'enseigne, 1. Pier. 5. Car estre Euesque n'est autre chose, sinon prendre diligēment garde, veiller & de tout son pouuoir s'appliquer a cela, que le diable ne nous prēne au despourueu. Car on peut voir yci, comment le diable avec vn merueilleux artifice se trāsmue en diuerses especes, de sorte qu'a la fin il se fait plus clair qu'un Ange de lumiere: & que les faux euesques ayent plus grande apparence de saintete que les bons

& fideles, & que les loups soyent plus simples que les agneaux. Nous n'auons plus maintenant affaire a ces phâtosmes gros & horribles de la Papauté, qui ne font qu'errer çà & là hors de l'Escripture. Il y a maintenant des esprits phantastiques, qui se fourrent en l'Escripture & en nostre doctrine, & veulent estre conioints avec nous: & toutefois ils sont agitez de ie ne scay quel appetit brutal, & nous vouldroyent auoir deschirez a belles dents & deuorez tous vifs. Mais que le saint Esprit soit nostre garde: autrement nous tomberons totalement.

De toutes ces choses-ci, il est facile a cognoistre pour quelles causes ce Concile-ci a este appellé: ascauoir, non point pour les ceremonies externes seulement, mais a cause de cest excellent article de la Diuinite de Christ, lequel cōmença a estre mis en controuersie, laquelle fut principalemēt debattue en ce Concile-ci, & puis apres agitee sans fin & sans mesure par la fureur de Satan. Et alors il n'est point fait de mention des autres articles. Et ceste calamite tant triste a duré en l'Eglise, presque par l'espace de trois cens ans. De sorte que S. Augustin estime q̄ la peine qu'Arrius souffroit en Enfer s'aggrauoit de iour en iour, cepédant que cest erreur-la a duré. Car la secte de Mahomet est sortie de ceste secte-la, cōme si l'vne des testes d'hydra eust este coupee. Et cōme i'ay touché ci dessus, il est aisé a voir, qu'on n'a point ordonné en ce Concile quelques inuentions ou traditions nouuelles: mais le symbole ancien, & qu'au contraire le nouuel erreur d'Arrius a este refuté & condamné par les tesmoignages de l'Escripture. C'est donc vne chose toute manifeste, qu'on ne peut tant attribuer d'autorite aux Conciles, & beaucoup moins a l'Euesque de Rome, qu'il leur soit permis d'inuenter nouveaux articles de la foy & des ceures, cōme ils en babillent avec vne impudence extreme. Ce que nous auōs yci dit suffira, touchant le Concile de Nicée, lequel a este le premier & le principal.

DV CONCILE DE
Constantinoble.

L'AUTRE Concile qui fut l'un des principaux, fut assemblé a Constantinoble, enuiron cinquante ans apres celuy de Nicce, sous les Empereurs Gratien & Theodose. Les causes pourquoy il fut assemblé, furent celles-ci, Arrius auoit nié la Diuinite de Christ & du saint Esprit. Sur ceci il s'esleue vne secte nouvelle des Macedoniens (comme tousiours vn erreur attire l'autre, & vne calamite l'autre, tant qu'il n'y a ne fin ne celsie) lesquels approuuoient le Concile de Nicce : ascauoir, que Christ est naturellement Dieu, & avec vn zeile tresardent condamnoient Arrius avec toute sa secte. Or ils enseignoyent que le saint Esprit n'est pas naturellement Dieu: mais que c'est vn mouuement Diuinement créé, par lequel Dieu esmeut les cœurs des hommes, les illumine, les console & les confirme, & fait toutes les choses que l'Escripture enseigne du saint Esprit.

Ceste secte-ci a attiré a soy plusieurs Euesques, grands personages, & excellens en doctrine, iugement & autorite. Or ceste erreur-ci a este espendu par tout, par vne telle occasion. Macedonius estoit Euesque de Constantinoble, laquelle estoit vne ville de tout l'Empire de Rome la plus excellente vers les parties d'Orient, & le lieu ou l'Empereur faisoit sa principale residence. Cest Euesque-la a este le premier autheur de ceste secte : & ceci auoit vne grande apparence, d'autant qu'un Euesque qui estoit le plus excellent entre les autres, enseignoit en ceste sorte, & mesme en la ville de Constantinoble, & en la cour de l'Empereur. Tous les lieux circonuoisins de Constantinoble s'accordoyent avec luy, & luy applaudissoient. Macedonius aussi n'estoit point paresseux en cest endroit, mais il poursuyuoit l'affaire d'une ardeur

deur merueilleuse, & (ce que le diable a accoustumé de faire en toutes sectes) eut volontiers attiré a soy tout le genre humain.

Yci il s'en falloit beaucoup que les bons Euesques peussent resister a ceste secte episcopale, veu qu'auparauant Arrius, qui estoit seulement ministre de l'Eglise en Alexandrie, auoit esmeu vn tel desordre. Or cestuy-ci n'estoit point quelque ministre ou Euesque vulgaire: mais l'Euesque d'une cite la plus florissante qui fust alors, voire mesme du lieu ou estoit le palais de l'Empereur ascauoir, de Constantinoble, qui auoit fuscité vne telle confusion. En cest endroit les bons Euesques estoient derechef cōtraints de solliciter l'Empereur de cōmander que le Concile fust assemblé, contre telles blasphemies. Ce que feit ce bon prince Theodose Empereur, & ordōna le lieu du Concile en la mesme cite de Constantinoble, & en la mesme Eglise en laquelle Arrius auoit presidé: cōme auoit fait deuant luy Constantin, lequel assembla le Cōcile en la ville de Nicee, en laquelle estoit Euesque Theogonius, lequel avec Eusebe Euesque de Nicomedie, sollicita fort qu'Arrius fust esleué & finalement remis en son premier estat.

L'an ensuyuant Damasus Euesque de Rome, commanda que le Concile s'assemblast, & eust bien voulu que ceste question eut este vuidée a Rome, afin que par ce moyē le siege Romain acquist la puissance souueraine d'assembler les Conciles, & de iuger de toutes controuersies, & voulut qu'il fut appellé Cōcile vniuersel. Car luy comme Euesque souuerain de tout le monde, appelloit les Peres qui auoyent este l'an precedent au Concile de Constantinoble: mais ils n'y voulurent pas cōparoïr. Or ils luy declarerent par lettres diligemment & sainctement escriptes ce qui auoit este fait au Cōcile assemblé en Constantinoble, & entre autres choses luy signifierent qu'ils auoyent condamné l'heresie de Macedonius: & outre cela qu'ils auoyent ordōné nouveaux Euesques en Constantinoble, en Antioche, &

en Ierusalem. Voire-mais, quelle audace, quelle meschancete estoit-ce, de faire telles choses sans que l'Euesque de Rome le sceust & qu'il en fut cōsentant? lequel luy seul vouloit auoir l'authorite d'assembler les Conciles, ce que touteffois n'estoit point en sa puissance, & de iuger de toutes heresies, ce qu'il ne pouuoit faire par faute de scauoir: & d'ordonner les Euesques, ce qui ne luy appartenoit en façon quelconque.

Outre ces choses ils le tacent aigrement, & luy remonstrent cōment ils ont ordōné Nectarius Euesque de la nouuelle Eglise de Constantinoble (car la ville de Constantinoble auoit este de nouveau redifiee) & Flauianus en Antioche, & Cyrillus en Ierusalem. Car ces trois poincts-ci estoient intollerables a l'Euesque de Rome. Premieremēt, ils appellent l'Eglise de Constantinoble, nouuelle, & y ordōnent vn Euesque: combien que sans le sceu & consentemēt de l'Euesque de Rome, il ne soit loisible de dresser vne nouuelle Eglise, ne d'y ordonner vn Euesque. Le second est encore pire. C'est qu'ils appellent l'Eglise d'Antioche, la premiere & la plus anciēne Eglise, en laquelle, cōme ils monstret par l'vnziēme chap. des Actes, les croyans en Iesus Christ ont deuant tous les autres este nōmez Chrestiens, & en laquelle S. Pierre & S. Paul. avec plusieurs des principaux Apostres ont presché l'Euangile par l'espace de sept ans & plus. Si ie vouloye dire ceci libremēt & en lāgue vulgaire, ce seroit autāt cōme si ie disoye, Monsieur l'Euesque de Rome vous, ouyez cōme vous n'estes pas le premier ou souuerain Euesque: mais que s'il y auoit quelque Eglise qui deust estre la premiere, il seroit plus raisonnable que ce fust celle d'Antioche, laquelle retient les escrits & les actes de saint Luc: mais l'Eglise Romaine ne peut prouuer, ne par escrits, ne par actes qu'elle soit premiere. Mais ils ont este gens de moderation, & y ont tressagemēt procedé, quand avec vne charite Chrestienne, & en toute patience, ils ont voulu vaincre par bon moyen, & sans aucune asperite

cest esprit si hautain, & si superbe de Rome, & faire cōme Syrach enseigne: ascauoir, esteindre la chaleur avec vn peu de saluie, & ont bien voulu aduertir l'Euesque de Rome, qu'il pense que puis que l'Euāgile n'est pas venu premierement de Rome en Antioche: mais d'Antioche a Rome, que c'est a bon droit que la tresancienne Eglise d'Antioche soit preferee a la nouuelle Eglise de Rome.

Vne telle ambition en l'Euesque de Rome, a fort fāché ces bons Peres, cōme on peut voir par leurs lettres, & non sans cause. Si en vn tel Concile il se fut trouué quelque Luther, il n'eust iamais cōsenti qu'on eust escript a l'Euesque de Rome, lettres tāt gratieuses: au moins si par quelque moyen il l'eust peu empeschier. En somme, tels & si excellens personnages ont este en ce Concile, que toute la multitude des Euesques de Rome ne merite de les deschauffer.

Le troisieme poinct a este le plus fascheux de tous: scauoir, en ce qu'ils nō moyēt l'Eglise de Ierusalem la mere de toutes les Eglises. La raison est, q̄ là le Fils de Dieu nostre Seigneur Iesus Christ a este le souuerain Euesque & Sacrificateur, & qui plus est, il s'est là offert soy-mesme pour les pechez de tout le mōde. D'auātage, en ceste mesme ville-la le saint Esprit a este donné le iour de la Pētecoste. Et en outre, to' les Apostres ensemble l'ont gouvernee non pas S. Pierre tāt seulemēt, duquel l'Euesque de Rome se vante fort sottemēt, desquelles choses il ne s'en est iamais rien fait a Rome. Parquoy ils admōnestent tacitemēt l'Euesque de Rome, qu'il pēse qu'il n'est rien moins qu'Euesque en Ierusalem: c'est a dire, en vne telle Eglise qui soit mere de toutes les Eglises qui sont au monde: & que son Eglise Romaine est vne Eglise puerile au regard de ceste-ci: d'autāt que ceste-ci est engēdree & sortie de ceste-la, cōme la fille de la mere. Car Christ n'a pas vescu a Rome cepēdant qu'il cōuersoit en terre, & Rome n'a pas este la premiere qui a amené les citoyēs de Ierusalem.

lem ou les Apostres a la foy: mais il est certain q̄ luy a-
uec toute sa troupe a este amené a la foy par l'Eglise de
Ierusalē. Cōme S. Paul par vn mesme argumēt rabba
l'orgueil & ambition des Corinthiēs, d'autant que l'E-
uangile n'a pas este espandu par iceux aux autres: mais
qu'il leur a este apporté d'ailleurs.

Finalemt, ils sont par trop vehemēs, & ordonnēt
vn Patriarche en ceste nouuelle Eglise de Constanti-
noble: & font cela sans le sceu & conseil de l'Euesque
de Rome, cōme si c'estoit peu de cas de mespriser son
authorite. Yci s'esmeut vne guerre entre l'Euesque de
Rome & celuy de Constantinoble, touchant la primau-
te, ou puissance souueraine. Car comme ainsi soit que
l'Euesque de Constantinoble (combien que la ville
fust nouuellemēt edifice) d'autant qu'il estoit Patriar-
che, a cause de la prerogatiue de l'Empire fust egal a
celuy de Rome, l'Euesque de Rome eut crainte que
celuy de Constantinoble estant paruenue a la primauté
ne l'en meist dehors. Ce qui est depuis aduenue. Car les
Euesques de Constantinoble maintenoyent que la re-
sidence & la cour de l'Empereur estoient a Constanti-
noble, & non pas a Rome, & qu'elle estoit appellee la
nouuelle Rome. Et que pour ceste raison a bō droit il
estoit l'Euesque souuerain, pource quil estoit Euesque
de la ville ou estoit la cour de l'Empereur.

Aucontraire l'Euesque de Rome crioit que sa ville
estoit la vraye & ancienne Rome, & que l'Empereur
estoit appellé Empereur de Rome, & non pas de Con-
stantinoble, & que Rome estoit plus ancienne que Con-
stantinoble. Avec ces querelles pueriles & plus di-
gnes d'une femme que d'un homme, ils se faisoient la
guerre: de sorte que c'est vne grande vilennie que
lire ou ouir telles choses. Ce debat a duré iusques a ce
que Phocas fut Empereur: lequel per vne meschance-
te & cruaute detestable tua ce bon Empereur Maurice
(duquel les histoires parlent comme d'un saint per-
sonnage) son seigneur & predecesseur, avec sa fem-
me &

me & ses enfãs. Et de l'armee duquel il estoit capitaine
general. Ce bõ Cain par vn edict public attribua a Bo
niface Euesque de Rome preeminence sur to^s les autres
Euesques. Et certes il ne falloit que ceste dignite du
siege Romain eut vn meilleur autheur & approbateur
que ce cruel & execrable meurtrier. Tant bien le dia
ble a sceu donner ordre que le cõmencement du Pon
tificat Romain ne fut pas moins detestable, qu'auoit e
ste auparauant le commencement du royaume, alors
que Romulus tua son frere afin que luy seul peut iouir
du royaume, & nommer la ville de son nom. Mais les
Euesques de Constantinoble, ne s'en sont pas beau
coup souciez. Et ces riottes ont duré tousiours depuis
ce temps-la, encores que cependant les Romains, ou
tre ce que leur autorite estoit conseruee par l'Em
pereur Phocas, se couurissent de fucilles de figuier,
& qu'ils tonnaissent d'une façon horrible & espouuan
table que la seule Eglise de Rome auoit la souuerai
nete par dessus toutes celles qui sont au monde, non
point par ordonnance humaine, mais de l'institution
de Iesus Christ, a cause de ce qui est dit, Matthieu 16,
Tu es Pierre, &c. Mais les Euesques de Constantino
ble voyoyent bien, que les Euesques de Rome, com
me ceux qui estoient gens du tout indoctes, fausse
ment & meschamment destournoient les parolles
de Christ a leurs resueries, & ne faisoient pas grande
estime de toutes leurs sottises. Ainsi ces deux Eglises
ont estriué ensemble fort ambitieusement, pour vne
chose de neant & de nulle importance: iusques a ce
qu'a la fin & l'une & l'autre ont este horriblement de
struites. Car la rage des Turcs & de Mahomet a de
struit celle de Constantinoble, & la Papeute, avec ce
gouffre d'impietez qui est aux Decretales ont ruiné
celle de Rome. Je recite ces choses d'autant plus vo
lontiers, afin que le lecteur prudent cognoisse, com
ment de ce tant notable Concile de Constantinoble,
comme d'une fontaine, sont decoulees les semences

de plusieurs grans desordres & cōfusions, & non pour autre cause, sinon que l'Euesque de ceste Eglise-la auoit este ordonné comme Patriarche. Combien que l'estime que de coste & d'autre n'eussent pas laissé de sortir de grandes haines, encore que ceste cause-la n'eut pas precedé. Car ce tresambitieux & tresarrogant orgueilleux de Rome, auoit desia commencé de exiger ceci des autres Euesques en quelque lieu qu'ils fussent. Et n'eut este qu'il luy fut donné empeschement par celuy de Constantinoble, il n'y a point de doute qu'il se fut opposé a l'Euesque d'Alexandrie, & a celuy de Ierusalem: & n'eut voulu obeir au Concile de Nicee, auquel il luy fut donné lieu aupres de l'Euesque d'Alexandrie, & au dessous de celuy de Ierusalem. Car il s'attribue la prerogatiue de dignité, & ce, non point par le consentement des Conciles ou des Peres, mais de droit diuin, ainsi comme luy-mesme le braitt & le tonne, en mentant tresimpudemment en ses Decretales.

En ceste sorte nous auons mis fin au second Concile: ascauoir, a celuy de Constantinoble: lequel publia trois decretis de grâde consequence. Le premier c'est, que le saint Esprit est vrayement & naturellement Dieu: & là fut condamné Macedonius, lequel a creu & enseigné que le saint Esprit estoit vn mouuement créé. Le second, c'est qu'il ietta hors de l'Eglise les faux euesques, & y ordonna de vrais Euesques: principalement en Antioche & en Ierusalem. Pour le troisieme, il crea Patriarche Neetarius Euesque de Constantinoble, ce qui a presque fait enrager les Euesques de Rome: combien que ie croy que les bons Peres ayent fait cela pour vne bonne fin. La premiere partie fut de l'affaire principal pourquoy le Concile fut assemblé. Et de là peut-on cognoistre quelle a este l'intention & volonte du Concile: ascauoir, qu'il n'a rien fait, ou voulu faire, sinon que la verite de l'article touchant la Diuinite du saint Esprit demeure

raît

raist immuable. Et apres auoir mis a fin ceste disputation-la, derechef le Synode fut rompu, pourautant qu'au cominancement il auoit este assemblé a ceste fin. La seconde partie, qui fut de ietter hors de l'Eglise les faux euesques, n'est pas vn article de foy. mais c'est vn œuvre exterieur & manifeste, que la raison doit & peut administrer: & n'est besoing yci d'appeller en conseil le saint Esprit d'une façon particuliere, comme quand il est question des articles de la foy, ou appeller vn Concile expressement pour cela. Il est donc vray-semblable que ces choses-la ont este traittes quelque autre iour, hors le iour du Concile. Car ils ne bastissent pas yci des Eglises de nouueau, ou des preeminées Episcopales en Antioche & en Ierusalem: mais ils veulent qu'elles demeurent en leur premier estat, auquel elles ont este ordonnées au commencement: seulement ils en surrogent d'autres au lieu des premiers. Car il faut que le ministere demeure en son entier en l'Eglise depuis le commencement iusques a la fin: mais il faut ordonner aux Eglises des personnes, les vnes apres les autres, par vne succession continuelle, comme Matthias a succédé a Iudas, & les Euesques qui sont viuans succedent a ceux qui sont morts. Laquelle chose n'est pas le principal soing des Conciles: mais elles se doyuent faire deuant le Concile, ou apres, ainsi que la necessite de l'Eglise le requiert. On ne peut pas tous les iours assembler nouueaux Conciles: mais il faut tous les iours auoir en main des personages idoines, qui soyent ordonnez aux Eglises, esquelles les ministres sont vacans.

La troisieme partie est tout autre: ascauoir, qu'en suyuant leurs conseils humains, ils ordonnent vn Patriarche. Or nous auons monsté ci dessus quelle en a este l'issue: & combien de combats & contentions horribles ces deux Euesques ont suscitées a cause de la Primauté: de sorte qu'il est facile de iuger que le saint Esprist n'a point este autheur d'une telle ordonnance.

Car cela n'est pas article de foy, mais vn œuvre externe & grossier de la raison humaine, ou de la chair & du sang. Qu'a affaire le saint Esprit, si vn Euesque (ie parle quand a la cceremonie externe) va deuant ou derriere? Il a d'autres choses a faire, qui sont bien de plus grande importance que ces jeux yci pueriles & ineptes. Nous n'apprenons pas seulement de ceci que les Conciles n'ont aucune autorite de creer nouvelles bonnes œuvres, & beaucoup moins de creer nouveaux articles de foy : mais aussi sommes-nous aduertis que les Conciles ne doyuent rien inuenter ou ordonner de nouveau, comme ceux qui doyuent scauoir qu'ils n'ont pas este assemblez a ceste fin-la, mais pour defendre la foy anciennē contre ceux qui sement nouveaux erreurs. Sinon qu'ils peuent instituer aux ministres anciens des nouveaux ministres, qui ne peuent estre appelez articles de foy, ou bonnes œuvres: car ils sont hommes mortels & incertains de leur vie. Ce qui se doit faire souuent en l'Eglise, mesme hors le temps des Conciles, & sy fait tous les iours.

Les Peres mesmes qui estoient en ce Concile, confessent, qu'ils n'ont rien ordonné de nouveau, quand ils escriuent a Damasus Euesque de Rome ce qu'ils ont fait au Concile, comme il a este dit ci dessus. Auquel escrit, entre autres choses on trouue ces parolles yci, Nous scauons que ceste est l'ancienne & vraye foy, & qui conuient a la reigle du Baptisme, & qui nous commande de croire au nom du Pere & du Fils & du saint Esprit, &c. Et qui plus est ils omettent le troisieme membre, qui est de l'election du Patriarche de Canstātinoble, pource peut estre, que cela n'est pas le principal affaire pourquoy ils sont venus au Concile: & que ce n'est pas heresie, si vn Chrestien ne tient vn Euesque pour Patriarche. Tout ainsi que maintenant beaucoup ne sont pas heretiques ou damnez, s'ils ne croient pas que le Pape est le chef de l'Eglise, reiettant tous ses Conciles, decretales & bulles. Car tous
n'ont

n'ont pas fait ceci d'un commun accord, mais on asserme que ç'a esté l'Empereur Theodose. Car les autres histoires asserment que ceci s'est fait a la persuasion de Theodose, lequel n'a pas eu puissance de creer des articles de foy. Puis donc qu'ainsi est, qu'ils sont contraints de dire & confesser, que ceste forme du symbole selon lequel nous auons esté baptizez, & que nous auons appris des nostre ieune aage, est la vraye & ancienne, pourquoy voulons-nous attribuer aux Conciles vne puissance souueraine de forger nouveaux articles de la foy, & de condamner comme heretiques ceux qui n'y veulent pas consentir? Certes ceux-la n'entendent pas bien les Conciles, & ne scauent en façon quelconque que c'est que Concile, & quel est son principal office, & sa principale intention: mais ils regardent seulement aux lettres nuës, & donnent toute puissance aux Cōciles, mesmes par desus Dieu. De ceci nous en parlerons ci après. Maintenant nous toucherōs en brief les deux autres Cōciles.

D V C O N C I L E D'Ephese.

LE troisieme Cōcile vniuersel fut tenu sous l'Empereur Theodose le ieune, duquel l'ayeul estoit Theodose premier de ce nom, dont nous auōs parlé ci dessus au second Concile. Cest Empereur assembla deux cens Euesques en la ville d'Ephese. Et combien que les auteurs Latins mesleroyēt yci volontiers l'Euesque de Rome comme autheur de ce Concile, il est touteffois tresueritable que ce fut l'Empereur, & nō le Pape qui l'assembla. Car le Patriarche de Constantinoble estoit desia egal a l'Euesque de Rome, & les Euesques d'Orient tenoyent desia beaucoup moins de conte de l'Euesque de Rome qu'ils ne faisoient auparauant. Et pourtant il eut esté impossible, a l'Euesque de Rome, d'assembler vn Cōcile si noble, mesmemēt en Ephese,

qui estoit vne ville loingtaine en Asie outre la mer. Autrement si son autorite eut este suffisante, il n'y a point de doute qu'il ne l'eut assemblé en quelque lieu plus prochain de luy, comme auoit fait deuât luy Damascus durant le Concile de Constantinoble. On dit bien toutesfois qu'il enuoya-là ses ambassadeurs: mais ils ne furēt pas assis au premier lieu. Or la cause pourquoy ce Concile fut assemblé est telle, Ces saincts Peres & tresbōs Euesques S. Ambroise, S. Martin, S. Hierome, S. Augustin (lequel mourut l'an mesme que ce Concile fut tenu) S. Hilaire, S. Eusebe, & autes semblables estoient delia decedez: & au lieu de ceux-la suruindrent d'autres qui ne ressembloyent en rien a ceux-ci: tellemēt que l'Empereur Theodose ne vouloit plus qu'on esleut quelqu'un des prestres ou du clerge de Constantinoble pour Euesque, pour autant que souuēt ils estoient superbes, ambitieux, difficiles, & qui auoyent accoustumé de susciter troubles & contentiōs aux Eglises. Tel aussi auoit este Iehan Chrysostome, comme l'histoire Tripartite le raconte. Parquoy l'Empereur fit venir d'Antioche vn estranger nommé Nestorius, lequel maceroit sa chair par exercices de chastete & par iusnes. Il auoit aussi la voix fort bonne, & estoit fort eloquent, & grand ennemi de tous les heretiques. Il salut dōc qu'il fut Patriarche & Euesque de Cōstātinoble. Mais l'Empereur faillit assez lourdemēt: car il n'eut sceu choisir vn plus grand ennemi de l'Eglise: & luy aduint ce qu'on dit commencement, Que qui veut euitier vn peril, il tombe en vn autre.

Iceluy commence a soustenir vn sien prestre nōmé Anastase: lequel auoit dit en preschant que la vierge Marie ne deuoit point estre appelée mere de Dieu: pourcē que d'autāt qu'elle estoit homme, ou creature humaine, elle ne pouuoit engendrer Dieu. Cest erreur troubla toute la Chrestiente: & personne ne l'entendoit autrement, sinon qu'il vouloit dire que Christ nay de la vierge Marie n'estoit pas Dieu, mais pur homme

homme comme nous-autres. A cause de cela s'esmerrent tant de troubles & confusions, qu'il fut force a l'Empereur d'assembler le Concile, afin que la verite fust esclarcie.

Ils s'assemblerent donc en Ephese beaucoup d'Euesques (combien que ce fut vn peu tard) Nestorius avec beaucoup d'autres, Cyrille Euesque d'Alexandrie, Iuuenal Euesque de Ierusalem. Et comme Iehan Euesque d'Antioche fust demeure vn peu trop tard en sa maison, Cyrille ennemi de Nestorius & Iuuenal commencerent a le condamner, & d'autre part Nestorius les cōdemnoit aussi. Apres que Iehan Euesque d'Antioche fut venu, & eut cognu que de coste & d'autre s'estoyēt esmeus de grands discords, il fut indigné contre Cyrille, de ce qu'estant encore enflambé de courroux, il auoit condamné Nestorius. Et ces deux-ci puis apres commencerent a auoir dissention l'vn avec l'autre, & a condamner l'vn l'autre, iusques a ce qu'a la fin tous deux furent chassez hors de leurs sieges. Quand Nestorius veit que tant de troubles s'esleuoient, en gemissant il profera ces parolles, Osons toutes les ambiguïtez qui ont premicrement donne occasion a toutes ces contentions, & confessons que Marie est a bon droit appelee mere de Dieu. Mais Nestorius ne proufita rien, non pas mesme quand il reuoca son erreur: mais il fut publiquement condamné & banni & chassé hors de tous les pays de l'Empire. Aussi ces deux Euesques, celui d'Antioche & Alexandrie, apres le Concile, quand ils furent retournez a leurs Eglises, se deschiroyent par iniures mutuelles, combien que puis apres la chose fut amenee a vne issue paisible. Combien touteffois que ceci est vne chose dequoy nous deuons estre marris, & que nous deuons deplorer avec grande effusion de larmes, que de voir en l'Eglise de si excellens personnages auoir ainsi lasché la bride a leurs affections, qu'a la façon des femmes ou des petis enfans, ils ont ainsi estriué les vns contre les autres. Ils auoyent besoing

d'un Constantin, qui ietta dedans le feu tous leurs débats & escrits contentieux. Mais ces Princes vertueux qui en eussent bien peu ainsi faire estoient bien loing. Or si Nestorius a perseueré en cest erreur, qu'il ait creu que Christ ne fust pas Dieu, mais pur homme, son erreur a este a bon droit condemné, comme celuy qui estoit plus pernicieux & plus plein de venin que celuy d'Arrius ou Macedonius.

Cestuy-ci donc est le troisieme Concile general, & ne fut la traitté d'autre chose. Et touteffois il est aisé a voir qu'il ne fut point là forge quelque nouuel article de foy : mais que seulement les symboles anciens qui estoient les plus purs fussent maintenus contre les nouueaux erreurs de Nestorius. Et ne peut-on prouuer de cela qu'il faille permettre aux Conciles de creer nouueaux articles de foy. Car il a este monsté par les premiers Conciles : ascauoir, de Nicee & de Constantinoble, que Christ est vraiment & naturellement Dieu. Ce qui est vn des plus anciens articles qui ait este creu en l'Eglise dès le commencement, & est confirmé par tesmoignages de l'Ecriture certains & immuables, contre la nouuelle heresie d'Arrius. Les autres decretz qui furent là faits, appartiennent seulement aux choses corporelles & externes, & ne sont point articles de foy, parquoy nous les laissons-là.

Or afin que nous regardions vn peu de plus pres quelle a este la controuersie de ce Concile, il en faut parler vn peu plus amplemēt. Car moy-mesme autrefois n'ay pas bien sceu entendre quel estoit l'erreur de Nestorius, sinon qu'il n'estoit aduis que Nestorius nioit la Diuinite de Christ, & qu'il affermoit q Christ n'estoit rien, sinon pur homme. Ce que les Decretales des Papes, & tous les commentateurs Papistes afferment. Mais apres que i'eu considéré la chose vn peu plus diligemment, i'apperceu par leurs parolles mesmes, qu'il en falloit iuger autrement. Car ils disent que Nestorius a fait deux personnes de Christ : ascauoir, celle

celle de Dieu & de l'homme. Aucuns imaginent, comme ceux qui n'ont pas peu entendre la subtilite de l'erreur de Nestorius, qu'il a enseigné que Christ nay de Marie estoit au commencement seulement pur homme, & que puis apres il a vescu tant iustement & saintement que la Diuinite s'est bien voulu vnir a sa personne, & que par ce moyē, de Christ il a este fait Dieu: en sorte que la conionction de la Diuinite avec l'humane de Christ est comme le loyer qui est rendu au merite. Et certes les choses sont tellement embrouillees & cōfuses que ie croy qu'eux-mesmes iusques aujourdhuy ne scauent pas pourquoy Nestorius a este condamné. Et voyci d'oū me vient ceste coniecture, Ils cōfessent que Nestorius a creu que Christ estoit Dieu & homme, excepté qu'il a fait deux personnes de Christ. De ceci il est certain que Nestori^{us} n'a point creu qu'il fust pur homme (en laquelle opinion nous auons tous este) veu qu'il croit qu'il est Dieu, comme leurs parolles mesme le tesmoignent. Et la difficulte est seulement en ceci, que Nestorius afferme que Christ est vrayement & naturellement Dieu & homme, & qu'il y a en luy double personne, la Diuine & l'humaine. Voyla vne partie de l'erreur. Or celuy qui desmembre Iesus Christ & en fait deux personnes, il en fait deux Christs: ascauoir, vn Diuin, qui est seulement Dieu, & non pas homme, & vn humain, qui est pur homme & non pas Dieu: autrement il n'y pourroit auoir deux personnes. Or il est certain que Nestorius n'a point creu qu'il y eust deux Christs, mais vn tant seulement, ce qu'aussi leurs parolles mesmes testifient: ascauoir, que Nestorius a creu que celuy qui estoit le vray Christ, & outre lequel il n'y en a point d'autre, a eu deux personnes. Il s'ensuit que ce que Nestorius a creu que Christ a eu deux personnes est faux & meschant: car ces deux choses yci ne peuent ensemble estre vrayes, que Christ ait deux personnes, & qu'il demeure vn seul & vnique Christ. Mais comme il a este dit, s'il y a deux personnes, il faut qu'il y ait deux Christs, & non pas vn seul.

Christ. Or Nestorius a creu qu'il n'y a qu'un seul Christ, & partant il ne peut estre qu'il ait creu qu'il y eust deux personnes en Christ. Autrement il faudroit dire que contre tout iugement & raison il auroit creu en un mesme instant que deux propositions contradictoires sont vrayes: *ascauoir*, Est & Non. Et ne se trouue point aux autres histoires que Nestorius ait creu qu'un mesme Christ ait eu deux personnes, sinon ce que les Papistes en gazouillent. Cōbien qu'eux-mesmes confessent bien cela, quād ils imaginent que Nestorius a enseigné, que Christ apres la natiuite de la vierge Marie a este fait Dieu, ou qu'il a este vni avec Dieu en vne mesme personne. Ou leur propre consciēce, ou leur ignorance leur ont arraché ceci: veu qu'il faut necessairement qu'ils cōfessent que Nestorius n'a point creu qu'il y eust plus d'un Christ.

Maintenant la question est, Qu'est-ce donc qu'on reprend en Nestorius, & pour quelle cause ce troisieme Concile general a-il este celebré contre luy? Veue que Nestorius n'enseigne autre chose, sinō que Christ est vray Dieu & homme, & un seul Christ, & nō deux? c'est a dire, vne seule personne en deux natures, comme contient la confession de nostre foy, laquelle a tousiours este en la vraye Eglise de Dieu, depuis le temps des Apostres.

Il appert que le Pape, & les escriuains Papistes ayēt faussement & malicieusement controuué contre Nestorius, qu'il a estimé Christ estre pur homme, & non pas Dieu: & qu'il a iugé qu'en un mesme Christ, il y eust deux personnes, ou bien, qu'il fust double. Cela, di-ie, se cognoit, non seulement par les histoires, mais aussi par les parolles & escrits des Papes & des Theologiens scholastiques. En quoy donc est-ce qu'a erré Nestorius? afin que nous venions a la cause pour laquelle ce Concile a este assemblé.

Tu pourras lire vne page ou deux au xij. liure de l'histoire Tripartite, chap. iiii. ce que tu pourras faire

en moins que d'un quart d'heure. Là se trouue tout ce qu'on peut auoir de certain, touchant Nestorius & ce Concile. Toy donc iuge si ie frapperay au but : car la cause de cest erreur a este telle. Nestorius a este vn homme superbe, enflé d'un orgueil Pharisaïque, & sans aucune doctrine. Et pourautât qu'il auoit este soudainement esleué a vne dignite souveraine en l'Eglise, de sorte qu'un chacun le reputoit comme vn souverain Euesque & patriarche, il luy estoit aduis qu'il surmontoit en doctrine & scauoir, tous les hommes du monde, & qu'il n'auoit qu'à faire de lire les liures qui auoyent este escripts par ceux qui auoyent este deuant luy. Et qu'en declarant choses de grande importance, il ne falloit point vser des façons de parler receuës anciennement en l'Eglise. Mais pource qu'il auoit la voix bonne, & qu'il auoit vne grace de bien parler & promptement, il vouloit estre scauant de soy-mesme, & sans le moyen ou l'aide d'autrui, & ne vouloit point qu'on receust d'autres façons de parler en l'Eglise, sinon celles dont il vsoit.

Estant donc armé d'une telle arrogance, il commença d'impugner cest article, qu' Marie est mere de Dieu, ou qu'elle a engendré Dieu. Alors il rencontra des Euesques aussi entez d'orgueil que luy, & auxquels l'arrogance de Nestorius desplaisoit fort. Et entre les autres Cyrille Euesque d'Alexandrie. Car pour lors il n'y auoit plus aucun Augustin ou Ambroise. Or Nestorius auoit desia enseigné en l'Eglise d'Antioche que Christ estoit naturellement engendré du Pere, n'ay eternellement (ce qui auoit este approuué par le Concile de Nicee) & puis apres auoit este nay vray homme de la vierge Marie. Nestorius n'estoit point en doute de ces deux articles, & les auoit desia long temps enseignez en ces predications: & qui plus est il persécutoit les Arriens qui auoyent este condamnés au Concile de Nicee, avec vne haine mortelle, ce qui fut cause puis apres d'un nombre infini de meurtres &

d'une grande effusioⁿ du sang innocent: tant croyoit-il fermement que Christ est vray Dieu & vray homme.

D'auantage, il confessoit aussi cela que Christ Fils de Dieu estoit bien nay de la vierge Marie selon l'humanite & non selon la Diuinite: ce que nous & tous fideles affermons aussi. Mais la faute estoit en cela qu'il ne vouloit pas que la vierge Marie fust appelée mere de Dieu, veu que Christ n'estoit pas nay d'elle selon la Diuinite: ou (afin que nous parliôs plus clai^remê^t) veu que Christ n'auoit pas de sa mere la Diuinite, comme il en auoit l'humanite. Voyla la somme & le principal point de ceste controuersie, Que Dieu ne pouuoit estre nay d'une creature humaine, ou tirer de là sa nature Diuine: & qu'une creature humaine ne peut engendrer Dieu, ou luy departir la nature Diuine. Car cest homme indocte & par trop hardi; s'arrestoit seulement a ces mots, Dieu nay de Marie, & exposoit ce mot, Nay, selon que les Grammariens ou Philosophes l'interpretê^t, comme si, Naistre, signifoit tirer la nature Diuine de la mere: comme aussi l'histoire Tripartite afferme que Nestorius a iugé que ces parolles-la estoient suspectes, & comme aussi elles doyuent estre a bon droit suspectes a tous Chrestiens quand elles sont destournées a ce sens-la.

De la nous voyons clairement que Nestorius, comme vn homme imprudent qu'il estoit & poussé d'une vaine persuation, parle bien de Iesus Christ avec vn bon ze^le, mais a cause de son ignorance, il n'entend pas ce qu'il dit, ne de quoy il parle: côm^e celuy qⁱ ne pouuoit parler d'une matiere si grâ^de, & toutefois s'en est bien osé vâter côm^e s'il en eust este ouurier. Nous aussi, nous scauôs bien que Christ n'a pas sa Diuinite de Marie: mais il ne s'esui^t pas, de là, q^u ce soit mal dit, de dire que Christ est nay de Marie, que Dieu est fils de Marie, & que Marie est mere de Dieu. Je proposeray vn exê^mple de ceci assez grossier. Quand une fê^me aura enfanté vn enfant, quel que setard Nestorius (car l'hist. Tripartite l'appelle

l'appelle ainsi) pourra bien estre assez superbe, indocte & sophistique pour dire, Ceste femme a bien enfanté cest enfant: mais elle n'en est pas la vraye mere. La raison est, que l'ame de l'enfant n'est pas du sang de la mere, mais viét d'ailleurs, c'est a dire, elle a este infuse de Dieu. Et ainsi l'enfant est bien nay de la femme quant au corps, mais d'autant que l'ame n'est pas infuse de la mere, au corps de l'enfant, elle n'est pas sa mere, pour ce qu'elle n'est pas mere de l'ame viuante.

Vn homme qui arguroit si sottemēt & si froidemēt, ne nieroit pas que ces deux natures: ascauoir, le corps & l'ame sont vne mesme personne: & ne dit pas q̄ là il y ait deux personēs, ou deux enfās: mais il cōfesse q̄ les deux natures: ascauoir, le corps & l'ame sont vne mesme personne, ou vn mesme enfant, & que la mere n'a point enfanté deux enfās, mais vn seul: mais il ne voit pas ce qu'il nié ou qu'il afferme. Or Nestorius a este du tout semblable a cestuy-ci. Il cōfesse q̄ Christ est Dieu & homme en vne mesme personne: mais pour ce que la Diuinite ne procede pas immediatemēt de Marie sa mere, elle ne doit pas estre appelée mere de Dieu. Ceci a bō droit a este condéné au Concile, & le doit estre a tout iamais. Et cōbien que Nestorius en vne partie de ceste cōtrouersie ait eu bōne opiniō: ascauoir, q̄ Christ est Dieu & homme: toutefois l'autre partie, où ces parolles yci, q̄ Christ ne soit pas nay de Marie, & n'ait pas este crucifié par les Iuifs ne peut estre tolleré. Tout ainsi q̄ ce calōniateur-la ne seroit pas a endurer: lequel cōbiē qu'il parlaist biē en cest endroit: ascauoir, q̄ la mere ne peut engēdrer ou creer l'ame de l'enfāt, vouldroit aussi adiouster ceci, cest enfāt n'est pas le vray & naturel fils de sa mere, & ceste mere n'est pas la vraye & naturelle mere de cest enfant.

En somme, cest orgueilleux & ignorāt Euesque a introduit en l'Eglise de sō tēps vne cōtention pernicieuse. Car quicōque concede que la mere enfante l'enfāt ayant corps & ame, il doit aussi cōfesser que la mere a

enfanté tout l'enfant, & est sa vraye & naturelle mere. Autrement il s'ensuyuroit de là, que nulle femme enfantât seroit mere de l'enfant qu'elle enfante. Et ainsi il faudroit effacer du Decalogue le cinquiesme Commandement, Honore tó pere & ta mere. En ceste sorte nous faut-il yci dire, que Marie est mere de ce tresbening & bié aimé petit enfant q est nómé Iesus Christ, & qu'elle est vrayemét mere de Dieu, & qu'elle a engendré Dieu : & outre ce, tout ce qu'on peut dire des femmes accouchees, ou des meres de famille, côme leuer, allaiter, mettre la viande en la bouche, donner a boire, nous le pouuós dire de Marie: ascavoir, qu'elle allaitte Dieu, qu'elle berse Dieu, qu'elle fait a Dieu de la bouillie, ou du potage & autres choses semblables: pource que celuy qui est Dieu & homme est vne mesme personne, vn mesme Christ, vn mesme fils, vn mesme Iesus, & non deux personnes, deux Christs, deux fils ou deux Iesus. Tout ainsi q tó fils n'est point deux fils, ou deux Iehans, ou deux cordóniers, encores qu'il ait deux natures, le corps & l'ame: le corps procedet de tes reins, & l'ame de Dieu. Ce n'est pas donc yci l'erreur de Nestorius, qu'il croye q Christ soit seulemét pur hómme, & ne le diuise point en deux persónes: mais il cõfesse q deux natures, la Diuine & humaine sont vnies enséble en vne mesme persónne, mais il ne cõfesse pas la cõmunicatió des pprietez. Je ne puis pas exprimer ceci en vn mot, en nostre lágue vulgaire. No' appellós proprieté, ce qui est propre a l'vne des deux natures: côme mourir, endurer, crier, parler, rire, manger, boire, dormir, estre marri, se resiouir, naistre, auoir vne mere, allaitter, marcher, se tenir droit, faire quelque ouurage, estre assis, estre couché, & tous autres gestes semblables: lesquels tous sont appelez proprietez de la nature humaine: c'est a dire, choses propres & adherentes naturellement a l'homme.

Aucótraire la propriete de la Diuinite, c'est qu'elle est immortelle, tout-puissáte, infinie, n'estát poit naye, elle

elle ne dort point, elle ne marche point, elle ne s'arreste: elle ne boit, elle ne mange, elle ne se contriste & ne pleure point. Brief, quel besoing est-il de recueillir beaucoup d'exemples ou tesmoignages? Il y a vne distance infinie entre Dieu & l'homme. Et pourtant les proprietiez des deux natures ne peuuent estre coniointes en vne seule personne. Voyla quelle estoit l'opinion de Nestorius.

Or si ie parloye ainsi en preschant, Iesus charpétier de Nazareth (car les Euangelistes le nomment fils de charpentier) marche là par la rue, & porte a sa mere vne pleine cruche d'eau, & vn petit pain, pour manger & boire avec sa mere. Et ce Iesus Charpentier est vray Dieu en vne persône. Nestorius m'accorde bié cela, & dit qu'il est vray. Mais si ie di, Dieu est là qui marche par la rue, qui porte de l'eau & du pain pour manger & boire avec sa mere, il n'accordera pas cela: mais il dit, que porter a boire, acheter du pain, auoir vne mere avec laquelle on mäge & boyue, ce sont choses propres a la nature humaine, & non point a la nature Diuine. Ainsi quand ie di, Iesus Charpentier a este crucifié par les Iuifs, & ce mesme Iesus est vray Dieu. Nestorius m'accorde que cela est vray. Mais si ie di q Dieu a este crucifié par les Iuifs, il respondra que non: car estre crucifié, ou endurer, ou mourir ne conuient a la nature Diuine, ains a la nature humaine.

Or quand les Chrestiens qui ne sont encore fort bien instruits, oyent ces propos, ils ne peuuent esleuer leurs pensees plus haut, sinon que Nestorius croit, que Iesus Christ est seulement hōme, & qu'il separe les personnes: ce que toutefois il ne fait pas, sinō que par ses parolles il semble qu'il le vueille faire ainsi. Le lecteur prudent voit claiement, qu'iceluy est forcené, & q luy-mesme n'entēd pas ce qu'il debat. Car veu qu'il cōfesse que la nature Diuine & la nature humaine sōt coniointes en vne mesme personne, il est certain qu'il ne peut nullemēt empescher que les proprietiez d'une chacune

lz. iij.

nature ne soyent coniointes ensemble. Que seroit-ce a dire autrement, Dieu & l'homme vni en vne mesme personne? Et pour dire en brieſ, toutes les resueries de cest heretique peuuent estre facilement refutees par ceste reigle des petits enfans, laquelle on enseigne es escholles, Si on accorde l'antecedent d'une bonne consequence, on ne peut nier la consequence. Comme on dit aussi communement : quand vne chose est accordee, il faut aussi accorder l'autre. Quand l'une n'est point accordee, on ne peut aussi accorder la premiere. Celuy qui accordera que François ou Marguerite est ta femme, il ne peut nier que les enfans d'icelle ne soyent tiens, si elle est chaste & honneste femme. Puis qu'on enseigne ces choses es petites escholles, y a-il homme de sain entendement, a qui il vint en fantasie, qu'il y ait des hommes tant sots & lourdaux, qu'ils oſent cōtre dire ou repugner a ces principes? Mais qu'on demāde aux gouuerneurs ou aduocats: ascauoir-moſi es plaidoyers ils n'ont bien souuent ouy ou maintenu la cause de quelques deffendeurs, lesquels ont bien confessé quelque partie du fait, & approuué: & non obstant n'ont point voulu accorder ce qu'on eut peu tirer de là par bonne consequence.

Or quelqu'un pourroit yci faire ceste obiection, que cest heretique Nestorius a cōfessé par finesse, que Christ est Dieu, & vne personne. Je respond, que non: car il n'estoit point si subtil ou ingenieux, mais il en a ainsi iugé comme il le sentoit. L'histoire Tripartite dit, qu'il cria vne fois en preschant, O Iuif, ne t'esleue point en triomphe, car tu n'as peu attacher Dieu en la croix. Voyci qu'il vouloit dire, Il est bien vray que Iesus Christ est Dieu: mais Dieu n'est point crucifié. Et au Concile deuant l'Euesque Cyrillus il dit ouuertement & deuant tous, que plusieurs confessent bien que Iesus Christ est Dieu: mais ie ne confesseray iamais en toute ma vie, que Dieu soit deux ou trois dieux. Cela vaut autant comme s'il estoit dit, Iesus Christ

Christ est Dieu, comme il y en a plusieurs entre nous qui le confessent : mais ie ne diray ou n'enseigneray iamais que Dieu doye naistre deux ou trois fois. Et comme il est recité en ceste histoire Tripartite, il estoit fort tourmenté de ce scrupule, que Dieu & la mort sont du tout opposites & contraires. Car il luy semble que ce n'est point-ci seulement vne absurdité, mais aussi vne proposition de blaspheme, de dire que Dieu meure.

Or voyci quelle estoit son opinion, que Iesus Christ estoit immortel selon la Diuinite, mais il n'auoit pas tant d'esprit ou industrie, qu'il eut peu parler ainsi proprement. Auec ce mal, il y eut aussi grâde insolence du costé d'autres Euesques, qui auoyent faute de sens, de ne penser point comment il falloit guerir telles blessures: plustost ils furent cause que ces playes furent beaucoup plus irritées & renouuelees.

Et si nous voulons parler comme il appartient, combien que de ceste opinion de Nestorius il s'ensuyue necessairement que Christ est homme pur, & deux personnes: toutefois il ne l'entendoit pas ainsi a la verite. Car ce sot & lourdaut sophiste ne voyoit pas bien, qu'il proposoit des choses impossibles & du tout absurdes. Il reputoit bien qu'en vne mesme personne Christ estoit Dieu & homme tout ensemble: & toutefois il ne vouloit point que les proprieté des deux natures fussent attribuees a ceste personne de Christ. Il iugeoit bien que l'antecedent estoit vray: tât y-a toutefois qu'il ne vouloit accorder que ce qui s'ensuit de l'antecedent fut vray. Et en cela il monstre bien son ignorance, qu'il n'entend pas ce qu'il nie.

Or quand a nous qui sommes Chrestiens, il nous faut ensemble attribuer les proprieté des deux natures du Fils de Dieu a ceste personne. Comme quoy? Christ est Dieu & homme en vne personne. Tout ce donc qui est dit de luy comme homme, il faut aussi qu'il soit dit de luy comme Dieu: ascauoir, Christ est mort,
lz.iiij.

& Christ est Dieu. Dieu d'oc est mort, non point Dieu separé, mais celuy Dieu qui s'est vni avec l'humanite. Car si nous considerons Dieu a part, l'un & l'autre est faux: ascauoir, que Christ soit Dieu, & que Dieu soit mort. Car en ce cas-la Dieu n'est poit homme. Que s'il semble a Nestorius que ceci soit admirable, q Dieu meurt, qu'il peust aussi pfer q ceci n'est pas moins admirable, q Dieu est homme. Car de vray effect le Dieu eternal & immortel est fait victime, laquelle meurt, endure, & ha toutes les proprietéz humaines. Autrement quelle chose (ie vous prie) seroit cest homme avec lequel Dieu est vni personnellemēt, s'il n'auoit point de vrayes proprietéz: Il est certain qu'il faudroit faire ceste consequēce, que c'est vn phātisme, cōme les heretiques Manicheens auoyēt enseigné auparauāt. Aucontraire tout ce qui est dit de Dieu, il faut aussi qu'il soit attribué a l'homme. Comme quoy? Dieu a créé & formé le monde, & est tout-puissant. Iesus Christ homme est Dieu, Iesus Christ donc homme a créé & formé le monde, & est tout-puissant. La raison est, qu'il est fait vne personne de la Diuinite & de l'humanite. Ceste personne donc ha les proprietéz de toutes les deux natures.

O bon Dieu! sans aucun debat ou contention ou doute il falloit consentir a cest article Diuin plein de consolation viue & eternelle: l'esprit s'en deuroit resiouir, estant fortifié par foy, il deuoit chanter louanges & action de graces au Dieu viuant & eternal, pour ceste misericorde & bonte inenarrable & infinie, de ce qu'il a voulu que son Fils bien-aimé fut fait semblable a nous: ascauoir, homme & nostre frere. Le diable met yci des troubles par des garnemens orgueilleux, ambitieux & desesperes: afin que ceste ioye pure & gracieuse soit souillee en diuerses sortes, dequoy tous fideles doyuent estre grandement contristez. Dieu en soit le iuge, au sein duquel nous espondons tous les iours nos larmes sanglantes, & nos complaints ame-

res. Car ceci est tresueritable, & tous esprits fideles le doyuent scauoir & sentir en eux : que si Dieu n'estoit assis pour balancer & dispenser les poids, nous irions bas en terre avec le bassin de la balance où nous serons. S'il ne faut point dire, Dieu est mort pour nous, mais seulement l'homme, il faut que nous perissions. Mais si la mort de Dieu est au bassin de la balance, ou si Dieu mort pour nous est mis en la balance pour contrepoids, alors luy emportant le poids va bas en terre, & nous sommes esleuez en haut, comme l'un des deux bassins qui sera vuyde & legier. Mais aussi il pourroit bien estre porté en haut, ou bien il pourroit sortir hors de la balace. Or il ne pourroit pas estre mis dedàs l'un des bassins, si premierement il n'estoit fait homme semblable a nous, ou nostre frere, a ce qu'il peut estre appellé Dieu mort, le deschirement de Dieu, le sang de Dieu, la mort de Dieu, la croix du Fils de Dieu. Car Dieu considéré selon soy ne peut mourir. Tant y-a neantmoins que d'autant que Dieu & l'homme sont vnis d'vniõ personnelle, on peut bien parler ainsi, La mort de Dieu : veu que cest homme meurt, avec lequel Dieu est vni, ou avec lequel Dieu est vne mesme personne.

Or ce Concile a trop peu condamné en ce Nestorius, pource qu'on y a seulement traitté de ceste façon de parler, que Dieu est nay de la Vierge Marie. Cela est la cause pourquoy il est recité es histoires, qu'il fut déterminé en ce Concile, que la Vierge Marie deuoit estre appelée mere de Dieu: cõbien que Nestorius ne voulut accorder les pprietez de la nature humaine ne Christ touchât la Diuinite: comme, estre crucifié, endurer, mourir, & toutes autres sēblables, qui ne cõuiennent point a la Diuinite. On ne deuoit dõc point seulement ordõner en ce Concile, que Marie fut mere de Dieu, mais aussi que Ponce Pilate & les Iuifs ont crucifié Dieu, & mis a mort, & autres choses semblables. Or quant a ce que puis apres Nestorius est condamné

par ces mots, Nestorius nie que Iesus Christ soit Dieu & vne personne, cela est bien vray en effect, & par la consequence. Mais c'est vn propos trop rude & estrange, veu que Nestorius estoit asseuré, qu'on luy faisoit vn grand tort en disant cela. Car sa doctrine ne fut iamais telle, mais il a tousiours dit le contraire, maintenant fort & ferme que Christ estoit vrayemēt & naturellement Dieu, & non point deux personnes: & pour ceste mesme cause il a fort pourfuyui les Arriens. Car vn tas de lourdaux ne pouuoient pas bien former vn syllogisme, ou entendre les consequēces: ascauoir, que quicōque niera les proprietēz, il niera aussi la substance ou la nature. Mais voyci quelle forme on deuoit tenir pour refuter Nestorius. Cōbien q̄ Nestorius confesse q̄ Iesus Christ vray Dieu & vray hōme soit vne personne: nōobstant pource qu'il n'attribue point les proprietēz de la nature humaine a ceste personne Diuine de Christ, ce qu'il enseigne est faux: & c'est autāt cōme s'il nioit la nature mesme. Et on ne doit poit seulement declarer ceste autre propiēte prise de la vierge Marie. Car par ce moyē on eut peu esclarcir beaucoup mieux tout le differēt de ce Cōcile, lequel selon mon opiniō peu de gēs ont entēdu iusqu'a present. C'est vne chose bien certaine, que telles choses de si grāde importance ne pourroyent pas bien estre entēdues des ecrits confus de Platine & autres historiēs semblables.

On trouuera encore aujourd'huy beaucoup de Nestoriens en la Papeute, qui touteſſois alleguent hardiment ce Concile, & n'entendent ou ne ſcauēt pas eux-mesmes ce qu'ils alleguēt. Car la raison humaine veut de soy-mesme sonder & espelucher ces choses si hautes & excellētes, & nullemēt accorder q̄ Dieu meure, ou qu'il soit vne substāce corporelle ou visible, cōme les autres hōmes: cōbien q̄ par lōgue coustume les Papistes soyent amenez a croire ces deux choses, q̄ Iesus est Christ & Dieu, comme Nestorius le croyoit aussi. En ceste sorte dōc ce Cōcile aussi n'a poit cōstitué vn nouuel

nouuel article de foy, cōme il a este dit ci dessus : mais il a maintenu les symboles anciens contre la nouuelle inuention de Nestorius , en sorte que quād on esmeut quelque dispute, on ne pourroit pas alleguer telles choses pour exemples, & quand on met en auant qu'il faut donner autorite aux Conciles, de dresser ou establis des articles nouueaux de la foy, ou de changer les anciens, ou de les corriger. Car depuis le commencement iusques a present on a gardé ceste doctrine en l'Eglise touchant cest article : & n'a este forgee de nouveau es Conciles: ains a este cōseruee & bien cōtegardee par l'Euangile & par tesmoignages conuenables des saintes Escritures. Car par ce qui est dit au 1. chap. de S. Luc, on scait pour certain que l'Ange Gabriel a annoncé a Marie, que le Fils du Treshaut deuoit naistre d'elle. Et Elizabeth mere de Iehan Baptiste dit, Dont me vient cela, que la mere du Seigneur vient vers moy? Et toute la multitude des Anges & de la gendarmerie celeste s'arrestant es nuees chante d'une voix ioyeuse & gracieuse ce beau cantique, Le Seigneur vous est nay, qui est Christ le Sauueur. Item, S. Paul au 3. des Galat. dit, Dieu a enuoyé son Fils n'ay de la femme. Je pense que ces tesmoignages sont assez suffisans pour prouuer que la vierge Marie est mere de Dieu. Ainsi dit S. Paul 1. Cor. 3. Les princes de ce monde ont crucifié le Seigneur de gloire. Mais sur tous autres il y a le tesmoignage du 20. des Actes qui est formel & fort express: où il est dit que l'Eglise a este acquise par le sang de Dieu: cōbien qu'en parlant humainemēt, Dieu n'ait point de sang. Et Philip. 2. il est dit, Cōbien que Christ fut egal a Dieu, toute fois il a este fait seruiteur, & a este trouué semblable a l'homme en tout & par tout. Outreplus au symbole des Apostres ces propres mots sont recitez, Je croy en Iesus Christ son Fils, nostre Seigneur vnique, conçu du S. Esprit, nay de la vierge Marie, qui a souffert, qui a este crucifié, & est mort, & a este enseveli, &c. On voit qu'il y a là des parolles ex-

presses, qui testifient les proprietéz de la nature humaine, & toutefois elles sont attribuees au seul Seigneur & Fils, auquel nous croyons : lequel est d'une mesme substance avec le Pere eternal, & est naturellement Dieu. Ceci soit assez touchant ce Concile.

DU CONCILE DE Chalcedoine.

LE quatrième Concile general a este celebré a Chalcedoine en Asie, & se peut bien faire que ce fut vingtdeux ou vingttrois ans apres ce troisieme Concile précédét, qui fut tenu en Ephese. Or ce fut l'Empereur Martien q fit assembler ce dernier, qui fut Empereur de Constantinoble apres le ieune Theodose, l'an apres la natiuite de Christ 455. Et ainsi ces 4. Conciles generaux ont este celebrez enuiron 130. ans l'un apres l'autre. Le Concile de Nicee fut tenu l'an 327. Combien que deuant ce temps-la & enuiron il y eut plusieurs autres Conciles ou Synodes en plusieurs lieux, seulemēt par les Euesques, & non point de l'autorite des Empereurs ou Princes, comme aussi il a este fait depuis. Mais ces quatre generaux n'ont peu estre assemblez sans l'autorite & cōsentemēt des Empereurs. Tant estoyēt les saints Peres adonnez a lacher la bride a leurs haines & dissensiōs mutuelles, en sorte que l'un ne vouloit pas facilement quitter la place a l'autre : & les histoires, hélas ! n'en rendēt que trop de tesmoignage. Cependant il y a vne cōsolation singuliere en ces exēples. Car il nous est remonstré, qu'il ne nous faut point desesperer, veu que pour certain il y a eu aucuns de ces saints Peres qui ont eu le S. Esprit, & eux ont este saints, & a fallu qu'ils ayent este appelez saints. Nous aussi combien que nous soyōs foibles & infirmes, nonobstant sommes saints, & de uons obtenir salut perpetuel.

Or

Or pour dire qui a este caule que ce Concile a este tenu, ie voudroye bien l'entèdre des autres. Car il n'y a nulle histoire digne de foy qui face mention de ceci. L'histoire Ecclesiastique fait fin apres auoir parlè du Concile de Nicee. L'histoire Tripartite & Theodoret ne disent plus mot apres auoir parlè du Concile d'Ephese, qui est le troisieme. Et desormais il faudra vucillons ou non que nous adioustions foy aux histoires des Papistes: où il y a grand dâger a cause des matieres grandes & graues. Car ces bons preudhommes ont finement tiré toutes choses pour les faire seruir a leurs resueries, & ont confirmé leurs inuétions friuoles par mensonges horribles, & continuent encore de le faire: en sorte qu'il n'y en a pas vn seul q puisse fortifier ou munir sa cōscience de tels tesmoignages. Deuine maintenât, ô ami lecteur, par quel moyen ie doy estre sauué, veu que ie ne peux bien entendre que c'est de ce Concile, & ne scay quelle occasion il y auoit de l'assembler. Et comment ont este sauuez ces saints & bons personages, qui ont este si long temps sans scauoir les decrets & ordonnances de ce Concile? Car il faut qu'e ceste vie mortelle il y ait tousiours quelques saints personages. Et quand ceux-la sortent hors de ce monde, il faut que d'autres succedent apres. Ceste succession continuelle a duré depuis le cōmencement du genre humain iusques a maintenant, & durera doresenauant iusques a la fin du monde: autrement il n'y auroit nulle verite en cest article, Ie croy l'Eglise vniuerselle, la communion des saints. Et le Fils de Dieu eut dit en vain, Ie suis avec vo' iusques a la fin du monde. Ie di, qu'en quelque lieu que ce soit il faut qu'il y ait des saints viuans en ce monde: autrement il n'y auroit pl' de Royaume de Iesus Christ: & n'y auroit pl' nul qui recitast vne fois l'oraison Dominicale, ou la confession de nostre foy: nul ne seroit fait participant des Sacremens, ne du Baptisme ne de la sainte Cene.

Platine & plusieurs autres disent que c'est-ci la rai-

son pourquoy on celebra ce Cōcile. Il y auoit vn abbe en Constantinoble, nommé Eutyches, lequel trouua vne doctrine pour cōtrarier a Nestorius: ascauoir que Iesus Christ est vne personne seulement en la nature Diuine. Les anciens determinerent contre cest erreur en Concile, que Iesus Christ est vne personne & deux natures. Cela est vray, & s'accorde avec la foy Chrestienne. Mais les histoires des Papes tesmoignent que cestuy-ci enseignoit, qu'apres q la Diuinite eut pris la nature humaine, & a este faite Christ en vne personne, ce n'a plus este depuis que Diuinite: & qu'il faut faire ceste resolution, que Christ est seulement Dieu, & nō point homme. Si l'opinion d'Eutyches est telle, ie peux dire hardiment qu'il estoit aussi ignorāt que Nestorius, duquel on dit qu'il auoit arresté ceci, qu'en Iesus Christ il y auoit deux personnes, & neantmoins auoit enseigné qu'il y en auoit vne seulement. Aussi cestuy-ci a accordé qu'il y auoit deux natures en Christ, & neantmoins il a nié qu'il y en eut plus de vne. Car le Pape Leon fait sonner ces mots haut & clair en quelque epistre, qu'Eutyches & Nestori^{us} ont enseigné diuerſes heresies. Et cela est vray. Si l'un enseigne que Christ est deux natures ou personnes, & toutefois il est ou vne persone ou nature seulement: & au contraire, si l'autre dit qu'il y ait deux natures en Christ, & toutefois il n'y en a qu'une: il faut bien que ces deux soyent discordans: & qui plus est vn chacun est contraire a soy-mesme.

Mais si les Papistes ont bien ſceu que Nestorius & Eutyches n'eussent point telle opinion, ils deuoyent plustost taire ces parolles, & traiter plus clairement de telles choses & en termes propres: c'est a dire, qu'il falloit vſer des propres mots, desquels iceux ont vſé. Autrement les heretiques pensent que nous les voulons surprendre ou circonuenir par mots controuuez, soit a droit, soit a tort, destournans leurs parolles a vn autre sens, comme on a veu ci dessus de Nestorius.

Car

Car les parolles mesmes des Papistes demonstrent bien, qu'Eutyches ne fait point ceste resolution, qu'en Iesus Christ il y ait seulement vne nature. Car ils disent qu'Eutyches a accordé qu'il y auoit deux natures en Christ: ascauoir, la nature Diuine, & la nature humaine que la Diuinite a prise. Celuy qui accorde cela, dit qu'il y a plus de deux natures en Iesus Christ. Mais quand il faut interpreter que c'est qu'Eutyches a voulu entendre par ceste opinion, que depuis Christ a laissé la nature humaine, n'ayant de reste que la Diuine, ils sont là du tout muets: & auant que de bien entendre le fait, ils disent qu'Eutyches a arresté qu'il y auoit deux natures en Iesus Christ, & toutefois qu'il y en auoit vne seulemēt, & nō point deux. Ainsi apres cela les histoires sont rendues incertaines & obscures: en sorte que nul ne peut bien entēdre quelle a este l'opinion d'Eutyches, ou ce que les histoires des Papes ont entēdu. Telles ambiguitez & propos obscurs font que nous perdons ce Concile avec les causes pour lesquelles on l'a celebré. Prenons le cas que ces choses puissent estre aucunement cogneuēs par les actes des Conciles, & par les epistres des Papes. Mais au contraire ceux qui ont redigé par escrit les histoires des Papes, ne deuoyēt pas escrire telles choses ainsi sottement & d'une si mauuaise grace, & nous proposer ainsi a l'estourdie des mots forgez par eux-mesmes, sinon que par cela on peut estimer, qu'eux ont entendu le Concile presque de telle façon que ie l'enten.

Or de moy, ie reciteray mes coniectures, si d'auenture s'entē bien ce qui en est, sinon la foy Chrestienne ne fera point pourtant renuersee. L'erreur de l'opinion d'Eutyches est quāt aux proprietēz, comme aussi de Nestorius. Combien que Nestorius erre d'une autre façon diuerse. Nestorius ne veut point attribuer les proprietēz de la nature humaine en Christ a la Diuinite, iagoit qu'il retienne ceci fort & ferme, que Iesus Christ est Dieu & homme. Au contraire, Eutyches re

130
D E U X I E M E L E T T R E
veut point attribuer les proprieté de la Diuinité a
l'humanité, combien qu'il tienne ceci fermement, que
Christ est vray Dieu & vray homme. Comme si ie di-
soye en sermon public, que la Parolle qui est le Fils de
Dieu, est createur & formateur du ciel & de la terre,
egal au Pere de toute éternité, Iehá 1. Et que ceste Pa-
rolle, ce Fils de Dieu est vray homme, Ieh. 1. Eutyches
accordera bien cela, n'en doutant nullement. Mais au
reste si ie di, que cest homme Christ est Createur du
ciel & de la terre, Eutyches en est offensé, pensant que
cela est du tout absurde, de dire: l'homme est Createur
du ciel & de la terre. Et voyci qu'il dit, Il n'est pas ain-
si: car ceste propriété Diuine: ascauoir, creer le ciel ne
conuient point a vn homme. Mais il oublie ce qu'il a-
uoit accordé auparauant, que Christ est vray homme
& vray Dieu en vne seule personne, & toutefois il ne
veut pas accorder la conséquence qui s'ensuit tresbien.

Car si quelqu'un accorde que Dieu & l'homme soit
vne mesme personne en Christ, il faut aussi necessai-
rement qu'il accorde a cause de la conionction de ces
deux natures en vne personne, q̄ cest homme Christ nay
de la vierge Marie soit createur & formateur du ciel
& de la terre. Car luy-mesme est fait cela en vne per-
sonne: ascauoir, Dieu, q̄ a créé le ciel & la terre. Euty-
ches n'entend pas ceste conséquence: & nonobstant il
retient ferme ce principe, que Christ est Dieu & hom-
me. Aussi ne considere-il point ceci, qu'il faut que la
nature humaine soit née en Christ, quand les proprie-
tez de la nature Diuine sont separees de la nature hu-
maine. Car par vne telle diuision, la personne seroit
separée en deux, & Christ ne seroit plus homme. Et
c'est ce que veulent affermer ceux qui disent dudit
Eutyches, qu'il ne pouuoit souffrir que la nature hu-
maine demeurast en Christ: ascauoir, en la conséquen-
ce: & nonobstant il confesse en l'antecedent, que la
nature Diuine & humaine en Christ sont vn mesme
Christ, vne seule personne, & deux natures. En somme,
quiconque

quiconque confessera (comme on a veu ci dessus) que ces deux natures sont en Christ, & qu'il est vray Dieu & vray homme, il faut qu'il attribue a la personne les proprietez d'une chacune nature: Car quand on oste les proprietez de l'un ou de l'autre, Dieu & hōme ne sont plus rien. Tous deux donc & Nestorius & Eutyches sont a bon droit condamnez avec leurs erreurs & meschantes opinions.

Toutefois ceci peut estre vray, qu'Eutyches a eu beaucoup plus de causes d'erreur que Nestorius. Car il y a eu plusieurs proprietez de la nature humaine qui sont demeurees en terre, depuis que Iesus Christ a este esleué a la gloire celeste: ascauoir, dormir, se contrister, manger, boire, endurer, mourrir, estre enseveli. Car il est maintenant assis a la dextre de Dieu, il ne mange iamais, il ne boit point, il ne dort point, il n'est point contristé, il n'endure ou ne meurt plus, & ne sera iamais subiet a toutes ces choses. Comme aussi nous ne serons plus subiets a la mort, apres que de ceste vie nous serons passez a la vie eternelle, 1. Corinthiens 15. Or ce sont-ci proprietez temporelles & caduques: mais les proprietez naturelles demeurerēt, comme ce qu'il ha chair & os, corps & ame, peau, cheueux, mouëlle & sang, & tous les membres d'un corps humain. Et pourtant voyci commēt on doit dire, Cest homme Christ, ceste chair & ce sang, a formé le ciel & la terre, a veincu la mort, a effacé le peché, a destruit les enfers: & toutes ces choses sōt proprietez Diuines: & toutefois elles peuuent estre droitement & saintement attribuees a ceste personne qui est la chair & le sang de la vierge Marie: comme ainsi soit qu'il soit seulement vne personne, & non point deux.

Ceci soit dit par forme d'exemple, Ton fils Pierre est nommé hōme scauant & letre, combien qu'une telle propiete conuienne seulement a l'ame, & non point au corps. Et quelque Eutyches pourroit ainsi tergiuerfer, Pierre n'est point letre en façon que ce soit, mais
l.j.

c'est son ame. Aucontraire, il y aura vn Nestorius qui dira, Je n'ay point battu ton fils de verges, mais seulement son corps. Cela est comme si on vouloit faire, de Pierre deux personnes, ou seulement retenir vne nature, combié que cela ne soit point dit. Or cela est vne pure ignorance, & vne vraye bestise, qui est a deplourer, laquelle monstre euidentmēt qu'ils ont este mauuais dialecticiens. Et touteffois il aduient bien souuent, qu'une telle ignorance sera apperceuë en beaucoup d'exemples de vie, & mesmes es autres choses, quand on accordera souuent quelque chose, cependant touteffois on niera ce qui s'ensuit de cela, comme il a este dit, que quand on a accordé l'antecedent, on nie la consequence puis apres. Il y a aujourd'huy plusieurs grans Princes, plusieurs excellens & scauans personnages, qui confessent publiquement & ouuertement, que la doctrine que nous annonçons de la foy, laquelle iustifie par pure grace sans aucuns merites ni œuures, est vraye: mais voyci dequoy ils sont grandement offensez, quand nous disons que pour ceste raison mesme on doit abolir la moynerie, & condamner tous seruices faits aux saincts, & autres choses semblables: & nonobstant la consequence requiert cela. Car nul ne peut estre fait iuste que par la seule foy. Il s'ensuit de cela que nul-homme ne peut estre iustificié ou sauué par la religion monachale, ou autres choses semblables. Dont vient donc cela, qu'ils font tant valoir la vie monachale, & la magnifient si hautement? A quel but tendent telles impietez & abus si horribles? Et afin que ie parle de moy-mesme, & que ie m'admoneste moy-mesme de la faute que i'ay cōmise autressois, (car ie confesse que ie doy quelque recognoissance a mon ignorance) Il y a plus de vingt ans que i'ay enseigné que la foy seule iustifie sans œuures, comme encore ie l'enseigne ouuertement & constamment. Mais si quelqu'un en ce temps-la se fut leué, qui eut enseigné que la vie des moynes & nonnains

nonnains eut este vne idolatrie, & que la profanation de la Messie eut este vn spectacle horrible, comment i'eusse iugé vn tel estre heretique? Et encore que ie n'eusse employé mes mains a le brusser, si est-ce que ie l'eusse foulé aux pieds, pour le moins i'eusse entierement suyui le conseil de ceux, qui eussent dit que c'estoit bien fait de le brusser. Et de moy, qui estoie vn pource fol mal aduisé, ie ne pouuoie voir la consequence, laquelle il faut que i'accorde maintenant: ascauoir, si la foy seule confere ou fait cela, la vie monachale ou la profanation de la Messie ne le fera pas. Mais ceci estoit encore le plus ioli. Je scauoie bien que toutes ces choses n'estoyent que traditions & œuvres humaines. Et toutefois ie n'attribuoie point cela aux bonnes œuvres commandées de Dieu & faites en foy. Je confesse franchement, que en ce temps-la i'ay fait fort bien le Nestorius & l'Eutyches, combien que ce ait este d'une autre sorte. I'accordoye bien vne partie du fait, & ie ne vouloye point accorder l'autre qui s'ensuyuoit de la premiere. Comme Nestorius accordoit bien que Iesus Christ est vray Dieu & vray homme, & nonobstant il ne vouloit point accorder, que luy-mesme qui est Dieu soit nay & mort: & toutefois cela s'en ensuit par vne bonne consequence.

Outreplus, Luther reprend les Papistes, qu'ils n'enseignent point la foy catholique ne les bonnes œuvres. Cependant ils bataillent courageusement, & poursuyuent Luther avec gros outrages, que c'est luy-mesme qui n'enseigne point purement la foy catholique, & qui defend les bonnes œuvres. Quel scrupule donc y a-il qui les presse en leur consciences, & qui les empesche de s'accorder ensemble, veu qu'ils confessent vne mesme chose? Je le diray, Quelque Nestorius a ainsi failli aux proprietéz. Luther requiert entierement les bonnes œuvres: mais il n'accorde pas ceci, qu'on attribue ces proprietéz magnifiques & Di

uines aux bonnes œuvres : ascauoir, satisfaire pour les pechez, appaiser l'ire de Dieu, & iustifier les pecheurs. Car quant a ces proprieté, on les doit attribuer a vn autre : ascauoir, a celuy qui est appellé l'Agneau de Dieu, qui oste & efface les pechez du monde. Il faut entierement reseruer ces proprieté au sang & a la mort du Fils de Dieu. Il y a d'autres proprieté, d'autres merites & recompenses, qu'on doit assigner & attribuer aux bonnes œuvres. Sur cela les Papistes tempestent, & font de terribles bruits, & veulent que ces choses soyent attribuees seulement aux bonnes œuvres, qu'elles satisfont pour les pechez, & qu'elles rendent les hommes iustes. Ils crient donc que Luther n'enseigne les bonnes œuvres, ains les defend. Mais voyci il ont les yeux aucuglez, & ne voyent point ceste consequence, que ce n'est rien de dire des bonnes œuvres qu'elles satisfacent pour les offenses, & soyent meritoires pour obtenir la vie eternelle & bien-heureuse: non plus que ce n'est rien de se taire de la doctrine des bonnes œuvres : car il n'y a point en ce monde de telles bonnes œuvres, & ne peuuent estre en lieu quelcôque ou en quelque partie de la nature. Parquoy pour ceste raison mesme que par vne obstination Pharisaïque ils enseignent & font profession des bonnes œuvres, ils n'enseignent nullement aucunes œuvres.

On voit maintenât quelle est la dialectique de Nestorius, lequel accorde l'antecedet, & nie la conséquence, & par cela-mesme il fait l'antecedent vicieux. Car si l'un est vray, l'autre aussi sera vray, en vraye consequence. Aucontraire, si le dernier est vicieux, aussi le premier sera tel. Non seulement ils accordent que les bonnes œuvres satisfont pour les pechez & offenses, mais aussi ils y insistent a cors & a cry. Mais ils condamnent l'autre partie qui s'ensuit de cela : ascauoir, que telles œuvres ne sont point bonnes œuvres, & qui plus est, ne sont rien du tout. Et nonobstant cela-mesme s'ensuit des choses precedentes par vne fort bonne consequence.

sequence. Car les bonnes œuvres qui satisfont pour les offenses & pechez, vallent autant certes comme si telles œuvres n'estoyent rien : en sorte que ceste conséquence est bien ferme. Celuy qui enseigne ce qui n'est point, il n'enseigne rien du tout. En ceste sorte peut-on bien dire de la foy. Celuy qui propose doctrine d'une telle foy, qui ne iustifie point seule & sans œuvres, cestuy-la enseigne d'une telle façon comme s'il n'enseignoit rien. Car une telle foy qui fait les hommes iustes avec les œuvres ou par les œuvres, n'est rié, & ne se trouuera point.

Je proposeray vn exemple plus grossier. Aucuns legistes accordent bien, que les mariages des prestres doyuent estre approuvez : tant y-a qu'ils reiettent ceste consequence, que leurs enfans soyent heritiers legitimes. Cela est autant comme s'ils disoyent, que le mariage des prestres est paillardise. Car si on accorde le mariage, il faut aussi necessairement accorder, que les enfans qui en sont issus, sont legitimes heritiers & successeurs des biens de leur pere. Car s'ils ne sont point successeurs, comment y auroit-il mariage? Ceci se dit coustumierement aux escolles : nier la consequence de l'antecedent desia accordé en vraye & bonne consequence : & apres que la consequence est renuersee, retenir l'antecedent, qui est une chose impossible. Et on ne fera point de tort a ces gens-ci, si on dit qu'ils sont ignorans ou rudes. Mais Nestorius & Eutyches estoyent lourds d'esprit, comme il aduiet a plusieurs autres en d'autres choses. Car sans doute & difficile l'un & l'autre auoit ceste opinion, que Christ est Dieu & homme en une personne, & ont creu cela, comme cela est amplement déclaré par les histoires & par les actes des Conciles : & toutefois ils n'ont peu iuger de la raison de ceste consequence : que ceste personne qui est ensemblement Dieu & homme, a este voirement crucifiée, & a créé les cieux : mais que Dieu ne peut estre crucifié, & un homme ne peut créer les cieux.

Et quel besoing est-il que nous parlions beaucoup de nous? Les Apostres en Ierusalem avec grand nombre de Iuifs ont este iustifiez par la seule foy, c'est a dire, par la grace du Fils de Dieu: & toutefois il y auoit quelques Nestorius & Eutyches par dessus la peau, qui leur esblouissoient les yeux, a ce qu'ils ne vissent ceste consequence, que la Loy de Moysse ne conferoit rien ou ne pouuoit rien conferer a salut: tant y-a qu'ils vouloyent aussi attribuer a la Loy les proprietes qu'il faut seulement attribuer a cest agneau, qui est l'Agneau de Dieu. Or ils disoient, comme il a este remonstré ci dessus: que les Gentils ne pouuoient estre sauuez qu'ils ne fussent circoncis, ou qu'ils ne gardassent la Loy de Moysse. Cela estoit du tout reietter & aneantir Iesus Christ avec sa grace, comme dit saint Paul, Galat. deuxiesme, Si la iustice est par la Loy, Christ est mort en vain. Et Romains vnzieme, Si c'est par sa grace, ce n'est donc point par les œuvres. Mais ceux qui pour lors estoient en la ville de Ierusalem, disoient ainsi, Ceci est bien conferé par la seule grace: toutefois il faut aussi attribuer ce benefice, aux seules œuvres. Car nul ne peut estre sauué sans la Loy, encore qu'il falut que l'homme fut sauué seulement par grace sans les œuvres. Et certes ceci n'est autre chose que se frapper & blesser les iouës de son propre gre, & n'entendre point ce qui est dit. Aux escholles on parle ainsi ordinairement, comme on a peu voir ci dessus, Accorder l'antecedent, & nier la consequence: ou au contraire, Nul ne fera cela, s'il n'est ou du tout hebeté, ou du tout impudent.

Autant en font aujourd'huy mes contredisans, qui parlent fort bien de la grace de Iesus Christ (& possible est qu'ils le font d'un bon zele) aussi de la remission des pechez, & de tout ce qu'il faut dire de l'article de la redemption. Mais cependât ils fuyent ceste conséquence, comme si quelque phantôme leur auoit fait peur:
alcauoir,

ascavoir, quand les hommes doyuent estre instruits du troisieme article de la sanctification: c'est a dire, de la nouvelle vie en Christ. Car ceux-ci pensent qu'il ne faut estonner ou troubler les hommes, ains qu'il faut tousiours prescher gracieusemēt & delicatement de la grace & de la remissiō des pechez, & qu'il faut fuir cōme la peste ou la mort telles & semblables parolles. Escoute, Tu veus bien estre appellé Chrestien, & cependant tu veus paillarder, yurongner, gourmander, commettre adulteres, t'esleuer en orgueil, tirer les biens d'autrui a toy, amasser des biens & richesses par vsures illicites, brasser de haine ou enuie contre quelque autre, appeter vengeance, & seduire les autres par mauuais exemples. Mais ils disent ceci, Si tu es yurongne, ou gourmand, ou adulateur, ou auaricieux, ou enuyeux, ou pollū de quelques autres pechez, pour estre sauué il ne faut que croire: & il ne faut point que tu craignes les menasses de la Loy: car Christ a tout accompli.

Je te prie, di moy, N'est-ce pas cela accorder l'antecedent & nier la consequence? Mais plustost cela mesme est oster Iesus Christ du milieu, & l'amoindrir iusques au plus bas, au lieu que ses benefices incenarrables & infinis sont recitez & annoncez par la voix publique de toute l'Eglise, & en tous les temples. Cela est ne dire rien que des contradictions ou oppositions: il est ainsi, il n'est pas ainsi, & mettre choses semblables aucontraire l'une de l'autre. Car vn tel Christ n'est rien, & ne se trouuera point: ascavoir, vn Christ qui soit mort pour les pecheurs qui ne se soucient nullement de la remission des pechez, & ne se repentent de leurs premieres offenses, & commencent vne nouvelle vie. Ainsi ceux-ci preschent Iesus Christ d'une dialectique Nestorienne & Euthychienne, qu'il est le Christ, & toutefois il ne l'est pas. Et se monitrent bons rhetoriciens quant aux pains sans leuain de Pasques: tant y-a que quant aux feries de Pentecoste, ils s'abu-
l.iiiij.

sent vilement, & ont des langues de plomb au lieu de l'ague de feu. Car ils omettēt du tout la sanctificatiō & viuificatiō du S. Esprit, & parlent seulement de la redemption de Christ: & nonobstant Iesus Christ (lequel ils magnifient si hautement, & a bon droit) est Christ, & nous a deliurez de la mort & de peché a ceste fin, que nous soyons regenez par son saint Esprit, que soyons faits nouuelles creatures de Dieu, couuertes du viciil Adam, a celle fin qu'estans morts a peche, nous viuions a iustice, cōme il est bien remonstré par saint Paul, & que commencement soit fait en ceste vie mortelle, & la nouueauté croisse, laquelle sera paracheuee en la vie eternelle. Car Iesus Christ ne nous a point seulement meritē la grace, mais aussi le don, qui est la donation du saint Esprit: afin que non seulement nous obtenions la remission de nos pechez: mais aussi que nous ayons la force & aide du saint Esprit pour resister au peché.

Or si quelqu'un ne cesse point de pecher, ains demeure en l'estat ou cōdition de sa premiere vie, il faut que nos contredisans ou repugnans luy monstrent vn autre Christ: car le vray Christ n'est pas-là, encōre que toutes les bandes des Anges criaient hautemēt & toutes d'une voix, Christ, Christ, Christ. Et il faut qu'un tel avec son Christ cōtrouuē soit damné a perpetuité.

Or considerons cōment nous sommes sots & malheureux dialecticiens es choses de grande importance, qui surmontent de beaucoup nostre capacite, ou qui ne sont point souuēt debattues, ou telles qu'en vne mesme & semblable chose nous mettiōs des oppositiōs ou conclusions contraires. Mais quand il est question de choses de neant, alors il n'y a dialecticien si aigu qui nous puisse surmonter. Car il n'y a villageois quelque lourd & gros entendement qu'il ait, qui ne iuge bien d'un sens cōmmun que vaut ceste façon d'argumēter, Celuy qui me baille vn sols, ne me baille pas vn escu. Car ceste consequēce coule de soy-mesme facilement,

& en

& en cela il y a vne raison tresmanifeste. Mais nos opposans ou cōtredisans ne voyent point qu'ils preschēt ou annoncent vn Christ sans le S. Esprit, & contraire au saint Esprit, veu qu'ils preschēt mesme a ceux qui perseuerent obstineement en leurs meschancetez, que la promesse de la vie bien-heureuse & du salut eternel leur appartient. Et nonobstant la consequence veut cela, qu'en l'hōme est cōuertī, le S. Esprit y est requis, qui soit pour gouuerner le cœur, & qu'au cœur il y ait vne nouuelle obeissance commencee, & vne nouuelle vie: ou bien l'hōme est du tout sans mediateur & sans Dieu. Tant y-a que ces afnes-ci veulent qu'on estime d'eux qu'il sont plus grans dialecticiens que Mo. Philippes Melancthon, ou qu'Aristote; afin que cependant le ne dise rien de Luther: car, ces gentils compagnons ont fort tourmenté le Pape. Ils ont abbatu la puissance & la force du royaume Papistique.

Toutefois la dialectique de Nestorius & d'Eutyches court par tout le monde comme vne peste contagieuse, mesmement quand il faut traiter la sainte Ecriture: neantmoins elle est aucunement plus tolerable es autres choses. Combien qu'elle donne assez de facherie quelquefois aux aduocats & iuges es causes subtiles & graues, en sorte que les vns & les autres sont contrains quelquefois d'accorder des cōtradictaires, & de prendre grand peine pour mettre fin aux proces.

Or si l'un ou l'autre, ou Nestorius ou Eutyches, ou tous deux ont persisté opiniastrement en leur erreur (ce que ie ne peux ou ne dois affermer temerairement, sinon autant qu'on le peut iuger ou cognoître par la lecture des hystoires) apres que les Euesques ont donné leur iugement, ils ont este iustement condānez & a bon droit non seulement comme heretiques, mais aussi comme grans fols. Sinon s'ils se sont retractez de leur opinion, cōme il y a mention expresse faire d'Eutyches es actes du Cōcile: & si selon le cōseil de S. Paul les Euesques n'ont point amiablement admōnesté ce-
luy

luy qui auoit failli par ignorāce, encore qu'ils eussent bien iugé du different, si est-ce qu'il faudra qu'il respōdent deuant le siege iudicial du iuge souuerain & tres-iuste de ceste sentence tāt seuerē & rigoreuse, veu que les Conciles auoyent pour lors si grande authorite, & qu'en ce Concile de Chalcedoine il y auoit pres de 360. Euesques assemblez.

Il me souuient que M. Iehan Vuesſalie qui a este ministre ou prescheur de Mayence, a este pour ceste seule cause iugé a mort par ces meurtriers pleins de cruauté sanglante, lesquels on appelle Inquisiteurs, ou plustost inuenteurs de la peruersite heretique, de l'ordre des Iacopins: ascauoir, qu'il ne vouloit pas dire, Je croy que Dieu est, mais disoit, Je scay que Dieu est. Car toutes les vniuersitez iugeoyent d'un commun consentement, que c'estoit vne chose toute notoire de dire que Dieu est, comme S. Paul aussi l'affirme au 1. chap. des Romains. Et il est amplement recité en l'Apologie comment ces orgueilleux successeurs de saint Dominique se sont portez meschamment enuers Iehan Hilten cordelier en Isenac.

Je pren le cas que quelque hōnestē personnage nous vint trouuer toy & moy, qui peust par vn propos dur & non vsité aggrandir tellement le fait, qu'il se monstrast estre du tout estrāge, & qu'il dit ainsi, Ceci n'est-il pas digne de grande admiration? Il s'est leué vn nouveau Prophete, qui enseigne, que si vn hōme peut estre entierement saint, non seulement il peut faire des miracles, mais aussi creer de riē le ciel, la terre, les Anges, les hōmes, & toutes autres choses qui y sont cōtenues, cōme il y a eu aucuns Schollastiques q ont debattu cela. Et qui est beaucoup pis, q dise que le vray Dieu & eternal est mort. Il est certain qno' trouueriōs vne si grāde absurdite en cela, que nous nierions l'un & l'autre, comme propos procedēz du diable.

L'Escripture dit, Je suis Dieu, & ne change point. Et S. Paul dit, Lequel seul ha immortalite. Quel besoing est-il

est-il de plus longues parolles? Dieu seul est viuant, & est la vie mesme. Iceluy nous romproit le propos, & diroit, Toutefois vo'-mesmes enseignez ainsi, & dites, Christ est vn homme parfaitement saint, qui a créé le ciel & la terre, & avec cela il est vray Dieu, qui a esté offert & sacrifié pour nous au bois de la croix, & est mort.

Voyla comment tout en vn instant nous sommes deuenus terribles heretiques comme Nestorius & Eutyches, qui cōfessons ensemblement, que Christ Dieu & hōme en vne personne est mort pour nous, & qu'il a créé le ciel & la terre, combien qu'un peu auparauant nous eussions dit, q̄ cest vn monstre, voire s'il y a quelque chose plus horrible qu'un monstre: ascauoir, celuy qui a osé dire qu'un homme ait créé le ciel & la terre, & que Dieu est mort. Et toutefois la consequence demontre cela assez ouuertement, par ce que nous acceptons Christ pour Dieu & homme en vne mesme personne. Tu vois bien que par vne occasiō facile les proprietez offensent & troublent les hommes qui ne sont point aduertis. C'estoit là où il falloit subuenir aux consciences foibles par admonition fraternelle amiable & salutaire: & ne faudroit reietter orgueilleusement ceux qui sont hors du bon chemin. A la mienne volonte qu'il n'en aduint pas ainsi que ie le iuge. Mais ie crain fort qu'il n'y ait aucuns heretiques au dernier iour qui en soyent iuges, & que ces Euesques mesmes qui auoyent puissance de iuger, ne soyent damnez a tout iamais.

Dieu est admirable & incomprehensible en ses iugemens & œuures: sinon que nous scauons qu'il est favorable & propice aux humbles & abbatus, & ennemi mortel de tous les fiers & orgueilleux. Et principalement es Eglises & Conciles il n'y falloit rien faire d'affection, ou par enuie, ou par ambition ou orgueil, car Dieu ne peut porter cela.

J'ay eu telles cogitations d'Eutyches, par lesquelles

si ie n'ay approché pres du fait, au nom de Dieu. Plustost deuroit-on reprendre ceux qui ont redigé ces choses par escrit. Car quelle raison y a-il, qu'ils n'ayent escrit ces choses par vn meilleur ordre ou plus songneusement, afin qu'on les peut mieux entendre? Et que seroit-ce, si les actes de ce Concile estoient du tout perdus & hors des mains des hommes? C'est vne chose bien certaine, que la foy Chrestienne ne seroit point du tout aneantie pour cela. Si est-ce que plusieurs escrits & beaucoup plus vtiles & proufitables que les actes de ce Concile ont este perdus.

Sainct Augustin mesme se plaint, qu'il n'a du tout rien trouué es escrits de ses predecesseurs, dequoy il peust estre aidé pour refuter Pelagius: iacoit qu'il faille bien dire qu'il y eut deuant ce temps-la beaucoup de disputes touchant ce differét, qui estoit de grande importance. Mais en telles pensees i'ay suyui les parolles de Leon Euesque de Rome, lequel recite que les heresies de Nestorius & d'Eutyches sont directement opposites, & du tout contraires l'une a l'autre. Or on peut facilement cognoistre par l'histoire Tripartite, que Nestorius a confessé & maintenu de grand courage, que Christ est vray Dieu & homme. Et ne tenoit point le parti des Arriens, qui ne vouloyét accorder simplement que Christ fut Dieu: mais il les a bannis, & pourchassé iusques a la mort. Mais c'est-ci son heresie, que les proprietétez l'ont troublé & confondu: ascauoir, que Dieu deuoit naistre d'une femme, & estre crucifié. Il faut donc qu'Eutyches ait deffendu le contraire. Eutyches auoit bien ceci pour tout persuadé que Christ est vray Dieu & homme: mais il ne vouloit pas attribuer les proprietétez de la nature Diuine a l'humanite de Christ: comme au contraire Nestorius ne vouloit pas attribuer les proprietétez de la nature humaine a la Diuinite en la personne vnique de Iesus Christ. Ces choses sont contraires l'une a l'autre, ou renuersees.

Mais si son opinion a este telle, qu'il ait simplement
nié

nié la nature humaine en Christ, son heresie ne seroit directement opposite a celle de Nestorius. Mais il faut bien dire qu'il estoit fol & insensé, d'auoir arresté ceci que la Diuinite est vnue avec l'humanite en Christ, & toutefois il ne luy demeure qu'une nature : ascauoir, la Diuine. Cela non seulement seroit opposite & contraire a l'opinion de Nestorius, mais aussi contre tous fideles & infideles, & contre tous Payens, voire contre tous les hommes. Car nul n'enseigna iamais ainsi. Mais pource qu'ils ont ainsi noté le fait, qu'eux-mesmes témoignent qu'Eutyches a bien confessé que la Diuinite & humanité sont vnies en vne seule personne de Christ, & que d'autres ont tellement écrit comme s'ils ne vouloyent point que ces choses fussent entendues, nous aussi ne les voulons point entendre. Car qu'en auons-nous a faire? veu que nous auons d'autres choses meilleures & plus certaines?

Eutyches afferme clairement au Concile, qu'il n'a point usé de telles parolles que les autres rapportent de luy : ascauoir, qu'il nie la nature humaine en Christ. Et par cela on peut bien apperceuoir qu'il a failli, & si n'a point voulu nier la nature humaine de Iesus Christ. Mais ie voudroye volontiers ouir ces historiens des Papes, comment ils sont si impudens, qu'ils osent dire que Nestorius a creu deux personnes en Christ, & n'obstant n'en a creu qu'une : semblablement qu'Eutyches a creu deux natures en Christ, & toutefois n'en a creu qu'une. Ie pense certes qu'ils ont esté aussi bons dialecticiens que Nestorius ou qu'Eutyches. De la Theologie, ie n'en di rien : car possible est qu'ils sont contraires a toute raison.

Et pour retourner encore a la dispute qui est touchant les Conciles : par ceci aussi peut-on bien cognoistre que ce Concile n'a point forgé de nouueaux articles de foy : en sorte que de ce mesme on ne puisse auoir exéple pour prouuer qu'il faille attribuer ou authorite ou puissance aux Conciles de charger l'Eglise

des fideles de nouueaux articles forgez par l'autorite & selon la fantasie des homes. Car cest article est fondé es Escritures beaucoup plus seuremēt & fermemēt. Iehan 5, Le Pere a donné au Fils tout iugement : car il est Fils de l'homme. Si Iesus Christ eut yci voulu vser de la phrase d'Eutyches, il eut fallu donner ceste raison, car il est Fils de Dieu. Car iuger est vne propriete de la nature Diuine, & non point de l'humaine. Mais Christ attribue ceci a la nature humaine : ascauoir, au Fils de l'homme, qui est le fils de la vierge Marie. Et Matthieu 22, Christ interrogue les Pharisiens commēt il faut accorder ces choses, que Dauid appelle Christ son Seigneur, qui touteffois estoit son fils & de sa semence. S'il est fils ou semence de Dauid, cōment donc se fait cela qu'il est assis a la dextre de Dieu ? Eutyches respondroit sur cela, La semēce de Dauid ne peut estre assise a la dextre de Dieu, mais le Fils de Dieu seul. Et nonobstāt il cōfesse que le Fils de Dieu & le fils de Dauid est vne seule personne. Mais là où ceste persōne est assise, là aussi le Fils de Dieu & le fils de Dauid est assis. Eutyches n'a point les yeux propres, pour bien voir ceste consequēce. Les autres donc ont eu ceste opinion de luy, qu'il ne tenoit point Christ pour homme, ains seulement pour personne & nature Diuine : & nonobstant son opinion n'est point telle a la verite.

Brief, tous les Prophetes, tous les passages de toute la Bible, qui attribuēt a Christ ou au Messias le Royau me bien-heureux & eternal. Item, la deliurance du peché de la mort & des enfers peuuēt estre opposez a Eutyches. Car tous ces passages ou tesmoignages afferment, que la semēce de la femme deuoit briser la teste du serpent, Genese 3. C'est a dire, deuoit vaincre & opprimer la mort, le peché, le diable & les enfers : & toutes ces choses sont proprietez de la nature Diuine, non point de la semence de la femme. Item, toutes nations deuoyent estre sauuees & beneites par la semēce d'Abraham, Genese.22. Cela aussi emporte que la malediction

ction de Dieu, le peché & la mort sont ostez. Ces proprietétez aussi sont de la nature Diuine, & non point de la semence d'Abraham. D'auâtage ces excellens & magnifiques oraçles de Dauid, d'Isaïe, de Ieremie & de tous les Prophetes, qui font mention de la semence de Dauid: ascauoir, que ce Fils de Dauid doit restaurer la iustice eternelle: c'est a dire, abolir la mort, le peché & enfer: lesquelles toutes choses sont proprietétez de la nature Diuine, & de la maïeste eternelle. Et touteffois cela est ordinaire a la saincte Escriture d'attribuer ces proprietétez au Fils de Dauid, qui est Christ, fils de la vierge Marie. Si donc ie n'ay pas encore le different de ce Concile, ou si ie ne l'enten pas bien: touteffois i'ay des tesmoignages clairs, ausquels le Concile mesme doit accommoder sa confession & sa sentence comme a la reigle. Et la verite de ces tesmoignages m'est plus certaine de beaucoup que tous les Conciles, de quelque temps qu'ils soyent.

Or qui voudra, pourra lire plus outre les actes de ce Concile, & y apprendre de soy-mesme. De moy, ie les ay tant leus, que i'en suis ennuyé. Il y a là vne telle confusion de ceremonies, qu'on peut bien voir que Gregoire Nazianzien a droitemēt iugé, lequel fut precepteur de saint Hierosme, & combien qu'il fut deuât ces temps-la, & qu'il se soit trouué aux Conciles plus paisibles & ou il y auoit des gens plus doctes: neantmoins il escrit ainsi en quelque epistre, Je suis tellemēt disposé, s'il faut dire la verite, que i'aymeroye mieueuiter toutes les assemblees des Euesques: car ie n'ay point veu vn seul Concile qui eut vne bōne fin, ou qui ostast plustost les maux que de les augmenter. Car la conuoitise de contention, de principaute & l'enuie surmontent la raison. Et de fait, ie m'esbahi comment se fait cela, que de long temps on ne l'a excommunié a cause de ces parolles, comme vn heretique outrageux. Mais pour entendre ce qu'il dit, que les Euesques ont cōbattu aux Conciles qui seroit le plus ambitieux,

ou orgueilleux, ou amateur de foy-mefme, en ce Concile il y a vn clair exemple pour monftrer cela. Et cefte confequēce n'eft point neceffaire, que tous ceux qui enfeignēt purement, ou qui maintiennent la vraye doctrine contre les corruptions, foyent Saincts pourtant. Car Balaam mefme auoit l'efprit de prophetie : Iudas femblablement auoit la charge du vray office d'Apoftre, & les Pharifiēs eftoyēt affis fur la chaire de Moyfe, & enfeignoyent droittement, Matthieu 23. Ainfi donc il faut que nous auffi foyōs munis de bonne heurre pour confermer noltre foy d'vne plus grande certitude, que n'eft pas la certitude ou la fermetē des Conciles. Or cefte plus grāde certitude & fermetē eft comprife es fainctes Efcritures.

Or les hiftoires nous tefmoignent, que ce qu'il dit yci, eft bien certain : afcauoir, qu'il ne veit iamais vn Concile qui eut bonne fin. Car l'herēfie d'Arrius a eſte comme vn paſſe-temps ou ieu deuant le Concile de Nicee, aupris de cefte confuſion horrible qu'eux-mefmes ſuſciterent apres le Concile, comme on a veu ci deſſus. Autant en pouuōs-nous dire de l'herēſie de Macedonius & de Neſtorius. Car la partie laquelle fut condamnēe, fut tant plus coniointe, en ſorte que ſous telle ombre de concorde & d'vnite ils peignoyēt leurs tromperies & fallaces, cōme ſi n'y eut eu aucune iuſte raiſon, par laquelle on les eut peu cōdamner. Souuentefſois ils ſuſcitoyent de plus grans combats contre les Concilēs, leſquels ils n'entendoyent pas bien. Comme auffi il eſt aduenu aux Allemans au Concile de Conſtance, quand le Pape ſubiet au Concile fut deboutē de ſa dignite Papale, & ſa cruauté & tyrānie fut extremement condānēe. Depuis ce temps-la, le Pape a eſte poſſedē de ſept diables beaucoup pires, & commença alors a eſtablir ſa cruauté barbare & tyrānique: il defrobbe, il pille, il deuore, il brigande toutes les Eueſchez, monaſterēs, temples, puis il fait par tout des indulgences a vendre, il confere pleine remiſſion
des

des pechez, & exemption des peines de Purgatoire. Il fait & refait des loix, & les baille a pris d'argent. Il trahit meschammét & Dieu & Christ & le saint Esprit, il met bas la gloire Diuine, il incite les Empereurs & les Rois a se ruiner & entretuer, il mene la guerre, & la denonce a sa fantasie: il espend le sang innocent, il tue l'ame & le corps: en sorte qu'on peut voir clairement quelle est ceste idole q̄ la cour Romaine adore. Nous auons este reöpensez de ce labeur par vn mesme pris: ascauoir, qu'au Concile de Constance nous auons osté les Papes de leur dignite, & deposez de leur office & les auons reformez: ascauoir, si l'issüe de ce Cöcile n'a point este cruelle? Certainement si il vous semble bon, qu'il vous soit licite desormais, de deposer les Papes de leur office, & les reformer: afin que si sept malins esprits ne fussent, que septante sept legions de diables les arment contre nous voire si il y a assez d'espace de reste pour heberger tât de diables, & si ilz ne sont point auparauant remplis de diables iusques au comble. Voy la quelle est la reformation du Concile de Constance,

Ainsi donc auons-nous paracheué les quatre Conciles generaux, & auons monstré les causes, pour lesquelles ils ont este assemblez. Le premier a este celebré en la ville de Nicee, lequel maintient la Diuinite de Christ cötre Arrius. Le second a este celebré a Constantinoble, & il maintient la Diuinite du saint Esprit contre Macedonius. Le troisieme a este celebré en la ville d'Ephese, lequel maintient vne personne en Christ contre Nestorius. Le quatrieme a este celebré en Chalcedoine, lequel deffend deux natures en Christ contre Eutyches. Mais en tous ces quatre Conciles il n'y a eu nuls nouueaux articles forgez. Car ces quatre articles sont beaucoup plus richement fondez sur le seul Euangile de saint Iehan, encore que les autres trois Euangelistes, & saint Pierre & saint Paul n'eussent rien escrit de ceste matiere: lesquels toutefois parlent grauement de toutes ces choses, & en ren-
m.j.

dent bon tesmoignage, & accordent bien avec les tesmoignages & oracles des Prophetes. Si donc ces quatre Conciles principaux, que les Euesques Romains selon leur Decret ont comparé aux quatre Euangiles (comme si les Euangiles ne traittoient beaucoup plus richement & amplement ces disputes avec tous les articles de la foy : ou comme si les Conciles ne tiroient ces poincts des Euangiles tant bien sont appris ces affaires mitrez qu'ils n'entendent pas q'c'est des Euangiles ne des Conciles) n'ont point voulu ou n'ont peu innouer ou constituer rien de nouveau es articles de la foy cōme eux-mesmes cōfessent: combien moins ceste puïssance peut-elle estre attribuee aux autres Conciles, desquels l'autorite est beaucoup moindre, veu que ces quatre Conciles doyuent estre reputez les principaux, & que on les doit ainsi appeller.

On doit aussi iuger en ceste sorte de tous ces Conciles soyent grans ou petits, encore que beaucoup de milliers fussent entassez ensemble: ascauoir, qu'ils ne doyuent rien determiner ou ordonner de nouveau ni en la doctrine de la foy, ne des bonnes œuures: mais le iuge souuerain & le plus ancien Euesque, qui y presideront, maintiennent sous l'autorite de Christ la foy ancienne, & les bonnes œuures anciennes par les tesmoignages de la sainte Escriture. Sinon que quelque fois on peut bien disputer des affaires temporels & caduques, & lesquels on peut changer, & ce selon la necessite du temps: & toutefois on pourra bien faire aussi en autre tēps & lieu, que des Conciles, en tois les temples & aux escholles. Mais s'ils ordōnent quelque chose de nouveau en la doctrine de la foy, & touchant les bonnes œuures, qu'on sçache pour tout certain que le saint Esprit n'est point là: mais vn esprit malin y preside avec ses anges. Cōme Christ luy mesme dit, Qui n'est point avec moy, est contre moy. Le saint Esprit ne nous est point donné pour nous enseigner quelque chose hors Iesus Christ, mais pour nous enseigner toutes choses en Christ, auquel tous les thresors de sapien-

ce & de tous les myſteres ſont cachez.

Or donc tous ces Conciles qui determinent & ordonnent hors l'Eſcriture, ſont Conciles de Caiphe, de Herodes, & de Pilate, comme les Apoſtres diſent au quatrieſme des Actes. Herodes & Pilate ſe ſont aſſemblez contre le Seigneur & contre ſon Oinct. Et tous les Euangelistes recitent, que les ſouuerains Sacrificateurs & les Pharifiés ont aſſemblé leur ſynode, & pris conſeil & deliberation comment ils pourroyent mettre a mort Ieſus Chriſt, comme Dauid l'auoit predit auparauant, au Pſeume deuxieſme, qu'ils deuoyent conſulter contre Dieu & contre ſon Chriſt, qu'ils parleroyent des ſermons, des liens & laqs de Chriſt, leſquels ils voudroyent rompre, & deſquels ils ſe vouldroyent deſueloper. Or les Conciles du Pape pour la pluſpart ont eſte tels, qu'il ſ'eſt là preſenté comme vicair de Chriſt, & comme chef de l'Egliſe: & cependant il foule aux pieds la ſaincte Eſcriture, & la deſchire par pieces, cōme ſes Decrets le demōſtrent ouuertement: & de quelle rage obſtinee condamne-il l'vne des eſpeces de la Cene, pluſtoſt l'aneantit entiere-ment? luy qui au parauant auoit rompu les mariages, les auoit deſſendus & reprouuez, & meſme auoit derechef crucifié & enſeueli le Fils de Dieu.

On fait ſur ceci ceſte queſtion, & eſt la queſtion principale, & pour laquelle i'ay compoſé ce petit traité, Qu'eſt-ce donc que Concile? ou quel eſt ſon eſſect ou vtilite? Car ſ'il ne doit nullement forger de nouveaux articles de foy, tout le monde iuſques a ceſte heure a eſte deceu d'vne horrible façon: car la pluſpart des hōmes eſt perſuadee en tout ceci, que tout ce que le Concile ordōne, eſt article de foy, ou pour le moins que c'eſt vne œuvre neceſſaire pour obtenir le ſalut eternal: & tellement neceſſaire que qui ne garde point les determinations, decrets & ordonnances du Concile, il ne pourra iamais eſtre ſauué, veu qu'il contrarie au ſainct Eſprit qui eſt auteur des Conciles, & y

preside.

Or de ma part, ie prononce & afferme haut & clair sans blesier ma conscience, & sans encourir quelque mauuaise souspeçon & opinion d'erreur, que comme il a esté dit ci dessus, il n'y a aucun Concile qui ait puissance de forger nouueaux articles de foy, veu que ces quatre Conciles principaux n'ont rien fait de semblable. Je veux donc monstrer quelle est yci mon opinion, & respondre a la principale question en ceste façon.

1 Que le Concile n'a nulle puissance de forger ni ordonner aucuns nouueaux articles de foy, encore que le Sainct Esprit y fust present. Car le Concile des Apostres qui fut tenu en Ierusalem, n'a rien determine de nouueau en la doctrine de la foy, Actes 15. Mais il a conclu comme saint Pierre, que leurs peres ou predecesseurs auoyent aussi creu cest article : ascauoir, qu'il falloit que les hommes fussent sauuez sans la Loy & sans les œuvres; & le croyant doit estre sauué seulement par la grace de Iesus Christ.

2 Que le concile a puissance & doit exequuter ceci: ascauoir, de racler & condamner tous nouueaux articles de foy, & ce selon la sainte Escriture & la foy ancienne. Comme le Concile de Nicee reprouue & condamne le nouuel article d'Arrius, le Concile de Constantinoble, l'article de Macedonius, le Concile d'Ephese, l'article de Nestorius, & le Concile de Chalcedoine, l'article d'Eutiches.

3 Que le Concile n'a nulle puissance de commander de nouuelles bonnes œuvres, & ne le peut faire: car desia auparauant il y a vn catalogue ou denombrement des bones œuvres recité bien au long es saintes Escritures. Qui est l'homme qui pourroit forger ou excogiter en son esprit vne seule bonne œuvre, outre celles que le saint Esprit enseigne & nomme es saintes Escritures? Comme sont celles-ci, mansuetude, patience, humilite, misericorde, verite a garder sa Parolle,

Parolle, foy, paix, bõte, obeissance, discipline, chastete, liberalite, communication de plaisirs mutuels. Brief, la dilection comprend tous les deuoirs & offices, toutes les vertus vtils & necessaires a la vie commune. Y a-il homme (pour dire en vn mot) qui puisse excogiter vne seule bonne œuvre, qui ne soit commandee en ce seul mot de dilection ou charite? Que si ceste œuvre est hors de la dilection, quelle bonne œuvre pourra elle estre? veu mesme que selon saint Paul, la dilection est l'accomplissement de tous les commãdemens: comme Iesus Christ mesme le dit, Matthieu cinquiesme.

4 Que le Concile a Puissance, & doit necessairement donner ordre, qu'il reiette & condamne en general toutes les mauuaises œuvres repugnantes a la charite Chrestienne, selon l'autorite des saintes Escritures, & selon la coustume ancienne de l'Eglise de Dieu, & redargue a bon escient les personnes adonnees a pecher & abandõnees a ordures & infametez: comme le decret du Concile de Nicee reprend l'ambition & les autres vices des Euesques & des Diacres.

Or il faut en cest endroit parler des deux sortes de mauuaises œuvres. Il y en a aucunes qui sont manifestement mauuaises, comme batterie, meurtre, adultere, auarice, ambition, & autres telles œuvres. Nous trouuons que les Conciles ont condanné telles œuvres, comme aussi sans Conciles les saintes Escritures les ont condamnées, & sont punies par le droit ciuil.

Il y a d'autres nouuelles bonnes œuvres aussi, lesquelles on n'appelle point mauuaises, d'autant qu'elles monstrent vne grande apparence de saintete & de vraye religion. Et si on les appelle bonnes, c'est a tant comme si on disoit, Vices honnestes, Profanation sainte, le diable plus blanc que neige, ou Satan tresclair. Ces nouuelles mauuaises (ie di bonnes) œuvres forgees par les hypocrites & Pharisaïques cagots, ou plutost par saints demoniaques & enragez, doyuent estre condamnées & du tout reiettees & retranchees, iusques

au dernier bout . Car elles dressent des embusches a la doctrine salutaire de la foy, & sont en scandale a la vie Chrestienne, & deffigurent l'une & l'autre, & les rendent contemptibles.

Comme si quelque Chrestien ayant la conscience tẽdre,oyoit ou voyoit quelque saint hermite ou moine, lequel fut plus excellent que les autres en saintete de vie, en abstinence & grauite des mœurs, & en quelques façons particulieres, il est rui, en regardant vne façon qui est par dessus l'ancienne ou vulgaire forme de la religion Chrestienne : & pense que si on faisoit comparaisõ de la vie de tous les saints & fideles du temps passé avec la façon de ce saint nouice, ce ne seroit rien du tout, ou que la vie des saints auroit este profane, ou pour le moins ne seroit sans scandales. De là, ce retrait horrible d'abominations, est decoulé iusques a tous les bouts du monde, qu'on reiettera comme vne chose de nulle valeur vn homme Chrestien, soit citoyen & habitant de ville, ou paysant, qui toutefois en purete de foy s'appuyera sur le Fils de Dieu, & qui s'exercera en toute hõnestete & œuvres saintes & Chrestiennes, & lesquelles Dieu a ordonnees par sa Parolle, comme humilite, patience, mansuetude, obeissance, saintete, chastete, fidelite, & dilection enuers ses freres, diligence & sollicitude en sa vocation, deuoirs & offices appartenans a la societe commune. Car vne telle façon de viure est vraiment sainte & Chrestienne. Et nonobstant vn tel ne sera rien repute au pris de ce nouveau saint, qui sous son habit particulier, sous couuerture de ses iusnes & abstinences de certaines viandes, & de ses contenance bigottes & marmiteuses, & autres semblables nouuelles bones œuvres, nourrira en son cœur vne ambition, vn orgueil enflé, estant plein de cholere, d'impatience, d'enuie & rancune, & de concupiscences infames: & pour dire en brief, ce sera vn faux hypocrite. S. Paul appelle telles gens orgueilleux, & saints enforcez de leur ppre persuasio & opinion

opinion qu'ils ont d'eux-mesmes, qui choisissent selō leur fâtasie vne nouuelle façō de viure & particuliere, & se forgent des seruices nouueaux, lesquels Dieu n'a point ordonnez, & qui sont instituez outre l'ancienne & commune façō de viure, qui est la vraye, & outre les vrais seruices de l'Eglise catholique de Dieu, lesquels Dieu a instituez & ordonnez.

Il se peut biē faire qu'en ces nouuelles cœures scādaleuses il y a eu des esleus preservez : mais il a fallu qu'ils ayent osté ces nouuelles despouilles derechef, & qu'ils ayent este sauuez en la vieille peau Chrestienne. Comme il est aduenu a saint Antoine, quand il fut contraint de dire qu'un cordonnier d'Alexandrie surmontoit sa vie monachale en vraye religion ou exercices spirituels: comme aussi il cōfessoit, qu'il n'estoit point encore parueni iusques au but auquel le cordonnier estoit parueni. Semblablement ce grād personnage Iehan premier hermite, qui auoit predit des choses a venir a l'Empereur Theodose, lequel a este si grandement loué par saint Augustin, comme ainsi soit que plusieurs eussent en admiration sa façō de viure si austere, & entre autres saint Hierosme, ledit Iehan respondit, Que cherchez-vous d'excellent entre nous, veu que vos Eglises sont sans comparaison mieux ordonnees, auxquelles les exemples escripts des Prophetes & Apostres vous sont proposez. Cela a la verite est oster le froc, de s'assubiettir a la sainte Escriture, & louër ainsi vne façō moyenne de viure, laquelle tous fideles suyuent ordinairement. Item, Paphnutius apprint qu'il estoit semblable a vn iouëur d'instrumens, qui auoit tenu les chemins, & brigandé : item, a deux femmes mariees, qui auoyent dormi ceste nuit-la avec leurs maris : en sorte que finalement il fut cōtraint de dire, qu'il n'y auoit façō de viure. ou estat, ou condition qu'on deuit mespriser. Semblablement S. Bernard, Bonauenture & plusieurs autres bons personnages ont este amenez iusques a ce

point, que finalement ils ont experimenté, que leur saintete nouvellement forgee, & leur vie monachale ne pouuoient nullement estre opposez au peché, & au iugement horrible de Dieu, & a la mort. Ils ont confessé franchement leur faute : & ont esté sauuez en la foy ancienne des Chrestiens, sans ceste saintete superstitieuse & forgee de nouveau, comme les parolles de S. Bernard en rendēt bon tesmoignage en plusieurs passages.

On ne trouuera point que telles nouuelles bonnes œuvres ayent esté condamnées es Conciles, & principalement en ces quatre Conciles generaux, excepté vn ou deux petits Conciles, cōme a esté celuy de Gāgres, auquel il y auoit seulement vingt Euesques. Là il y eut quelque bōne chose & proufitable. Mais beaucoup plustost ils ont souffert que ceste nouuelle saintete print accroissement, iusques a ce qu'a grand peine pouuoit-on plus cognoistre l'Eglise catholique de Dieu, ou discerner. Et ces iardiniers paresseux ont enduré que les rameaux de ceste iustice ayent multiplié outre mesure: en sorte que la vraye racine a cependant esté endommagée, & est venue iusques a mourir & perir. Tant y a que du temps de saint Antoine, la moynerie n'auoit pris si grandes racines. Durant ce quatriesme Concile de Chalcedoine, il y auoit vn abbaye assez pres de Constantinoble de laquelle Eutyches tāt de fois nommé estoit abbe. Toutefois il n'y auoit pas si grande magnificence & sumptuosite de bastimens, comme il y a aujourd'huy es monasteres, & n'y auoit point de telles fondations comme il y a aujourd'huy. Car il y auoit de petites logettes faites de clayes tiffues de rameaux & feuillages de buissō, cōme maisonnettes pour garder les troupeaux des bestes. Eutyches comme souuerain Euesque viuoit avec les siens dedās ces petites cahuettes, separé de la frequentation des hommes. Par cela on peut cognoistre, quels estoient les conuents de moynes en ce temps-la, veu qu'il n'y auoit

auoit point encore de conuents enfermez de murailles, ou enclos & enuironnez de forterefles.

Mais ne plus ne moins q̄ cela se fait es iardins, que les branches inutiles s'auanceront plustost & prendrôt plus grand accroissement que les rameaux naturels & fertiles, il en aduient autant au iardin de l'Eglise, quād ces petits saincts bourionnent a costé de la racine, & toutefois ils veulēt haut monter comme vrais Chrestiens, & se refaire du noble suc de cest arbre. Et qui plus est, ils se promettēt qu'ils veulēt attraire plus de suc de la foy & vie Chrestienne, q̄ les vrais rameaux & anciē.

Et pource que ceci vient a propos, il faut aussi mōstrer ceci comme en passant, ce que i'ay noté de la lecture des histoires. Sainct Bernard a este abbe trente six ans entiers, & durant ce peu de tēps il a fondé 160. monasteres de son ordre. On scait quels freres ont este les moynes de Cisteaux. Combiē qu'en ce temps-la leur reuenu fut bien petit, toutefois on voit au iourd'huy comment ces monasteres peuuent estre biē comparez a de grandes duche. Je passeray encore plus-outre. Lors du temps des Empereurs Henri troisiēme, quatriēme & cinquiēme, en moins de vingt ans se sont leuez quatre ordres de moynes semblables a duche: ascauoir, l'ordre de Grandmont, les Chanoines reguliers reformez, les Chartreux, & l'ordre de Cisteaux. Quelle longue suite ou continuation on pourroit reciter, si on vouloit faire vn recueil des ordres & monasteres, qui ont este fondez durāt ces 400. ans iusques a nostre temps? Certainement on pourroit dire, que le ciel a pleu & pissē tant de millions de moynes. Et il ne se faudroit point esbahir, s'il n'y auoit point de ville ou village ou bourgade de reste, ou il n'y auroit vn monastere ou deux.

Qu'on lise les histoires, on trouuera qu'une aspre censure est faite a l'Empereur Valentinien, de ce qu'il a mené des moynes en guerre pour s'en seruir. Mais qu'on ne pense pas qu'il eut fait cela sans bon conseil,

439
DES CONCILIES
d'autant que ceste troupe oisue & inutile estoit creüe
infiniment. Comme de fait on lit d'aucuns rois de
France, qu'ils firent publier vne ordonnance, que nul
deormais ne se rendit moyne : & principalement on
marquoit les esclaves par cest edict, d'autant que sous
ombre du froc ils cerchoient la liberte. Apres qu'un
chacun auoit fait quelque meschancete, sa franchise
estoit de se faire moyne.

Le monde veut estre deceu. Quand l'oïseleur tend
aux oiseaux, il faut qu'il mette vn chathuant sur quel-
que branche : & lors il vient a bout de son attente. Au-
tant en fait le diable, quand il veut deceuoir ou enfor-
celer les esprits fideles, il se vest d'un froc, & refrögne
sa face. Le sot populaire est beaucoup plus esbahi alors
de voir telles pippees & tels hiboux, q̃ de la vraye pas-
sion, du sang, des playes, de la mort & resurrection,
lesquelles toutes choses nous oyons & voyons que Ie-
sus Christ a endurees pour nos offenses. Ainsi les
hommes se jettent par troupes sans consideration, de-
puis qu'ils se sont vne fois destournez de la foy pour
venir a ceste nouuelle saintete, qui est proprement
vn rets ou vne pippee du diable. Car ils ont vn desir
particulier, qui les pousse a affecter des nouueautez,
La mort & la resurrection de Iesus Christ, la foy &
la dilection leur sont tellement hors d'usage, qu'il
n'y a personne qui ne se puisse vanter d'auoir vne co-
gnoissance excellente & parfaite de choses si gran-
des & hautes. Parquoy toutes ces choses ne sont plus
rien : mais il faut que nous ayons des inventeurs nou-
ueaux de toutes sortes de folles absurditez, comme
sainct Paul dit. Et cela aduient a bon droit, veu que
nous auons les oreilles si chatouilleuses, que nous
ne pouons plus souffrir la verite ancienne & entie-
re : seulement nous taschons a amasser de tous costez,
ou a nous charger d'une pesanteur infinie de doctri-
nes nouuelles, comme cela a este vsué de tous temps,
& l'est, & le fera. Car les Conciles subsequens, & prin-
cipalement

ciatement ceux des Papes (comme de fait il est bien certain qu'après ces temps-la il y a eu plusieurs Conciles des Papes) non seulement n'ont reprouvé ne condamné telles bonnes œuvres, mais aussi les ont estendues au long & au large par tous les lieux & bouts du monde, & les ont exaltées par dessus les anciennes bonnes œuvres: comme le Pape a canonisé plusieurs chanoines, ou de l'ordre des moynes il en a esleué plusieurs aux plus hauts degrez des dignitez.

Du commencement l'estat monachal auoit vne fort belle apparence: mais la fin demonstre vne face d'un monstre horrible, veu que ces abus croissent sans mesure & sans fin, & les superstitions s'augmentent de iour en iour. Comme il y auoit vn fort beau commencement en la reigle de saint François, & selon le regard exterieur tout reluisoit en cest ordre. Mais par l'audace & impudence de plusieurs la chose est venue iusques a ce poinct, que mesme les corps morts seront reuestus du saint habit de l'ordre, comme si vn tel habit ou froc meritoit salut au poure trespasé. N'a-on point horreur d'ouir dire cela? Voyla comment il en aduient, quand vne fois l'esprit commence a se destourner du Fils de Dieu, & continue a tomber, & puis apres ne peut cesser. Qu'est-il aduenue de nostre temps a Belgic? Dame Marguerite ordonna qu'elle fut habillée en nonnain apres sa mort. Ce qui fut fait. On la vestit d'un habit de moynesse: on la mit a table, ou il y auoit force viandes delicates & vins precieux: aussi il y auoit des eschâfons & escuyers pour la seruir, comme si on eut eu a seruir vn duc ou vn Roy. C'estoit-la vrayement vne œuvre meritant la remission des pechez: là elle se repentoit de ses pechez, & tenoit mine de nonnain. Et quand on eut ioué ceste belle farce par l'espace de quelques iours, l'Empereur Charles cinquiesme en fut aduertí, & fit estroit commandement qu'on ne fit plus cela. Et si l'autorité d'un si grand Prince ne se fut opposée a vn tel ba-

dinage, il ne faut point douter qu'un tel exéple n'eut eu cours iusques a tous les bouts & parties de la terre. Voyla quelles fins & issues il faudra necessairement que ceste nouuelle sainteté ait, laquelle pense que tout ce qu'elle a cōtrouué, est diuin, auprès de la vraye & ancienne Chrestiente, qui n'estoit point fardee. La vraye Chrestiente non fardee ne refuse pas ainsi, mais elle demeure tousiours semblable a foy-mesme, & s'exerce assiduelement en la foy, en dilection, humilite, discipline, patience & vraye obeissance, & autres telles vertus: en sorte qu'on n'y voit point des choses mōstrueuses, ains seulement des exemples plaisans, gracieux, doux, paisibles & proufitables, que Dieu & les hommes puissent approuuer. Mais ceste saintete nouuelle & ceremonieuse bruit & tempeste d'une terrible façon, elle ha de farouches contenances, par lesquelles les hommes inconstans sont bien tost attirez: & mettēt en auant des choses grandes, & non-obstant ce n'est rien a la verite, comme saint Pierre aussi en rend tesmoignage.

Gerson escrit ainsi des Chartreux, qu'ils sont fort bien & saintement, quand ils gardent la reigle de leur ordre si estroittemēt, ne mangeās point de chair, voire quand il faudroit mourir. Or si quelque scauant & fidele medecin bailloit ce conseil, que le malade pourroit estre remis en quelque bonne santé, s'il humoit quelque bouillon ou brouet de chapon ou de poule, ou s'il mangeoit quelque morceau de chair, & que son corps debilité & languissant ne pourroit estre autrement restitué en vigueur: toutesfois il n'y auroit pas vn seul qui obtemperast au medecin, mais le malade mourroit plustost.

En ce cas-la, le conseil de saint Augustin me plaît fort, qui dit en son Canon, qu'on doit demander conseil aux medecins. Et dit d'auantage: que tous n'ont point vne mesme force. Il ne faut dōc poit traitter tous hommes d'une mesme façon. Certainement voyla v-

ne belle equite & moderation: & elle n'oblige point les hommes a vne seruitude perpetuelle de cest ordre. Car du commencement ce monastere n'estoit point vne prison ou bourellerie d'hommes:mais c'estoit comme vne societe familiere,ou come vn college de quel que petit nombre de prestres.

Staupice m'a recité quelquesfois, qu'il auoit ouy tenir ces propos a vn Euesque de Vuormes, qui estoit de Dalburg. Si saint Augustin n'eut escrit autre chose que ceste reigle,toutefois il faudroit qu'un chacun confessast, que ç'a este vn homme d'une grande prudence. Et cela est vray:pource qu'il auoit extremement reprouué & condamné les chartreux comme meurtriers, & leur ordre comme vne societe de larrons, & leurs monasteres comme cauernes de brigans,comme la verite est telle aussi.

Et moy, ie peux dire cela, que i'ay veu au conuent des chartreux d'Erford vn moyne malade qui alloit avec vn baston, & estoit encore ieune. Il luy demanday, si les autres ne luy donnoient point quelque relasche par compassion, & s'il n'auoit point quelque loisir pour se reposer. Il me respondit d'une voix pitteuse & lamentable que non:mais il falloit qu'il continuast tousiours.

Mais souuenons-nous,que nous sommes a bon droit punis de nostre obstination & mespris. Le Pere celeste,vray Dieu viuant & eternal nous a enuoyé son Fils nostre Seigneur Iesus Christ pour nous instruire & sauuer. Et non point seulement cela, mais s'abaissant du haut throne de sa maieste eternelle, parle a haute voix & claire a tout le genre humain, Escoutez mon Fils. Nous-nous deuions avec les Apostres en cest endroit ietter bas contre terre deuant toute la Diuinite, & si attentiuement ouyr la voix de Dieu parlât a nous, comme s'il n'y auoit autre voix sortant de la bouche d'aucune creature. Et nous comme gens bien asseurez & sans souci, laissons esuanouyr en l'air ces oracles

celestes du Dieu viuant & eternal, le Pere, le Fils & le saint Esprit, comme des sons inutiles, & d'une outre-cuidance particuliere nous exaltons magnifiquement les ordonnances & traditions humaines, & les songes des moynes. Finalement, nous voyons aduenir ce qui est dit au Pseau. 62, Mon peuple n'oit point ma voix: ie les ay donc abandonnez aux desirs de leur chair.

C'est ci la source & la premiere origine de toutes ces belles philosophies & vaines deceptions, qui sont selon les ordonnances & traditions des hommes, selon les constitutions du monde, comme saint Paul en parle Coloss. 2. Voyla ceste belle cruauté, par laquelle nous tuons nos corps, & de nous-mesmes faisons violence a nos propres personnes. Et toutefois Dieu a ordonné que nous honorassions nos corps, & que nous ne soyons point meurtriers de nous-mesmes. Si selon le conseil & la reigle de S. Augustin, & la doctrine de S. Paul mesme on eut permis aux medecins de gouverner & procurer la guerison des prestres & moynes, & principalement des femmes nonnains: ne pensons-nous pas que plusieurs saints & bons personnages eussent este preseruez, qui sont morts ou de rage, ou d'ellourdissement d'esprit, ou de ptysie, & qui ont este miserablement peu a peu consumez? Comme l'experience ordinaire le demonstre assez. Mais c'estoit lors le temps d'ire & d'indignation: & falloit que ce temps-la fut gouverné par ceste belle saintete nouvelle & furieuse: afin que tous eussent deuant les yeux vn exemple de la punition du monde.

5 Que le Concile n'a aucune puissance d'imposer aucunes observations ou ceremonies aux Chrestiens & fideles sous obligatiō de peché mortel & de mettre les consciences en danger: comme sont les iusnes, les iours de feste, la difference des viandes, ou nouvelle façon d'habillemens. Si les Peres du Concile font cela, voyci que nous leur deuons tout incontinent opposer: acauoir, le tesmoignage clair de S. Augustin, escri-

uant

uant a Ianuarius, quand il dit, Ceste maniere de gens a des obseruations a sa poste:& Iesus Christ nous a donné bien peu de ceremonies. Car veu qu'il ne leur est licite de faire ordonnance de telles choses, aussi est-il en nostre liberte de les omettre. Et qui plus est, nous auons le tesmoignage euident de saint Paul Coloss. 2, Là il deffend d'observer les traditions humaines, disant, Que nul ne vous iuge au manger ou au boire, ou en partie du iour de feste.

6 Le Concile a puissance, & doit procurer que ce grand amas de traditions soit aboli, & du tout arraché du milieu des fideles selon la reigle de l'Escripture sainte: car c'est vne chose bien certaine, qu'elles sont pleines d'impiete, & donnent occasion & ouuerture a nouuelles idolatries, & nouueaux seruices, qui ne sont ordonnez de Dieu, ains expressement deffendus.

7 Le Concile n'a point puissance de se mesler avec les royaumes & gouuernemens politiques. Car S. Paul dit ouuertement que qui veut seruir Dieu au fait de la guerre spirituelle, il se doit deporter des affaires mondains ou politiques.

8 Le Concile a puissance, & doit donner ordre, que telles obseruations & ceremonies soyent reiettees & du tout reprouuees, & ce par l'autorite des saintes Escriptures, & selon la reigle d'icelles: & ietter au feu & brusler tout ce gros bobulaire des Decretales du Pape.

9 Le Concile n'a point puissance de faire tels statuts ou decrets, qui ne tendent a autre chose qu'a vne tyrannie barbare & cruaute inique: c'est a dire, lesquels de fait ottroyent aux Euesques vne puissance royale d'instituer tout ce que bon leur semble. Comme si tout le monde se deuoit arrester ou trembler aussi tost qu'ils auront fait quelque signe du bras ou de la teste. Mais il a puissance de reietter toutes ces choses, & le doit faire aussi selon la reigle de l'Escripture sainte, 1. Pet. 3, Ne dominez point sur le peuple.

10 Le Concile a puissance d'instituer aucunes ce-

remonies & obseruations: mais voyci la difference qu'il doit garder. En premier lieu, que telles ceremonies ne soyent point pour excuser ou couvrir la cruauté inique des Euesques, ou pour la confermer ou autorizer. Secondement, que les ceremonies & obseruations soyent nécessaires & vtils pour entretenir vn bon ordre & vne sainte discipline au gouuernement de l'Eglise. Car il est nécessaire qu'il y ait quelques iours, & qu'ils y ait certains lieux, ou les assemblees se facent pour y entretenir le ministere public. Dauantage, il faut qu'il y ait desheures certaines deputees pour les prediciōs ordinaires, pour administrer les Sacrements, pour faire oraisons cōmunes, pour chanter louanges a Dieu, & pour luy rendre action de graces. Cōme S. Paul dit 1. Corinth. 4, Que toutes choses se facēt par bon ordre & conuenablement. Or ces tesmoignages ne seruent point a establir la tyrannie des Euesques: mais seulement ils regardent a la necessite commune, a l'vtilite des auditeurs, & a conseruer & maintenir vn bon ordre en l'Eglise. Brief, il faut nécessairement que nous retenions ces parties, desquelles nous ne nous pouuons nullement passer, voire si quelque Eglise doit demeurer de reste.

Toutefois quand pour quelques causes vrgentes & nécessaires, pour les maladies & autres empeschemens qui pourront aduenir, ces choses ne pourroyent estre quelquefois obseruees: alors elles n'obligēt point sous peine de peché mortel: car cela se fait pour son proufit, & non point pour faire plaisir à l'Euesque. S'il est Chrestien, il ne souffrira point qu'aucun dommage luy aduiēne de cela. Dequoy s'en soucie Dieu, mesme quand qu'elqu'un ne souhaittera ou ne desirera estre en ceste compagnie? Vn chascun sera contraint de rendre conte pour soy. Et pour dire en brief, celuy qui est Chrestien, n'endurera pas qu'on mette de tels liens en sa conscience: il fait plus volontiers ces choses qu'il ne les omet: pour le moins n'est il point empesché ou destourné,

destourné, s'il peut faire cela. Parquoy nulle loy ne luy peut estre donnee ne limitee. Et qui plus est, s'il le pouoit faire, il est certain qu'il voudroit faire plus que ceste loy ne requerroit. Mais celuy qui mesprise ces choses hieremēt & obstineemēt, doit estre là laissé pour tel qu'il est. Car vn tel osera bien aussi mespriser des loix plus hautes, soyent Diuines ou humaines.

On pourroit toutefois faire ceste obiection, Que deuiendront finalement les Cōciles, si on les veut entierement retrencher? Si ceste condition est receuë, vn chacun curé ou pedagogue (ie laisse a parler des peres & meres) aura beaucoup plus de puissance ou autorite sur ceux qui luy sont baillez en charge, que le Concile n'aura sur l'Eglise.

Or ie respon ainsi, Penseroit-on bien que la charge & office d'vn curé ou d'vn principal de college fut si petite, ou si estroittement serree, qu'on n'en puisse en quelque sorte faire comparaison avec les Conciles? S'il n'y auoit nuls curez ou Euesques, comment pourroit-on tenir des Conciles ou Sinodes? S'il n'y auoit point d'escholles ou colleges, ou est-ce qu'on pourroit entretenir & instruire des personnes propres ou idoines pour le gouuernement de l'Eglise? Je parle de tels maistres d'escolle, qui non seulement instruisent les enfans es arts ou sciences liberales, mais aussi les enseignent en la foy & doctrine Chrestienne, & font leur deuoir en cela, & de grand desir les ameinent a la connoissance de Dieu. I'en di autant des curez ou pasteurs qui enseignent purement & fidelement la doctrine celeste.

Car ie pourroye bien facilement prouuer ceci, que ce poure pasteur d'Hippon S. Augustin, a plus enseigné, & fait plus grand proufit, que tous les Cōciles: encore que cependant ie ne dise mot des tressaincts Euesques de Rome, lesquels sont a bon droit redoutables.

Ie passeray encore plus outre, Le Catechisme ou le formulaire qui est pour instruire les petits enfans a dō

né plus grande lumiere a la doctrine Chrestienne, que tous les Conciles. Outreplus l'oraison Dominicale & les dix Commandemens contiennent plus de doctrine & d'erudition que tous les Conciles. Finalement nō seulement ils n'enseignēt point, mais aussi ils deffendēt, qu'on n'introduise rien de nouveau en l'Eglise, q soit opposite & contraire a la doctrine vſitee & ancienne.

O bon Dieu, comment les Papistes seront dispos & aigus a recueillir ces parolles, & a les debattre aigrement, & a y contredire : & cependant ils voudront de leur propre gre fermer les yeux a mes raisons graues & d'importance, lesquelles m'ont fait ainsi parler de toute ceste matiere. Car ils sont assez gens de bien de ne rien mettre en auant que des calomnies, & purs mē songes, qui meritēt biē que tous les ayent en horreur. Mais ie ne seray pas grāde req̃ste a Dieu qu'il me pardōne telles offēses: ains pource q̃ ie ne peux me tenir de dire telles iniures, ie leur dōne cōgé aussi de calōnier & mētir autāt q̃ bō leur ſēblera. Dieu en fera le iuge.

Mais toy & moy, disputons vn peu de la matiere. Que peut faire le Cōcile? ou quelle est ſō œuvre principale? ou bien quels sont ses effēcts? Eſcoute les parolles des Conciles, Nous anathematizons, nous excommunions. C'est-ci le titre de ce bel office qu'ils tiennēt. Mais encore, ils parlent encore plus bas : & ne diſent point, Nous anathematizons, ains, l'Eglise anathematize. Ie ne me ſoucieroye pas beaucoup de la sentence du Concile touchant la condamnation: mais la tempeſte & la foudre de l'Eglise eſleuē de Dieu m'auroit en vn moment du tout brisé, a cause de celuy qui dit, Ie ſuis avec vous iusques a la fin du monde. Il n'y a creature qui puiſſe ſouſtenir l'execration ou maudifſō de ceſt homme, non pas meſme les Anges.

Neantmoins pource que les Conciles alleguēt l'autorite de la ſaincte & catholique Eglise de Dieu, cōme vn iuge ſouuerain, ils proteſtent qu'ils n'entreprēnent point l'autorite de iuger a leur fantalie: mais que
c'eſt

c'est a l'Eglise d'en iuger, laquelle interprete, croit & cōfesse la sainte Escriture, cōme nous orrōs ci apres. Ne plus ne moins qu'un larron ou brigād seroit assez assēuré enuers le iuge, quāt a sa personne: mais les loix & tout le biē public de toute la prouince se ioignēt ensemble pour former pces deuāt le iuge, cōme deuāt l'exécuteur des ordōnāces & administrateur de iustice, Celui qui est coupable de brigandage ou de larrecin, est cōtraint de craindre ces deux choses cōiointes ensemble.

Le Cōcile donc n'est autre chose qu'un consistoire, public, qu'un plaidoyer de chābre, vn parlemēt, ou autre assemblée de gens, en laquelle les iuges pronōcent les sentēces, apres auoir ouy les deux parties: mais c'est avec telle modestie & humilite, qu'ils disent qu'ils fōt cela pour conseruer la iustice. Comme fils disoyent, Nostre office est d'anathematizer, ou excommunier, c'est a dire, de condāner & réietter du tout: tāt y a que ce n'est pas selon nostre fantasie, ou selō quelque droit forgé de nouueau: mais selon le droit ancien, qui est iugé par tout l'empire estre conuenable & accordant aux loix Diuines & humaines. Ainsi aussi les Peres du Cōcile peuuent condamner vn heretique, non pas selon qu'il leur semble estre iuste: mais comme les loix imperiales prononcent estre iuste: c'est a dire, la sainte Escriture, ce qu'eux-mesmes confessent: laquelle est le droit escrit de l'Eglise vniuerselle de Dieu. On doit craindre vn tel iuge, vn tel regne, vn tel droit, cōme on doit craindre la peine d'enfer, & les horreurs de la dānatiō eternelle. Car ce que nous appellōs yci ou droit ou autorite, c'est ceste reigle immuable & eternellement ferme de la parolle de Dieu. Le regne c'est l'Eglise esleuē du Fils de Dieu. Le iuge ou le gouuerneur est celui qui gouuerne le regne & la Parolle.

Or le Concile n'est pas seul vn tel iuge & exequuteur ou administrateur de droit, & gouuerneur de ce regne: mais aussi on peut bien ainsi appeller chacun pasteur ou maistre d'escholle. Outreplus le Concile ne

peut pas retenir perpetuellemēt ou cōtinuellemēt ceste exequution. Car les Euesques ne peuuent pas estre perpetuellemēt assemblez ensēble:plustost il faut qu'il y ait certain tēps deputé pour les assembler, veu qu'il faut qu'il y en ait aucūs q̄ soyēt anathematizez ou ex-cōmuniciez. Cōme quād quelque Arrius d'Alexādie veut estre eminēt par dessus sō diocelin ou Euesque,& attirer a soy le peuple ignorāt de toute ceste puince,& veut mesler a ces affaires des pasteurs estrāges ou d'autres hōmes, afin q̄ le pasteur d'Alexādie succōbe finalement,& qu'il ne puisse plus deffendre & maintenir sō office iudicial:c'est a dire, la vraye foy Chrestienne. En ce cas-la ou en tel tēps, les autres pasteurs & autres Euesques y doyuēt accourir de toute leur affectiō & de tout leur effort pour bailler secours au pasteur d'Alexādie, deffēdre la vraye foy cōtre Arrius,& cōdāner Arrius, maintenir les autres a celle fin q̄ ceste cōfusion ne croisse infinimēt: & si les pasteurs ou Euesques ne se peuuent assembler de diuers lieux, alors ce bon Empereur Constantin doit aussi par son autorite aider vne telle assemblee. Cōme quād vn feu s'est pris soudainement en vn lieu, si le pere de famille ne le peut pas soudainement esteindre, tous les voisins doyuēt là accourir viste de leur bon gre, a ce que le feu soit finalement esteint. Et s'ils n'y accourent volontairement, le magistrat doit commander qu'ils y viennent par force, & taschent d'anathematizer l'impetuositē du feu, ou la reprimer, de peur que le feu ne consume aussi les bastimens & maisons prochaines.

En ceste sorte le Concile est alors ce grand maistre d'escholle, ou ce grand iuge en vn tel royaume & en vne telle loy. Mais quand il n'y a plus de necessite, il a desia fait ce qu'il deuoit. Cōme au gouuernemēt politique, il faut q̄ les magistrats souuerains ou princes soyēt les exequiteurs, quād l'autorite des iuges ou gouuerneurs inferieurs ne suffit pas pour reprimer l'insolēce orgueilleuse des hōmes meschās, iusqu'a ce qu'on soit venu

venu finalement a ce souuerain degre, a scauoir aux iournees imperiales, lesquelles aussi ne peuuent estre perpetuelles. Mais quand on despesche les affaires, on les espard puis apres: & derechef on commet les causes aux iuges inferieurs. Mais il aduient ordinairement aux iournees imperiales, que quelquefois on y fait des loix nouuelles, ou plusieurs loix, on change & corrige-on les anciennes, ou on les abolit du tout. Et il ne se peut faire, que d'une mesme loy & ordonnance & en tous temps on prononce sentence sur les affaires & matieres. Car il y a vn gouuernement politique ordonnant des choses ciuiles ou temporelles, lesquelles on change selon le temps. Parquoy il faut necessairement que les loix soyent changees, lesquelles ont este faites pour les choses muables. Car quand les choses pour lesquelles la loy a este faicte du commencement, cessent, aussi l'exequution de la loy cesse.

Exemple, La ville de Rome n'est plus en cest estat & dignite, ou elle estoit auparauant. Les droits d'oc & les priuileges qui ont este consermez & establis pour ceste ville la, sont peris ensemble, ou abolis avec ceste republique, & n'obligent plus: car ceci est bien vray. q̃ si la chose est muable le droit aussi d'icelle est muable.

Mais voyci comment la chose va en ce royaume de l'Eglise, La parolle de Dieu demeure eternellement. Il faut iuger selon ceste parolle: il ne faut point audacieusement forger d'autres parolles ou nouuelles: il ne faut point dresser d'autres articles de foy ou nouueaux. Il y a donc des pasteurs & maistres d'escholle inferieurs: mais cependant ils demeurent tousiours, & sont ordinaires, & sont iuges perpetuels, lesquels sans cesse anathematisent le diable, & repriment assiduelement ses fureurs, & d'un grand courage. Le Concile comme souuerain iuge est contraint de reformer ou du tout faire mourir les vieux abuseurs: mais il ne peut pas derechef entretenir d'autres. Les pasteurs & precepteurs travaillent seulement a reprimer la folie, de la ieunesse &

bien souuent ils entretiennent d'vns & d'autres qui soyent pour gouverner & les Eglises & les Conciles au temps a venir, quand il y aura necessite. Le Concile coupe les plus grâdes & longues branches des arbres, ou arrache iusques a la racine les rameaux bastards & sauages. Mais les pasteurs & maistres d'escholle prouignent & entretiennent les petits arbrisseaux tendres, & les plantes odoriferantes, qui sont les ornemens de ce iardin de plaissence. O combien est heureuse, excellente, hōneste & sainte ceste façon de viure, de laquelle ceux-ci vivent! Ils sont les ioyaux precieux, & le thresor magnifique de l'Eglise: car ils conseruēt & gardent l'Eglise. Ainsi donc tous les gouverneurs deuoyēt d'vn grād desir s'appliquer a cela, que les Eglises & escholles fussent bien ordonnees. Car encore que cela ne peust estre nullement obtenu, que les Conciles fussent tenus, si est-ce que les paroisses ou cures & les escholles doyēt estre reputees pour perpetuels & bien necessaires aides des Conciles, encore qu'ils soyent petits.

On scait par les histoires des anciens de quel soing, de quelle benignite de quel desir & affectiō paternelle les Empereurs anciens ont aimé les Eglises & les escholles: & de quelle liberalite ils ont vſé pour entretenir les reuenus d'icelles. Car pour monstrier ouuertement, que du cōmencement les Eueschez estoyēt des escholles, ces mots anciens le tesmoignēt assez, Preuost, Doyē, Schollastique, Chantre, Chanoine, Vicaire, Gardien. Mais pourquoy est-ce que toutes ces choses sont abbatardies? A la miēne volōte qu'ils feissent encore quelque chose de semblable. Il est bien certain qu'ils retien droyēt leur magnificēce, & leurs dignitez, & demeureroient en leurs posselliōs, ils seroyēt princes & grās seigneurs: pour le moins ils remettroyēt au dessus aucunes leçons, & contraindroyēt les Chanoines, les Vicaires & Choriens d'ouyr pour le moins vne leçon le iour pour leur dōner interpretation des saintes Escritures: afin qu'en quelque sorte les Eueschez pour le mois fussent derechef semblables a des escholles: & selō que la

nécessite le requerroit, qu'on eut promptement des pasteurs & Euesques qui fussent pour aider aux gouuernemens des Eglises selō leur faculte. Bon Dieu q̄l proufit seroyēt ceux-ci a l'Eglise! quel biē ils apporteroyēt a la poure Eglise, s'ils faisoient cela! q̄l repos ils donneroient aux cōsciēces des affligez! Et il ne faut point douter, q̄ Dieu ne les recōpensast abondamment d'une telle pieté: il leur doneroit de plus grādes richesses, plus grāde dignité, puissāce & gloire. Pour le moins s'ils amendoient ou corrigeoyent ceste vie si vilaine & plus que brutale & barbare. Mais nos cōplaintes & gemissemens ne sont que des sōs friuoles & inutiles: car estās plōgez dedās vn profond boubier de voluptez, ils ne voyent nō plus que s'ils auoyēt les yeux creuez, ils noient nō plus q̄ s'ils n'auoyēt nulles oreilles: ils souffrēt q̄ les Eglises soyēt demolies, & q̄ le poure peuple viue sans la parole de Dieu en toute villenie & d'une façō brutale. Cōbiē de fois ay-ie ouy dire a plusieurs gēs dignes de foy, qu'en plusieurs Eueschez il y auoit bien deux cēs, ou trois cens, ou quatre cēs Eglises demeurees desertes. N'est-ce pas la vn spectacle miserable, horrible, & triste? A la verite c'est vne chose fort estrāge de voir telles profanatiōs entre ceux qui veulent estre reputez Chrestiens, voire faizus professiō de l'Euangile. Nostre bon Dieu q̄ est le vray Dieu, vnique & eternal, nō face misericorde: qu'il soit assis pour iuger, & veuille par sa grace ouyr nos piteux gemissemens & souspirs. Amē.

Or pour faire vne fois fin a ceste dispute des Cōciles, ie pēse biē qu'on peut facilement cognoistre par ce q̄ i'ay recité, que ce'st q̄ Cōcile, puis apres quel est son vray & principal office, quelle exequutiō il ha, quelle est son autorite: qui sōt les vrais ou faux Cōciles. ascauoir, que cōtre les nouueaux articles de foy ils doyuēt maintenir la vraye foy, q̄ a este en l'Eglise depuis le cōmencement, & faire leur cōfessiō d'un cœur cōstāt & d'une façō alaigre. Ils ne doyuēt forger aucuns nouueaux articles de foy cōtre les Symboles anciēns de la premie-

re Eglise, ne decreter. Outreplus ils ne doyuēt controuuer aucunes nouuelles bōnes œuures, contre les bonnes œuures anciēnes: mais deffēdre les anciēnes bōnes œuures cōtre celles q̄ sont nouuellemēt inuētees. Et de fait quelle sera la foy, tels seront les fruićts de la foy, ou les bonnes œuures. Sinō q̄ ces deux Cōciles n'ont peu ietter les yeux sur ceste consequēce: autrement ils eussent condāné Eutyches non seulement en la cause de la foy, ce qu'ils ont fait d'un grand zele: mais aussi a cause de son hypocrisie monachale: ce qu'ils n'ont pas fait. En quoy ils ont suffisamment monstré qu'ils n'estoyent gueres bons dialecticiens, veu que combien qu'ils ayent accordé l'antecedent, nonobstant ils n'ont point accordé la consequence, C'est vn vice ou vne faute cōmune a tous hommes, en ce mēme erreur des bonnes œuures, lequel Nestorius & Eutiches ont eu en la foy.

Cela est autant comme si ie disoye, En la matiere de la foy, Dieu non seulement veut que nous soyons enfans, mais aussi nous reputer pour fols en la dialectique, & cōme Nestoriēs ou Eutychiques, afin que nous soyons aucunemēt plus abbatus. Car combien que Nestorius & Eutyches se soyent villainement abusez, & ayent este condamnez: touttefois leur sottē & friuole dialectique est demeuree au monde, cōme aussi elle y a tousiours demeuré depuis le cōmencement. C'est que on reçoit l'antecedēt, & on laisse la consequence. Mais quel besoing est-il de plus longues parolles? Quand les decrets & ordonnances de tous les Conciles pourroyent estre iettees ou versees dedans ton corps par vn entonnoir, si est-ce que tu ne serois pas Chrestien pour cela: car telles choses ne seruent pas de beaucoup. Encore que tu eusses de grans mōceaux de peres entassez en quelque lieu, si est-ce que tu ne receuras d'eux ce qui seroit besoing. Il te faut auoir recours a la saīcte Esriture, laquelle est ouuerte & claire, & explique amplement tous les poinćts de la doctrine Chrestienne. Ou biē il faut que tu retournes aux premiers principes qui
sont

sont contenus au Catechisme, auquel il y a voirement quelque briefuete, touteffois les choses grandes comprises en ceste briefuete surmontent tous les Conciles ou Peres, de quelque temps qu'ils soyent.

Finalemēt le Concile doit tascher, & tēdre du tout a ce but, q̄ la cause de la foy ne soit réuersee. Car vne chātune ville ou village peut anathematizer & detester les mauuaises œuures q̄ sont notoires & manifestes, & ce par les magistrats ou pasteurs & parens, & maintenir les autres qui viuent bien. A ceci aussi appartient les fausles œuures, lesquelles ont tiltre & apparence de bonnes œuures, comme celles qui falsifient & corrompent la doctrine de la vraye foy.

Ainsi donc quand l'authorite des pasteurs ne suffit pas on doit aussi proposer ces choses au Concile. Mais cōme on a veu ci dessus, les Conciles passez ne se sont pas beaucoup souciez de debattre ces choses a bon esciant, excepté vn ou deux, comme celuy de Gangres, duquel nous auons ci dessus fait mention. D'auantage des assemblees Synodales on deuoit renuoyer les ceremonies aux Eglises fideles, ou plustost aux escholles, a ce que le principal du college fut pour gouverner les ceremonies ensemble avec le curé ou le pasteur. Car tous les autres apprennent les ceremonies & obseruations de ce qu'ils voyēt faire aux escholliers sans que ils y ayent este instituez ni enseignez. Ainsi le commun populaire suit bien tost tout ce que les escholliers chantent ou prient au temple, ou en quelque lieu ou en quelque façon que ce soit. Et tout ce qu'ils chantent en conduisant vn corps les autres aussi apprennēt bien tost ceste forme de chanter, quand ils se mettent a genoux, ou quād ils ioignent les mains, & quand le maître de l'escholle fait signe de son baston lors qu'on chante, Et il a este fait homme. Le populaire imite ces contenance & signes quand ostant le bonnet & se mettant a genoux, il dit ce mot Iesus Christ. Brief le peuple imite toutes telles contenance ou acoustumances, qui appartiennent a la discipline, encore qu'il n'y ait

point eu d'admonition publique, mais seulement il a
ra este esmeu par tels exemples. Toutefois toutes les
obseruations & ceremonies mesme sous la Papaute su-
perstitieuse ont este tirees des tēples & escholles: sinon
q depuis, de ceste belle pedagogie le Pape en a fait vne
cruelle boucherie & bourrellerie touchāt les viādes, les
iufnes, les iours de feste, & autres choses semblables.
Neantmoins il est yci besoing de tenir quelque mesu-
re, de peur que les fardeaux des ordonnances, traditiōs,
ceremonies, ne croissent sans fin.

Or sur tout il se faut biē garder q les esprits des sim-
ples & rudes ne soyēt saisis d'une telle persuasiō, cōme
si ces obseruatiōs estoyēt necessaires a salut: mais q seu-
lemēt on pense qu'elles sont viles pour la discipline &
pour garder bon ordre en l'Eglise. Au demeurāt qu'on
les peut chāger a toutes heures & momēs, & nō poīt les
estimer pour loix & ordōnāces perpetuelles & inuiola-
bles, cōme ceste grāde beste de Pape fait, ou q par quel-
que menace tyrānique on puisse faire q telles traditiōs
doyēt estre mises par escrit dedans des liures. Car ces
choses externes sont corporelles & subiettes a mutatiō.

Ainsi auiourd'huy de nostre temps nous auriōs des
causes & raisons assez suffisantes, pour lesquelles on
deut tenir & faire assembler vn Concile. Car nous au-
tres pources malostrus, miserables, foibles en foy, & las-
ches Chrestiens, nous auions, (il y a long temps) bon-
ne occasiō d'accuser le Pape avec ses flagorneux a cau-
se de l'article de saint Pierre, duquel nous auons fait
mention ci dessus: ascavoir, que c'est tenter Dieu, quād
on charge les pources fideles de fardeaux importables,
lesquels ne nous ne nos Peres n'auons peu porter: &
sur tous le Pape & ses gens ne les ont pas voulu seule-
ment remuer du petit doigt. Il y a cela toutefois, que
saint Pierre parle de la Loy de Moysē, q est ordōnee
& cōmādee de Dieu immediatemēt. Mais ceste lourde
beste de Pape nō a chargez de fardeaux villāis, & char-
ges ordes & puātes: & ne s'en a gueres fallu, que de la
sainte

saincte Eglise de Dieu il n'en ait fait son retrait & son fumier. Et tout ce qu'il a mis hors tant par le bas q̄ par le haut, il nous l'a fallu adorer cōme vn parfum sacré & comme vne diuinite celeste. Outreplus il n'a point seulement mis au feu & bruslé vne Eglise ou deux, cōme a fait Arrius & ses semblables : mais il a bruslé & reduit en cendres toute l'Eglise de Dieu, & toute a la fois, a ceste fin qu'il renuerlast du tout & abolist (entāt qu'en luy estoit) le vray & ancien article de la foy, lequel saint Pierre traite. Car ce monstre impudēt reiette comme vne heresie cest article, que nous sommes seulement par la grace de Iesus Christ, comme toute l'Eglise depuis le commencement du monde, tous les Ptriarches, Rois & Prophetes, & tous les fideles ont este sauuez par ce seul moyen : & desia dés le commēcement a foudroyé de plus en plus & souuentefois contre cest article, & encore ne cesse de debattre furieusement a l'encontre.

Or sur ceci nous appellons a haute voix le ciel & la terre, & requerons le Concile a cors & a cri, & implorons l'aide & le cōseil de l'Eglise vniuerselle de Dieu contre ce principal meurtrier & boutefeux de l'Eglise, ce parricide execrable, & ennemi mortel du bien & du salut des Chrestiens, a ce que nous puissions recouurer derechef l'article de saint Pierre.

Mais nous requerons ceci a telle condition, qu'en ce differēt il n'y ait homme qui vueille vsfer de la dialectique de Nestorius ou d'Eutyches, laquelle accorde & confesse bien vne partie, tant y a qu'elle nie la consequence qui est l'autre partie. Nous requerons l'article entier pleinement & purement, tel qu'il a este ordonné & dressé premierement par saint Pierre, & déclaré par saint Paul : ascauoir, que les choses qui s'enfuyuent de cest article soyent semblablement cōdamnees : c'est que les charges importables ou impossibles (comme saint Pierre les appelle) soyent reiettees & reprouuees, desquelles saint Augustin dit, que ce sont

charges ou fardeaux innumerables imposez aux Eglises par les Euesques. Or que nous proufitera cela, que la premiere partie nous soit accordee: ascauoir, que les hommes doyuent estre sauuez par la seule grace de Iesus Christ? Et cependant on n'accordera pas la secóde partie qui s'ensuit de la premiere: comme quand sainct Paul dit, Si c'est grace, ce ne sont point merites. Si ce s'ot merites, ce n'est plus grace. Et S. Pierre dit, Si c'est grace, ce n'est point ce fardeau importable. Si c'est ce fardeau importable, il est bié certain que ce n'est point la grace de Christ: ce qui est téter Dieu. Outreplus S. Augustin dit, Côme ainsi soit que le Fils de Dieu voulut charger son Eglise de peu de ceremonies & obseruations, ou plustost la mettre en liberte, il n'a voulu qu'elle fut accablee de charges innumerables des Euesques: en sorte qu'il y a maintenant vne pire condition en l'Eglise, qu'il n'y auoit entre les Iuifs, qui n'estoyét chargez que des loix instituees & ordonnees de Dieu.

Voyla donc nous requerós vne telle dialectique de sainct Pierre, de sainct Paul & de sainct Augustin: qui est la dialectique du sainct Esprit, & laquelle propose & enseigne toute la matiere, & non point a demi a la façon de Nestorius. Autrement il en aduiendroit comme il est escrit d'aucuns rois & Iuifs: ascauoir, qu'ils remettoyét bié au dessus le vray seruice de Dieu, mais n'abolissoyét point les hauts lieux. Ce que le Propheete Elie appelle, Clocher des deux costez. Ainsi vouloyent-ils donner deux dieux a vn peuple, ou pour le moins ils vouloyent mettre vn autre dieu estrange & forgé aupres du grand Dieu vnique & souuerain. Ils se monstroyent bien lourds dialecticiens en cela, quád ils confessoient qu'il y auoit vn seul Dieu digne d'estre adoré: & cependant ils attoient les yeux auuglez pour ne voir point ce qui s'ensuyuoit necessairement: & ne pouuoient endurer ceste consequence, qu'il falloit reietter tous autres dieux, ou n'auoir poit le vray Dieu. Ainsi nous ne voulons qu'en ce Concile q nous
requerons,

requerons, qu'aucun Nestorius y soit admis, qui nous vueille accorder vne chose, & nous oster l'autre. Car par ceste mesme raison nous ne pouuôs pas mesme retenir ce qu'il nous accorde. Car quâd ceci nous est accordé, que la seule grace de Iesus Christ nous sauue, & qu'on ne nous accorde point la consequence quant & quant: ascauoir, que les œuures ne nous iustifient ou ne nous sauuent point: mais veulent garder ceci que les œuures sont necessaires a salut, ou a faire obtenir iustice: alors on nous oste mesme ce qu'on no^u auoit otroyé auparauant: ascauoir, que la seule grace sans les œuures nous rend iustes. Par ce moyen il ne nous demeure riē de reste, & vn erreur est corrigé par vn plus grand erreur.

Je diray maintenant le plus simplement que ie pourray ce que i'en sens, Non seulement le Pape doit abolir au Cōcile la tyrannie des traditions humaines: mais aussi faire ceste resolution ferme avec nous, que les bonnes œuures mesmes encore qu'elles soyent faites selon les commandemens de Dieu, toutesfois n'aident de rien a iustifier, ni a abolir le peché, ni a impreter le benefice de la reconciliation gratuite: mais seulement la foy par Iesus Christ, qui est le Roy de iustice en nous par son sang precieux, par sa mort & resurrection, par laquelle il a aboli le peché, il a satisfait pour iceluy, il a apaisé l'ire de Dieu, & nous a deliurez de la mort, du iugemēt de Dieu, & des enfers. Il doit dōc condamner & brusler toutes ses belles bulles, ses decrets & liures des indulgences, du Purgatoire, de la religion monachale, de l'adoration des saints, des pelerinages & autres mensonges & idolatries infinies, cōme choses du tout repugnantes a l'article de S. Pierre. Il doit aussi rédre toutes les choses qu'il a desrobbees, rauies, pillées, brigandees, & notoirement gastees par vne iniuste violence & oppression, & ostées a tant de royaumes, nations, prouinces, villes, bourgades & villages, & arrachees par force a toutes sortes de gens: &

sur tout sa primaute controuuee faussement doit estre raclee de tous liures, & effacee de tous lieux: de laquelle il se glorifie si hardiment, & la prononce estre si necessaire, que nul ne peut ou esperer ou obtenir le salut eternal, s'il n'est subiet au Pape. Il ne faut admettre cela en façon quelconque. Car le chapeau rouge d'un Cardinal, ou la grâde mitre du Pape n'est point morte pour mes pechez, & cela n'est point appellé Christ. Et tous fideles & Chrestiens qui ont este deuât luy & de son tēps, ont este sanctifiez & sauuez sans ce chapeau.

Il me semble que c'est-ci vne cause assez suffisante, pour laquelle on doyue tenir & celebrer vn Concile authentique, auquel il y ait grande assemblée, & auquel les choses soyent traittees a bon escaiant, & non point par mocquerie. Les Monarques de la terre, les Rois & Empereurs sy deuoyent employer d'un bon cœur, & contraindre le Pape de le faire, s'il ne le vouloit de son bon gre, cōme les Empereurs l'ont fait par ci deuant es quatre Conciles generaux.

Or il ne seroit point besoing, que là s'assemblassent tous les Euesques, Prelats, Moynes, Docteurs, & ceste racaille de bellistres & de gens oisifs. Autremēt il aduiendroit, qu'en vn tel Concile la premiere annee seroit toute employee ences vaines & friuoles disputations de leur ioyeux aduenement, du bel ordre, qu'on doit tenir aux sessions, qui sont ceux qui doyuent estre assis aux plus hauts lieux, & qui aux plus bas: item, qui sont ceux qui doyuent marcher les premiers ou les derniers en la procession. La seconde annee seroit employee en pompes inutiles, en banquets sōptueux, en appareils magnifiques, en ioustes & tournois. La troisieme annee seroit employee en noises & riotres legieres vēnantes de dehors, ou aussi en tourmens faits a quelques bons personages: & cependant les frais seroyent si grans qu'on en pourroit bien entretenir vne forte & puissante armee contre le Turc. Mais il faudroit appeller de toutes parts gens bien ex-

ercez & instruits es saintes Escritures, qui auoyent bonne affection & vn saint desir de seruir a la gloire de Dieu, au bien public de la foy catholique & de l'Eglise Chrestienne, au salut des ames & a la tranquillite publique. Il faudroit aussi qu'il y eut entre autres des gens politiques, qui fussent prudens, fideles & de bonne conscience: car l'affaire aussi les touche. Et trois cēs hommes en tout pourroyēt bien suffire, qui fussent sages & de bon iugement, propre pour conduire & bien gouverner les affaires salutaires a toutes regions & grandes villes.

Comme le premier Concile, qui estoit assemblé de plusieurs royaumes & prouinces que tiennent auourd'huy, le Turc & nostre Empereur, n'auoit point plus de 318. personnes: & toutefois il y auoit dixsept faux freres, infectez du poison d'Arrius. Il y auoit en l'autre Concile de Constantinoble seulement 150. personnes. Celuy d'Ephese n'en auoit que 200. Mais il y en auoit bien 630. en celuy de Chalcedoine, lequel nombre monte bien quasi autāt que de tous les autres trois: & toutefois ces 630. estoient du tout dissēblables aux Peres qui auoyent assisté au Concile de Nicee.

On ne deuroit proposer temerairement aux Conciles les causes des prouinces, lesquelles sans cela nul ne voudroit ou ne pourroit iuger, ni amasser d'un costé & d'autre les vieux proces ou differens legiers & de nulle importance. Mais il faudroit qu'il y eut là quelque bon Constantin, qui amassast toutes ces riottes en vn faisceau, & les iettast au feu, & commandast qu'il en fut decidé es prouinces & citez: qu'il cōmandast que le fait mesme & le principal poict de la cause fut proposé, a celle fin que tout incontinent on s'enquist de la verite certaine, & que finalement on mit fin a toutes disputes.

Par ce moyen il aduiendroit, que l'heresie du Pape, ou plustost cest horrible & espouuantable amas d'abominations & superstitions seroit leu par parties deuā

tous: & alors on verroit clairemēt, que toutes ces choses sont controuuees orgueilleusement & audacieusement contre l'article de sainct Pierre, & contre l'ancienne, la vraye & catholique foy de l'Eglise, laquelle a receu dēs le commencement cest article de S. Pierre. Toutes ces choses donc ainsi forgees deuroyent estre soudain condamnées par la voix de tous les fideles, & du tout abolies, & iettees hors de l'Eglise. Mais on pourroit dire, Il ne faut point attendre vn tel Concile, ou en imaginer vn tel en ceste vie, veu que par tout il y a de si horribles confusions. Et certes de moy, ie le pense bien ainsi: toutefois voyci quelle est mon opinion, que s'il y auoit quelqu'un qui voulut prudēment traiter de ces affaires, ou requerir a bon esciēt & souhaiter vn Concile: lors il faudroit souhaiter vn Concile tel que nous l'auōs descrit, ou biē il n'en faudroit souhaiter riē du tout, ni en faire aucune mention. Car le premier Cōcile de Nicee a este tel, & celuy de Cōstātinoble semblablement, lesquels exemples sont bien dignes d'estre imitez. Et ie recite ces choses, a celle fin que les Monarques & Princes souuerains, les Rois & Empereurs qui se disent Chrestiens, entendent q̄ cest office leur est donné, & ont ceste autorite de Dieu, de faire assembler le Concile, pour deliurer tant de millions de pources ames, lesquelles le Pape laisse mourir par sa cruaute barbare, & de peur qu'il ha que le Cōcile se tienne, il les fait miserablemēt perir, autant qu'en luy est: au lieu que par vn seul Concile tous pourroyēt derechef retourner a l'article de S. Pierre, & a l'ancienne & vraye foy de l'Eglise. Et cela se fait maintenant, qu'elles vont en damnation eternelle, d'autant qu'elles ne peuuent auoir ceste doctrine de sainct Pierre, veu qu'elles ne veulent rien ouyr du tout de ceste doctrine, ni en rien voir.

Et encore que les autres Princes & Monarques refusassent d'assembler vn Cōcile general ou vniuersel: tant y a que l'Empereur Charles & les Princes d'Allemagne

maigne pourroyent bien publier & celebrer vn Concile national. Il y en auroit aucuns qui penseroient que de cela se leueroit vn schisme: mais qui peut scauoir, si en faisant nostre office, & en cherchant la gloire de Dieu & le salut des ames d'un bon cœur & en verite, Dieu amolliroit & changeroit les cœurs des autres Monarques, a ce qu'eux-mesmes aussi approuuassent petit a petit, & receussent la sentence d'un tel Concile? Car cela ne se peut pas faire tout en vn coup. Et si toute l'Allemagne venoit a recevoir ceste determination ou sentece, lors le bruit paruiendroit aussi iusques aux autres regions, ausquelles il ne pourroit nullemēt paruenir, ou biē ce seroit a grande difficulte, sans vne telle trompette renommee, comme est la voix du Concile, laquelle on peut ouyr de loing.

Mais sil faut du tout desesperer du Concile, remettons le tout au bon plaisir du Iuge iuste, qui est le vray Dieu, viuant & eternal. Cependant nous procurerons, que les petits Conciles & pueriles, c'est a dire les paroisses & les escholles, soyent conseruez, & les assemblees entretenues. Nous donnerons ordre que par tous moyens l'article de saint Pierre sera facilement entendu, debattu & conserue contre tous les articles qui ont este forgez de nouueau, & qui sont a condamner, & contre toutes les nouuelles bonnes œuvres, que les fureurs du Pape ont augmentees, & fait inonder sur toutes les parties du monde, comme vne grande raiue d'eaux desbordees. Cependant ie prendray mon passe-tēps a regarder la pccsiō des petits escholliers, qui marchent en habit d'Euesques, & penseray q Dieu fait de tels Euesques masquez, & qu'il fera des vrais Euesques. Aucontraire, que Dieu estime seulement comme Euesques masquez, & mocqueurs de son Eglise, ceux qui deuoyent maintenant estre vrais Euesques de fait. Cōme Moyse dit Deut. 32, Ils m'ont prouoqué en celuy qui n'estoit point Dieu, & irrité en leurs vanitez. Et moy aussi les prouoqueray en celuy qui n'est

point peuple, & les irriteray en vne gent folle. Car il ne commence pas maintenant a rejetter les Euesques: & de fait il y a vne terrible menasse en Osee, Pourau- tant que tu as repoussi la sciéce, ie te repousseray aus- si, a ce que tu ne me sois point Sacrificateur. Et il en a este ainsi fait, & encore se fait ainsi.

C'est assez parlé des Conciles, Maintenant sur la fin de ce liure nous adiouterons quelque peu d'aduertis- semens necessaires touchant l'Eglise.

L A T R O I S I E S M E partie, qui est de l'Eglise.

LO V T ainsi que nos aduersaires de- bagoulent de grande furie ces gros mots, Peres, Conciles, & toutesfois ne scauent que veulét dire les Peres ne les Conciles, & ne tendent a autre but qu'a nous decevoir, & ne veulét sinó nous esblouir les yeux de quelques figures & notes de lettres: aussi d'une scéblable furie ils desgorge a bouche ouuerte ce mot d'Eglise. Mais quád il faut dire que c'est de l'Eglise, qu'elle est, & ou elle est, ils ne daigneroyét de faire vn tel honneur a Dieu ou a son Eglise de demander ces choses aux autres seulement vne fois, ou d'en penser quelque chose en eux-mesmes. Ils frappét bien des deux mains l'vne contre l'autre, & font leurs grás trióphes de cest hon- neur qu'on leur fait, quád ils oyent que le nom magni- fique de l'Eglise leur est donné, quád on les appelle de ces nós, Pape, Cardinaux, Euesques. Ils ont ceste belle couverture d'vn tiltre si magnifique: tant y a que c'est pour estre organes & instrumens des diables, côme on ne peut dire autre chose de ceste bande enragee & or- gueilleuse, sinon qu'ils sont auteurs de toute insoléce & de forfaits execrables. Mais laissons-la pour ceste heure la diuersité des tesmoignages & la diuisió de ce
mot

mot, Eglise, nous declarerōs simplement la doctrine du Catechisme, ou il est dit, Je croy la sainte Eglise vniuerselle, la communion ou cōmunauté des saints. Là le Symbole declare ouuertement & par parolles expresses que c'est que l'Eglise: ascauoir, la communion des saints, c'est a dire, vne assemblée ou cōgregatiō d'hommes qui sont saints & Chrestiens. Tels sont appelez vne assemblée sainte & Chrestienne.

Au 19. chap. des Actes l'Ecriture appelle l'Eglise v-nion ou congregation, laquelle s'estoit assemblée en la place publique, & dit, Ces choses pourront estre vuidées en l'Eglise ordinaire. Item, Apres qu'il eut ainsi parlé, il renuoya l'Eglise. En ces passages-la & autres, l'Eglise ne signifie autre chose sinon vne cōpagnie assemblée, combien qu'il y eut plusieurs Payens non cōuertis en ceste assemblée-la. Il y a plusieurs nations au monde, & en chacune nation il y a vne Eglise, c'est a dire assemblée: mais les Chrestiens ont ce nom particulier, & non seulement sont nommez Eglise ou congregation, mais aussi Eglise catholique & Chrestienne, laquelle croit en Iesus Christ. Pourtant elle est appelée le peuple Chrestien, qui ha le S. Esprit. Iceluy les sanctifie ordinairement, non seulement par la remission des pechez & offenses, laquelle Iesus Christ a meritee, mais aussi en repurgeant, abolissant & mortifiant le péché. Pour ceste raison les Chrestiens sont appelez peuple saint. Ainsi donc si on dit maintenant, La sainte Eglise Chrestienne, c'est cōme si on disoit, Le peuple Chrestien & saint ou sanctifié, cōme on a accoustumé de dire, La sainte Eglise. D'auantage en l'ancien Testament toute l'Eglise est appelée le peuple saint de Dieu,

Et si en l'instruction des petits enfans nous eussions vsé d'une telle forme, Je croy qu'il y a vn saint & Chrestien peuple de Dieu, on eut peu facilement euité toutes confusions & débats, qui ont este suscitez en l'Eglise a cause de l'obscurité du mot. Car ceste forme de parler, Le saint peuple Chrestien, eut monstré ouuerte-

ment & clairemēt la vraye intelligence & le iugemēt du fait, par lequel la vraye Eglise de Dieu doit estre discernée de la bastarde & contrefaite en hypocrite. Car si quelqu'un eut ouy ces parolles, Le saint peuple Chrestien, il eut peu soudain & facilement iuger q̄ le Pape n'est pas vn peuple, encore beaucoup moins le peuple saint & Chrestien. De ceste façon aussi les Euesques, les chanoynes & les moynes ne sōt point le peuple saint de Dieu, ne le peuple Chrestien. Et la raison est, qu'ils ne croyent point en Iesus Christ, & ne font point d'œuvres saintes : mais ils sont les propres esclaves, organes, instrumens & la possession du diable. Car celuy qui n'embrace point Iesus Christ d'une ferme foy, n'est point Chrestien. Ceux-ci donc ne peuuent estre la sainte & catholique Eglise de Dieu.

Mais pource qu'en nostre forme commune de catechizer ou instruire les petits, nous vsons de ce mot estrange, Eglise, le peuple ignorant imagine tout incōtinent que c'est vn grād tas ou amas de pierres, qui est appellé vn temple. Ou bien quand on veut auoir vne figure fort propre, on peint les Apostres & leurs disciples, & la mere de Iesus Christ, comme en la feste de Pentecoste, & sur toute ceste belle assemblee il y a le saint Esprit comme voltigeant par les nues. Il n'y a pas fort grand incōuenient en cela, sinō que cela n'est que pour vn temps, & represente la sainte Eglise vniuerselle. Mais a proprement parler, l'Eglise doit estre appelée la sainte Eglise catholique, non point seulement celle qui a vescu du temps des Apostres, qui sont morts desia des long tēps: mais aussi celle qui doit durer iusques a la fin du monde. En sorte qu'il ya tousiours & en tous temps en ce monde vne sainte Eglise catholique, en laquelle Iesus Christ est viuant, il monstre ouuertement sa vertu, & y regne par redemption, par grace & la remission des pechez. D'auantage le S. Esprit y œuvre par viuification & sanctification, par mortification ordinaire des pechez, & par vn commencement

temēt de nouuelle obeissance: ascauoir, afin que nous ne perseueriōs point a offenser Dieu: mais afin q̄ puissions cōmencer vne nouuelle vie en bōnes œuures de quelque sorte q̄ ce soit, & nō point en mauuaises œuures, mais telles qu'elles sōt requises de no' par les dix Commandemēs, ou les deux Tables de Moyse. Telle est la doctrine de S. Paul grandemēt necessaire, & qui merite bien d'estre consideree de pres. Mais le Pape & tous ses flagorneurs sous ceste belle couuerture de ce mot d'Eglise, ont peruersement transseré a eux l'un & l'autre: ascauoir, le nom & la peinture de l'Eglise.

Toutefois si nous voulōs declarer ces choses comme il appartient, a ce que le nom s'accorde avec le fait, ils se donnent vn tiltre qui leur est fort conuenable, quand ils s'appellēt l'Eglise Romaine ou sacree. Et cependant ils n'adioustēt point ce mot Catholique, cōme aussi ils ne le peuuent faire, Car si on prend ce mot d'Eglise en sa propre signification, c'est a dire peuple ou assemblée: & eux sont vn peuple. Comme on peut aussi bien dire des Turcs qu'ils sont Eglise, c'est a dire vn peuple. Or l'Eglise Romaine signifie nation Romaine: & eux sont bien tels. Et certes ils romanisent plus que les Payens ne faisoient anciennement, comme Neron & autres semblables.

La sainte Eglise Romaine signifie la nation sainte & sacree Romaine. Et eux sont tels. Car ils ont monstř vn plus beau semblāt de plus grande saintete & dēs long temps, que la saintete Chrestienne ne monstre, ou que celle que la sainte gent Chrestienne ha. Car leur saintete est la saintete Romaine, la saintete de l'Eglise Romaine, de la nation Romaine. Et ils sont dignes d'estre appelez tressaints ou tressacrez: mais c'est en telle signification que Vergile appelle la conuoitise de l'argent sacree, c'est a dire execrable. Et de fait le nom de la saintete Chrestienne leur est si odieux, qu'ils ne le peuuent ouyr nullement, & encore beaucoup moins ce mot Eglise Chrestienne, ou natiō

Chrestienne, ou peuple Chrestien : & non pour autre raison sinon que l'Eglise ou la saintete Chrestienne est vne chose fort, vulgaire ou vſitee en toutes les Eglises & entre tous les Chrestiens qui sont par tout le monde. Pour ceste mesme cause on l'appelle Catholique. Mais eux desdaignent ce mot orgueilleusement comme vn mot vulgaire, & l'estimēt a peu pres comme vne chose de neant : & au lieu de cela, ils ont excoſité vne autre saintete plus singuliere, plus haute & beaucoup meilleure, laquelle doit estre appelée la saintete Romaine, & la saintete de l'Eglise Romaine. Car voyci quelle est la saintete Chrestienne, ou la saintete de l'assemblee ou cōgregation Chrestienne, quād le saint Esprit œuure es hommes par la foy qui est en Iesus Christ, & les sanctifie par foy, Act. 15. C'est a dire, creē vn nouveau cœur, vne ame, vn corps, des operations nouuelles, & escrit les saints Commandemens & ordonnances de Dieu, non point en tables de pierre, mais es cœurs de chair, 2. Cor. 3.

Or ceci soit pour exemple, En la premiere Table ceste saintete fait que nous auōs vne vraye cognoissance de Dieu, a ce que les cœurs illuminez par le S. Esprit resistent a toutes heresies par vne vraye foy, surmontēt toutes opinions pleines de blasphemes, & demeurent purs & fermes en la vertu puissante de la foy contre les diables, & en toute asſurance conferme les esprits en la cognoissance de Dieu, & les retient en la vraye inuocatio d'iceluy. Elle cōsole aussi les cōsciences abbatues & opprimees contre les accusations de la Loy, les menasses horribles de peché, a ce qu'elles ne succōbent du tout, & ne soyēt outre mesure estonnees des cōbats, des tormēs, de la mort, des bānissēmens, du regard de l'ire, & des espouuātemens & frayeurs du iugemēt de Dieu : mais estās redressees & fortifiees par vne certaine esperance de la presence & aide de Dieu, elles s'opposent d'un courage magnanime & constant aux fureurs du diable, & le surmontent. Ainsi aussi elle engendre

engédre au cœur vne vraye crainte de Dieu, vne vraye dilection pleine de bonne efficace, a ce que ne mesprions Dieu, par vne vaine & folle assurance de nous-mesmes, & que ne murmurions & fremissions contre ses iugemens admirables, & ne nous despitons fierement contre ses œuvres : mais que nous soyons prests a receuoir tous euenemens soyent bons ou mauuais, que nous-nous offrons par prieres a Dieu, que nous luy recommandions nos esprits, que nous luy chantions louanges, que nous luy rendions graces, & l'honorions cōme il appartient. Ceci est appellé la nouuelle & sainte vie es puissances de l'ame selō la premiere Table. Ces trois degrez aussi sōt appelez vert^z Theologales : ascauoir, foy, esperāce & charite. Et le S. Esprit q nous fait participās de telles choses par le merite de Christ, engendre & œuvre ces mouuemens en nous. Pourtant il est appellé Sanctificateur ou viuificateur : car le vieil Adā est mortifié, & ne peut pl^{us} faire tout ce qu'il veut. Et certes il faut q la voix de la Loy luy face apprēdre, qu'il n'a plus de pouuoir de faire, & qu'il est mort : autrement il ne scauroit poit telles choses de foy-mesme.

En la seconde Table elle sanctifie les Chrestiens, mesme selon le corps, & fait qu'ils obeissent a leurs parens & aux magistrats de leur bon gre, qu'ils se portēt honnestement & modestement, qu'il fuyent tout couroux, qu'ils n'appetent point vengeance, qu'ils hayent la malice, qu'ils viuēt paisiblement, amiablement, frater nellemēt en toute douceur & humanite, en faisāt plaisir de bō cœur les vns aux autres, qu'ils ne sōt point incestueux, ou adulteres, ne paillards, ne dissol^s, ains chastes & hōnestes avec leurs fēmes, leurs enfans & toute leur famille, ou biē sans fēme, sans enfans & sās famille. Item, elle fait qu'ils ne desrobbent point, qu'ils ne commettent point vsure ni oppression, qu'ils ne sont point auaricieux, qu'ils n'amaissent point des biens & richesses par nouueaux moyens, ains seruent en quelque honneste vocation, ils viuēt sans fraude, ne sans

mauvaise trafique, ils prestent volōtiers, ils font plaisir aux autres de bon cœur, ils les secourent autant qu'ils peuuent. Semblablement ils ne s'adonnent point à mesonges, ils ne trompēt point les autres, ils ne mesdisent point des autres, mais s'estudient à dire verite, ils sont fideles & constans, & si outre toutes ces choses il y a encore quelque chose que Dieu requiert es dix Commandemens, ils le font. C'est le S. Esprit qui fait cela, qui sanctifie & mesme resuscite le corps à vne telle nouvelle vie, iusques à ce que finalement il soit rendu parfait en la vie eternelle. Et ceci est bien appellé la saintete Chrestienne: & aussi il faut qu'il y ait tousiours de tels saints en ceste vie mortelle, voire quand il y en auroit deux ou trois viuans, ou pour le moins qu'ils fussent encore en bas aage. Entre ceux qui sont d'aage de discretio il y en a bie peu de tels à la verite: & ceux qui ne sont point tels, aussi ne se doyuent-ils point reputer Chrestiens. Et qui plus est, on ne leur doit proposer aucune consolation, comme s'ils estoient fideles & Chrestiens, ne faire de longs sermons touchant la remisio gratuite des pechez, & les richesses de la grace, comme font nos contredisans. Car en reiettant la doctrine des dix Commandemens, comme de fait ils ne l'entendent pas, cependant ils font de longues declamations de la grace de Iesus Christ. Tant y a qu'ils cōferment ceux qui demeurent en peché en leurs propos obstiné de pecher, à ce qu'ils ne craignent & n'ayent en horreur leurs offenses & pechez, cōme s'ils estoient tous effacez par la grace du Fils de Dieu. Et eux sont spectateurs de beaucoup de villenies & ordures, & dōnent licence de pecher, promettans impunité, & de perseuerer en forfaits & meschacetez manifestes, sans aucun renouvellement ou correction de la vie precedente. Par cela on peut apperceuoir facilement, qu'ils n'entendent pas bien ne la doctrine de la foy, ne les benefices du Fils de Dieu: & par cela mesme ils ostent tous les benefices d'iceluy: ascauoir, qu'ils ne preschent que de ces

de ces benefices. Car celuy qui ne se soucie point, ou qui ignore les effects du saint Esprit qui sont de la seconde Table, comment pourra-il bien parler des effects du S. Esprit qui sont de la premiere Table: ascauoir, de la vraye consolation, de la grace, de la remission des pechez? Il peut sentir & experimenter en son cœur les effects de la secōde Table: mais quant aux effects de la premiere, il ne les a iamais sentis. Cela dōc est bien certain que tels n'ont point, ou n'entendent point ne Iesus Christ, ne le S. Esprit: & to' leurs beaux & excellēs sermōs ne sont qu'escumes de parolles, qui ne viennent point de plus loing que des leures & de la langue. Et cōme il a este dit, ils sont Nestorius & Eutyches, de nom & de fait, qui confessent & enseignent Iesus Christ en substāce quant a l'antecedēt, & toutesfoi ils le niēt en la cōsequēce & es proprietēz. C'est a dire, ils enseignent Christ aux auditeurs, & nonobstant par leur silence ils couurent & enseuelissent du tout le Fils de Dieu par cela mesme qu'ils veulent enseigner ou prescher de luy.

Or ceci soit assez dit de la saintēte Chrestienne, laquelle le Pape desdaigne orgueilleusement, & demande vne autre saintēte particuliere, qui est plus sainte & plus excellente: ascauoir, les frocs, les capuchōs, les chappes, les testes rases, iours de feste, difference de viādes, difference d'habillemens, iours speciaux, religion monachale, adoration des saints, & autres monstres horribles de traditions touchant les choses externes, temporelles & caduques. Et mesme quand quelqu'un cependant viuroit sans foy, sans esperance, sans dilection, & toutes autres semblables vert' que le S. Esprit engēdre es cœurs des fideles selon la premiere Table: au lieu de toutes ces vert' ceux-ci supposēt vne fausse foy, rēdent les cœurs incertains, engendrēt desdoutes, vn horrible mespris de Dieu, impatience & murmure, contre la bontē & verite de Dieu, fausse fiance des œuvres, & toutes sortes d'idolatries. Item, ils despendent

aux consciences de se fier en la grace de Iesus Christ, & controuuent des merites ou satisfactions a plaisir, pour se racheter de leurs pechez & offenses. D'auantage, ils vendent cheremēt aux autres des œuures de supererogation, & rauissent a eux les richesses & biens du môde par fraudes & tromperies, comme si c'estoit chose fort iuste de rēdre vn tel guerdon pour vne telle marchādisse. Toutes ces choses n'empeschēt point ceste saintete Seraphique ou Cherubique, de laquelle ils se vantent d'vne audace si orgueilleuse, cōme si elle estoit plus sainte que toute la saintete Chrestienne.

Semblablement, en la secōde Table de la Loy rien n'est osté a ceste saintete, mesme quand ils enseignēt que les enfans obeissent a leurs peres, & les subiets a leurs superieurs: & eux sōt meurtriers, parricides cruels, ils denoncent des guerres iniques, ils enflamment les Princes, ils allument des haines mutuelles, & sans cause ils rendent les innocens odieux, ils donnent licence a tous de paillarder sans les punir, & de commettre des incestes, ils forgent des mensonges estranges d'vne fureur horrible, ils desrobbent, ils sont vsuriers, ils oppriment, ils pillent, ils trompent les autres desloyalement. Brief, ils maintiennent toutes sortes de meschancetez d'vne façon orgueilleuse & impudente. Iette seulement vn froc. ou vn habit. de moyne sur ta teste, voyla assez pour sanctifier tes forfaits selon la saintete Romanisq̃ue. Ayant cela, tu peux bien estre sauué sans la saintete Chrestienne. Mais nous n'auons que faire de parler a telles gēs si pollus & souillez, pource que si on se veut meller de les cōuertir, on perdroit sa peine. Car la fureur de Dieu viendra sur eux finalement. Deuison donc ensemble de l'Eglise entre nous. Comme il a este dit, le formulaire des petits enfans qui est le Catechisme, nous monstre ouuerement, qu'en ceste vie presente & mortelle il y a vne gent sainte & Chrestienne, & demeurera iusques a la fin du môde. Car c'est vn article de foy, qui ne peut
cesser,

cesser, iusques a ce que, ce que ceste communauté Chrestienne croit soit du tout accompli, comme nous auons ceste promesse du Fils de Dieu. Je suis avec vous iusques a la fin du monde.

Or qui sont les signes, par lesquels l'entendement troublé ou esgaré doit discerner qui est l'Eglise catholique de Dieu, & ou elle est en ce monde? Car il faut qu'en ce monde visible il y ait vne telle assemblée. Car l'esprit fidele croit, qu'il y aura vne conuersation celeste & vne vie eternelle & bien-heureuse apres ceste vie: mais il n'en a pas encore la pleine fruition. Il faut donc qu'en ceste vie & en ce monde visible il y ait vne telle assemblée, & qu'elle demeure iusques a la fin du monde, pource qu'il est dit au Symbole, Je croy qu'il y aura vne autre vie apres ceste-ci: ascauoir, la vie du siecle a venir. Par lesquelles parolles l'esprit fidele cōfesse, qu'il n'est point de fait encore en ceste vie-là: mais il l'attend en vraye foy & avec certaine esperance, & l'aime d'une vraye affection & zele comme son vray pays & sa vraye vie. Cependant qu'il est en ceste vie, il est subiet a la croix & a beaucoup de fascheries. Ainsi des miseres de la vie presente il est finalement porté a la conuersation celeste & aux ioyes & felicittez eternelles. C'est de ceste matiere si grande qu'il nous faut yci parler.

Or en premier lieu on doit cognoistre & discerner la sainte Eglise vniuerselle de Dieu par ce signe. En quelque lieu que resonne la vraye & pure parolle de l'Euangile, qui parle du Fils de Dieu, qui est le Mediateur, & de toutes les graces & benefices d'iceluy, là est l'Eglise: combien que cela se face en diuerses sortes, comme saint Paul dit. Car il y en a aucuns qui sont du tout sans erreur: puis apres il y en a d'autres, parmi lesquels il y a quelque erreur meslé. Ceux qui n'ont point d'erreur, sont ceux qui edifiēt or, argent & pierres precieuses sur le fondemēt. Ceux qui ont les erreurs, sont ceux qui edifient des esteules, du bois, de la paille sur

le fondemēt. Et toutesfois sont sauuez par le feu. Mais il a este desia parlé de ceci ci dessus bien amplement.

C'est-ci le principal point de la matiere, & le saint des saints, & pour cela l'Eglise catholique est appelée sainte. Car la parolle de Dieu est sainte, & sanctifie toutes les choses qu'il porte: ou pour mieux dire, c'est la saintete elle-mesme, & la maieste de Dieu eternal & inuisible. Rom. 1, C'est la vertu de Dieu en salut a tout croyant. Et 2. Timot. 4, Toutes choses sont sanctifiees par la Parolle & l'oraison. Car le saint Esprit luy-mesme conduit heureusemēt, & oinct ou sanctifie l'Eglise, c'est a dire, le peuple saint, Chrestien & fidele, par la Parolle & oraison, & nō point par l'onction ou le cresseme du Pape, duquel il oinct & consacre les doigts, les ornemens, les calices, & les pierres. Car ces choses sans ame ne seront iamais de telle efficace, que de cela l'esprit puisse bien proufiter en la dilection de Dieu, & en la vraye foy, ou que par cela il soit induit a honorer Dieu, & a bien former sa vie. Ces choses peuuent bien tellement quellement orner ceste masse du corps infirme & puante. Toutesfois a la fin elles se deschirent & pourrissent avec ce saint cresseme & onction sacree, & avec tout cest amas de saintete, & tout ce qu'il y a de tels badinages. Toutes lesquelles choses perissent finalement & se confument avec ceste masse caduque & tant fragile, qui est appelée le corps.

Mais c'est-ci le vray & saint cresseme, duquel Dieu nous oinct en vie eternelle, encore que nous ne puissions obtenir la couronne du Pape, ou vn chapeau de Cardinal, mais que nous fussions contrains de viure & mourir tout nuds comme les petits enfans sont baptizez sans aucun accoustremēt ou ornemēt. Or nous parlons de la Parolle qui resonne par la bouche d'un homme, qui est ordonné pour l'administrer. Car le Fils de Dieu montant au ciel a laissé vne Parolle de vieue voix en terre, comme vne marque ou vn signe exterior,

terieur, par lequel il veut que son Eglise soit reconnue, qui est ce tant bel heritage, tant exquis & sainct & excellent, lequel le Fils de Dieu a choisi pour soy de tout le genre humain.

Outreplus nous enseignons, q̄ ceste Parolle vocale doit estre receue en vraye foy, & quād il aduiēdra que il faudra faire cōfession, il faut confesser ceste Parolle publiquemēt & ouuertemēt deuāt tout le monde. Cōme aussi le Fils de Dieu luy-mesme dit, Qui me cōfessera deuant les hōmes, ie le cōfesseray deuāt mon Pere & ses Anges. Il y en a plusieurs de tels qui sont bien instruits en la doctrine de la foy, & l'entēdent bien : toutesfois ils n'en veulent point faire cōfession publique. Plusieurs oyent l'Euāgile, ils ont la Parolle, mais ils ne l'embrassent point par viue foy, & ne viuēt point selō la parolle. Et c'est pource qu'il y en a biē peu q̄ croyēt vrayemēt a la parolle de Dieu, ou qui vueillēt dresser a icelle toute leur vie & leurs operations, comme a la vraye reigle, cōme il est dit en la parabole de la semēce Matt. 13, que ceste semēce occupera bien les trois parts du chāp: mais il n'y aura que la quatriesme partie qui sera fertile: ascauoir, en ceux qui gardent la Parolle en vn cœur bō & honeste, & rapportēt fruiēt par patiēce.

En quelque part dōc que quelqu'un se trouuera en vne telle cōpagnie, ou la parolle de l'Euāgile est purement annōcee, & la où il y a gens qui apprennent la Parolle, & la reçoüyēt en vraye foy, & en font profession contre les diables & tyrans, & formēt & dressent toute leur vie selon icelle: qu'il scache que là il y a vne vraye Eglise catholique, Eglise du Dieu viuāt & eternal, encore q̄ le nōbre soit bien petit. Car la parolle de Dieu n'esuanouit poīt en l'air, Esa. 55. Mais elle gaigne pour le moins la quatriesme partie du champ, ou vne partie quelle qu'elle soit. Et d'auātage, quād encore on n'aperceuroit autre signe que cestuy-ci seul, ce nonobstāt cela suffiroit pour cōnuaincre les cœurs, q̄ là il y a vne vraye Eglise catholique. Car la parolle de Dieu ne

peut estre hors de l'Eglise, & sans l'Eglise. Côme aussi d'autre part l'Eglise ne peut estre sans la Parolle. Car autremēt y a-il homme qui au ministère voulut prendre la peine ou d'enseigner ou d'ouir les predications, si n'y auoit compagnie ou assemblée? Et qu'est-ce que le peuple de Dieu pourroit ou voudroit croire, si la parole de Dieu n'estoit là presente?

Et c'est-ci ceste bōne partie du champ, laquelle fait des miracles de toutes sortes. Elle redresse & remet en bon estat toutes choses : elle conserue toutes choses, elle jette hors toutes sortes de diables, comme sont les diables des pelerinages, les diables des indulgences, les diables des bulles, les diables des confrairies, les diables des Saints, les diables des Messes, les diables du Purgatoire, les diables des monasteres, les diables des Papistes, les diables des sectes. Item, les diables des seditions, des heretiques, des Papes, des contredifans. Toutefois cela ne se fait point sans grans cris & tourmens, tels que le diable monstre en ce pource homme, duquel il est parlé Marc 1, & 9. Cela ne se fait point sans monstrier signe de douleur, de fremissement & de torment. Comme ceci a este monstrier ouuertement en ces pourceaux, en ces asnes & troncs de bois, Emser, Ecchius, Cocles, Faber, Vuincelius, & autres tels criars. Tous ces vaillans escriuains sont organes, bouches & trompettes des diables : & par tels instrumens le diable fait resonner ses rages horribles & Sataniques, afflige & opprime les pures consciences. Si est-ce toutefois qu'il est finalement contraint de quitter la place : car il ne peut soustenir la vertu & puissance de la parole de Dieu. Car ils confessent bien eux-mesmes, que c'est-ci la verite Diuine & celeste, & que ce sont les propres tesmoignages de la sainte Escriture. Et nonobstant ils disent que ces choses pourroyent estre mieux iugees ou decidees par les Peres & Conciles, lesquels ie laisse là tous. Ce nous est assez de scauoir, comment le vray Dieu & eternal purge, soustient,

nourrit,

nourrit, conferme & maintient l'Eglise, comme saint Augustin dit, L'Eglise est engédrec, entretenue, nourrie & fortifiée par la parole de Dieu. Mais quant a ceux-ci qui ont conceu vne haine mortelle contre la Parolle, & la condamnent furieusement, on les peut facilement cognoistre par leurs propres fruiçts.

Secōdemēt on peut recognoistre & discerner le peuple de Dieu, ou la sainte Eglise catholique par le saint sacrement du Baptême, en quelque lieu qu'il est purement enseigné, creu & administré selon la sainte institution & le cōmandement du Fils de Dieu. Car cela aussi est vn signe manifeste. C'est ce sanctuaire Diuin & digne d'adoration, par lequel le peuple de Dieu est sanctifié. Car c'est ce tressaint lauement de regeneration, fait par le saint Esprit, par lequel le saint Esprit nous oste & laue nos pechez, & nous exēpte de la mort eternelle, & il fait cela par le moyen du precieux sang de cest Agneau tressinnocēt, qui est l'Agneau de Dieu. En quelque lieu donc que ces signes apparoiſſent & sont veus, nous ne deuons point douter qu'il n'y ait là vne vraye Eglise de Dieu sainte & vniuerselle. Et ne vueilles point pour cela donner scrupule a ta conscience, de ce que le Pape ne baptize point, ou bien mesme quand tu ignorerois sa saintete & puissance, comme les enfans qui ne font que naistre, ignorent ces choses, & n'en peuuent rien scauoir, sinon quand ils sont deuenus grans: & apres cela, hélas! on les destourne tout incontinent du vray & legitime vsage du Baptême, comme saint Pierre s'en plaint, 2. Pier. 2. disant, Ils amorſent, par concupiscēces de la chair a dissolutions ceux qui vrayement auoyent euité ceux qui conuersent en erreur, &c. Et qui plus est, on ne doit point mesme demander avec trop grande anxiété qui est le ministre qui administre le Baptême: car ce n'est pas le Baptême du ministre baptizant, & il ne luy est point administré: ains de celuy qui est baptizé, pour l'amour duquel Dieu a institué le sacrement de

224 DES CONCILLES
Baptême, & l'a donné a l'Eglise. Comme la parolle de Dieu n'est pas de celuy qui la presche, sinó entât qu'il l'oit, & la reçoit par foy: ains elle appartient a l'auditeur & au disciple, qui reçoit & embrasse par foy ceste doctrine sainte, laquelle il oit.

Tiercemét on peut recognoistre & discerner le peuple de Dieu ou la sainte Eglise Catholique par le saint Sacrement de la Cene de nostre Seigneur, quâd on en vse, quâd on la croit, quâd on la reçoit puremēt selô l'institution de Iesus Christ. Car c'est vn signe & seau trescertain & manifeste, lequel le Fils de Dieu a laissé a son Eglise, voulât mōter a son Pere, par lequel l'Eglise est sanctifiée, par lequel elle s'exerce, & fait profession manifeste, qu'elle est le saint & esleu heritage de Dieu: comme aussi elle vse a ceste mesme fin de la Parolle & des Sacremēs. Et ne faut point qu'aucun se tourmente yci en sa conscience, encore que le Pape ne dise point de Messe pour luy, & ne le consacre point, luy appliquant la confirmation ou onction, ou ne luy mette sa chasuble sur le dos, &c. Tu peux bien prendre la Cene sans aucun habit ou grand appareil, mais que ce soit avec honnestete & simplicité, comme la discipline externe contrainst les hommes a se porter honnestement.

Il ne faut point aussi que tu demâdes si tu as la teste rase ou nō, ou si tu as este cōsacré du crespme. Et encore dois-tu beaucoup moins disputer si tu es homme ou femme, si tu es ieune ou vieux: comme aussi tu ne t'enquiers point de ceci, quand on te deuoit apporter au Baptême en ta premiere enfance, où bien quand tu veux aller ouyr le sermon. Cela te doit bien suffire, que tu es oinct & consacré de ceste tresnoble onction & de ce tressainct crespme de Dieu, qui est sa Parolle, le Baptême & la sainte Cene. Lors tu es parfumé de bons & precieux vnguens bien fleirans, & richement orné & reuestu d'habits sacerdotaux.

Finalement cela ne te doit nullement fascher, si ce-
luy

luy qui te baille & administre le Sacrement, est plus excellent en dignite ou sainctete que les autres ou non, & s'il a espouse deux femmes ou non. Car ce n'est point que celuy qui administre, puisse dire que le Sacrement soit le sien propre, ains est a celuy qui le reçoit : sinon que le ministre qui administre le Sacrement, y participe aussi, & lors il est aussi du nombre de ceux qui le reçoivent, & selon cest vsage il luy est donné aussi. Toutefois & quantes donc que tu vois que ces Sacremens sont administrez d'une façon legitime, fois resolu en cela, que là il y a vn peuple de Dieu. Car comme il a este dit ci dessus de la parolle vocale, en quelque lieu que la parolle de Dieu est publiee ou annoncee purement & deuëment, là necessairement il y a vne sainte Eglise de Dieu. Semblablement là ou le Baptisme & la sainte Cene sont en leur vray vsage, là aussi il y a Eglise necessairement : & aucōtraire nous pouuons bien dire, que là ou ces choses defaillent, là il n'y a point de peuple ou Eglise de Dieu. Car il n'y a que ceste seule assemblee ou congregation, qui est le peuple de Dieu, qui ait vrayement ces choses si excellentes, qui les administre, qui les exerce, ou qui en vse, ou qui en face profession, voire lors mesme qu'il y a des faux Chrestiens & infideles meslez secretement parmi les bons & fideles. Mais tels ne peuuent profaner ceste sainte & bonne assemblee, veu mesme qu'ils sont secrets. Car l'Eglise du Fils de Dieu ne peut souffrir ceux qui contredisent & rebellent ouuertement : mais elle les reprend & chastie, & apres la reprehension & correction elle les sanctifie mesme, ou bien quand ils ne se veulent point amender, elle les chasse hors par la Parolle & excommunication, a ce qu'ils ne participent au tressacré mystere, & elle les repute comme Payens, Matthieu 18.

Quartement, on peut recognoistre & discerner le peuple de Dieu, ou la sainte Eglise catholique par l'vsage des clefs, desquelles elle vse en ce ministere : asca-

uoir, comme Iesus Christ dit, Matthieu dixhuiet, elle declare que quand quelqu'un d'entre les Chrestiens fait faute, il doit estre redargué par la voix de la Parolle. Et si il n'y a point encore esperance d'amendement, le pecheur doit estre lié, & chassé hors de l'Eglise: mais si il vient a s'amender & corriger sa vie, on le doit absoudre. Voila quelles sont les clefs de l'Eglise.

Or il y a double vsage des clefs, l'vsage particulier & le public. Il y en a aucuns qui ont les consciences si tendres, & tremblent d'une telle façon, qu'auant mesme qu'ils soyent publiquement condamnez, tant y a qu'ils ne peuuent souffrir la consolation d'autrui sinon a grand difficulte, ou bien ils ne se peuuent consoler eux-mesmes, iusques a ce que l'absolutio leur soit particulierement appliquee. Il y en a d'autres aussi, qui sont si rebelles & obstinez, qu'ils ne veulent point descendre en eux-mesmes, ne par quelque conseil que le ministre leur sache donner, ou quelque remonstrance qu'il leur sache faire, ne peuuent estre induits a pardonner les offenses des autres, ou ne se peuuent deporter de faire des meschâcetez toutes notoires. Pour ceste raison il faut que l'vsage des clefs soit conserué en l'Eglise en ces deux façons, particulierement & publiquement. Quand donc on voit que les pechez sont pardonnez ou chastiez en quelques personnes publiquement ou particulierement, il est certain qu'il y a là vn peuple de Dieu. Car il n'y a point d'vsage des clefs, où il n'y a point d'Eglise: & où il n'y a point d'Eglise, là aussi il n'y a nul vsage des clefs. Car la raison pourquoy le Fils de Dieu prenant son dernier congé, a laissé les clefs a son Eglise, c'est afin qu'elles fussent comme vne impression publique, ou come le seau de l'Eglise, par lequel le saint Esprit derechef sanctifie les pources pecheurs qui estoient tōbez, & ce par le benefice de la mort de Iesus Christ. C'est afin aussi que les fideles & Chrestiens fissent protestation par ces mes-

mes

mes signes ou tesmoignages, qu'ils sont le peuple saint, la sainte gent visible, de laquelle Iesus Christ inuisible en ce monde est le chef. Et ceux qui ne se veulent conuertir, ou estre derechef sanctifiez, qu'ils soyent chasses hors de ce saint peuple: c'est a dire, qu'ils soyent liez & reiettez par ces clefs.

Mais encore ne se faut-il pas yci trop tormenter, & s'enquerir avec anxiété des deux clefs du Pape, lesquelles luy-mesme a forgees, a ce qu'elles fussent propres pour crochetter tous les riches thresors & deniers publics de tous les Princes & Rois. Encore que ce grand serrurier ne vueille point lier ou reprendre les pechez tant publics que particuliers, cōme il ne le fait point aussi: toutefois soit resolu en cela, qu'en l'Eglise où tu es, les pechez sont liez ou redarguez. Car quand il lie ou deslie, quand il absout ou condamne, cela ne te peut profaner ne faire saint, veu qu'il n'a point de vraies clefs, ains des clefs bastardes & cōtrefaites. Car les clefs n'appartiennent point au Pape, cōme il ment impudemment en cela: mais elles sont proprement a l'Eglise: ascavoir, a ce peuple, qui est le peuple du Fils de Dieu, le peuple de Dieu, la sainte & catholique Eglise de Dieu, iusques a toutes les estendues de toutes les fins & bouts de la terre, ou en toutes les parts de tout le monde, où il y a des Chrestiens: car il est impossible vraiment que tous les hommes du monde soyent a Rome, sinon que premierement on enferme toute la rondeur de la terre dedans les murs de la ville de Rome, & nul ne peut esperer ni attēdre que iamais cela se face. Comme aussi la parolle de Dieu & les Sacremens du Baptisme & de la sainte Cene n'appartiennent point au Pape, ains a l'Eglise, qui est le peuple de Dieu. Ainsi les clefs sont appellees les clefs de l'Eglise, & non pas du Pape.

5 On peut aussi cognoistre & discerner l'Eglise quand on parle du signe exterieur, en ce que l'Eglise consacre & ordonne les ministres ou les appelle: ou en

ce qu'elle a des preuostez pour se soucier des Pasteurs. Car il faut qu'il y ait des Euesques, qui sont les pasteurs & precheurs, qui soyent dispensateurs de ces biens & en particulier & en general : ascauoir, de la Parolle, du Baptisme, de la Cene & de l'absolution, & les administrent, & s'estudient de les conseruer en continuel vsage, au nom & pour l'amour de l'Eglise, & sur tout a cause de la sainte ordonnance & institution de nostre Seigneur Iesus. Comme saint Paul dit Ephes. 4, Il est monté en haut, donnant des dons aux hommes, les vns Apostres, les autres Euangelistes, Prophetes, Docteurs, Gouverneurs, &c. Car toute la congregation ne peut pas ensemble presider ne gouverner : mais il faut qu'il y ait certaines personnes, a qui le gouvernement de l'Eglise soit baillé. Car sans cela, ie vous prie, quel desordre ou confusion y auroit-il, si tous indifferemment vouloyent crier ou parler haut en l'assemblée? Tous voudroyent que leurs songes & opinions fussent adorez, comme si c'estoyent quelques mysteres ou Scraphiques ou Cherubiques, & nul ne voudroit faire ou quitter la place a son compaignon.

Il faut donc que ceste charge soit donnee a quelqu'un, qui annonce la parolle, qui administre les Sacremens du Baptisme & de la Cene, qui prononce l'absolution aux repentans, Quant aux autres, il faut que ils se deportent de ce ministere : il n'y a que les ministres legitimement appelez & ordonnez, qui doyuent s'employer a faire cest office. Or en quelque lieu que tu verras ces choses, sois certain qu'il y a là vn peuple de Dieu, que là il y a vne sainte, esleue & catholique Eglise de Dieu.

Or toutesfois cela est vray, qu'en cest endroit le saint Esprit parle avec exception, des enfans, des ieunes garçons, enfans & autres, qui ne sont point capables ou idoines : & veut qu'on eslise seulement des personnes idoines, sinon quand quelque necessite soudaine

daine suruient quelquefois. Comme ces choses se lisent par tout es epistres de saint Paul, 1. Timothee 3, L'Euesque doit estre irreprehensible, honneste, mari d'une seule femme, &c. Et 1. Corinth. quatorziesme, Que la femme n'enseigne point en l'assemblee. En somme, le ministre de l'Eglise doit estre vne personne choisie par l'election des fideles, lequel soit doué d'une doctrine singuliere, & d'un bon scauoir. Les enfans, les femmes & autres semblables, ne sont point propres a cela, encore qu'ils soyent idoines a ouyr la parolle de Dieu, a receuoir l'absolution, le Baptisme & la sainte Cene. Au demeurant, ils sont membres vifs & esleus de l'Eglise, comme saint Pierre dit. Or la nature mesme & la sagesse de la creation nous admoneste de ces differences, qu'il ne faut donner la charge du gouuernement aux femmes a cause de l'infirmité & fragilité du sexe, encore moins aux petits enfans & ceux qui ont faute d'esprit : comme aussi l'experience en rend bon tesmoignage. Et Moysé dit, Genese 3, que la femme doit estre subiette au mari. Et l'Euangile n'abolit point ni oste le droit naturel, ains il le ratifie comme vne bonne ordonnance & sainte institution de Dieu.

Mais monsieur le Pape abbayeray ci contre moy furieusement par ses mastins & clabauds, qui desgorgeront orgueilleusement ces parolles, Saint Paul ne parle pas seulement des pasteurs & prescheurs : mais aussi des Apostres, Euangelistes, Prophetes, & autres personnes spirituelles haut esleues & eminentes. Il faut donc necessairement, qu'il y ait des degrez haut eminens en l'Eglise, & plus esleuez que ne sont les pasteurs & prescheurs. De quel costé te tourneras-tu maintenant, Luther? Ou en es-tu? De ce costé, quand ils seront deuenus Apostres, Euangelistes, Prophetes, ou quand ils m'en auront monstré quelqu'un. Mais comment est-ce que ie refuse ainsi? Si de toute ceste grande multitude ils m'en montrent vn seul,

qui puisse estre comparé a vn petit eschollier de la plus basse leçon de quelque college, où il y aura des gens scauans, ou qui ait aussi bien proufité en la somme de la doctrine Chrestienne, en la lecture des saintes Escritures, qu'aura fait vne fillette de sept ans: ie leur donneray gagné volontiers. Or ie scay bien, que vn Apostre, ou Euangeliste, ou Prophete est beaucoup plus scauant qu'vne fillette de sept ans (ie parle de la sainte Escriture & des symboles) sinon que ceux-ci sont plus scauans es traditions humaines, & en ruses & finesse: ce que ie croy fort bien, & le fait me contraint a le croire. Parquoy tout ainsi qu'ils ne sont point l'Eglise, aussi sont-ils beaucoup moins Apostres, Euangelistes ou Prophetes: car les vrais Apostres, Euangelistes & Prophetes preschent la parolle de Dieu, & non point contre icelle.

Or puis qu'il n'y a plus d'Apostres ni Euangelistes, ne Prophetes, il faut que d'autres soyent mis maintenant en leur place, & que ci apres d'autres y soyent mis iusques a la fin du monde. Car l'Eglise durera tousiours iusques a la fin du monde. Il faut donc que les Apostres Euangelistes & Prophetes durent, de quelque nom q'on les doye ou puisse appeller, qui soyent pour proposer assiduellement aux auditeurs la parolle de Dieu & les tesmoignages excellés, ou les miracles produits a cause de la Parolle. Car quant au Pape & ses complices, qui persequutent furieusement & de haine mortelle la parolle de Dieu, veu qu'il faut qu'ils confessent ce qui est vray, ie peus dire hardiment qu'il ne sont rien moins qu'Apostres, Prophetes & Euangelistes: mais ils sont du tout tels que le diable avec les anges. Mais ie suis derechef tombé sur ce bourbier puant du Pape: laissons-les là derechef, & mandons-leur qu'ils ne retournent plus. Que si, &c.

Tout ainsi donc que nous auons dit ci dessus des autres parties de ce ministere tant excellent & du tout Diuin, par lequel la sainte Eglise est sanctifiée, qu'il

ne se faut point curieusement enquerir qui & quels sont ceux-ci, par lesquels ces choses sont receuës: aussi on ne se doit point curieusement enquerir qui & quel est celuy qui les distribue, ou qui exerce cest office & ministere. Car toutes ces choses sont donnees & offer-tes non point a celuy qui les manie, mais a celuy a qui elles sont eslargies par le ministere du ministre: sinon que de son office il se peut quant & quant administrer ces choses, quand bon luy semble. Laisse-le là pour tel qu'il est & pour tel qu'il peut estre, puis qu'il est en of- fice, & qu'il est enduré de la compagnie. Toy aussi ne fay rien de ton affection & fantasie particuliere. La personne du ministre ne peut pas faire la parolle de Dieu ne les Sacremens, elle ne peut les faire plus di- gnes, ne les rendre pires: car ils ne sont point siens, ne les choses qu'il dit ou fait. Mais c'est le Fils de Dieu qui parle, c'est luy qui dône efficace: & le saint Esprit dit & fait toutes choses par iceluy, entant qu'il garde vne certaine & legitime forme d'enseigner & d'admi- nistrer le Baptesme & la sainte Cene. Sinon que l'E- glise ne doit & ne peut endurer les forfaits enormes & manifestes. Mais toy qui es personne priuee, tien toy quoy & paisible, & ne fay rien curieusement, veu que toy seul ne peus estre toute la congregation ou toute la sainte Eglise catholique de Dieu. Mais il ne faut point que tu t'arrestes au Pape, qui defend qu'un ho- me marié puisse estre appelé a ce ministere: mais tous doyuent estre des chastes nonnains, selon la cōsequen- ce de Nestorius. Cela est autant comme si ie disoye, Tous prestres doyuent estre chastes: mais eux-mesmes de la licence du Pape peuuent estre incestueux & So- domites. Mais tu me mettras ce borbier execrable derechef deuant les yeux, & ie te l'auoye desia defen- du. Or sus, dōc comme tu seras le mal venu, ie te feray recueil de mesme, selon la façon de Luther.

Le Pape ha en execration le mariage des Euesques ou des prestres: & on scait assez cela. Combien que ce

soit là vne defense cruelle & tyrannique, si est-ce qu'il ne desgorge pas encore toute sa cholere pour cela: mais il ha encore en beaucoup plus grande execration le second mariage. Pour dire plus ouuertement ce que ie pense, il diuise la digamie (c'est a dire repetit ion de mariage) en quatre sortes, ou plustost en cinq. Or i'appelle yci digame celuy qui apres la mort de sa premiere femme en espouse vne autre en secódes nopces, soit vierge ou vefue. Premièrement celuy est digame, qui espouse deux filles vierges a deux fois. Secondement celuy qui espouse la relaissee ou vefue d'autrui. Tiercement celuy qui espouse vne fiancee, l'espoux de laquelle est mort auant qu'espouser. Le quatriesme est d'une condition aucunemét plus mal-heureuse que les autres, lequel aussi est appellé digame pour ceste raison qu'il a espousé vne fille ne le scachant & ne le voulant, laquelle toutefois il a cognu depuis n'estre point pucelle ou vierge: mais selon le iugement du Pape il est contraint vueille ou non d'estre digame, & beaucoup plus que ce troisieme, qui a espousé vne espouse vierge delaissee par son espoux en fianfaiiles. Le droit Canon reiette tous ceux-ci comme trainans leurs ordures. Et quant a eux, il ne leur est point ottroyé de prescher, d'administrer la Cene du Seigneur, de baptizer, ou d'exercer aucun ministere en l'Eglise, voire quand au demeurant ils seroyent plus excellens & plus saincts que Iehan Baptiste, & quand leurs femmes seroyent plus chastes ou plus pures que la vierge Marie. Tant est excellente & haut eminente la saintete du Pape, & tant bien canonizee en ses Decretales.

Mais quand quelqu'un auroit depucellé cent vierges, ou desbauché cent honnestes vefues, & traineroit a sa queue cent ordes & vilaines putains: cestuy-lanó seulement pourroit estre oinct ou esleu pour estre prescheur ou pasteur: mais aussi on en pourroit faire vn Euesque ou Pape. Et quád il seroit ces choses villaines, lors mesme qu'il seroit en office, toutefois on l'endureroit

reroit. Mais s'il espouse vne fille vierge ou vne femme
vesue, il ne peut estre ministre ou seruiteur de Dieu.
Et quand il seroit au demeurant bon Chrestien, sca-
uant, honneste, & propre & idoine pour bien seruir,
tout cela ne luy proufiteroit de rien. Toute la raison
de ces beaux Decretalistes c'est qu'il est digame. Il le
faut oster de l'office, & qu'il n'y soit iamais admis.
Que vous en semble? Ceste sainctete n'est-elle pas
plus excellēte ou plus digne que celle du Fils de Dieu
mesme, ensemble avec le sainct Esprit & son Eglise?
Iesus Christ ne reiette point ceux qui ont espousé vne
femme, ne ceux qui en ont espousé deux, pourueu
qu'ils ayent la foy: mais il leur permet d'estre vrais &
vifs membres de son Eglise catholique, & se sert d'eux
aux ministeres & seruices de l'Eglise, ausquels ils
sont idoines, ou tels qu'ils ne soyent par dessus leurs
forces. Combien que selon la commune façon de par-
ler de l'Ecriture, digame soit celuy qui a espousé en-
semble deux fēmes viuantes. Tel a este Lamech. Mais
le Pape selon son haut scauoir, appelle digame celuy
qui a espousé deux femmes l'une apres la mort de l'aut-
re. Il prononce aussi telle sentence des femmes: car il
est plus excellent en doctrine & sapience que Dieu
son createur.

Mais ceci est encore le plus ioli de tout. Le Pape
confesse bien luy-mesme, que le mariage d'un digam-
me est legitime, & un tel homme en espousant vne se-
conde femme, ne commet nulle offense contre Dieu,
& ne peche nullement contre aucune ordonnāce tant
Ecclesiastique que ciuile: & il passe encore plus ou-
tre, que ce mariage est un Sacrement de l'Eglise: &
nonobstant il faut qu'un tel soit depose ou reculé de
tout office & ministerē Ecclesiastique, voire ceux qui
sont du troisieme ou quatriesme degre des digames,
qui toutesfois meritoyent bien d'estre appelez mo-
nogames, c'est a dire ceux qui ont espousé vne fille
vierge. Et pourquoy cela? Voyci ce qui defaut, qu'un

tel mariage ne peut estre Sacremēt ou figure de Christ & de l'Eglise. Car Iesus Christ n'ha qu'une seule espouse, qui est l'Eglise: & l'espouse n'ha qu'un seul mari, qui est Iesus Christ: & tous deux demeurent vierges. En ceste comparaisō il y a tant d'absurditez ou sottises, qu'il ne seroit possible les reciter toutes. Et les Canonistes & Decretalistes sont bien dignes d'estre appelez asniers. Car en premier lieu si le mariage doit estre Sacrement de Christ & de l'Eglise, lors il n'y aura point de mariage qui soit Sacrement, sinon de ceux qui s'estans espousez demeureront toutesfoiς vierges en leur mariage. Car Christ & l'Eglise demeurent vierges. Et comment donc cela, que nous ayons des enfans & heritiers? Où se trouuera le mariage institué & approuué de Dieu? Brief, il n'y aura mariage qu'on doye appeller exemple de mariage en tout le genre humain, que de Marie & de Ioseph, & s'il y en a d'autres semblables. Tous les autres mariages ne seront nullement Sacremens: & possible est qu'aucun les vituperera orgueilleusement comme telles societēz qu'on voit estre entre les russiens ou maquereaux.

Secondement ie demande, Qui a iamais enseigné ou ordonné ceci, que nous fussions contraincts d'adiouster foy a ces choses? Voyci qu'ils respondent, Sainct Paul dit au quatriesme chapitre des Ephesiens, que le mari & la femme sont vn grand Sacrement. Sainct Paul adioustē incontinent apres, Cela est vray en Christ & en l'Eglise. Ie vous prie, pourroit-on de ces parolles de sainct Paul tirer aucune raison de Sacrement? comme eux parlent des Sacremens. Il dit que c'est vn grād secret ou mystere, que le mari & la femme soyent vn meisme corps. Puis apres il s'expose soy-me, quand il adioustē, Ie di de Christ & de l'Eglise, non point du mari & de la femme. Sainct Paul veut que Christ & l'Eglise soyent reputez pour vn grand Sacrement ou mystere. Aucontraire ces gentils glo-seurs disent, que le mari & la femme sont vn grand Sacrement.

Sacrement. Pourquoy donc est-ce qu'ils n'estiment rien les mariages legitimes, & mesme les reputent comme ordures, ou pollution & souillure, en laquelle l'homme ne peut bien & saintement seruir a Dieu? Je passeray encore plus outre. Peut-on de ces parolles de saint Paul tirer ce sens, que les mariages des monogames & digames selon saint Paul ne soyent le mari & la femme, ou vn corps? S'ils sont vn mesme corps, pourquoy ne sont-ils aussi Sacremens de Christ & de l'Eglise? Et toutesfois saint Paul parle en general de tous maris & femmes, lesquelles sont faites vn mesme corps, soit qu'elles soyent ou vefues ou en liberte: & il les appelle Sacremens en ceste signification que vous les appelez Sacremens. Dont est-ce donc que vous auez puisé ceste sapience tant spirituelle & tant haute: que vous faites ainsi des differences de mariages, & n'estimez autre espee de mariage pour Sacrement de Christ & de l'Eglise, que celle-ci, quand vn homme espouse vne pucelle ou vierge, & vous reiettez tous autres mariages? Qui vous a baillé autorite ou mandement de corrompre les parolles de saint Paul d'une façon si rusee & malicieuse, pour les faire seruir a vos resueries & songes?

Outreplus selon vostre iugemēt, ces mariages mesmes ne sont point Sacremens. Car les espoux ne donnent point permission a leurs espouses de demeurer vierges: & les vierges ne se marient point a ceste intention de demeurer vierges: car elles pourroyent beaucoup mieux faire cela hors mariage. Mais Dieu a créé & formé les corps feminins a ceste fin qu'ils engendrent, entretiennēt & nourrissent des enfans. En quoy demeure yci le Sacremēt du Fils de Dieu & de l'Eglise, quād tous deux demeurent vierges? Est-ce la vne si belle chose, d'arguer de la figure a l'histoire, ou biē au contraire de l'histoire a la figure? Qui est le maistre ou precepteur q vo'a appris vne telle dialectique? Christ & l'Eglise sont l'espoux & l'espouse, & demeurēt cor-

porellement vierges : il s'ensuit donc que le mari & la femme doyuent demeurer vierges corporellemēt. Itē, Iesus Christ n'a espousé qu'une seule espouse : il s'ensuit dōc que le Chrestien, ou un prestre mesme ne doit avoir qu'une seule espouse vierge: autrement ce ne seroit point Sacrement. Pourquoy donc accordez-vous & affermez, que les mariages mesmes des vefues soyēt Sacremens? veu que cōbien qu'ils puissent estre mariages, toutesfoi ne peuuent estre Sacremēs, d'autant que la fēme n'estoit point vierge. N'estes vous point hors du sens & forcenez, qui ne scauez q̄ c'est a dire, ouy ou nō? Vo^r dites d'un en l'antecedēt, & dites d'autre en la consequēce. Allez, retirez vous d'yci, maistres asniers.

C'est erreur aussi a tiré son origine de là (sinō q̄ ce p̄mier soit venu de cestuy-ci) ascauoir, q̄ les Euesques & Prelats se sōt appelez Espoux de l'Eglise, & ont pēse estre tels. Et destournēt a ce, p̄pos ce q̄ dit S. Paul, q̄ l'Euesque doit estre mari d'une seule fēme: c'est a dire Euesque d'une seule Eglise: comme Iesus Christ n'a qu'une espouse, qui est l'Eglise. Ils ne doyuent dōc poit estre digames. Or sus dōc, le Pape & les Euesques sont bōnes gēs, qui meritēt bien que tous leur baillēt leurs voix pour estre les espoux de l'Eglise. Je croy biē cela, voire si l'Eglise estoit une maquerelle, ou la fille de quelque diable sortāt du profōd d'enfer. Ils pourroyēt biē estre espoux d'une telle pucelle. Les vrais Euesques sōt ministres & seruiteurs de l'espouse de Iesus Christ, & icelle est la royne & dame cōmandāt aux ministres. S. Paul se nomme ministre de l'Eglise: il ne veut point estre espoux, ou maistre par dessus l'espouse. Mais le Fils de Dieu nostre Seigneur Iesus Christ est appellé le vray & seul espoux, a qui l'Eglise est espousee. S. Iehan Baptiste ne dit point, Je suis l'espoux: mais il dit qu'il est ami de l'espoux, & qu'il est abondammēt & puremēt resiouy par les propos & deuix d'iceluy. Car celuy qui ha l'espouse, dit-il, est l'espoux: to^r doyuent ouir les parolles & propos d'iceluy avec ioye & liellē: & c'est bien

bié raisõ q̃ ie luy obeisse cõme seruiteur. Mais cõment ils ont les oreilles dressées a vne sottise si lourde, & a ce badinage si ridicule! Vn Euesque aura quelquefois trois dioceses ou Eueschez: & toutefois il est appellé mari d'une seule femme: & mesme quand il n'a qu'une Euesche seule, tant y a que quelquefois il a cent, deux cens, cinq cens paroisses, ou quelquefois d'avantage: & neantmoins il sera appelle espoux d'une seule Eglise. Le Pape veut estre l'espoux de toutes les Eglises grâ des & petites: & toutefois il est appellé mari d'une seule Eglise. Ceux-ci ne sont point digames, qui tout a la fois ont plusieurs espouses: mais celuy est digame, qui espousera une femme, qui auoit este auparauant espousée. L'esprit humain est facile a-recevoir de tels badinages si sots: & Dieu le permet ainsi, quâd les hommes se reculent de sa Parolle, & quand ils espeluchent plus subtilement toutes choses qu'iceluy ne le-veut.

Mais en quelque part de leurs Decrets ils ont inséré l'opinion de saint Augustin contre saint Hierosme: que celuy qui deuant le Baptisme a espousé une femme, & puis en espouse une autre apres le Baptisme, est digame. Or sus bonnes gens, tirez doncques ceste belle consequence. Encore que saint Augustin ait eu ceste opinion, qu'un tel soit digame (a quoy toutefois l'Escripture ne s'accorde point) s'ensuit-il qu'il veuille que cestuy-ci aussi soit tellement cõdamné, comme s'il ne pouuoit seruir a Dieu, ainsi que vous faites? Et quâd mesme cela s'ensuyuroit, nauez-vous pas vne contradictoire categorique en la ix. Distinction? Commét se fait cela que vous-vous arrestez tant a Acutius en ce qui est toutefois cõtre l'Escripture, & laissez passer cependant tant d'autres chapitres qui sont contraires?

Or ie pèse plustost, que voulez estre faits seigneurs de l'Eglise, a ce que toutes choses que vous dites, soyent receuës pour vraies, & adorees cõme quelques mysteres & oracles. Le mariage sera legitime, il sera Sacrement quâd bõ vous semblera: & quâd vous ne voudrez

point, ce sera vne ordure & vn sacrement merdeux, auquel nul ne pourra honorer ne seruir Dieu.

Quelle raison aurez-vous pour faire accorder ces choses? Le mariage doit seruir a ces deux choses a engendrer des enfans, & a les nourrir: & cependant la femme doit demeurer vierge. Et si cela ne se fait, ce n'est plus Sacrement de Christ & de l'Eglise. Les digames sont sans reprehension, & ont vray mariage & Sacrement quand il vous plaist. Quand il vous semble bon aussi, ce sont hommes damnez, qui doyuent estre separez de tout office Ecclesiastique. Ha, ha, comment le diable vous esblouit les yeux d'une merueilleuse finesse & soudainete! comment deuant vos yeux il se transforme en diuerses figures pour vous tourmenter ou agiter, a ce que mainteniez des resueries si estranges, & des opinions si monstrueuses!

Comment se pourroit faire cela, que la sentence & opinion de saint Augustin fut receuë pour article de foy, veu que luy-mesme ne veut point qu'on recoyue ses propres escrits, ou les escrits de ses predecesseurs pour articles de foy? Encore que les saints Peres eussent eu telle opinion, & qu'ils eussent ainsi enseigné, que le digame soit celuy qui a este dit ci dessus, qu'auons nous a faire de cela? Est-ce a dire que nous deuons auoir vne telle opinion, ou que nous deuons ainsi enseigner? Ne bastissons point de si foibles fondemens pour appuyer nostre foy & l'esperance de nostre salut: ascauoir, sur les dits ou les faits des hommes, qui sont comme de l'esteule, de la paille & du bois. Mais les Canonistes sont des asnes si lourds, ils sont si badaux avec leur idole & Antechrist Romain, qu'ils veulent faire des articles de foy des dits & faits des Peres: & tout au rebours de ce que les Peres mesmes veulent & requierent. Il falloit prouuer par les tesmoignages des saintes Escritures, que tels maris doyuent estre appelez digames ou trigames: alors on pourroit dire ceci estre vray, que tels ne doyuent estre en office Ecclesiastique
selon

selon la doctrine de saint Paul, lequel dit que l'Euesque doit estre mari d'une seule femme. Cela est bien souuēt aduenü aux Peres de coudre ou ioindre vn vieil bord a vne robbe neufue : comme cela se fait fort bien en cest endroit : & c'est vn nouuel habillement, que nul digame ne doit auoir office ou charge en l'Eglise. Mais selon leur iugement & opinion, c'est-ci vn vieil bord, de dire que cestuy-ci ou cestuy-la soit digame : veu q̄ l'Escripture sainte ne pronõce rien de cela : mais selon la sainte Escripture celuy est appellé digame, qui a espousé deux femmes toutes deux a la fois. Et on pèse de saint Paul qu'il auoit vne femme, comme on peut recueillir du 4. des Philipp. & laquelle mourut. Parquoy il falloit qu'il fut digame, & qu'il quittast la charge & son office d'Apostre. Car en la 1. aux Corin. chap. 7. il se met au rang des vefues : tant y a toutefois qu'au 9. il veut auoir vne liberte commune avec Barnabas de mener vne femme. Qui est-ce qui voudroit affermer ceci pour certain que ces pources pescheurs, Pierre, Andre & Iaques, ayent espousé des filles vierges, & non point des femmes vefues, ou espousé deux femmes a deux fois ?

Ces asnes, bourdins & bestes brutes ne peuuent estre si bien touchez de ceste vertu excellēte qui est appelée chastete, comme ont este les saints Peres, lesquels se sont efforcez d'un grand zele de la maintenir & garentir contre toute corruption & ordure : mais ils voudroyent volontiers troubler & du tout opprimer les pources cõsciences, & les mettre en danger. Ce leur est tout vn pourueu qu'ils deffendent leur liure plein de toutes ordures & villenies plusque brutales & barbares. Comme si leur finesse n'eut iamais trompé aucun, ou comme si elle n'eut peu tromper. Autrement ils voyent bien quelle chastete est gardee. Toutefois quand aux autres opinions (& que sont leurs belles doctrines sinon purs songes & resueries, & vaines opinions) si quelque chose ne leur plaist, ils peuuent biē

dire, Il n'est pas tenu de garder cela. Que ne le font-ils yci semblablement? veu qu'autrepart non seulement ils reiettent vn seul des Peres, mais tous ensemble, quand il est question de decider vne cause: comme ceste idole de Rome crie a gorge desployee. Mais ils voudroyent volontiers gouverner les Eglises, non point par vne sagesse certaine & ferme, mais par opinions farouches, & confondre derechef les consciences de tous les hommes, & les rendre vistement incertaines, comme ils ont fait audacieusement par ci deuant. Mais tout ainsi qu'ils reiettent les tesmoignages des Peres ou Docteurs anciens, & les mettent hors de leurs canons: aussi nous de nostre costé raclons & effaçons leur nom de l'Eglise & de l'Escripture sainte. Ils ne se doyuent nullement mesler de nous enseigner les Escriptures saintes, ne de reformer nos Eglises: car il ne leur est point licite, & si ne le peuuent faire. Mais ils se doyuent soucier de leurs chanoyneries & prebendes. Voyla quelle est leur saintete. Et quant a nous-autres pources Theologiens, ils nous ont ietté hors de leurs liures ensemble avec les Peres: & en cela ils nous ont fait fort grand plaisir, & ont vsé enuers nous de fort grande humanite, de quoy nous les remercions de bon cœur. Maintenant ils nous veulent aussi ietter hors de l'Eglise & de l'Escripture: & eux toutefois ne peuuent endurer aucun gouuernement. Ceci est trop dur, & fort difficile a porter, & nous aussi ne pouuons porter les outrages.

Or selō leur belle sagesse, ie pense bien qu'il ne faudroit point qu'un homme espousast vne fille vierge, ou s'il l'espousoit, toutefois il ne pourroit estre prestre ou faire office de prestre apres la mort d'icelle. Car y aura-il homme qui soit si despourueu d'entendement, qui se voulut constituer pleige pour la vierge a l'espoux nouveau, qu'icelle soit vierge pour certain & non pas depucelée? Car il y a grāde difficulte a garder ce qui plaist a plusieurs. Or si depuis il la trouuee violée, comme aussi deuant le fait il n'en pouuoit estre certain:

certain: alors on peut dire qu'il est ord & sale digame, combien que ce ne soit par sa propre faute. Si donc il veut estre certain de recouurer quelque benefice, il ne faudra point mesme qu'il espouse vne fille vierge. Car qui est-ce qui le voudroit assurer quelle fut vierge? Pluſtoſt il faudroit qu'il depucelaſt des filles, qu'il violaſt des veſues, & deſbauchaſt des femmes honneſtes marices, qu'il nourrit & entretint beaucoup de putains, & ſouillaſt ſon corps de toutes ſortes de forſaits & pechez execrables. Tout cela conuient bien a vn bon preſtre: & vn tel reſteur merite bien d'auoir vn bon benefice, & qu'on luy donne la charge de paſtre & conduire beaucoup de milliers de cōſciences. Mais voyci quel eſt le principal poinct & la ſomme de toute la matiere. Le Pape, le diable, & ſon eglise, ſont ennemis du mariage, comme Daniel la predict. Pour ceſte cauſe il pourſuit ainſi furieusement le mariage. Quand il dit que les preſtres ne doyuent point eſtre mariez, c'eſt autant comme ſ'il diſoit, que le mariage eſt vne compagnie inceſtueuſe d'vn homme pollue & d'vne femme pollue, que c'eſt vn peché & ordure condamnee de Dieu. Et combien que quelqueſſois ils diſent comme en paſſant, que le mariage eſt ſainct, & que c'eſt vn ſacrement Diuin: tāt y a touteſſois qu'ils mentent en leurs cœurs peruers comme hypocrites impudens. Car ſ'ils auoyent arreſté ceci a bon eſciant & en verite, que le mariage eſt vne choſe ſaincte ou Diuine, & vn ſacrement, ils ne le deſſendroyent point aux preſtres. Mais pource qu'ils le deſſendent, il ſ'enſuit bien qu'ils l'eſtiment comme vne choſe ſouillee, & comme vne ordure de peché. Comme ils alleguent ceſte ſentence, Soyez purifiez vous qui portez les vaiſſeaux du Seigneur. Ou bien (encore que ie parle a l'auātage de ceux qui ont quelque bonne volonte entre eux) ils ſont lourds Neſtoriens & Eutychiens, veu qu'ils admettēt l'antecedent, & nient & reiettent la conſequence. Vous ſoyez donc

les bien venus messieurs les bestes, venerables Asnes-papes avec vos Canonistes. Mais retournous maintenant a nostre propos.

Ainsi donc comme il a este dit, ne t'enquiers point trop scrupuleusement selon la doctrine des Papistes, qui & quel est celuy qui est en office. Car ces gros asniers n'entendent pas bien que signifient les parolles de saint Paul, ils ne scauent que veut dire ce mot, Sacrement. Il dit, que Christ & l'Eglise est vn grand Sacrement. C'est que Christ & l'Eglise sont vn mesme corps comme le mari & la femme; mais ce mystere est grand, & on le doit apprehender par foy. On ne le peut voir des yeux corporels, ne manier des mains. Pour ceste mesme raison il est appellé Sacrement ou mystere, qui est vne chose occulte, secrette & inuisible. Mais pource que non seulement les premiers mariages de ceux qui n'auoyent iamais este mariez, mais aussi les secóds de ceux qui l'auoyét este, sont vn mesme corps: la raisõ veut que quelque mariage que ce soit, soit vne figure ou vn signe de ce grand Sacrement ou mystere, qui est en Christ le Fils de Dieu & en s^{on} Eglise. S. Paul ne parle point des filles vierges ou des vefues: il parle du mariage, auquel le mari & la fême sont vn mesme corps. Quád d'óc tu vois tels preuosts ou preuostez, ou gouuerneurs ou gouuernemés, saches pour certai qu'il y a là vne Eglise catholique de Dieu. Car l'Eglise ne peut fermement subsister sans tels Euesques, pasteurs, prescheurs ou prestres: & aucontraire eux peuuét estre sans l'Eglise, mais il faut que s'ils veulét viure, qu'ils vivent ensemble, ou qu'ils soyent ruinez ensemble.

6 On peut aussi recognoistre & discerner le peuple de Dieu ou l'Eglise par quelque signe externe: a sca uoir, quád prieres y seront faites publiquement, quád on y rendra graces, quád on y louëra Dieu en cõmun. Car en quelq lieu qu'on voit ou qu'on oit reciter l'oraison Dominicale, ou que les auditeurs y sont accoustumez, a ce que pour le moins ils apprenent a reciter

les mots. Itē, quād on oit chāter les Pſeaumes ou autres ſaincts cantiques ſelon la pure parolle de Dieu ou ſelō la vraye cōfeſſion. Item, quād le Symbole, les dix Cōmandemēs & tout le Catechiſme y ſont ſouuentefſois repetez & publiquemēt: alors on ſe peut bien aſſeurer qu'il y a la vne Eglise ſaincte & catholique. Car l'inuocatiō ou oraifō eſt auſſi ce precieus ſanctuaire, par lequel tous les fideles & toutes choſes ſont ſanctifices, cōme dit S. Paul. Or les Pſeaumes ne ſont auſſi autres choſes ſinō formes de prieres & oraifons, par leſquelles Dieu eſt hōnoré & glorifié, & graces ſont rendues a Dieu pour tant de biens, & tāt de benefices ineſtimables, tant corporels que ſpirituels. Et les Symboles & les dix Cōmandemēs ſōt auſſi parolle de Dieu. Brief, nous pouuons appeller ſainct tout ce parquoy le S. Eſprit ſanctifie le ſainct peuple de Dieu. Mais nous parlons des oraifons & cantiques qu'on puiſſe entendre, & deſquels les eſprits fideles puiſſēt tirer quelque doctrine & cōſolation. Car les grōdemens, & murmures, les repetitiōs de notes, les hurlemēs ou recanemēs des prēſtres, chanoynes, moynes & nōnains ne ſont point oraifons ne louanges de Dieu: car ils n'y entēdent riē, & outre cela ils n'en vouldroyēt point tirer aucū proufit. Mais ils ſont cela par couſtume, comme les aſnes de molin ſont dūits & façōnez a leurs trauaux. ſeulement pour la pāſe. En tout ce qu'ils ſōt il n'y a nul ſouci d'amēdemēt: nul ne pēſe aux benefices & graces du S. Eſprit, ni a la miſericorde & bonne volonte de Dieu.

7 La ſaincte Eglise catholique eſt diſcernee par dehors par le myſtere de la croix: en ſorte que toute la vie des Chreſtiens & fideles n'eſt autre choſe que toutes ſortes de calamitez, perſequutions, oppreſſions, miſeres & faſcheries, leſquelles nous ſōt faites par le diable, le monde, & noſtre propre chair: dedans il y a des triſteſſes, puſillānimitē & eſtonnemens: & dehors il y a des pouretez, meſpris, maladies, debilitē de corps & beaucoup de paſſiōs: & toutes ces choſes ſont afin qu'il

y ait conformité entre ceste assemblée des membres & le Fils de Dieu qui est le chef. Et toute la raison est ceste-ci seule, que l'Eglise soit fermement appuyee sur Christ, qui est la roche immobile, & sur la Parolle d'iceluy, & qu'elle passe hardiment par le milieu des dâgers, & endure constamment les passions pour Iesus Christ: comme il est dit Matthieu 5, Bien-heureux sôt ceux qui endurent perseuution. Il faut qu'il y ait des hommes honnestes, paisibles, attrempez, sobres, bien morigerez, prests de seruir aux magistrats & a tous autres de leurs biens & de leurs personnes, qui ne facent point de tort ni outrage a autrui. Il faut qu'il n'y ait ne peuple ne nation en tout le genre humain, qui soit si subiette a tant de haynes horribles, ne si odieuse a tous les autres: brief, qu'il n'y ait peuple qui soit en plus grande execration & detestation, que le peuple Chrestien, lequel on a en pire reputatiō que les Iuifs, les Payens & les Turcs. Brief, il faut qu'ils soyent esti mez heretiques, les ordures, ballicures & excommunications du mode, & encore s'il y a quelque chose plus detestable en toute la terre: de telle façon que les tyrās mesmes pensent faire seruice, & offrir sacrifice a Dieu, quand ils font pendre, noyer, brusler, trencher la teste, & tormenter en toutes sortes les pources fideles innocens. Et de tout cela non seulement il n'y a homme qui soit esmeu de compassion, mais aussi on leur donne a boire du fiel & de la myrre pour leur breuuage, comme on a fait a nostre Seigneur Iesus quand il estoit pendu au bois. Toutefois (graces a Dieu) ils n'endurent point ces horribles tormens comme adulteres, paillards, larrons, brigans, ou comme gens de meschante vie: mais pource qu'ils ne veulent recognoistre autre Dieu que le Pere de nostre Seigneur Iesus. Or en quelque lieu qu'on apperçoit telles choses, sçachōs qu'il y a là pour certain vne sainte & catholique Eglise de Dieu: cōme il est dit Matth. 5, Vo' serez biē-heureux quand les hommes vous maudirōt, & quād ils

vous reietteront comme vne chose execrable, & ce a cause de moy. Esiouissez-vous & prenez liesse, car vostre salaire est grand es cieux. Car ce sanctuaire du saint Esprit non seulement consacre & sanctifie les hommes en ceste vie mortelle, mais aussi les sauue a perpetuite & selon le corps & selon l'ame.

Cependant que ton esprit ne soit point esmeu des inuentions profanes des Papistes, des reliques & reliquaires des Saints, du bois de la sainte croix? Car ces reliques peuuent aussi bien estre des os morts de quelque charongne puante d'un cheual ou d'un bœuf, que de quelque saint que ce soit. Quant au bois de la sainte croix qu'ils monstrent, ce peut estre aussi bien du bois de quelque gibbet ou fourche que de la sainte croix, & il y a de merueilleuses tromperies & attrapemens cachez là dessous, par lesquels le Pape deçoit les hommes pour attirer argent, & pour les destourner de Iesus Christ. Mais encore que ce fussent vrayes reliques, si est-ce qu'elles n'ont pas la vertu de sanctifier aucun. Mais quand a cause de Iesus Christ les tyrans te condamnent, blasment, maudissent, affligent & oppriment cruellement, voyla qui te sanctifie. Car le vieil homme est mortifié par ce moyen, & proufite en ces vertus grandes & excellentes: ascauoir, en patience, mansuetude, humilite, action de graces & louanges de Dieu. Aussi cela fait qu'au milieu des fascheries l'homme Chrestien est fort, alaigre & vigoureux. Finalement cela est estre sanctifié par le saint Esprit, & estre renouuellé en vie eternelle en Iesus Christ.

En tels vrais exercices de repentance les fideles apprennent a croire, a esperer en Dieu, a se fier en Dieu, a aimer Dieu, comme il est dit au cinquiesme des Romains, Tribulation engendre esperance, &c.

Or ce sont-ci les sept parties principales, par lesquelles le saint Esprit nous sanctifie & viuifie tous les iours en Christ, & ce seló la premiere Table. Nous accomplissons ceste table par ceste sanctification, com-

bien que ce ne soit point en ce degre souuerain, ni en telle perfectiō que le Fils de Dieu a accompli la Loy, lequel a pleinement & tresparfaitement satisfait a la Loy. Cependant cela est vray, que nous aussi proufitōs de bien en mieux & petit a petit en ceste vie mortelle, estans aidez des bienfaits du Fils de Dieu, estans rachetez de nos pechez & offenses, & deliurez de l'ire de Dieu, & cela se continuera iusques a ce que nous serons entierement parfaits en ceste conuersation bienheureuse & eternelle avec Dieu, là où il n'y aura plus nulles offenses ne pechez. Car les esprits fideles iettent leurs yeux en toute leur vie & mesme au dernier assaut sur ce seul & dernier but. Je pourroye aussi dire de ces sept parties que ce sont sept Sacremens ou mysteres. Mais pource que ce mot de Sacrement a este tiré en abus entre les Papistes, combiē qu'il ait vne autre signification selō la phrasede vſitee des saintes Escritures: ie me contente bien de les nommer simplement sept articles de la sanctificatiō Chrestienne, ou sept sanctuaires.

Outre ces sept articles ou poincts principaux encore y a-il plusieurs autres marques ou signes externes, par lesquels on peut discerner la sainte Eglise catholique: aſc auoir, quand le saint Esprit nous sanctifie aussi selon la ſecōde Table: en sorte que par son aide nous honorons nos peres & meres en verite & de bon cœur, les peres & meres aussi de leur part nourrissent leurs enfans & les entretiennent en la crainte de Dieu & en toute hōnestete. Puis nous auons vne bōne affection enuers nos Princes ou superieurs, nous les honorons, nous leur rendons fidele obeissance: & eux aussi aiment leurs subiets, ils les deffendent & maintiennent. D'auantage, nous ne haïssons personne, nous ne nous courrouçōs point, nous ne portons point d'enueie aux autres, nous ne laschons point la bride aux rancūnes, nous ne desirons point de nous venger de nos prochains: mais nous sommes prests a pardonner, & faire plaisir les vns aux autres en ceste societe cōmune
de

de vie. Nous ne sommes point desfreiglez, ne gourmàs, ni yurongnes, ne prodigues, ne lascifs, ne dissolus, ne pōpeux, ni orgueilleux, mais chastes, sobres, modestes, gracieux, doux, humbles & debōnaires. Nous ne com mettons point rapines, brigandages, larrecins ni vsures, nous ne cerchōs point des gaings illicites, nous ne sommes point auaricieux, ains liberaux, bien-faisans, & nous-nous contentons de nostre condition & du bien que nous possedons presentement. Nous ne sommes point faux detracteurs, ne menteurs, ne calomniateurs, ne pariures, ains veritables & cōstans en nos faits & parolles, & tout ce qu'on peut dire de ces cōmandemens : cōme S. Paul explique ces choses par tout amplemēt & selon l'abondāce de son esprit, cōme aussi il fait valloir & amplifie les œuures de la secōde Table. Car il est necessaire que nous ayōs le Decalogue, non seulemēt pour ceste cause que par le Decalogue comme par sentences nous sommes instruits des choses, esquelles il faut que nous rendions obeissance a Dieu: mais aussi afin que par cela nous puissions bien iuger, comment nous sommes approchez pres du but par la conduite du sainct Esprit, & quelle longue distance il y a encore : de peur que nous ne soyons finalemēt surprins de quelque folle asseurance, qui nous enforcele de vaines & friuoles opinions, comme si nous auions fait toutes choses, & si nous-nous estions bien acquitez de nostre deuoir. Plustost faisons que de fois a autre les commencemens de sanctification croissent en nous, que les commencemens de nouveaute viennent en augmētant, iusques a ce que nous soyons faits nouvelles creatures de Dieu en son Fils Iesus Christ.

Or cōbien que ces signes ne se monstrent point estre si certains q̄ ceux desquels nous auōs parlē ci dessus, veu qu'il y a eu aucuns Payēs mesmes, qui ont fait grād cas de tels tant hōnestes exercices, & en cela mesme ont meritē plus grāde louange, & se sont monstrez plus saincts & parfaits q̄ n'ont fait les Chresttiēs: neātq. iij.

de Rome ne peut nullemēt souffrir, & q̄ sōt pleines de grās outrages cōtre mōlieur le venerable vicaire du S. siege apostoliq̄. Dequoy no^r auōs desia parlé ci dessus.

Or le diable voyāt q̄ Dieu auoit edifié & basti pour soy vne Eglise saīcte & exquisite, n'a peu estre en repos iusqu'a ce qu'il eut edifié vne chapelle aupres de ce tēple q̄ fut plus ample & spacieuse q̄ non pas mesme le tēple de Dieu. Il voyoit q̄ Dieu instituoit des ceremonies exterieures, cōme le Baptisme, la Cene, la Parolle, les clefs, & telles autres obseruations, par lesquelles il deut sanctifier son Eglise: & cōme ce maling esprit est tousiours singe de Dieu, & veut ensuyure, & faire toutes choses a l'imitatiō de Dieu, & faire aucunes choses mieux, il a aussi imité les choses externes, cōme si en el les il y auoit aussi vertu de saīctifier: cōme il fait entre les femmes forcieres, empoisonneresses, enchāteresses, diuineresses, & faislās des cōiuratiōs. Là aussi il permet qu'on life & recite l'Euāgile & l'oraison Dominicale, a celle fin qu'il y ait pl^r grāde magnificēce en ce venerable sanctuaire. Aussi a-il permis que les Papes & Papistes ayent beneit & cōsacré l'eau, le sel, les chādelles, les flābeaux & torches, les herbes, les cloches, les images, les babouins & marmosets, les Agnus Dei, les aubes, les chasubles, les estolles, les autels, les testes rases, les doigts, les mains: & y a-il hōme q̄ puisse racōter toutes badinages. Finalement il a voulu que les chaperōs, frocs & habits des moynes fussēt si saīcts, q̄ plusieurs hōmes pchains de la mort ont voulu estre coufus dedās, auant quē d'estre enterrez, ou enseuelis: cōme si par le moyē d'un tel habit ils eussent peu obtenir la vie eternelle. On pourroit bien accorder ceci, q̄ la parolle de Dieu, & quelques formes de cōsecratiōs ou oraisōs fussent recitees sur les creatures, cōme les enfās font quād on se veut mettre a table, ou quād ils se vōt coucher, ou quād ils se leuēt du liēt. Et S. Paul dit. Toute creature de Dieu est bōne, & est saīctifiee par la Parolle & oraison. Car par vne telle cōsecratiō la creature n'acquiert

point de nouuelles forces: car les forces sôt cōfermees par les choses qui sont auparauāt mises en la creature.

Mais le diable cherche biē vn'autre chose. Il veut que par ceste peruerse imitatio la creature acquiere nouelles forces. C'est cōme l'eau par la parolle de Dieu est faite Baptesme, lauemēt de regeneratio a vie eternelle, nettoyāt & ostāt les pechez, & sauuāt l'hōme par la vertu & efficace de la parolle & de l'ordonance Diuine, & non point par sa force propre. Itē, le pain & le vin par ceste mesme vertu & ordōnāce sont faits corps & sang de Christ, les pechez & offenses sont remises par l'absolution selō l'institutio & ordōnance Diuine: sēblablement le diable veut aussi q̄ ses enchātemens ayēt efficace & vertu, & faire qlque chose de nouueau cōtre le cōmun cours & ordre de nature. L'eau beneite, disēt-ils, efface les pechez, elle chasse les esprits familiers des maisons, elle deffend les acouchees cōtre les diables & les phātosmes & les apparitiōs des diables. C'est la belle doctrine du Pape en son droit Canō. Ils disent que le sel coniuř & cōsacrē a semblable vertu. Vn Agnus Dei consacrē par le Pape a plus de puissance que Dieu mesme. Outreplus le son des cloches a vertu de chasser les diables quand les grādes tempestes sont leuces. Le glaiue de saint Antoine blesse les diables. Les herbes beneites naurent les vers qui ont du venin. Il y a quelques consecrations qui guerissent les bœufs & vaches frappees de maladie, elles chassēt les femmes forcieres qui soustrayent le laiēt furtiuement, esteignent le feu pris en quelque maison. Certains caracteres trassez en papier ou parchemin contregardēt les corps qu'ils ne soyent blessez par les ennemis en guerre, & ailleurs aussi gardēt d'estre blesē par le glaiue, d'estre noyē en l'eau, de tōber dedans le feu, & de tomber en la gueule des bestes sauuages dedans les bois.

Encore disent-ils, que la religion monachale, la messe & autres semblables monstres meritent des dons encore beaucoup plus Diuins & excellens, que
le salut

le salut eternal & la vie bié-heureuse. Et qui est l'Homere ou Demosthenes qui fut suffisant pour raconter toutes telles impietez? Et nonobstant il n'y a point eu de danger si leger ou digne d'estre mesprisé, que le diable n'ait fondé quelque Sacrement ou mystre, afin que par vne vaine esperâce d'aide, les hommes fussent allechez a ces profanatiōs horribles & infinies. Pour ce faire il s'est serui de forcieres, deuineresses & enchanteresses & des deuinations, des diseurs de bonne fortune, qui pouuoÿēt deuiner des choses cachees, predire les choses a venir, de descouurir les larrécins & les larrons cachez, & d'enseigner les choses rauies.

Le diable est équipé de beaucoup plus grād nombre de Prophetes, Apostres & Euangelistes que Dieu mesme: & son oratoire est beaucoup plus ample & spacieux, & tient beaucoup plus de gens que tous les tēples, ausquels la vraye & fidele Eglise de Dieu s'assēble. Et ha plus grand nombre de gens qui luy obeissent que Dieu n'ha pas. Et qui plus est, les cœurs des hommes sont plus facilement enclins a embrasser & receuoir les promesses, les Sacremens, les deuinations ou enchantemens du diable, que de cōsentir & s'accorder au Fils de Dieu. Le diable est le grand dieu du monde, & le prince ou recteur des tenebres. Par tels ieux de passe-passe & par tels enchantemens le diable destourne finemēt les esprits des hommes de la foy qui est en nostre Seigneur Iesus. Il amoindrit & obscurcit la Parolle & les Sacremens que le Fils de Dieu a ordonnez pour le bien & proufit de l'Eglise par vne grande bonté & admirable. Cōme si c'estoit le plus court & plus facile, d'oster le pesant fardeau de peché & de l'ire de Dieu, par les sacremens du diable, de deliurer les consciences opprimees de leurs angoisses, des cōbats, des tentations, & des batailles terribles & spirituelles, qui sont incogneuës aux hommes profanes & charnels, de tirer de la mort mesme les hommes plongez en enfer, pour les amener a la contemplation de la beatitude e-

ternelle, de la glorification, de la lumiere & vie bienheureuse & perpetuelle. Plusieurs pésent, di-ie, que ces benefices peuuent estre plus facilement impetrez par les faux Sacremens du diable que par les vrais Sacremens du Fils de Dieu. Car ce bon Seigneur veut sanctifier les esprits des hommes a vie eternelle, & sauuer les ames & les corps de ceux qui croient : & ne veut point que nous demeurions tousiours en doute ou en pechez contre la conscience. Certes il est bien difficile que ces choses soyent entédues de ceux qui ne veulent point estre conuertis, & qui s'abandonnent comme bestes a toutes villenies, amassans pechez sur pechez, & offenses sur offenses. Telle maniere de gens n'ont pas grand besoing de l'efficace & aide du saint Esprit: car leurs entédemens sont preoccupezz de ceste persuasion & peruerse opinion, que sans l'aide du S. Esprit ils peuuent estre plus facilement sauuez par l'eau beneite, par vn Agnus Dei, par bulles & parchemins escripts, par Messes & anniuersaires, par frocs & testes rases des moynes. Il n'ont donc point besoing d'aller chercher autre secours ne refuge.

Or le diable n'a point seulement cherché cela, mais aussi il a tédú a ce but, de s'armer d'vne telle audace & outrecuidance, que par vn sacrilege horrible il effaçast & abolist du milieu de toute l'Eglise tât la Parolle que les Sacremens, pensant ainsi en soy-mesme, Si quelqu'un se met en auant qui ose entreprendre de gaster mon eglise, iuger & reputer mes sacremens pour impietez & profanations horribles, & reprendre la magnificence des euesques, comme si les choses externes ne pouuoient sauuer: voyci aussi que ie feray, ie tacheray que la parolle de Dieu sera aussi mise bas, & q ses Sacremens seront abolis. Car ce sont aussi bien des signes externes: & les Euesques & l'Eglise de Dieu sôt aussi hōmes mortels. Si ce qui est de moy, ne doit rien valloir, ses inuentions & ordonnances doyuent beaucoup moins valloir: veu mesme que mon eglise, mes euesques

euesques & sacremēs sont de grande efficace, & donnent secours soudain aux hommes en ceste vie, en sorte qu'on peut ouuertement & manifestemēt voir, sentir & toucher le secours. Car ie suis tousiours prest, & quād on m'inuoque, ie fay tout incontīnēt sentir l'aide. Mais les Sacremens de Christ ne valent que pour l'aduenir & que pour les choses inuisibles en l'esprit en sorte qu'a grād peine peut-on flairer de loīg & vn biē peu son Eglise & ses Euesques : & le saint Esprit fait seulement semblant d'estre present, comme s'il estoit absent : il permet qu'ils soyēt opprimez de toutes sortes de calamitez, & aupris de mon eglise qu'ils soyent condamnez comme heretiques. Cepēdant mon eglise non seulement se monstre de si pres, qu'elle se manifeste deuāt les yeux de tous, & mesme peut estre touchée a la main : mais aussi on apperçoit tout incontinent les signes & effects de ma presence. Or voyla quelle est ma prerogatiue, & quels proufits ie fay, & que ie scay bien faire.

Autant en est-il aduenu aussi, quand par la grace & grande bonté de Dieu la doctrine commença a estre repurgee, & quand nous cōmençasmes a prescher l'Euangile, que les choses externes ne peuuēt sauuer, d'autant que ce sont creatures nues, corporelles & sans efficace, desquelles le diable se sert bien souuent pour faire valloir ses enchantemens magiques : il y eut alors plusieurs personnages d'autorite & de grand renom, qui tomberent en cest erreur grossier, de penser que le Baptisme cōme vne eau externe, la Parolle comme le son d'un homme, l'Escriture comme vne letre externe escrete d'ancre ou de vermillon, & que le pain pestri & cuit par le boulengier & le vin, n'estoit rien du tout : pource que c'estoyēt choses externes & caduques. Par ce moyē ces cris se leuoyēt entr'eux, L'Esprit, l'Esprit. Il faut que ce soit l'Esprit qui ait efficace. La letre occit : l'Esprit viuifie. En ceste sorte l'an 1525. Thomas Monetari^o disoit de nous-autres Theologies de Vuit

remberg que nous estions enseignez selon la letre, & que luy & ses compagnons estoient enseignez selon l'Esprit.

On peut voir par cela commét le diable s'est armé, comment il s'est fortifié de murailles de fer, afin que si quelqu'un venoit a reprendre sa doctrine des choses externes & Sacremens (qui nonobstant seruiroyent promptement, visiblement & avec efficace) il faudroit quant & quant que les Sacremens externes & les parolles de Christ (qui n'apportent secours & aide que bien tard, ou pour le moins inuisiblement, & si n'ont pas si grande efficace) fussent plustost abolis, & du tout aneantis ensemble avec tous ses Chrestiens.

Ainsi donc la sainte & catholique Eglise de Dieu non seulement ha des Parolles externes, des Sacremens visibles ou ministeres, comme Satan le singe de Dieu en ha de tels & en beaucoup plus grand nombre; mais elle ha ces choses mesmes ordonnees, instituees & commandees de Dieu: de telle façon que Dieu luy-mesme, & non point vn Ange celeste, ou autre creature, veut là besongner avec efficace, il veut ouurer en ces ministeres par la vertu de s^{on} Esprit. Et le Baptisme ne doit estre appellé le Baptisme d'un Ange, ou d'un homme, ou de quelque autre creature, non plus que la Cene, ou la remission des pechez, ou la Parolle, mais la Parolle, le Baptisme, la Cene & la remissi^{on}, de Dieu mesme. Sinon qu'il veut que ces biens tant excellens nous soyent vrayement offerts, a nous poures vermisseaux de terre, pour nous fortifier & consoler: non point par ceste lumiere trespalaire & resplendissante de sa maieste Diuine. Car qui est celuy, qui en ceste vie fragile, & en ceste masse si infirme, pourroit tenir ses yeux arrestez voire vne petite minute de temps pour cōtempler ou regarder ceste maieste infinie? Comme Moyse dit, L'homme ne me verra point & viura. Veu que les Iuifs ne pouuoient d'un œil ferme regarder les soulis de ses pieds au mont de Sina au milieu des tempestes,

pestes, des nuees & esclairs: comment de leurs yeux de chauuesouris, & de leur veuë tant foible voudroyent-ils regarder ce tresclair Soleil & la face resplêdissante de la maïeste Diuine? Mais il veut faire cela par moyës gracieux, moderez & tolerables: & mesme quand le choix nous seroit donné, nous n'en pourrions eslire de plus conuenables ou plus commodés, que quand quelque homme de bien & de vie honneste parle & deuise avec nous d'un cœur pur & fidele, nous baptize, nous presche, nous impose les mains, nous absout de nos offenses, nous administre le pain & le vin pour manger & pour boire.

Qui pourroit detester & desdaigner ces formes tât belles & tant douces, & non plustost se resiouir d'une grande abondance de liesse de l'esprit? Car a la verite ces choses nous sont tournees en cōsolation a nous pour ures ordures & vermisseaux rempans. Et nous voyons là comment la maïeste eternelle, infinie & inuisible de Dieu se iouë benignemēt avec nous, deuise avec nous priuement comme vn pere familial avec ses enfans bien-aimez. Il ne veut point (ce que nōobstār il pourroit faire a bon droit (se porter enuers nous d'une façon maïestueuse & selon la grandeur de sa puissance infinie: tant y a toutesfois que par ces signes externes comme de couuertures il reuest ses œuures admirables & Diuines, & desploye sa force sous iceux, & exerce sa puissance contre les diables & les tyrans. C'est a dire, il pardonne les pechez, il purge les offenses, il destruit la mort, il nous donne de sa pure grace & bonte la iustice & la vie eternelle. Ces biens tant inestimables & de si grande efficace ne se trouuerōt point en la synagogue ni es sacremens du diable. Toute la nature, les herbes, les fueilles des arbres debattent cōtre ceux qui crient d'une façon outrecuidee, Dieu a commandé ces choses: Dieu a institué & ordonné ces choses: Dieu a establi ces choses: il veut assister essentiellement, presentement & en puissance. Mais il nous faut penser &

dire le contraire, Dieu n'a point commandé ni ordonné ces choses: ains les a estroitement defendues, les hommes ont inuété ces choses, ou plustost le finge de Dieu les a orgueilleusement cōtrouuees, & en a finemēt deceu les hommes. Car le diable ne peut riē ouurer ne mettre a fin, sinō q̄ quelquefois il se iouē es choses corporelles ou tēporelles: ou mesme si elles doyēt estre spirituelles, nonobstāt ce ne sont que pures tromperies. Car il ne peut pas remettre la coulpe & la peine eternelle, ne sauuer les hommes a perpetuite. Comme de fait en l'eau beneite il y a des exemples manifestes de lourds mēsonges & de trōperies du diable, & semblablement en la Messe & en la religiō monachale: cōbien que quelquefois il puisse rendre le laiēt a vne vache, que les sorcieres auoyent auparauāt ostē a la vache par leurs empoisonnemens: lesquelles ont accointance au diable, & font alliāce avec luy, & en beaucoup de lieux & pays sont bruslees pour leurs malefices execrables. Ce qui est bien raisonnable, nō point a cause du laiēt qu'elles auoyent ostē furtiuement, mais a cause de ceste villaine iniure & outrage fait au Fils de Dieu, quād elles ratifient par serment horrible ceste alliance diabolique, ensemble avec les sacremens faux, que le diable a forgez audacieusement.

Brief, si Dieu de sa propre voix te commandoit de son haut throne celeste que tu leuasses vn festu ou vne petite paille, ou que tu estreignisses vne plume, & que avec le commandement il y eut ceste promesse adioustee quant & quant, que par vne telle œuvre tu peusses meriter la remission de tous tes pechez, la reconciliation & imputation gratuite, & la vie eternelle & bienheureuse apres ceste vie presente: ne receurois-tu pas cela de bon cœur, d'un esprit alaigre, d'une face ioyeuse, & d'un zele ardent: n'en rendrois-tu pas graces d'une affection seruente? n'embrasserois-tu pas vn tel benefice des deux bras: ne chanterois-tu pas les louanges pour le magnifier iusques au ciel: & pour ceste mesme cause

cause ne garderois-tu pas beaucoup plus songneusement ceste paille ou ce menu festu, ou ceste plume que tous les thresors de ce mode, & ne serois-tu pas esmeu d'un plus grand desir apres cela qu'apres le ciel & la terre? Car quelque abiection ou contemnement qu'il y eut en ce festu ou en ceste plume, si est-ce toutefois qu'il par le moyé de tels menus fatrats tu pourrois acquerir tous biens, & mesme de tels biens, que le ciel ne la terre, ni aucune creature, non pas mesme le plus excellent de tous les Anges, ne t'en pourroit donner de semblables. Pourquoy donc est-ce que nous poures pecheurs homes de neant, sommes si esloordis & si despourueus de bon entendement, que nous n'estimons autant l'eau du Baptisme, le pain & le vin de la Cene, la parolle externe ou vocale du ministre, l'imposition des mains en l'absolution, qui est le signe de la remission des pechez, comme nous estimerions ce festu ou ceste plume? Et toutefois (comme nous scauons & oyons tous les iours es temples) Dieu luy-mesme veut faire sentir sa vertu: il veut que ces elemens, l'eau, la parolle, la main, le pain, le vin soyent siens, par lesquels moyens il te veut sanctifier & sauuer en Iesus Christ, qui nous a merité ces biens par sa passion, par sa mort, & par sa resurrection glorieuse: & a espendu abondamment dedans les cœurs des hommes le saint Esprit de la substance du Pere pour engendrer des mouuemens vifs.

Au contraire si tu allois armé de toutes pieces à S. Iaques, ou si les chartreux, ou cordeliers, ou iacopins te faisoient mourir par exercices austeres & aspres, afin que tu peusses obtenir le salut eternel par ce moyé, lesquels toutefois ne fussent point commandez de Dieu: tout cela certes ne seroit du tout rien, d'autant que Dieu ignore ces choses: mais c'est toy qui les as forgées impudemment avec le diable, comme Sacremens particuliers, ou ordres de prestres. Et encore qu'il te peusses porter le ciel sur tes espaules, & qu'estant chargé d'un tel fardeau tu esperasses pouoir obtenir le salut eternel,

neantmoins tu ne proufiterois de rien en faisant tout cela. Mais celuy qui leueroit vne paille ou vn festu de la terre (si cela estoit cōmandé de Dieu) feroit plus que tu ne ferois, encore que tu peusses porter dix mondes sur ton dos. La raison est: Dieu veut que nous dōnions audiāce, & rendions obeissāce a sa parolle, il veut que nous soyons disciples & auditeurs de sa voix, il veut q nous luy portions reuerence avec humilite, il veut que nous vsions des Sacremēts que luy-mesme a ordōnez, il veut que nous portions hōneur a l'Eglise & aux ministres. Lors ausli de son costé il veut se monstrier Pere bening & clemēt enuers nous, & no' traicter plus doucement ou debonnairemēt, que nous ne scauriōs nous mesmes demāder ou desirer. Car voyci cōment Dieu parle a nous, Je suis ton Dieu: tu n'auras poit des dieux estrāges deuāt moy. Outreplus il dit de son Fils, Escoutez-le, & n'escoutez nul autre. C'est assez parlé de l'Eglise pour maintenāt. On n'en pourroit riē dire d'auātage, sinō qu'on pourroit biē estēdre pl' loing & esclarcir vne chacune partie. Il faut entēdre toutes les autres choses par vn autre moyē: dequoy no' parlerōs vn peu.

Outre ces signes & sanctuaires l'Eglise ha plusieurs obseruatiōs & ceremonies externes, par lesquelles elle n'est nullement sanctifiee ne selon le corps ne selon l'ame: & ne sont point ordōnees ni instituees de Dieu. Mais comme nous auons bien amplement traitté de cecy cy dessus: vne telle apparēce ou mōstre exterieure de l'Eglise est honneste, vtile & bien necessaire: comme quand on fait des iours de feste pour y assembler le peuple a ouir les predications, pour faire oraisons & prieres publiques: il y aura certaines heures ordōnees deuāt disner: il y en aura d'autres apres disner: qu'il y a des temples pour s'assembler, des chaires pour prescher, baptisteres, chandeliers, lampes, & cloches, qu'on vse de longues robes, & autres choses semblables: & tout le proufit lequel on peut recueillir de toutes ces choses, ne s'estend non plus que leur raison ou mesure

mesure porte. Comme aussi le manger & le boire ne seruent de rien d'auantage pour toute la forme de benediction ou action de graces, que les enfans recitent ordinairement a table. Car les hommes profanes & barbares qui se mettent a table comme les porceaux viennent a leur auge, sans prier Dieu & sans le remercier, sont aussi bien nourris & engraissez des viandes, que ceux qui ont bien la crainte de Dieu. Les hommes Chrestiens pourroyent bien estre sanctifiez & demeurer saincts, mesme quand on feroit les sermons en pleines rues sans entrer au tēple, & sans monter en chaire, & quand là les pechez seroyent pardonnez, ou bien quand il n'y auroit point de table dressée, sur laquelle on administrait la Cene, ou quand les petits enfans seroyent baptizez sans baptistere, comme aussi on a acoustumé de faire cela ordinairement pour quelques causes particulieres & necessaires. Mais a cause des enfans & du peuple ignorant, cecy est vne belle chose, & doit estre faite pour entretenir vn bon ordre, a ce qu'ils ayēt vn certain temps, certains lieux, certaines heures limitees, afin qu'vn chacun se puisse preparer & se trouuer en l'assemblee. Comme saint Paul dit, 1. Cor. 14. Que toutes choses se facent honnestement en l'Eglise & par bon ordre. Et nul ne doit se fascher, ne mespriser orgueilleusement vn tel ordre, comme nul homme fidele n'osera pas facilement attenter d'introduire des confusions ou desordres en l'Eglise pour troubler la police & discipline qui y sera. Mais pour l'vtilite commune de toute la congregation vn chacun se doit associer avec les autres, & garder de son bon gre les ceremonies que tous par coustume publique & sainte ont desia receuës par commun consentemēt & accorder, ou pour le moins ne les doit troubler ni empcher. Vn tel trouble ou destourbier seroit contre la charite Chrestienne, & contre les offices & deuoirs communs d'humanite.

Cependant toutefois il faut garder quelque liberte

en ces obseruations & disciplines Ecclesiastiques. Cōme quand pour quelques causes vtils nous ne pouuōs pas prēscher aux heures destinees, ou es iours ordōnez, ou au chœur, ou au grād tēple: on peut biē choisir d'autres heures, ou autres iours, ou vn autre temple: moyēnant qu'on ne face point de cōfution ne trouble: mais si par le conseil des scauans ou des plus sages on aduise qu'il faille changer quelque chose: on doit faire cela par le consentement de toute la multitude. Car toutes ces choses sont du tout externes, du tout subiettes à ce que la raison dictera, selon que les circonstances des temps, ou des lieux, ou des personnes le requierent. Dieu, Iesus Christ & le saint Esprit ne s'arrestent point à ces choses. Il y a bien plus: ils ne s'en foucient non plus que de ce que nous beuuōs & mangeons, non plus que de l'heure de nostre repas, non plus que de la façon de nos habillemens, du lieu où nous habiterons, du temps quand nous-nous marierons, ou du loisir de nostre repos, ou de nostre marcher. Sinon (comme on a veu cy dessus) que nul ne doit de son audace particuliere ordonner rien sans cause, ni empescher la congregation, ou la troubler. Comme au temps des nopces ou des banquets nul ne doit faire cette fascherie à l'espous ou à ses compagnons de vouloir attenter quelque chose nouuelle ou non acoustumee, qui soit discordante du consentement ou de la volonte des autres. Mais tu te dois accommoder à toute la compagnie: pense que si tous les autres sont assis, il faut aussi que tu sois assis, s'ils marchent, s'ils s'arrestent ou se leuent, il faut que tu faces comme eux, il faut que tu boiues & manges de mesme breuuage & viande que les autres. On ne peut pas dresser à chacū vne table a part, ne faire fumer a chacun sa cuisine. Si quelque chose desplaist ou defaut a quelqu'un, qu'il se leue de la table, & qu'il laisse les autres demeurer paisibles chacun en son siege. En ceste sorte on doit icy faire toutes choses paisiblement, en toute modestie & par bon ordre

dre & honnesteté : cependant toutefois il faut qu'il y ait liberté, toutefois & quantes que le temps, la personne, ou autres circonstances requierent que changement se face. Et certes lors la compagnie (selon que la necessité le requiert) reçoit vn tel changement d'vn mesme consentement sans y contredire, veu que pour cela nul Chrestien n'est fait meilleur ou pire, comme il a este dit. Neantmoins pour cela-mesme le Pape a farci & rempli presque tout le monde de gros liures, de bobulaires & gloses : & a conuerti le nom de peché & iustice en vrais laqs des consciences pour les estrangler, en loix, ordonnances & exactions: il en a fait des droits diuins & humains, & des articles de foy: en sorte qu'il merite bien que son gros decret soit derechef jetté au feu. Car il est bien certain que l'Eglise se peut facilement passer de ce Bobulaire, lequel a apporté vn dommage irreparable a la plus grande partie du genre humain: il a enseucli toute la Bible & toutes les saintes Escritures comme dedans vn puant borbier, & a quasi du tout esteint la doctrine Chrestienne. Il y a cecy d'auantage, qu'il a asserui les Legistes avec leurs loix & ordonnances Imperiales: & en ceste sorte il a villeinement foulé aux pieds tant l'Eglise que l'Empereur: & au lieu d'eux il nous a mis en auant des bestes de Canonistes, lesquels ont gouverné l'Eglise par leurs sortes resueries & badinages. Mais cecy est encore plus a deplourer, que laissant les choses les plus saines & meilleures, ils ont ramassé les pires & les plus absurdes, lesquelles tous ceux qui auoyent quelque bonne & sainte affection, ont eues en horreur. Et par force & violence ils ont contreint la pource Eglise a les recevoir & adorer. Car combien que quelque fois quelque bonne chose ait este meslee parmi les escrits confus de ces grosses bestes, comme quelque fois on trouuera de l'or parmi les fientes & ordures: neantmoins on trouuera cela beaucoup mieux couché & beaucoup plus amplement es saintes Escritures, ou

mesme es escrits d'un seul saint Augustin, autāt qu'il est expedient pour l'instruction ou cōsolation de l'Eglise: & aussi es liures des Legistes, entant que touche le gouuernement politique. Car les Legistes mesmes auoyent vne fois deliberé de retrencher comme vn mēbre pourri ce liure yci de tout le reste du corps du droit, & le quitter aux Theologiēs pour le declarer, & en faire leur proufit. Mais il eut beaucoup mieux vallu le ietter au feu, & qu'on en eut fait des cendres, iāçoit qu'il y ait quelques bonnes choses. Car sans cela ce qui est puremēt mauuais ne pourroit pas cōsister sans qu'il y eut quelque bien mēlé parmi. Mais en ce Decret-la il y a tant de maux, que lieu ne peut estre nullemēt donné au bien. Et comme i'ay dit, les choses bonnes sont plus amplement & richemēt expliquees es saintes Escritures, & mesme es liures des Peres & des Legistes. Sinon qu'on vueille que tels liures soyent reseruez en quelques librairies seulement a ceste fin, que là il y ait quelque tesmoignage pour donner a cognoistre, commēt le Pape s'est villemēt abusé avec son detestable cōsistoire, & toute ceste troupe de singes rouges, & tāt de docteurs Ecclesiastiqs. Et de ma part, il se pourroit faire, que ie garderoye cest asnier bobulaire a ceste fin.

Or maintenant faisons comparaison de ces choses desquelles on peut vser en liberte avec les bādelettes, desquelles on enuolope vn petit enfant qu'on porte au temple pour estre baptizé. Il est certain que l'enfant n'est point sanctifié ne baptizé par vne telle bandelette, mais seulemēt par le Baptēme. Et touteffois la raison enseigne, qu'on doit enuolopper ou bāder ce petit corps tendre: & quand la bandelette sera souillee ou deschirree, on luy en doit mettre vne autre. Ainsi l'enfant croist peu a peu avec l'aage, sans que les drapeaux ou bandelettes y aident de quelque chose.

On doit neantmoins tenir ceste mesure, qu'on ne prenne trop de bādelettes ou de drapeaux, de peur que l'enfant ne soit estoufé ou estrāglé. Aussi es ceremonies
Ecclesiasti-

Ecclesiastiques, il faut qu'il y ait quelque mesure gardée, de peur qu'elles ne soyent en la fin cōuerties en fardeaux & laqs de cōsciences. Mais il les faut tellement moderer, que nul ne sente q̄ ce soit vne charge ou fardeau. Cōme en vn bâquet ou appareil de nopces, on ne sent point qu'on y soit greué, quand vn chacun accōmode sa cōtenance & façon de faire à celle des autres.

Quant aux iusnes, i'en feray aussi quelque fois vn liure: ce sera quand i'auray fait mon inuestiue, contre ceste coustume horrible, detestable, abominable, plus que brutale & barbare d'yurongner, gourmander, boire outre mesure, laquelle est trop ordinaire entre les Allemans. Et non seulement il est vtile & bien necessaire que telles choses soyent reprises pour en faire aduertissement, mais aussi cela appartient & sert à la forme du gouuernement politique.

Touchant les escholles, i'en ay parlé cy dessus & ailleurs: & ay fidelement exhorté ceux qui ont la charge d'administrer & gouuerner les affaires ciuils, que sur tout ils s'employent d'un bō cœur & diligēment à ceste charge, à ce qu'hōmes propres, honnestes & craignans Dieu soyent choisis pour seruir aux escholles. Il faut aussi qu'ils ayent scauoir suffisant pour exercer vn tel office. Car cōbien q̄ plusieurs n'estiment pas grādement la peine des maistres d'escholles, quād ils trauaillēt apres la ieunesse pour l'instruire es ars & lāgues, & qu'il semble biē q̄ cela ne soit qu'un exercice mechanique, q̄ serue aucunemēt pour reprimer la saffrete & le desbau chemēt des ieunes: tant y a toute fois qu'à la verite les trauaux & labeurs mesmes meritēt biē d'estre grandemēt estimez. Car si la ieunesse n'est biē instituee & formee es lettres, il aduēdra biē tost apres q̄ les Eglises serōt desolees, & la parolle ne sera point ouye par les temples. Car les escholles sont cōme boutiques du saint Esprit, lesquelles fournissent aux Eglises des personnes idoines, Apostres, Euangelistes, Prophetes, c'est à dire, prescheurs, pasteurs, gouuerneurs Ecclesiastiques.

Il faut outre cela, qu'en tous les autres degrez des gouuernemens, & par tous les estats de l'Empire, il y ait des esprits ingenieux, qui exercent offices diuers, & s'appliquent a diuerses charges. Il est besoing qu'il y ait des gens industrieux en la cour d'un parlement, ou es cours des Rois & Princes, & en la Chancellerie, qui soyent pour les grandes deliberations & consultations d'importance. Il est bien certain que le gouuernement politique ou ciuil est aidé grandement par le moyen de tels personnages.

Outreplus quand le principal d'un college est homme de bien, modeste, & faisant fruit, quand il est diligent & cōtinuel en son office, quand il instruit les enfāns en la parolle de Dieu & en la vraye foy, & leur fait cognoistre q̄ leurs estudes & exercices de ieunesse sont agreables à Dieu, a-ce qu'ils entendent les textes, les hymnes, les Pseaumes, les cātiques, les formes des prieres & oraisōs, desquelles ils vsent, quād il les acoustume & façōne a aimer la discipline: alors cōme i'ay dit, les escholles sont cōme assemblees synodales, & cōme Conciles de ieunes garçōs, lesquels doyuēt estre continuellement conseruez par le moyen & diligence des gouuerneurs: d'autant que leur labeur est beaucoup pl^{us} proufitable que de beaucoup de Conciles generaux.

Pour ceste raison les Empereurs, les Rois & Princes ont fait par cy deuant des choses louables & saintes, en ce qu'ils ont employé si grans frais d'une si grande liberalité & d'un si bon zele a fonder tant de colleges grās & petits, tāt de monasteres ou couuens, tāt d'Eueschez, & le tout a ceste fin de tēdre la main forte aux Eglises, a ce que l'Eglise fut fournie & munie d'un bon nōbre de bōs esprits, lesquels on instruisoit & formoit en toutes sciēces liberales, afin qu'ils fussēt prests toutesfoiſ & quātes & en quelq̄ lieu qu'on les appelleroit.

Depuis quelques ans en ça on a petit a petit du tout mis en oubli ce tressage conseil, & par vne ignorāce & stupidite brutale & incroyable on a cōuertī toutes ces choses

choses en abus horribles. Nos Princes & Seigneurs deuoyent en ce tēps-ci imiter tels exemples. Ils deuoyēt employer les reuenus des monasteres a entretenir des escholles, & a nourrir gēs de bon esprit, & par leur liberalite aider a ceux qui estudient. Or cōbien que ceci soit a craindre que ceux qui viendront apres nous, abusent de ces choses: toutefois il faut que nous donnions ordre a appaiser nos consciences, & que nous facions diligemment & constamment ce qui est de nostre office.

Brief, il faut que les escholles soyent tousiours prochaines des tēples, qu'en icelles il y ait des ieunes gens entretenus, qui bien tost apres puissent exercer l'office de prescheur & pasteur, quand il y aura faute de ministres, & quand ceux qui estoient auparauant en office seront morts. Puis s'il y a quelque honneste citoyen, il est bon que sa maison soit prochaine des escholles, d'autant que de là on peut tirer des enfans de bon esprit, qui seront pour augmenter & orner les escholles. D'auātage cela sera propre, que la maison ou le palais du Prince soit prochain des escholles, lequel est obligé aux citoyens d'auoir soing & de maintenir le gouuernemēt ou la police publique, a ce qu'ils puissent entretenir leurs enfāns en bōne paix, & les enuoyer aux escholles, & que d'autre part on puisse enseigner les bons esprits aux escholles, qui puissent faire proufit a l'Eglise, & estre propres pour exercer la charge & office de pasteur: finalement a ce que les pasteurs puissent aussi bastir des Eglises. & produire des enfans de Dieu, soyent citoyens. ou Princes, ou Empereurs.

Or il faut que Dieu soit souuerain & principal protecteur, pour conseruer ceste assemblée & compagnie

ce a chacune herbe, a chacune fleur & feuille, soit de plantes ou d'arbres. Ainsi au Pseau. 127. le Prophete nomme deux degrez de gouuernemés, qui sôt les plus excellens en ceste vie: ascauoir le gouuernement ciuil, & le gouuernemēt domestique. Car il dit ainsi, Si le Seigneur n'edifie la maisō: si le Seigneur ne garde la cite.

Il met en premier lieu le gouuernement domestique, duquel sortēt des hommes cōme d'un ieu de pris pour estre employez a diuers offices. Le second est le gouuernement des Republiques, qui est pour gouverner des regiōs toutes entieres, des villes, principautez ou dominations. Là sont cōpris toutes sortes de magistrats. La maisō assemble, edifie & bastit: la cite garde, maintient & deffend. Pour le troisieme il y a la maison & cite propre de Dieu. Ceste-ci cōprend persōnes idoines des familles ou du gouuernemēt domestique & de fese & ptectiō du gouuernemēt politiū ou ciuil.

Ce sont-ci les trois Hierarchies ordōnees de Dieu. Et n'est besoing d'en forger d'auantage: car nous n'aurons que trop de fardeaux, charges, labeurs & miseres, & plus qu'il ne seroit de besoing, auāt que no^r puissiōs administrer ces trois estats ou degrets cōme il appartient, a ce que tāt d'empeschemēs ou destourbiens ne no^r rendent languissans: comme de fait le diable nous propose diuers empeschemens deuant les yeux.

Regarde seulement a vn gouuernement moyen de maison ou famille, & quand tu l'auras bien cōsidéré, tu verras quels flots, quelles difficultez d'affaires se presentēt. Là il faudra obeir a peres & meres, ou a des maistres & seigneurs. D'autrepart il faudra nourrir les enfans & toute la famille en la crainte & reuerence de Dieu & toute hōnestete: en sorte que le gouuernemēt domestique apportera assez de fascherie a vn chacun en sō endroit, encore qu'en tout le reste de la vie il ne se fallut employer a chose quelcōque. Puis apres l'ordre de la bourgeoisie, c'est a dire le gouuernemēt ciuil nous est vn fardeau assez pesant, si nous obeissons a nos
superieurs

superieurs d'une bõne volõte: si les magistrats de leur coste portent vne bonne affection a leurs subiets, s'ils gouuernent leurs prouinces & republicques en equite & droiture, & s'ils procurent leur bien & salut en verite de cõeur. Le diable no^e exercera, & fera assez de fascheries, & nous proposera deuãt les yeux assez de difficultez: & ne faut point que nous mesmes attirions les trauaux a nous, lesquels ne sont point necessaires. Vn chacũ sentira cõbien ceste sentẽce de Dieu est veritable, Tu mangeras ton pain en la sueur de ton visage. Item, La terre te produira des chardons & espines. Et certainement il y a assez d'espines & aiguillons tant es familles priuees qu'es Republicques: là il y a beaucoup de choses a faire, & encore beaucoup pl^u a endurer, lesquelles il faut endurer & veindre par grãde prudence.

Puis apres s'ensuit le troisiẽme & dernier gouuernement. Si ce gouuernement est conduit par l'aide du saint Esprit, le Fils de Dieu appelle cela vne charge douce & legiere, & pleine de grande cõsolation. Mais aucontraire si l'Esprit de Dieu n'y besongne point, nõ seulement la charge est pesante, difficile, fascheuse, terrible & triste, mais aussi impossible a porter. Comme saint Paul dit, Rom. 8. Il est impossible a la Loy, &c. Item, La lettre mortifie.

Or maintenant quel besoing sera-il, qu'outre ces trois formes de gouuernemens celestes & Diuins, & outre ces trois droits Diuins, naturels & politiques, accepez & approuuez de Dieu, on y adiuste des enchantemens execrables & horribles tels qu'on les voit en ce diabolique & cõtrouuẽ gouuernement du Pape, lequel veut estre toutes choses, & toutefois il n'est riẽ: mais destourne nos yeux, & retire nos cõeurs de la consideration salutaire de la sãpience de Dieu. laquelle a

excellens benefices. Mais afin que ne les puissions recognoistre, le Pape nous met au deuant vne masque, ou vn froc moisi, & nous bâde les yeux pour n'y voir goutte, & comme si nous auions affaire a des batteleurs, il nous pippe & deçoit comme poures fols & badins, & puis nous expose en mocquerie au diable.

Or nous n'auons plus deliberé d'endurer ces gaudisseries orgueilleuses, & mocqueries picquantes du Pape: mais ayans repris courage, nous luy quitterons hardiment & constamment ceste orde & villeine seruitude, selô la doctrine de S. Pierre, de S. Paul & de S. Augustin, & reietterôs sur sa teste & des siens orgueil leux ce qui est dit au Pse. 2, Rôpons leurs liens, & reiet-tôs leur ioug arriere de nous. Et qui plus est, nous châterons câtiques & louanges d'un cœur ioyeux & d'une face riante, disans avec S. Paul, Si quelqu'un enseigne autrement, voire quand ce seroit vn Ange du ciel, qu'il nous soit en execration. Et nous seruâs des paroles de S. Pierre, nous interroguerons ainsi toute la bande des estafiers du Pape, Pourquoi tentez-vous Dieu, en imposant vn tel ioug? Et aussi en ceste sorte nous voulons auoir a nostre tour la domination, & souueraine iurisdiction contre le Pape: & quand nous l'aurons ietté par terre, & courageusement & vaillamment abbatu, nous foulerons aux pieds le lion & le dragon, & marcherons sur l'aspic & le basilic: comme il est dit au Pseau. 91. Et nous le ferons moyennant l'aide & la grace de la semence beneite de la femme, qui a brisé la teste du serpent, & par vne puissance infinie la rompt & brise encore tous les iours: combien qu'il y ait encore ceci de reste a endurer, que ceste beste orgueilleuse morde nos talons. Louange, gloire & honneur soit eternellement a ceste semence beneite, qui avec le Pere & le saint Esprit est Dieu seul, vray, viuant & eternal. Amen.

FIN.

INDICE

INDICE DES MATIERES contenues en ce liure.

A.

la vie de saint Antoine nullement approuuee.	6.8
les Apostres meritent plus d'autorite que le pape.	55
les Apostres ont impose loy aux gentils,&c.	119
Arrius prestre d'alexandrie.	90.120.126
Articles de la foy sont produits du ciel.	94
Atheistes & epicuriens font la mouë aux princes.	<u>19</u>
S. Augustin a fait plus de proufit q̄ tous les cōciles.	<u>193</u>
S. Augustin deplore l'estat de l'ég ^{lise} .	<u>41.42.46.50.74</u>
L'Autorite des hommes ne doit estre esgale a l'authorite du saint esprit.	<u>48</u>
l'astuce d'Auxentius.	120.122

B.

S. Bernard a fondé 160. monasteres.	<u>38.185</u>
l'eau du Baptisme.	257

C.

plusieurs Ceremonies ne sont instituees de dieu.	<u>258</u>
les Chapeaux & mitres de rome ont pl ^r de force que les portes d'enfer.	<u>2</u>
Chrestiens appelez heretiques ont matiere de se resjouir.	20.21.34
S. Cyprien ne s'accorderoit aux anabaptistes.	<u>77</u>
du son de Cloches.	250
les Clefs du pape.	227
les Colleges a quelle fin sont-ils fondez.	264
Commandement de l'empereur charles.	<u>5.187</u>
Compassion de chartreux.	<u>189</u>
que c'est de Conciles.	195.194
il est impossible qu'il n'y ait Concile.	<u>113</u>
le Concile a puissance de racler nouveaux articles de	<u>de</u>

Concile du pape prodigieux.	18
premier Concile & le plus excellent. 52.57. il maintient la diuinite <u>de</u> christ.	177
Conciles & decrets repugnans.	39
quatre Conciles principaux.	43
le Concile plus excellent.	50
le Cōcile doit tascher que la cause de la foy ne soit reuersee. 201. il n'a puissance de se mesler avec les gouuerneurs politiques.	191
Constantius arrien fils de constantin empereur.	120
Constantin deceu par arrius.	121
vn Cordónier d'alexádie surmōte la vie monach.	183
le Corps & l'ame sont vne mesme personne.	147

D.

Debat entre l'euesque de rome & de cōstantinoble.	134
les Decrets des vrais conciles demeurent immuables.	110.136.261

Determination du concile de nicee.	59
Difference entre les bōnes œuures qu'enseigne luther & les papistes.	163
le Different principal du concile de nicee.	102
la Doctrīne diuine est plus certaine que celle qui est ree des peres.	79

E.

l'Eglise a besoing d'un concile.	27
que c'est de l'Eglise & cōmēt elle est cogneuē.	211.212
l'Eglise d'antioche la premiere eglise.	132
l'Eglise de ierusalem la mere des eglises.	133
l'Eglise ne peut estre sans la parolle de dieu.	222
si l'Eglise perit il faut que iesus christ perisse.	24
Errer & estre heretique n'est vne mesme chose.	82
la saincte Escriptrue reigle de verite.	49
cōmēt le S.Esprit œuvre en ceux q sōt en l'egl.	212.213
Escholles sont bouti ques du sainct esprit.	263
tout Espoir est oste qu'il y ait iamais reformation en l'eglise.	21
les Euangelistes & apostres sont fermes tesmoings.	95
les	

I N D I C E.

les Eueſchez eſtoient eſcholles. 198

l'Eueſque de Rome n'eſt le premier eueſque. 132

les Eueſques de Rome par leurs trafiques ſont plus que
les empereurs conſtantin, &c. 46

Eueſques de rome frappez d'ambition & ignorans. 47

les Eueſques des autres regions ne craignoient l'eueſ-
que de rome. 44

vrais Eueſques & paſteurs ſ'expoſent au dâger de leur
vie. 24

Eueſques ſeruiteurs de l'eglise. 236

Eutyches contraire a neſtorius. 159. 160. 161

Eutyches abbe fut la cauſe du cõc. de calcedoine. 158

F.

Falace d'arrius. 125

contention de la Feſte de paſques. 98

G.

Gregoire nazienzenien. 175

H.

l'Hõme q veut eſtre iſtruit ne peut eſtre Heretique. 93

l'Heretie d'arrius. 93

trois Hierarchies ordonnees de dieu. 266

I.

Iehâ baptiſte ne cõdamne le fait ou eſtat de la guer. 68

Iehan baptiſte au deſert. 67

Impoſſibilite ne ſert point d'excuse. 54

L.

les Loix ne ſont abolies pource quelles ſont meſpri. 56
par la Loy-nous ſommes conſtituez pecheurs. 107

M.

la feſte de Mahomet eſt ſortie d'arrius. 129

Mariage ne peut eſtre ſacrement. 334

S. Martin ſe voulant faire chreſtien quitta leſtat de la
guerre. 69

N.

Nestorius a fait deux personnes de christ.	142.145.154
sentence de Nicolas de lyra.	248
Nourriture de l'eglise.	223

O.

OEuvre du saint esprit.	97
OEuvre du pape & des romanisques.	20
l'efficace de l'Oraison.	243
Ordonnance faite en france de ne se r��dre moyne.	186
Osius euesque, ambassadeur en alexandrie.	91

P.

le Pape a fait des clefs fausses.	88
le Pape appell�� vlisses.	18.19.26.30.31
les Papes ont obtenu grande chose par le moyen de Charlemaigne.	46
Paphnuce resiste aux euesques de son temps qui defendoient le mariage.	72
les Peres n'ont iamais satisfait a la loy.	106
les dits des Peres ne sont oracles.	39
Phocas empereur attribua a boniface preeminence sur tous les euesques.	135
Probus gouverneur donna sentence contre arrius.	125

R.

les Ruissiaux sont guides pour trouuer la fontaine.	39
---	----

S.

les grans Saints ne sentent point qu'ils soyent t��tez.	33
quelle est la Saintete chrestienne.	214
Signe de la vraye eglise.	219.143.242

V.

Valentinien a men�� des moynes en guerre.	185
Vertus theologales.	215
Vsage de clefs.	226